

Tujetsch



Historia dalla scola



Ina documentaziun da
Tarcisi Hendry

Tujetsch

Historia dalla scola

Ina documentaziun da
Tarcisi Hendry

Carnet accompignont per l'exposiziun "Nossa scola" el Museum La Truaisch, Sedrun
Lectorat e correctura Norbert Berther
Ediziun entras il Forum cultural Tujetsch
versiun 02/2013

Cuntegn

1	La scola veglia	5
2	Las midadas	10
3	L'instrucziun	15
4	Las scolas ed ils scolasts da Sedrun	25
5	La scola e scolasts dil vischinadi da Camischolas	51
6	La scola e scolasts da Rueras	59
7	Scola e scolasts per Selva e Tschamut	70
8	Scola e scolasts da Cavorgia	76
9	La scoletta	83
10	Il cussegl da scola	90
11	Ina cronologia dils fatgs da scola	100
12	Conclusiun	101
13	Fontaunas	102
14	Fotografias	102
15	Annexa: Ord ils protocols da vischnaunca da 1871 -	103

1. La scola veglia



La colonisaziun primara dalla val ei succedida el decuros dil 10 ed 11avel tschentaner. In tiern marcant per la val ei l'erecziun dalla baselgia da s.Vigeli entuorn 1200 a Sedrun sco sanctuari dalla val. Cun quella ei era in plevon secasaus ella val, responsabels per la pastoraziun e l'instrucziun dil pievel. Aschia seclamava ei pli baul:

*Nua ch'igl ei ina baselgia ed in plevon
sesanfla era ina scola.*

Plirs concils dalla Baselia catolica han concludiu ch'ei seigi l'obligaziun dils plevons d'instruir ils affons ella pleiv. Oravontut settractava ei d'ina scolaziun ella ducrina cristiana.

Gia duront il 15avel tschentaner vegneva ei erigiu ellas pleivs grondas "caplanias da scola". La pleiv da Tujetsch ha era gia baul retschert in gidonter pil plevon che veva l'obligaziun da dar scola a Sedrun. Pli exacta informaziun dat il document dalla visitaziun episcopala digl onn 1643.

Denter las obligaziuns dil plevon vegn era nudau sut nr. 5:

*Ei vegn punctuau ch'il plevon stetti avon e detti scola
ed hagi la lubientscha da retrer persuerter, sco ei
plai ad el, per affon e per meins treis bazs e sch'ei*

*schabegiass ch'in affon u l'auter frequentass inaga mo 3 - 4 dis la scola en in meins, sch'eis
ei lubiu al plevon da retrer la taxa sco per in entir meins.*

(Urbari dalla pleiv da Tujetsch.)

Il document suddastreha l'existenza d'ina scola gia ditg avon 1643 e d'ina instrucziun buca mo en ducrina. Il basegns d'ina persuna che sededicheschi principialmein alla scola, vegn pli e pli urgents. El decuros dil 17avel tschentaner survegn il plevon dalla val caplons ni primissaris. La caplania da Rueras pren sia entschatta cugl onn 1645 e per Sedrun vegn igl'empre caplon numnaus 1666. La caplania da Sedrun vegn erigida cun lubientscha digl uestg da Cuera per igl onn 1749 sco "in'atgna caplania da scola". Denter sias obligaziuns descrettas manedlamein secloma ei:

*Il caplon sto u el sez dar scola, u mirar per in um adattau che sappi far quei; persuerter
dueigi el u siu substitut obtener empau lenna dapli ch'ils vischins ston ira per tut, pinar, far
ora e cavegliar.*

(Recensentur dem Actus quos Dns. Capellanus Aethuatiensis ex obligatione obire tenebitur . . . 11) Debet se Juventuti instruendae graebere Magistratum attenta conditione, si ligna ad usum suum necessaria ab incolis convicinis in Silviis caedantur, atque conducta diffindantur apte ad combustionem. Sine ullo incomodo sive sumptu" Copiau da treis fegls pupi vegl, tagliai ord igl urbari vegl da Sedrun, probabel cun p. 128-131, che sesanflan ussa egl archiv episcopal a Cuera, senza datum. – Tenor pader Baseli Berther settract'ei dalla scartira da R.D. Joannes a Castelberg plevon a Sedrun 1730-1736.)

In'otra notizia precischa che la principala obligaziun dil caplon seigi:

.... far duas ga per di scola.

(Notizia da pader Baseli Berther, ella Biblioteca romontscha dalla claustra da Mustér.)

Avon la fundaziun dallas caplanias ella val vegneva il plevon sustenius da caplons ni gidonters casuals ni ch'el era persuls responsabels per l'instrucziun e pil quitaun ch'ei vegni dau scola en vischnaunca e quei silmeins en in liug dalla val. Sper la pastoraziun fuva quei pil plevon ina pulita lavur. Il diember da naschientschas dumbrava igl onn 1700 31 affons, 1740 28 affons, 1745 38 affons e 1750 42 affons. Per levgiar sia lavur pledeva el era mintgaton in "magistri" ch'el stueva sez indemnisar. In tal fuva tenor il cudisch da battens da 1664 il magister Risch. Il plevon da Sedrun nota el register da battens ils 12 d'avrel 1692 la naschientscha dalla feglia Maria Magdalena da magistria Risch e Durgiai Victoria. Il secund "scolast" ei registraus ils 26 d'ost 1708, il magistri Joannes Soliva che veva maridau la Durigiet Maria.

(El cudisch da batten nr. 1: "1692, 12 Aprilis: Maria Magdalena filia magistria Risch et Durgiai Victoria; 1708. 26 augusti: Maria Catharina filia magistri Joannes Soliva et Maria Durigiet legitimae uxoris.")

Sin fundament dalla gliesta dils caplons da Sedrun dils emprems onns eisi da supponer ch'ei fuva buca lev da survegnir in caplon e lu aunc tals che instruevan bugen ils affons. En gliez cass stueva il plevon haver quitaun, sez surpender ni surdar la lavur a laics.

Quei demonstrescha fetg bein ina brev dils Tuatschins scretta ils 28 da matg 1679 agl uestg da Cuera. Cheu secloma ei denter auter:

Sur Jacob Anton de Gonda plevon a Sedrun ei sedecidius quei onn da surpender el sez la scola a Sedrun, aschinavon ch'ei seigi aschi pupratscha stabilitad "so schlechte Beständigkeit" culs caplons, mo stoppien ins schar la libertad ad el d'encurir in caplon tudestg ni talian che gidi el. La vischnaunca hagi supplicau el ditg persunter, entochen ch'el hagi dau suenter e scret la caussa a Cuera.

(La copia da quella brev sesanfla ella Biblioteca romontscha dalla claustra da Mustér.)

In'obligaziun da scola regeva gia alla fin dil 18avel tschentaner. Da quei temps vegneva la scola sustenida dil cumin dalla Cadi che selubeva era d'intervegnir en cass delicats en fatgs da scola.

Ei ordenau ch'ils signurs geraus da Tujetsch en preschientscha dil Herr Farrer dueigien far clamar Andriu Beer e sia casada e quel admonir ch'el muossi ed entruidi ses affons meglier e cumandar ch'el quels flisiameing tarmetti a scola e ducrina. Aschiglioc resalva in Lud. Oberk. da dar il dueivel castitg per sia malobedientscha, cun el leutier obligar da tener ses affons ella vischnaunca da Tujetsch.

(Protocol da Cumin 1 sut "Anno 1790, ils 22 da Nov. Lud. Oberk. dil Cumin ..")

Quella fuorma da scola e quell'instrucziun ha cuzzau tochen viaden l'entschatta dil 19avel tschentaner. Pader Placi a Spescha scriva en sia descripciun dalla val digl onn 1805 davart la scola:

Quei uffeci ei adossaus als caplons da Sedrun, da Rueras e da Selva. Ils affons san serender en casa-caplania e retscheiver leu instrucziun en leger e sriver en romontsch e latin. Beinduras vegn era in laic admess. Las scolas entscheivan il november e cuozan entochen dumengia da palmas.

Pader Placi manegia ch'ei fussi pli cunvegnient da surschar il dar scola a persunas laicas d'omisduas schlattinas. Al spiritual duess vegnir surdau ina lavur d'instrucziun pli correspondent a siu character, numnadamein l'instrucziun en religiun e morala ed en auters arts e scienzas e quei mo alla giuventetgna masculina. Il cuntrari duessen versadas giuvnas sils onns instruir mattatschas

pli grondas ella morala, en cuschnar, cuser e filar ed el tenercasa. Egl urbari da Sedrun noda el 1814:

... dil rest: tgi che vegli tarmetter lur affons tier auters a scola, possien ei sez secunvegnir cun quels tals e pagar particularmein.

(Urbari dalla caplania da Sedrun p. 245, curret 1814 dil maun da pader Placi a Spescha.)

Quels plaids muossan ch'il caplon veva l'obligaziun d'instruir ils affons. Mo sch'ei deva aunc auters «schulmeisters» en vischnaunca, savevan ins tarmetter ils affons tier lezs a scola. Pader Placi sez veva carteivel buca nuidis quella varianta cun paucs affons, forsa era ils megliers ed el astgava quell'uisa plitost ughegiar da scappar ora ella natira.

Quella fuorma da scola era da principi trasatras catolica. Ella ei vegnida praticada e sustenida cumpleinamein dalla baselgia e quei sur tschentaners ora. Alla testa da quei sistem steva igl uestg. Quella pratica ha funcziunau quasi entochen amiez il 19avel tschentaner.

•••

Ell'emprema mesadad dil 19avel tschentaner entscheiva ina nova epoca dalla scola. Piuniers sco Heinrich Pestalozzi (1746-1827), Gregor Girard (1765-1850) ed auters exponents dalla scola populara, han dau novas directives e novs accents all'instrucziun dils affons en scola. Il patertgar dad introducir ina scola populara ni scola primara sco ozildi, ha era entschiet a semadirar el spért tuatschin. Igl onn 1841 sentaupa la cumissiun da scola dil cumin dalla Cadi culs responsabels tuatschins per las scolas. Ei regi ina grond basegns da promover il migliurament dallas scolas en Tujetsch. Cun in scriver sedrezza il cumin als signurs geraus da vischnaunca cun l'incumbensa da consultar ils amitgs dalla scola ed il sur plevon.

Sch'ei seigi necessari da fundar aschi bein a Sedrun sco era a Rueras meglieras scolas ni sch'ei seigi forsa avunda da promover ina scola centrala en in liug plascheivel alla vischnaunca, laschond a mintga liug las scolas presentamein existentas cun la pli necessaria refuorma.

Sche la vischnaunca fuss cuntenza da cun cunsentiment digl Ordinariat prender ord las rehas capluttas dalla farria per vegnir tier las necessarias fundaziuns, sco era per baghegiar els dus menziunai loghens casas da scola.

Sch'ils beneficiats che han l'obligaziun da far scola, fussien cuntents da contribuir in ton tier il salari per las scolas, sedeliberond els cautras dalla sura grevezia.

Sch'ei fussi d'anflar auters avantatgs, sco per exempel a Rueras entras unir la scola cun la calustaria per cheutras vegnir ton pli tgunsch tier la necessaria fundaziun etc.

E veramein - ils anno 1840 e 1850 ein ils onns ch'ils Tuatschins sedesdestan per propi ed han scochemai dau alla scola e l'instrucziun gronda peisa.

In maletg dalla scola da quels decennis leu porschan las notizias dil vegl scolast Gion Antoni Soliva (1832 - 1915) da Sedrun. Quellas secloman:

Dil temps denter 1840 e 1850 vegneva clamau giud scantschala la dumengia avon s.Catrina (25-11), che la scola vegni da quei temps entschevida e cuntinuada tochen la jamna sontga. El medem temps recumandava il sur plevon da vuler tarmetter ils affons sauns e tafers dad otg onns vegliadetgna tochen ils da dudisch onns inclusiv, flissiamein a scola. - Quei daventava aber sut negin strof e controlla.

Il anno 1840 tochen 1845, che jeu mavel a scola, deva il sur Giachen Martin Camenisch, caplon a Sedrun, scola als pigns digl ABC en sia casa privata. (Quei era la casa dil

Muggli Grond.) - *Als auters affons che savevan ina gada leger deva il sur plevon, decan Giusep Antoni Hetz, scola en sia casa pervenda. A Rueras deva il sur beneficiat sur Vigeli Venzin da Gonda scola ed a Selva ha il sur beneficiat sur Gion Giusep Deplaz dau tochen anno 1850 era en casa pervenda, ton sco saiel. - Naven dils anno 1845 tochen ils 1849 ha Stiafen Monn dau scola a Sedrun en sia atgna casa.*

Cudischs da scola eran:

1. *In sempel ABC.*

2. *Suenter quel il sempel cudisch dil cuntegn da cuortas fablas e praulas.*

3. *In cudisch pli volum, cuntenent enqual descripziun dalla natira ed enqual raquintaziun ord il temps vargau, che vegneva numnaus "il cudisch da steilas", sco era il cudisch dil Veder Testament".*

4. *Il cudisch d'uffeci latin ed il cudisch da ductrina. En quels vegneva legiu ed enqual causa empriu a memoria e raquintau.*

(Partenent ils divers "cudischs da scola" duvrai per l'instrucziun en nossas scolas romontschas da quei temps, mira: Gion Deplazes: "Schulbücher im romanischen Rheingebiet", disertaziun a Friburg.)


El scriver: concepts negins mobein exerchezis ella calligrafia. A mintga scolar scriveva igl instructor sez sisum in fegl pupi ina lingia e suenter quella haveva il scolar da scriver igl entir fegl schi bein sco'l saveva.

El quen vegneva mussau successivamein las quater specias cun special risguard e far quen cun renschs, rizers e bluzchers; mo quei naturalmein, quellas quater specias, senza risguard sin quens pratics per la veta. Quen a tgau negin exercezi.

Ariguard las absenzas dils affons da scola durant il temps da scola vegneva tenu negina controlla.

La disciplina era empau munglusa, malgrad ch'ils affons eran bein sensibels e beinduras empau da scharfs (tazzas cun ina gronda e ferma lingiala treis e quater en ina gada; star mesas uras enschanuglias cun bratscha aviarta e lu aunc beinduras sin in plèder git).

Durant scola vegneva bein savens scumandau scadin tschintschar denter ils scolars ed era buca mirar ord il cudisch. Per quei intent metteva il scolast secretamein in scolar sco surveglader e tgisader da quels, mo quei tgisader ch'era il bia gia enconuschents als affons da scola, vegneva ord scola hassiaus e persequitaus da tuts affons da scola, en particular da quels che tal tgisava al scolast. In relavont spért e fliss fuva tiels scolars gronds che scrivevan sin pupi, il scolast metteva giu ils scolars ina ga per meins en retscha cun nr. 1, 2, 3 ed aschia vinavon, secund sco lur scartiras eran bein ni malfatgas.



**Emprova da scriver da Teresa Monn
1885**

In scolar dil temps che Gion Antoni Soliva e Placi Bisquolm devan aunc scola a Sedrun, numnadamein Emanuel Deragisch (1846 – 1924) da Bugnei, bab dils dus missiunaris caputschins, pader Placi (1875-1934) e pader Theodosi (1888 – 1944), ha mess per scret las suandontas notizias sur ses onns da scola a Sedrun:

Jeu sundel ius a scola 1851 da 5 onns e vevel aunc en rassa. Ei era gia obligatori d'ir a scola. (Dapi 1846!) Mo buc aunc fixau con ditg e schebein ins stueva far ora intons onns, mo ira mavan tuts. Scolast era Placi Bisquolm da Disla, prima scolast en tuts graus. Ha stuiu ceder pervia da Gion Antoni Soliva che deva lu scola enta Rueras. Bisquolm deva era scola la stad en casa dil caplon; giu bass en ina stiva habitava el. Cudischs vevan nus igl ABC ed il "cudisch da steilas" per las classas aultas. Avon Placi Bisquolm deva sur Giusep Maria Camenisch scola.

(Davart sur Camenisch mira: Guglielm Gadola, sur Giusep Maria Camenisch, biografia, Glogn 1931, 5avla annada, p. 74-99.
- Las sura notizias manuscrettas sesanflan ella Biblioteca romontscha da Mustér.)

2. Las midadas

Ilis onns 1840/50 crescha l'idea per novas scolas en las vischnauncas dalla Surselva. La "Societad per ameglieraziun dallas scolas catolicas dil Grischun", fundada 1832, ha propagau e susteniu in svilup innovativ en favur dallas scolas. (Mira: Gedenkschrift, 1. c. p. 106 e ss.)

La pressa renfatscha en general ch'ins hagi entochen ussa fatg plitost pauc per il progress dalla scola dil vitg e che las vischnauncas astgassien entscheiver ad interpretar enzatgei en favur dall'instrucziun. La Nova Gasetta Romontscha nr. 16 da 1840 s'exprima ualti clar cun scriver:

Aber tgei ei vegniu fatg per las scolas! Confesseien sinceramein: nuot, dil tut nuot.

Quei vegn ualvess ad esser stau la verdad per l'entira regiun dalla Surselva. Ord il sura artechel san ins denton prender che Tujetsch veva tochen lu aunc neginas casas da scola. La gasetta visa vi sin il stemprau da 1839 che hagi derschiu massa plantas e la vischnaunca duessi patertgar da baghegiar cun quella lenna casas da scola. Ilis vischinadis duessien dar gratuitamein ils suloms. Quei fussi buca fatg da memia per la scola. A Camischolas duessien ins in summa ereger ina casa da scola per l'entira val.

La cumissiun da scola dil cumin dalla Cadi intervegn en caussa scola ed il resultat da quella sesida scriva ella alla vischnaunca da Tujetsch calonda december digl onn 1841:

Mustér, igl 1. da december 1841

Havend la cumissiun da scola dil ludeivel Cumin dalla Cadi sil sura di teniu confereza cun ils signurs geraus dalla ludeivla vischnaunca da Tujetsch e vesend ord informaziuns dadas dils medems signurs geraus, d'ina vart ils gronds basegns da promover il megliurament dalla scolas leu schon existentas, sco era da l'otra vart las abuldontas resursas pecuniaras da quella vischnaunca, sche ha la cumissiun da scola invitau ed incumbensau ils respectivs signurs geraus da tener en lur vischnaunca conferenza cul revendissim signur farrer ed auters amitgs da scola per seconsultar:

a) Sch'ei seigi necessari da fundar, aschibein a Sedrun sco era a Rueras, meglieras scolas, ni sch'ei seigi forza avunda da promover ina scola centrala en in liug plascheivel alla vischnaunca, laschond a mintga liug las scolas presentamein existentas cun la pli necessaria refuorma.

b) Sche la vischnaunca fuss cuntenza da, cun cunsentiment digl ordinariat, prender ord las rehas capluttas dalla farrìa il superfluum per vegnir tier las necessarias fundaziuns, sco era per baghegiar els dus menziunai loghens casas da scola.

c) Sch'ils beneficiats, che han l'obligaziun da far scola, fussein cuntents da contribuir in ton tier il salari per las scolas, sedeliberond els cheutras dalla sura grevezia.

d) Sch'ei fussi forsa d'anflar auters avantatgs, sco per exempel a Rueras entras unir la scola cun la calustria, per cheutras vegnir ton pli tgunsch tier la necessaria fundaziun

La cumissiun da scola viva dalla dultscha speranza, ch'il signur farrer dil liug, ensemen culs respectivs signurs geraus ed auters buns amitgs da scola, vegnien en buna entelgienstcha ed accord ton per in liug sco per l'auter, secund lur meglier saver e puder, promover il megliurament dallas scolas da lur vischnaunca.

Vegnend la vischnaunca da Tujetsch suenter a quei senza dubi gest e sogn desideri d'in ludeivel magistrat ed en particular dil cussegl d'educaziun, sche pudein nus quella era certificar, ch'ella vegni secund ils progress era contonscher ils commensurai premis ord la cassa cantunala.

Serecamondan alla buna vulientscha d'ina ludeivla vischnaunca, ils suttascrets

*Paulus Benedictus Berther, farrer
Al. la Tour
F. Cabernard*

Mo il far ils emprems pass en quella direcziun veva pauc ried e perquei scriva Il Romontsch nr. 10 da 1847:

Tujetsch ... Era en Tujetsch spetgav'ins in meglier regulament da scolas, denton par'ei ch'ei seigi vegniu refretg pia vinavon plaunsiu?!

Mo cura ch'igl ei cudizzau ditg avunda tonscha ei. Perquei secloma ei ussa tuttenina en Il Romontsch nr. 23, 1847:

La vischnaunca da Tujetsch ha ils 30 da matg 1847 unitamein tschentau si in fondo da scola da 11'000 flurins, ditgel endisch melli. In bi e zun legreivel progress e segiramein mai seudius ellas annalas tuatschinas suenter la mort dil glorius Pieder de Putnengia.

Cheu suondan ils emprems status da scola mess si d'ina cumissiun. Oravontut eis ei iu per la preparaziun dalla finanziaziun dalla scola tuatschina.

Status da scola – 1847

Sin stimulaziun dil revendissim segnerfarrer, sco era entras insinuaziun dallas autoritads cantunales ed era muort igl aspect d'autras vischnauncas ed en particular per era nus survegnir enzatgei ord la cassa cantunala, sche ha la vischnaunca sco enconuscent ei, decretau ch'ils signurs geraus dueien cun agid d'ina cumissiun seconsultar co ins savessi stabilir ina fundaziun per vegnir tier scolas nizeivlas e bunas per nossa vischnaunca. Differentas gadas ha quella cumissiun giu palaz e finalmein projectau il sequent. Ordavon secrei quella cumissiun da metter en egl a tuts vischins, che buca interess privats, u zuppadas miras, hagian mumentau tier quei conclus, sonder la totala perschuasium dil bien general; che buca mo ils pli beinstonts sappien spargnar bia daners, sonder era ils paupers sappien cheutras vegnir instrui da maniera, che era a quels seigi dau ils mettels da semetter en stan da puder e saver gudignar lur paun.

Plan co la fundaziun duei vegnir stabilida

1. Ord las capluttas vegn priu ora il capital, cumpriu en ils tscheins rimnai:		fl 4200.- porta tscheins annuala fl. 210.-
Tscheins rimnau da tuttas capluttas	fl. 800.-	
Capitals ord la caplutta da s. Nicolaus	fl. 150.-	
Capitals ord la caplutta da s. Bistgaun	fl. 500.-	tenor approbaziun dalla Curia croda
Capitals ord la caplutta da Nossadunna	fl. 800.-	tscheins annual ord las capluttas 194 fl.
Capitals ord la caplutta da s. Giusep	fl. 100.-	
Capitals ord la caplutta da s. Antoni	fl. 830.-	
Capitals ord la caplutta da s. Leci	fl. 1000.-	

Ils signurs geraus cun il segnerfarrer han la cumissiun d'immediat corrispunder cun la Curia ed aschigleiti sco la lubientscha ei, zavrar ora ils capitals e dar enta maun al cussegl da scola.

2. Ei duei vegnir schau segar pastiras mintga onn per fl. 50.-, numnadamein las sequentas: Pala Gronda, Crappa Grossa dadora, Grep Tgietschen, Sur Tscheinghels, Caschle da sum en ed ora suenter il solit, las Fontaunas da Malamusa, ils Bruis, Ruosna, Crap Gelgia, Puzza Pintga, Riva da Surpalits, in ton sin l'Alp Tschamut, Plaun Viradas, Val Ruinatsch, els Pardatschs suenter il solit, Paliu Crap ed in ton en la Val Gierm.

L'entschatta vegn segau a Surpalits ed allura mintg'onn mess ingant in ton da quellas, da maniera ch'ins po ver speranza, d'avon ch'ei seigi entuorn, cuoza ei onns – e duei vegnir vendiu annual per fl. 50.-.

aschia tscheins annual fl. 50.-

3. La vischnaunca pren sin jarva 26 tiers per onn, ils quals vegnan reparti sin ils vischinadis sco suonda:

Bugnei, Sedrun e Gonda 7, Camischolas e Zarcuns 4, Rueras 4, Selva 3, Tschamut 3, Surrein e Cavorgia 5. Mintga vischinadi ei responsabels per igl arver digl importo da fl. 3 e 20 x per tier, quels tiers duei mintga vischinadi procurar che buca pli che dus da quels tiers vegnien mess u schai ad in – per raschun che las pastiras dalla primavera vegnan aschi uliv sco pusseivel gudidas, autras grevezias da pustretsch ein quels tiers suttaposts sco il nos.

renda in tscheins annual fl. 86.40 x

4. Ei vegn projectau ch'igl oberkeit duei per treis onns prender si l'administraziun d'economia da vischnaunca senza ver entgina recumpensa per quella, quei s'entelli tuts fatgs d'economia – quei che regordescha correspondenza cun autoritads u per materialias da quellas varts, duei vegnir bonificau, per il qual ei vegn tenu quon e quei ed auter quon dau giu alla vischnaunca, cass nunprovedi e particularitads ei adina reservau.

Ins ha cheutras buca l'idea che la giustia, ni nos fatgs economs vegnien periclitai, sonder ferm perschua di dalla buna affecziun che nus veien bein patertgau. Umens che hagien premura per nies bien, sche mo in bien exempel ed enqual sacrifici, ch'els rendien affecziun al pievel, e ton pli ch'ins ha ferm fastitgs, ch'igl oberkeit present, vegni pigl onn futur a sacrificar quest. Sche han ins era speranza che per dus auters onns sappi quei daventar. Il gentar da Tschuncheismas ei dismiss – per il gentar ch'il segnerfarrer deva agli oberkeit, paga quel alla scola fl. 7.- per onn ed igl oberkeit survegn negin, perencunter paga la vischnaunca alla scola per quels treis onns mintg'onn fl. 100.-

aschia tscheins annual fl 100.-

fl. 446.40 x

quei fust pia tscheins franc annual per
quels 3 onns, dil qual negin vischin vegn la
minima causa engreviaus -

Igl oberkeit ei aber incumbensaus da ton pli gleiti tschentar si in regulativ u uorden da vischnaunca commensurau als basegns administrativs, sco enconuschent quel, rapportar alla vischnaunca.

Resuras arbitrandas

5. Tgi che seghi fein a pastg el Cuolm Bass paga per um 20 x e femnas che segan 8 x.

calculau che pudess vegnir en per onn fl. 60.-

6. Tgi che marida en vischnunca paga fl. 1 40 x tochen fl. 6 40 x. Tgi che marida ord vischnaunca paga fl. 1 40 x tochen fl. 10.-. Quei s'entelli era vieus e vieuas. Igl arbitrar il pagament ei surschau al cussegl da scola, quei vul dir da pagar dils fl. 1 40 x tochen la pli aulta summa.-

7. Finalmein duei vegnir tschentau in cussegl da scola, che consista en otg persunals ed ha da cuzzar treis onns. Il segnerfarrer ei president da quels, ils auters siat dueien esser seculars, ils quals la vischnaunca legia ora en mintga vischinadi silmeins in, quels han l'incumbensa da rugalar ensemen ils fondos, mirar ch'ils capitals seigien segirai, recavar dalla cassa sco dretg ei per ils premis, procurar per locals da scola aschigleiti sco pusseivel. Trer en il stipulau tscheins ed autras resursas, cun quei far capital u pagar quei che croda, e mintga onn render in specificau quon alla vischnaunca dil prender en e dau ora – sco era da lur operar.

Las scolas lontanadas en ils vischinadis dueien ad interim vegnir fatgas sco tochen ussa e pagadas secund basegns, quellas nua ch'ils caplons fan, vegn schau era sco ussa – quei duei aber buca puder vegnir prolunghiu pli che dus onns, da leu naven vegn allura en scadin liug a vegnir fatg silmeins ina scola rurala, ed ord il fondo pagau a proporziun e sinaquei che mintgin sappi cul temps seprofitar dallas scolas centralas.

Aschiditg sco ei setracta da regulaments d'interess, localitads, stabilliments da fundaziuns, duei mo il sura cussegl vegnir clamaus, cura aber ch'igl ei da secussegljar dalla istruzziun dils affons ed examinar mussaders; sche dueien tut ils spirituals vegnir clamai en. -

Ils commembers dil cussegl ein obligai da seradunar aschi savens sco il president cloma en e quei tut gratis, u per negina pagaglia.

Per quei mument manegia la cumissiun da star tier quei, recamonda il cussegl da scola, sch'el anfla cul temps ch'il basegns damonda pliras resursas, sche vegn el a projectar u seprofitar, dils pli adequats e migeivels mettels, per augmentar la fundaziun, sco era per il manteniment dallas casas.

Approbaus ils 30 da matg 1847 ed eligiu il suandont cussegl da scola:

Sedrun:	signur scarvon Monn, substitut Stiafen Monn, Hans Giachen Beer
Rueras:	signur mistral Gieriet (- 1853), statalter Paul Wenzin, statalter Hans Giachen Decurtins
Camischolas:	statalter Gion Andriu Berther
Dadens gl'Uaul:	statalter Vigeli Wenzin
Da Maun Sut:	statalter Lezi Mucli e statalter Sep Antoni Mucli

La cumissiun da scola digl onn 1847 noda ils 27 da zercladur en siu protocol, propagond la construcziun d'ina scola centrala per ils vitgs dador il Dutg Grond:

Ha la cumissiun da scola concludiu il sequent: numnadamein da baghegiar ina casa vin Dulezi che dueigi survir per scola centrala dall'entira vischnaunca. La casa dueigi vegnir baghegiada giufuns duas stivas grondas a pèr e lura trer giebel da maniera ch'ei possi aunc en zatgei cumachs. Ils da Camischolas dueigien sedecider, sch'ei veglien s'eunir cun ils da Sedrun en termin tochen ils 29 dil present senza neginas cundiziuns, oreifer sch'ei duess vegnir il cass ch'els havessen stgisas sufficientas da sedevidir separadamein. Cass vegness ei lura fatg ina regurdientscha co gidar zatgei vid lavur cumina. Sco era schei duess vegnir mess spesaspeculiaras, dueigi era vegnir ad els a proporziun. Als da Rueras ei schau sura als vischins da tschentar sia casa suenter lur bein manegiar, bein entelgiu aschi spargniusamein sco pusseivel, bein ch'ei vegni fatg in local adatteivel per ina scola.

Il svilup en caussa scola ei pia mo staus pusseivels cul grond sustegn dalla baselgia da ses plevons e caplons. Era ils onns nua ch'il moviment per la promoziun dalla scola vegn fatga dil cantun e cumin, ein oravontut ils plevons stai alla testa dalla promoziun e quei cun plaid e fatg. Da quei dat era il suandont document perdetga:

1847, ils 12 d'uost ha igl Ordinat episcopal da Cuera lubiu da prender dallas capluttas da Tujetsch sequentas summas per fundar in fondo per las scolas ruralas:

Caplutta da s. Clau, Tschamut	180 fl.
Caplutta da s. Bistgaun, Giuv	580 fl.
Caplutta da Nossadunna, Zarcuns	860 fl.
Caplutta da s. Giusep, Bugnei	100 fl.
Caplutta da s. Antoni, Surrein	860 fl.
Caplutta da s. Leci, Cavorgia	1300 fl.

Quasi tuttas capluttas dalla val han dau in bien exempel e susteniu finanzialmein il moviment per l'instrucziun e per l'erecziun da baghetgs da scola. Ei cuntinuescha cun ina admirabla curascha ed engaschi endinau. Il tschentaner dalla scolas pren ina legrevivla entschatta per la val.

"Il Romontsch", la gasetta conservativa, rapporta en nr. 15 digl onn 1848:

"Sin Cadruvi a Sedrun duei vegnir baghegiau in stupent casament per las scolas da Sedrun. Per treis autras casas da scola, eis ei schon ussa lenna sil plaz. Tujetsch sestauscha pia cun honor vinavon."



Casa da scola Cadruvi: Meister Gion Benedetg Deragisch, Rueras 1848

Dus onns pli tard egl Amitg dil pievel nr. 13, 1850:

.... Alla giuventetgna auda igl avegnir e sche la vischnaunca da Tujetsch ha dacuort baghegiau ... treis casas da scola ed ha presentamein emploiau treis scolasts, gl'emprem cun ina paga da 350 flurins, il secund cun 80 ed il tierz cun 50 flurins (ils dus davos mo pigl unviern), sche sa mintgin concluder, ch'ella hagi il dretg quitau per l'educaziun dils affons ...

Treitschien flurins era da gliez temps ina tschecca paga per in scolast che deva gl'entir onn scola e gliez fuva plitost ina raritad singulara. Era ils 80, respectiv ils 50 flurins per tschun meins scola fuva pagau fetg bein.

(Dr. J. Ulrich Maier en sia "Geschichte des bündnerischen Volksschulwesens in der ersten Hälfte des 19. Jhs.", scriva p. 107: ".... ja die Gemeinde Tavetsch, die in Schul- Strassen- u. Forstwesen den übrigen Gemeinden als Muster aufgestellt werden kann, gibt ihrem Lehrer einen Gehalt (1852) von 300 fl. nebst Wohnung und Heizung!")

...

Co fuva ussa la situaziun da scola ils onns dallas grondas midadas, ils onns 1849/50 cun l'entschatta dil grond progress? Il cantun Grischun ha ediu in rapport uffical en fuorma da cudischet davart las

scolas grischunas ils onns 1849/50. Quel porscha ina interessanta survesta dil scolaesser dalla vischnaunca da Tujetsch. Quei ualti exact rapport ei positivs e tuna zun bein:

Nr. 252 Tujetsch-Sedrun

Circuit da scola catolic. Cun ils uclauns ed uclivas: Gonda, Salins, Camischolas, Zarcuns, Surrein e Bugnei.

Local da scola: in agen, niev e cuntenteivel.

Cussegl da scola: Per tut las fracziuns da scola dalla vischnaunca politica da Tujetsch che consista ord 8 commembers; il plevon dil liug a Sedrun ei president ord uffeci.

Fondo da scola: Per l'entira vischnaunca politica 2400 flurins en capitals hipotecars, dils quals ina part ein aunc uni cul fondo da caplania. Ei exista neginas ordinaziuns legalas arisguard igl augment dil fondo, encuntercomi ei priu en egl in'augmentaziun sin autra via.

Scola d'unviern: Da s.Martin entochen Pastgas; 36 uras ad jamna. Obligaziun d'ira a scola. Quella entscheiva cun 6 onns; finiziun da scola tenor veglia.

Remarca: Anno 1847 ei la vischnaunca vegnida premiada dil cussegl d'educaziun cun in premi da 400 flurins per lur fundaziun dil fondo da scola da 2000 flurins.

Nr. 253 Tujetsch-Cavorgia.

Cuminonza da scola Cavorgia cun l'ucliva Cavorgia Sura. Affons obligai dad ir a scola: 18 en ina scola cun classas. Local da scola: in agen, cuntenteivel.

Quei che pertucca ils auters uclauns, mira Tujetsch-Sedrun.

Nr. 254 Tujetsch-Rueras

Cuminonza da scola catolica. El circuit 14.

Affons obligai dad ir a scola: 40 en ina scola cun classas.

Local da scola: Vegn baghegiu in niev. Il "canzler" (=caplon) tegn scola. Gl'auter mira Sedrun.

Nr. 255 Tujetsch-Selva

Cuminonza da scola catolica: El circuit 14 cun l'ucliva Tschamut.

Affons obligai d'ir a scola: 27 en ina scola cun classas. Local da scola: Ei vegn baghegiu in niev. Il caplon tegn scola. Gl'auter mira Sedrun."

(En: Zweiter öffentlicher Bericht des Erziehungsrates. Darstellung des Zustandes sämtlicher Gemeindeschulen Graubündens im Jahr 1849 auf 1850. Chur 1850, p. 152/153.)

Il fondo da scola muossa la suandonta situaziun finanziaria:

Ils fondos da Tujetsch cun 5 scolas

(Nova Gasetta Romontscha, nr. 11 dils 12 da mars 1863.)

1847 ha la vischnaunca fundau tras arvers ellas alps e fein a pastg ...	3400.-	frs.
Premi cantunal pella sura fundaziun ...	680.-	frs.
Priu cun lubientscha episcopala ord la facultad dallas capluttas capitals che vegnan aunc administrai dals resp. ugaus da quels	596.-	frs.
Premi cantunal per 3 casas da scola, a Sedrun, Rueras e Cavorgia ...	425.-	frs.
Camischolas ha uss era in'atgna casa da scola ed a Selva vegn uonn medemamein baghiau ina. La caplania da Sedrun paga annual alla scola 51.- frs., che representa in capital da	1020.-	frs.
En bonis dalla scola ha il ludeivel oberkeit resignau sin ina annuala gastaria tiel signur plevon, persunter paga quel annual alla scola 11 fr. 90 cts. in capital da	238.-	frs.
1863, schaner, purtava aschia l'entira facultad	12279.-	frs.

Ils da Zarcuns e Camischolas, aunc uni cun la scola da Sedrun, han en mira in'atgna scola. Cun ina collecta voluntaria da 393.63 frs. han els fundau lur agen fondo per la scola.

Dus onns pli tard han dus uclauns dalla val puspei caschun d'augmentar lur fondos specials da scola:

Premis fixs per casas da scola ni alzament dil fondo ei vegniu partiu ora 5240 frs.... denter auter a Selva 400, Camischolas 350 ...

(Nova Gasetta Romontscha 1865, nr. 27.)

Ils onns 1860 vegnan las scolas da stad ni scolas tudestgas propagadas. Ellas ein las antecessuras dalla scola reala e secundara dad oz.


Tujetsch se presenta davart quellas ideas a moda exemplarica. Gia 1868 secloma ei en quels graus:

Las novas scolas per la giuventetgna buc obligada pli da frequentar la scola elementara, per las qualas il davos cussegl grond ha decretau in subsidi cantunal, han ils vischinadis da Rueras, Sedrun, Segnas, Mustér-S.Gions e Surrein entschiet a menar en.

(Nova Gasetta Romontscha 1868, nr. 48.)

La scola grischuna fa en general in grond svilup – igl ei onns da progress. Il cantun prolunghescha 1868 il temps da scola da 22 sin 24 jamnas, diesch onns pli tard, 1878, vul il cantun schizun far frequentar ils affons nov onns la scola elementara. Encunter quella midada han era ils Tuatschins portestau.

(Nova Gasetta Romontscha 1868, nr. 14, 1878, nr. 7 e 1878, nr. 12.)



Document d'ina donaziun dil cantun

Quels onns ein las midadas evidentas ed ei vegn pretendiu pli e pli bia dils scolasts. Ord quels motifs pretenda il cantun era da dar dapli paga als instruiders cun in undreivel alzament dalla paga. Quei plai denton gnanc tec allas vischnaucas sisum la Cadi.

(Nova Gasetta Romontscha 1863, nr. 43 e Nova Gasetta Romontscha 1863, nr. 49 e 50: "Protesta dallas vischnaucas Mustér, Sumvitg, Tujetsch e Medel.")

Quei patertgar pertuccont las pagas svanescha ed ei vegn pli quiet, ton che gia 1874, cu il cantun ha puspei alzau las pagas, dat ei neginas protestas giu da sum la Surselva, era buca dils Tuatschins.

(Gasetta Romontscha 1874, nr. 22 e G. R. nr. 25 dil medem onn.)

Survegnend denton ina megliaera paga ella Bassa han biars scolasts bandunau vischnaunca e patria romontscha per grond donn dallas scolas e dalla cultura romontscha. Las biaras scolas novas, cussegls da scola culs plevons pulitamein innovativs e progressivs, han buca gidau a frenar quei moviment.

(Aschia ha era il scolast tuatschin Jacob Martin Muggli bandunau la patria. Da quei relata la Gasetta Romontscha 1867, nr. 18 il sequent: "Gl'avrel 1867 ei morts a Galgenen, Cantun Sviz, il giuven scolast J.M. Muggli da Tujetsch, nua ch'el veva dau 3 onns scola cun bien success. Sco la Gasetta da Glaruna scriva, era el leu generalmein stimaus e carezaus sco bien e fideivel instructor e bab da familia.")

3. L'instrucziun

A Tujetsch era la scola buca megliera e buca mendra ch'enzanua auter. La scola dependeva e dependa sco oz dils buns e menders scolasts. (Pli detagliau davart la scola d'avon 100 onns, mira: Gedenkschrift, 1. c. p. 102 e ss.)

Tujetsch ha giu numerus fetg buns scolasts. Cheu suondan notizias ch'els han relaschau sco documentaziun da sia lavur. Aschia raquenta Placi Biscuolm che ha instruiu quater onns a Sedrun da 1849 - 1853:

Observaziuns sur la scola a Tujetsch 1849/50.

Jeu hai uonn 76 scolars en scola.

La 3. classa exercitescha en ils quens dallas 4 specias cun cefras numnadas.

La 2. classa exercitescha els quens dallas 4 specias buca numnadas.

La 1. classa el quen a tgau e scriver cefras.

Fliss: En scola buca fetg gronds generalmein, bein aber el frequentar la scola: il progress ei da ludar.

1852, ils 12 d'avrel examen. - Stau tonta glied, ch'ei ha buca giu plaz en scola: stuevan star on zuler. - Era dus scolasts da Mustér ein stai presents.

(Gadola, G., Placi Antoni Bisquolm. Glogn 1939, p. 126 e ss. e Gadola G., Ord il diari d'in scolast da tschels onns. Glogn 1938, p. 4-24.)

N ^o	Namen der Schüler.	Seimath.	Alter. (Geburt.)	Eintritt.	Verpätun- gen.	November & Dezember.	Januar
1	Fulvia M. Chiffina						
2	Hon Hans Giachen						
3	Schmett. Margrita Chiffi						
4	Terapisch Maria						
5	Hon M. Giuseppe						
6	Berther Barbara Turci						
7	Terapisch Barbara Catina						
8	Hon Barbara Catina						
9	Hon Giachen Antoni						
10	Schmett Giachen Martin						
11	Schmett Paul						
12	Casanova Florin						
13	Hon Gian Christ						
14	Terapisch Levi Antoni						
15	Berther Rigili Joseph						
16	Berther Rigili Ros. il gen						
17	Terapisch Giachen Lub						
18	Hon Gian Antoni						

Tabella d'absenzas dils 5 da november 1852 entochen ils 11 d'avrel 1853

Per enonuscher l'instrucziun d'amiez il 19avel tschentaner ei era il contract dil cussegl da scola fatgs cun Placi Biscuolm il settember 1848 zun interessants e plaيدا dalla instrucziun da gliez temps:

Denter ils suttascrets, numnadamein: il Präsident e Cussegl de scola della lud. Vischnaunca de Tujetsch d'ina vard e Lehrer Placidus A. Bisquolm de Sumvitg de l' altra vard, ei sil di ded oz serrau giu in'entelgientscha ed accord sur dil schar far e sur dil surprendre ina scola ella vischnaunca e vitg Sedrun, e zuar sco suonda:

1. *Surpren Lehrer Pl. Bisquolm de far scola el sura predetg vitg e vischnaunca ad in diember de 50 - 70 affons senza in auter agid.*
2. *De dar instrucziun als mats (giuvenns carschi) in miez di per jamna.*
3. *D'instruir ina u duas gadas per jamna e zuar la sera durant igl unviern el cant pella baselgia.*
4. *De tener scola durant 3 onns ella sura vischnaunca e vitg; 10 meins per onn entochen 6 uras de lecziun per di.*
5. *Tuttas dumengias, fiastas e firaus cummandai, sco era in auter miezdi (sco per vacanza dell' jamna) ein exceptuai de far scola.*
6. *Per indemnisaziun per la sura instrucziun, paga e s'oblighescha il Cussegl de scola annualmein al Lehrer Pl. Bisquolm:*
 - a. *350 fl. scrivel treitschien e tschunconta renschs.*
 - b. *Loschamen -logi en casa de scola e lenna de cuschinar.*
 - c. *ded esser libers de tuttas lavurs ed expensas communablas.*
7. *Ils dus meins de vacanza vegnan reparti sin ina vacanza della permavera ed ina digl atun. Il con ditg per liug, sco era cura ch'ella entscheiva e finescha, vegn mintga gada destinau e sentelgiu dil Cussegl de scola e dal Lehrer.*
8. *Sur dils materials, ch'ein de duvrar tiellas lecziuns en scola, sur dils cons dils objects, e con lunsch quels dueigien vegnir docì, deigi adina vegnir s'entelgiu denter il Cussegl de scola ed il Lehrer*
9. *Tuts cass de malentelgientscha denter las parts pervia de quest accord, deigien, buca savend vegnir perina denter ellas, vegnir fatgs ora definitivamein mo entras il sgr. inspectur de scola de nies district.*
10. *Sur della sura entelgientscha ei vegniu scret dus medem plidonts originals, de medema scartira e maun, e da mintga part dau in, suttascrets dallas parts cun agen maun.*

*Il Cussegl de scola, en num de quel
Johan Jacob Beer
Placidus Bisquolm, Lehrer.*

Tujetsch, ils 23 de September 1849.

Denter ils sottascrets, nommadamein: Il Präsident e Cussegl della
scola della lud. Vösch pe Tujetsch di via vard e Lehrer Placidus
H. Biscuolm pe Sarnung de lautra vard, ei sil/oi dedoz serapen in
entelgienscha ed accord sur dil schar far e sur dil surprendre ina
scola ella lud. Vösch e Vity Sedrun e zoar sco suonda:

1^{mo} Surpren Lehrer Pl. Biscuolm de far scola el sura predety Vity e
Vösch ad in Diember de 50-70 uffons senz' in anter agid.

2.^{do} De per instonziun als mats (jovens carschi) in vias di per jamma.

3.^{ta} Dinstar in duas gidas per per jamma e zoar la sera suront il umuier
el cant pella baselgia.

4^{ta} De tener scola ella sura predety Visananca e Vity suront 3 ons; Moins
per on e tochen 6 aras de lezion per di.

5^{ta} Tuttas Domenzias, fiastas e fiaras comendai, so or' in miez di suenter
miez di sera per vacanza dell' jamma; con exceptuai de far scola.

6^{ta} Per indenmizziun pella sur instruziun paga e seoblighesch il
cussegl de scola annualmein a Lehrer Placidus Biscuolm
a. 350 fl. suriel treitshien e tschunconta renschs.

b. Loschament = Logi en casa de scola e lena de cuschinar

c. De esser libers de toutes lavours ed expensas commonables.

7^{mo} Als per meins de vacanza vegnen reparti sin ina vacanza delle primavas
e diel atun. Il condit per ling, so era cura ch' ell' entschio' e finescha,
nega mintga pada sentelgiu del cussegl de scola e del Lehrer.

8^{mo} Sur dels materials, ch' een de duvar tiellas leziuns en scola, sur dels conts
dels objects, e con lausch quels deigen vegair docci, deigi ei adina vegair
sentelgiu denter il cussegl de scola ed il Lehrer.

9. Tuts cas de malentelgienscha denter las parts, per via de pacs accord,
deigen, buca savent vegair perina denter ellas, vegair fatg ora Defini
toamein mo entras ils sigr Inspectar de scola de nies District.

10^{ed} Sur della sur' entelgienscha ei vegnia scret sus maders plidonts
originals, de madema scatura e manon, ed a mintga part dau in
sottascrets delhas parts cun agien manon.

Il cussegl de scola, en nom de quel

Jehan Jacob Berra

Placidus H. (Biscuolm) Lehrer.

Tujetsch ils 23 pe September 1849.

Igl onn 1850 scriva igl inspectur Placi Condrau "Gl'inspectur de scola alla ludeivla Prestonza de Tujetsch era per mauns dil lud. Cusseilg de scola de leu":

Stimatissims Signurs,

Cheutras fetschel jeu da saver ad Els, chil cussegl d'educaziun hagi approbau nossa convenziun fatga leu ils 5 da november en ina radunonza dil cussegl da scola e dils geraus, che plaida:

- 1. La vischnaunca augmentescha il salari dils scolast a Sedrun per fr. 30 e dat ad el 200 fr. Paga ultra la habitaziun e lenna; al scolast da rueras dat ella sco onn 120 fr.*
- 2. Sinaquei che las elecziuns dils scolasts d'avegnien dacheudenvi cul necessaris risguard, sche vegn la suprastanza dil cussegl da scola a far lur pusseivel da persuader la vischnaunca da surschar l'elecziun al cussegl da scola, sco igl ei il cass en auters loghens.*
- 3. Ils spargns, che vegnan fatgs tras la sbassada dalla pagaglia dil scolast a Sedrun, duein buca curdar tier alla cassa da vischnaunca, sonder al fondo da scola.*
- 4. Gl'inspectur da scola vegn a metter avon quei fatg al cussegl d'educaziun e supplicar el da far pella paga dil scolast a Sedrun in'exceptiun dalla lescha fatga uonn dil cussegl grond ariguard il salari scolastic.*

jeu stoiel aschia supplicar il cussegl da scola, che quella convenziun vegni messa en siu protocol.

Ariguard mia inspecziun fatga d'in temps nua ch'il cussegl da scola era senza president, il qual vegn speranza buca ad esser pli il cass, saiel ni stoiel jeu far al cussegl da scola sequenta remarca.

Oravon haiel jeu stuiu observar cun grond displascher ch'ils affons obligai tiella scola ein vegni per part fetg tard a scola, ferton ch'en autras vischnauncas ein schon gl'emprem di quasai tut ils affons vegni a scola. Per lura schar pli ditg la scola da Cavorgia orfanila, haiel jeu cun consentiment digl'emprem genau (en riguard la paga) e cun cussegl dil signur Janer (en riguard il personal) pladiu leu in scolast sut las condiziuns sco onn. Il cussegl d'educaziun vegn tenor empermischun a schar vegnir tier ad el in susteniment de 40.- fr.

La scola da Sedrun drova pella classa aulta in auter cudisch da leger; il cussegl da scola duei pia mirar ch'ils affons cumprien per quei intent la historia biblica; pils paupers eis ei aunc entginas biblas a Rueras che vegnan buca duvradas e ch'audan alla scola. Sedrun ei la suleta scola denter las 26 scolas dalla Cadi, nua ch'ins anfla buca la bibla. Sco jeu haiel observau legevan ils affons senza capir, senza saver raquintar enzatgei dil legiu. Han els ina gada la bibla, sche vegn quei nuscheivel mecanismus a calar si.-

Jeu haiel milsanavon era sesmarvegliau zun fetg, d'anflar la scala dalla casa casa da scola a Rueras el medem miserabel stan sco avon in onn. Jeu haiel speranza d'anflar quella l'otra ga en meglier uorden, silmeins ina provisorica, ch'ins sappi ira en ed ora senza temer da stuer rumper las combas.

Ella ferma speranza che la suprastanza ed il cussegl da scola vegnien dacheudenvi en buna harmonia a cooperar pell'educaziun dalla giuventetgna e prevegni ad in memia grond diember dâbsenzas, restel cun aultza stema

Placi Condrau, inspectur

(Archiv communal Tujetsch, Scolaresser)

Buca pauc interessant ei quei che pertucca ils baghetgs casas da scola! Da quella da Sedrun scriva scolast Placi Biscuolm 1851:

Ils 12 da fevrer dat il sulegl per l'emprema ga en stiva da scola ed ella stiva speras en dallas finiastras sura. Il sulegl va giu ussa pér allas 4 dalla sera, q.e. ils 12 d.q. e leva $\frac{3}{4}$ sillas 8 dalla damaun. En stiva encunter damaun dat il sulegl per l'emprema ga ils 16 da fevrer e stat schon $\frac{1}{4}$ ura il di.

Diesch onns pli tard ha Tujetsch in scolast da mo quendis onns vegliadetgna ella persuna da Rudolf Cavelti da Sagogn. El daventa pli tard canoni residenzial e domcantor. Quel ha pader Baseli Berther giu supplicau igl onn 1905 da far aschi bien e scriver sias reminiscenzas da scolast a Sedrun e Selva ils onns 1860 - 1863. Las notizias da pader Baseli Berther, Rueras/Dieni remarcjan il suandont:

Entuorn 1860 era ei aunc gronda munconza da scolasts. Professer Placi Condrau era inspectur. Rudolf Cavelti veva fatg la scola primara a Sagogn. Condrau ei vegnius sin inspeziun leu e viu che Cavelti saveva stupent sias caussas e scret igl atun ad el da vegnir a Sedrun e surprender la scola pintga. Ed el ei vegnius a Sedrun sco scolast cun 15 onns, senza negina preparaziun. Plevon Durgiai ha lu presentau Rudolf Cavelti a Lucas Cavegn e lez ha detg: "Quel bettan ei del Run giu!" - Denton veva lunsch entuorn buc in soli scolast quei uorden e quella disciplina sco Rudolf Cavelti! - Siu salari fuva frs. 120.-. Nua prender cuost per ch'ei tonschi? Ei han cussegliu ad el dad ir en casa dalla caplania e far sez il percasa; han mess en in letg e dau in per cazzettas ad el. "Jeu survegnevel fetg bia dils purs", raubas da cuschinar etc.. Suenten scola metteva Rudolf Cavelti si scussal e fageva il percasa: pulenta, broda, suppa da frina ... Era ils ses tarmettevan si dabia da casa. Il mender era che negin lavava siu resti; siu scussal era tschufs e tut steris dil cut!

Rudolf Cavelti era staus pladius per la scola pintga, mo ha lu dau la gronda a Sedrun. Vegneva ora fetg bein cul sur plevon: la sera era el quasi adina si tier lez - per spargnar la cazzola! Alla fin da quei emprem onn da scola ha professer Placi Condrau giu detg: "Cavelti ei ualti nauschs en scola!"

L'auter onn va Rudolf Cavelti scolast a Selva per 150.- frs. Leu ha el fatg scola en ina casa sper la caplutta, casa dubla dils Flurins, ella stiva encunter la caplutta: cuschina davos mun e combra da maner cun tgaminada. El stueva era scaldar pegna per la scola - cun caglias striauna. La sera fuv'el adina si tier pader Sigisbert Monn, um fetg serius, che sunava fetg bein clavazin e mussava gronda simpatia per la claustra! - Fetg bien fageva la famiglia Venzin cun el. L'Onna Rosa Martina Venzin ha schizun gidau el pli tard a schar studegiar! - Il secund unviern a Selva ha ei dau massa neiv. Vegniu giu la lavina da Rusas e Rudolf Cavelti ha stuiu far tunnels per che ses affons sappien vegnir a scola.

A Selva fageva el mai cafe, el bueva adina latg mulsch; insumma pintgas u neginas expensas. El ha tarmess l'entira paga a casa! Perquei veva Lucas Cavegn, commember dil cussegl da scola giu detg: "Quels tg'on nuet, tarmettan la paja a tgèsa: quels tg'on enzatgei fon se daivets!"

Ils scolasts da Tujetsch mavan adina a conferenza. Quella veva liug il bia a Mustér ella "Cruna". Quei eri dis da biala poesia e da pign cuost. Cafe cumplet tiella "Veva" per 60 raps e pil "surmeister pign" custav'ei aunc meins!

"Leger stuevan mes scolars fetg bia. Buca bustabiar pli; nus vevan la fibla. Gruppas da plaid; alla fin adina "vianter" e "costas". - Jeu vevel dus differents cudischs da scola cun lien differentas caussas zun capeivlas. Las classas superiuras havevan il cudisch da professer Placi Condrau. Il principal era denton la "bibla", il scriver ed il quen.

(1863 igl atun ha Cavelti frequentau il cuors da repetiziun a Cuera ed obteniu l'admissiun. Lu eis el vegnius eligius scolast a Surcasti per 220 frs. plus 20 dil cantun. Staus leu a cuost tier sur Caviezel, dus unviarns. Quei stupent um ha giu gronda influenza sin Cavelti ed ha animau el da studegiar vinavon. Duront las vacanzas ha el pia studegiu latin tier plevon Laim a Lags. Plev. Caviezel ha lu priu in di Cavelti ed ei ins cun el a S. Pieder (Feldkirch) e giu quitau ch'el survegni "costags" el marcau. El ha entschiet cheu cun la II. latina e perfin dau uras privatas ad auters ed aunc fatg la quarta leu. Lu han ils paders gesuits piars leu il gimnasi e salvau ina casa sco scola privata; avon vevan els scola statala. Cavelti fa perquei la Savla el gimnasi dil stadi, la sisavla a Sviz; suenter va el ad Innsbruck cun Simeon, Augustin e pres. Wellinger. Leu ha el studegiu la filosofia; teologia a Cuera. Morts lu a Cuera sco domcantor.)

Collega da Rudolf Cavelti a Tujetsch fuvà lezs onns Fidel Caderas da Ladir. Era quel ha, sin giavisch da pader Baseli Berther, relaschau interessantas notizias davart la scola tuatschina da gliez temps. Denter auter metta el per scret 1907 ch'el era gia in um vegl:

Jeu hai entschiet a far scola a Sedrun 1859/60 e tenui ora 14 unviarns. Per tut ils affons hai jeu fatg scola - sch'jeu sbagliel buc - ils 8 davos unviarns; las notizias ch'jeu vevel giu scret da lezzas uras davart la scola a Tujetsch ein barschadas. Sper la scola superiura, fuv'ei ina scola inferiura, tenuta 1859/60 da Tumaisch Jacomet; 1861/62 da Rudolf Cavelti, ussa canoni a Cuera; 1862/65 da Lucas Cavegn da Rueras. Suenter vegneva tenui a Sedrun sper la scola elementara ina scola tudestga per tgi che leva, mo quella era buca obligatorica. Quell'ei vegnida tenuta da scolast Gion Antoni Soliva e dils caplons sur Casanova e sur Tuor. Avon che jeu vegni a Sedrun veva Gion Antoni Soliva quella scola e suenter mei scolasta Onna Maria Deplazes. - Jeu hai entschiet a far scola a Sedrun cun 200.- frs. - l'aulta paga da quei temps. La mesadad, 100.- frs., pagavel jeu pil cuost. Suenter han ins lu, empau per onn, alzau entochen sin 300.- frs.

Malcontentientscha regeva a Tujetsch, cura che jeu sundel vegnius leu, pervia dils fondos da scola, ils quals la vischnaunca veva priu e pagava als divers vischinadis, tenor scolas e diember d'affons; e quei ei era stau il motiv da duas scolas a Sedrun. Camischolas ha eregiu ina scola mo per buca stuer schar vegnir ora a Sedrun e collectau per in agen fondo da scola etc.

Sgr. Bernhard, president dil cussegl d'educaziun cantunal da lu, ha cun caschun ch'el haveva visitau la scola claustrala, era visitau las scolas da Sedrun e dau a quellas grond laud, cunzun alla romontscha, specialmein el quen. -

Diesch onns, unviarns, hai jeu, ultra dalla scola dil di, era dau scola la sera, a pigns e gronds. -

Da quei temps schavan ins buca scriver cun plemas d'itschal! Dillas dudisch all'ina vevel jeu adina da tagliar ora plemas. Ins haveva lu era negins carnets da quen. Mintga damaun avon scola stuevel jeu scriver quels sin las tablas grondas per mintga classa. Havevel per quei mez cumponiu pensums per mintga classa. Hai fatg biaras translaziuns per auters scolasts che savevan buca tudestg, e quasi mintg'onn purtau in referat sin ina u l'otra conferenza scolastica. Visitavel era bugen las scolas dils auters scolasts.

(Interessantas ein era las sequentas notizias davart ses inspecturs: "miu emprem inspectur ei stau professor Placi Condrau, staus miu professor a Mustér; suenter sur canoni Huonder, medemamein miu professor a Mustér ed era il sur Maurus Desax, plevon a Sedrun da quei temps e lu Gion Mathias Pfister da Schlans, staus miu scolar a Schlans, nua che jeu hai entschiet a far scola. Notizias manuscrettas transmessas a pader Baseli Berther per la biblioteca romontscha Mustér.)

Maria Caplazi che ha dau scola diesch onns suenter Fidel Caderas, ha medemamein relaschau ina partida interessantas notizias davart las scolas da Tujetsch. Ella relata denter auter:

Da 1873 - 74 entochen 1879/80, siat unviarns, hai jeu fatg scola a Sedrun; igl unviern 1881 a Camischolas, sperond che lezza pli leva lavur cun 23 scolars, seigi pli favoreivla a mia sanadad.

Il diember da scolars a Sedrun variava denter 50 - 60; in onn 61 ed in onn 48, reparti sin 7 classas. L'instrucziun ed educaziun da quels carezai affons cun aschi promta obedientscha e sutmissiun, zun attaschai e dalla pli buna veglia enten suandar admoniziuns, cussegls e giavischs, era miu grond legherment. Favori intragliauter cun talents mesauns, han ei levgiu mia lavur, gidau suenter mia inhabilitad entras ualti general buna diligenza, premurada activitad en scola ed a casa. La pli gronda indulgenza e toleranza han tuts cars, buntadeivels cooperaturs dalla scola demussau a mias biaras munconzas e mendas.

Igl emprem onn hai jeu giu 400.- frs. pagaglia, ils quater suandonts 500.- frs. ed ils dus davos onns aunc habitaziun e lenna tiels 500.- frs. Il local da scola era en casa da caplania; per la numerosa populaziun ina stiva bassa, pintga e stgira. Laschond il ludeivel

cussegl d'educaziun miserar in onn ils locals da scola e prescrivend el 4,5 qm³ plaz per affon, ha ei resultau ch'ils mes vevan mo 0,8 qm³ plaz.


Miu antecessur ei sgr. scolast Fidel Caderas da Ladir staus, miu successur scolast Anselm Capeder, avon a Camischolas. Sch'jeu seregordel endretg, ha era Camischolas pagau mia lavur cun 430.- frs. Lezs affons, meins occupai a casa, han demussau cun pintga excepziun ina nunstunclenteivla activitad e diligenza. - A Cavorgia hai jeu fatg scola ils treis unviarns 1898/99 e 1900 cun 8, 7, 6 scolars pulit talentai e zun diligents, mo pauc sviluppai, per gl'auter denton oreifer buns affons."

"Cert, ei ha dau en tuts onns bia anecdotes da rir, mo sai jeu oz buca pli seregurdar da tuttas aschibein e co ellas ein seconstituidas. - D'ina tscheivrila recreaziun sai jeu far menziun Havend il ludeivel cussegl da scola, sco era buns geniturs lubiu in communabel divertiment, havein uns seprofitau da quella lubientscha per gliendisdis-tscheiver. Suenter messa ein tuts scolars vegni en scola, per spitgar ils associats da tscheiver: revendissims signurs farrer Desax e caplon sur Augustin, cussegl da scola, plirs babs e president communal Luregn Jacumet. Cantau ina canzun sil plaz, ei la cumpignia semessa sin viadi a Rueras, cantond e giubilond e menada dils dus pli pigns scolars sco capitani e portabandiera. A Rueras essan nus sereuni en baselgia, cantau ina canzun. Sin nies retuorn fatg il medem a Zarcuns ed a Camischolas. Ils vischins da scadin liug ein separticipai da quella affonila legria, sepustond sin finiastra, sper via per veser ed udir la legra societad. Arrivai a Sedrun circa allas 12, han 2 - 3 siets da buis beneventau la cumpignia. Spir appetit essan nus i ella Cruna per satisfacer a quel cun in bien refrestg. Duront quel han ils affons sedivertiu cun cantar e declamar. In pulit diember da vischins formavan igl auditori. Memia gleiti eis ei stau sera e la legra societad ha stuiu sesparter e sespatitschar.

In onn hai jeu giu in principiant, paupers da talent, e quel hai jeu ditg buca saviu perschuer da far scriver - ord spir buna fei. Aschigleiti che jeu bandunavel el, metteva el greffel e tabla d'in maun, mo steva tut ruasseivels e quiets. Dumandond pertgei el scrivi buc, ei la risposta stada: "Ju stu fa scu la schulmeistra: lezza scriva era bètg!

(Las notizias da scolasta Maria Caplazi, ha pader Baseli Berther ugliu da scriver l'autura. Quella cuorta memoria da scolasta Maria Caplazi, ei vegnida scretta ils 24 da december 1901.)

Tenor las tabellas d'absenza ch'ei avon maun egl archiv communal vegneva pil pli menau ina seriusa controlla dallas absenzas. Quella digl onn 1871/72 dalla scola romontscha cun instrucziun naven dils 25 d'october entochen igl emprem d'avrel noda sigl emprem fegl co menar la controlla.



Moda de nudar en.

- Absenzas d'avon miez di**
- Absenzas de suenter miez di**
- Adsenzas digl entir di**
- Absenzas per malsogna**
- Absenzas per urgents basigns**
- Absenzas cun lubientscha dil scolast**
- Absenzas cun lubientscha dil president**

Interessant ei era l'egliada sil program da scola digl onn da scola 1873/74 a Sedrun che sesanfla egl archiv communal.

Program dalla scola da Sedrun

La scola da Sedrun ha entschiet ils 20 d'october 1873 e finescha ils d'avrel 1874.

Quella ha dumbrau 49 scolars parti giu en 7 classas. A quels ei vegniu cumpartiun instrucziun en sequents roms: ductrina, lungatg, quen, callegrafia, historia, geografia, contabilitat e cant.

I Classa

Ductrina

Lungatg. Legiu el cudisch d'ABC ed ils exerchezis el cudisch secund entochen exercezi 50. Scret silbas, plaids e construcziuns tenor exerchezis dalla emprema secziun el cudisch secund.

Analysau silbas, plaids e construcziuns. Memorisau las historias 8,9,10,11,12,13,14 el secund cudisch ed in per autras.

Quen. Dumbrau 1 – 30 mettend vitier 1,2,3,4,5 e targend giu 1,2,3. Cantau la scala, igl accord e 4 canzuns

II Classa

Ductrina. Priu atras la ductrina el cudisch entochen tiella penetienza.

Lungatg. Legiu el cudisch secund las historias 1 – 26.

Memorisau tuttas. Scret construcziuns tenor ils exerchezis dil cudisch secund. Fatg descripziuns dil: greffel, la lingiala, la tabla, il cudisch, la suppia, la meisa, la pegna, il paun, la tscherescha, il meil, la camischa, il gat, la gaglia, la nuorsa, la caura e memorisau a tabla las historias 8,9,10,11,12,12,14,15.

Quen. Dumbrau ensemen, tratg giu e multiplicau 10 – 100 a tgau ed a tabla cun nominaziun.

Callegrafia. Scret sin pupi en lingia dubla.

Cant. Cantau la scala, igl accord e 4 canzuns.

III Classa

Ductrina. Priu atras tenor il catechismus pign entochen tiella penetienza.

Lungatg: Legiu exerchezis e historias el cudisch secund, el tierz cudisch legiu historia bibla entochen las historias da David e las historias egl appendix. Memorisau quellas tuttas, scret construcziuns tenor exerchezis el cudisch secund e tierz entochen exercezi 20. Fatg descripziuns dil: cudisch, la trucca, la pegna, il paun, la tscherescha, la casa, il tgaun, la caura, il cavagl, il tgiat, la merlotscha, il falien, il luschar, il stgirat, igl elephant, paregliau il meil culla tscherescha, la nuorsa culla vacca, Cain cun Abel e scret e memorisau las historias legidas egl appendix.

Quen. Fatg las quater specias dils numers denter 10 – 10'000 cun nominaziun a tgau ed a tabla.

Callegrafia. Scret sin duas lingias.

Cant. Cantau la scala, igl accord e 4 canzuns.

IV Classa


Ductrina. Priu la ductrina el cudisch pign entochen tiella penetienza.

Lungatg. Legiu historia bibla el Veder Testament entochen la secunda part, ed el niev entochen historia 48. Memorisau ed applicau ellas sin nus sezzi. Scret construcziuns tenor ils exerchezis dil cudisch tierz entochen exercezi 25. Fatg descripziuns e paregliazziuns dils tiers dumiasstis, segal, dumiec e truffel, descret l'occupaziun d'in pur, ils quater temps digl onn, memorisau a tabla historia bibla, fatg ord quella paregliazziuns da Cain ed Abel, Abraham e Noe, David e Moses, Jesus e Josphe e scret 4 simplas brevs. Legiu e raquintau la historia svizra el cudisch tierz e quart entochen Heroismus.

Quen. Fatg las quater specias dils numers entirs da 10 mellis cun nominaziun a tgau ed a

tabla.

Cant. Cantau la scala, igl accord e 4 canzuns.



Emprova da scriver en scartira tudestga dad Ulrich Wigilius Cavegn 1896

V Classa

Ductrina. Priu atras 4 capetels dil catechismus

Lungatg. Legiu bibla e Veder Testament entochen: la secunda part, el Niev Testament entochen: Jesus dat la vesida al tshiec da naschienscha. Memorissau ed applicau ellas sin nus sezzi. Scret construcziuns tenor exerchezis dil cudisch 3 e 4 entochen exerchezis 32. Fatg descripziuns da tiers, dalla fiasta Daniev, temps d'Advent, da Cureisma. Paregliazziuns dils temps digl onn, dil segal e dumiec, ord la historia biblica, descret: tgei ins sto haver e far per survegnir il paun, raquintau a tabla: ils Diablerets, il Grond S. Bernard, ils viandonts claustrals ed il tgaun Barry e scret entginas semplas ... e l'obligaziun sempla.

Quen. Fatg las quater specias da numers entirs e fracziuns ordinarias cun nominaziun a tgaun ed a tabla.

Historia svizra. Legiu e raquintau: Co la tiara vesev'ora dil temps vegl, ils Rets, S.Leci, S.Placi e S.Gallus.

Geografia svizra. Cunfins, surfatscha, Muntognas digl Jura, alpinas e cadeina septentrionala dallas alps.

Callegrafia. Scret en lingia dubla e sempla.

Cant. Cantau la scala, igl accord, tuts intervals e pliras canzuns.

VI Classa

Ductrina. Priu atras 4 capetels dil catechismus.

Lungatg. Legiu historia bibla el Veder Testament entochen la secunda part ed el niev entochen historia 48. Memorissau ed applicau sin nus sezzi.

Scret construcziuns tenor exerchezis da cudisch 3 e 4. Fatg descripziuns: digl Advent e fiasta Nadal, dalla schubradad, obligaziuns d'in flissi scolar, reverenza en baselgia, raquintaziuns ord la historia e geografia svizra, paregliazziuns ord la historia bibla, applicaziuns dalla historia da Cain ed Abel, da Joseph e dallas vertits d'Abraham sin nus sezzi, scret

obligaziuns, quitanzas e divers contracts.

Quen. *Priu atras las quater specias dils numers entirs, dallas fracziuns ordinarias, cun nominaziun, fatg quens d'unitad e priu atras la mesira da praus e corps quadrats.*

Historia svizra. *Priu atras tut la historia svizra egl Eberhard.*

Geografia. *Priu atras tut la geografia Svizra egl Eberhard.*

Contabilitad. *Scret diaris, quens currents, da casada, da cassa.*

Callegrafia. *Scret en lingia dubla e sembla.*

Cant. *Cantau la scala, igl accord, tutts intervals e pliras canzuns cun 2 e 3 vuschs.*

VII Classa

Ductrina. *Priu atras 4 capetels dil catechismus.*

Lunqatg. *Legiu historia bibla el Niev ed el Veder Testament. Scret construcziuns tenor exerchezis grammaticals el cudisch 3 – 4, analisau ellas, scret diversas brevs e contracts, applicau historias biblas sin nus sezzi, fatg cumposiziuns cun ils temas: l'oraziun, reverenza en baselgia, geniturs ed affons, luvrusadad e marschadetgna, obedientscha, schliats cumpogns, misericordia e ranveria, humilitonza e luschezia, fideivladad e perinadad e Dieus il tut sabi e pussent.*

Quen. *Priu atras cun nominaziuns las 4 specias dils numers, entirs, fracziuns ordinarias, decimalas, la regla d'unitad, il miserar planiras da diversas fuormas, corps quadrats e rodunds e quintar ora las mesiras ed il quen da societad.*

Historia svizra. *Priu atras tut las historias egl Eberhard, la separaziun dalla baselgia, igl avat Cristian de Castelberg e cardinal Carli Boromeo el cudisch instructiv da Condrau.*

Geografia svizra. *Priu atras tut la geografia egl Eberhard e la descripziun dil cantun Grischun ed Uri el cudisch instructiv da Condrau.*

Contabilitad. *Scret diaris, quens currents, da casada e cassa.*

Calligrafia. *Scret en lingia dubla e sempla.*

Cant. *Cantau la scala, igl accord, tuts intervals e pliras canzuns cun 2 e 3 vuschs.*

to the Bibliothek
Nipon, Kyoto
1873.



Program della scola de Sedrun.

La scola de Sedrun ha entschiet ils 20 d'October 1873 e finescha ils d'Avrel 1874.

Quela ha Dumbrau 49 scolars parti qui en 7. Classas
A quels ei vegnuu compartiu instrucziun en sequen-
roms: Doctrina, Lungatg, Quen, Callegrafie,
Historia, Geografie, Contabilitat e Cant.

I Classa

Doctrina.

Lungatg. Legiu el cudisch d'A, B, C. et ils exercizis el
cudisch secund entochen exercizi 50. Scret silbas, plaid's
e construcziuns tenor ils exercizis della emprema secquin
el cudisch secund. Analisis silbas, plaid's e construcziuns.
Memorisau las historias 8, 9, 10, 11, 12, 13, 14 el secund cudisch
et in per autras.

Quen. Dumbrau 1-30 mettent vitier 1, 2, 3, 4, 5 e tergend qui
1, 2, 3. Cantau la scola, iql accord e 4 canziuns.

4. Sedrun e Gonda - scola e scolasts

Las casas da scola d'avon 1850

Avon igl onn 1800 ei la scola da Sedrun, ch'era quella per Sedrun, Gonda, Salins, Camischolas, Bugnei, Surrein e Cavorgia, vegnida dada en casa pervenda. Igl εμπrem han ils plevons e suenter ils caplons instruiu entochen igl onn 1849. Cun l'entschatta dil 19avel tschentaner crescha la populaziun. Igl onn 1835 dumbra la populaziun tuatschina 1116 persunas e da quei fuvan 505 persunas ni 43% sut 20 onns.

Quella carschen ha sfurzau da far scola en stivas pli grondas da casas privatas. Aschia ei vegniu instruiu a Sedrun en "Tgès'alva" ed en "Tgèsa dels Monns". Ils plevons e caplons dumignavan buca adina lur pensum d'instrucziun ed ins ha meinsvart pladiu scolasts. Avon 1850 vegnan ils suandonts scolasts numnai ellas plitost munglusas indicaziuns en quei grau: Duri Monn da Sedrun, stalter Tumaisch Beer da Camischolas e Stiafen Monn da Sedrun. Suenter igl onn 1849 han ils plevons e caplons buca pli dau scola. Il davos caplon che ha dau scola a Sedrun ei stau sur Giusep Maria Camenisch. (Mira: Gadola G., sur Giusep Maria Camenisch, Glogn 1931, p. 126 e ss.)



Seniester la casa da scola da 1848

Scola Cadruvi

Damai ch'ins vegn buca perina dad ereger ina casa da scola centrala a Dulezi, sco quei che las instanzas da cumin e la cumissiun da scola vevan intimau, prendan ins en mira da baghegiar la scola, ensemen cun la casa pil caplon, sin Cadruvi da Sedrun. Il grond impediment per la varianta centrala ein ils vischins da Camischolas e Zarcuns stai. Da capir eis ei ch'ils da Cavorgia, muort la distanza, han sez viliu la scola egl uclaun.


Per saver entscheiver cun l'erecziun cumpra la vischnaunca per 255 flurins da Str. Cristian Walentin Caveng sia casa sin Cadruvi.

... Numnadamein stalter Walentin vinda e surdat sia casa ch'el ha sin Cadruvi cun tut quei ch'ei vid la casa: sco tablegiaus, eschas, finiastras e ferradira. Dapli dat el ils tschalers, numnadamein la fravia, ed aunc in auter tschaler pign suten, mo resalva il gang sper la stizun en, per comunicar cun ses nuegls. Dapli concedel da schar baghegiar tenor sco quei ch'ins anfla per basegns ella alzada sura, sura da sia talina ora. Era ha el empermess da dar per la alzada sura plaz per la commoditad dapersei, dapersei dalla commoditad dalla part sut, num ch'ei seschass buca senza grond pregiudezi da far auters baghetgs. ...

Ei era scartezia, pertgei igl onn 1848 ha la vischnaunca saviu pagar mo la mesadad dalla cumpra. L'otra mesadad ha la vischnaunca reparti denter ella e la Cassa da scola e pagau igl onn 1849. Igl emprem document da quella scola ei il contract d'accord per l'erecziun cun scrinari Gion Benedetg Deragisch.

Accort



Ei daventau in contract, denter la cumissiun da scola e meister signur sehelmeister de Ragisch. Il detg sehelmeister de Ragisch interpren da baghegiar si la casa da scola e caplon cheu a Sedrun tenor "Abreiss". La altezia dils cumahs dalla emprema alzada dueigien restar. L'altezia denter ils plantschius tredisch quartas e mesa, la secunda alzada dueigi ver e restar l'altezia da bein dudisch quartas. El giebel l'altezia dallas combras sco ei po en. Ei dueigi vegniu mess si isiarchels a canals e tablegiau las grundas sut si con aissas per "Schirm dil Luft", sco era encunter las lattas dueigi vegnir tablegiau cun aissas. Igl "Überschuss" dueigi vegnir fatgs ch'in sappi metter silatten. Per la sura lavur paga la cumissiun al detg meister in capital da 320 flurins, treitschien e vegn rischuldis e vegn, il qual capital dueigi vegnir pagau duas tiazas sin datun proxim, ed ina tiarza dueigi vegniu dau empau peda,



sche la cumissiun fuss buca el cass da saver pagar tut. Il meister ei obligaus da far la lavur sco ei auda.

Tujetsch ils 3 de Avrell 1848

Joseph Ant. Durgiai Farrer
Johan Jacob Beer, Actuar
Gion benedeig de Ragisch



La skizza per l'erecziun dalla scola

Davart la casas da scola da Sedrun relata igl enconuscent original, scolast Giusep Steiner, en sias notizias surdadas a pader Baseli Berther:

L'emprena casa da scola da Sedrun ei vegnida baghiada 1848. Sia fatschada mira encunter il hotel dalla Cruna. Quella era casa da scola e caplania. Gronds tschalers per caplon e lennas

La stiva gronda da scola ei dil maun encunter sera, gronda e spaziusa, mo baul stgir la sera e tard clar la damaun; ella ei era memia bassa ed aschia en plirs graus malemperneivla.

L'autra stiva per la scola pintga, ha, pon ins dir, negin sulegl. En quella devan ins ils davos onns "scola tudestga". (Cheu fa el aunc la remarca: "Gl'empren ei la scola tudestga vegnida fatga per treis onns da sur caplon G. Gieri Tuor.")

Era il president da vischnaunca veva cheu siu local ufficial.

Il tschaler encunter damaun duvravan ils vischins per metter sut la lenna pil caplon. Cu sur Rageth ha giu baghegiu sia casa odem Sedrun ha el aunc deponiu sia cotgla da scaldar en quel. Il tschaler encunter sera ha surviu als pompieri sco magazin. Avon, entochen 1932, steva il local da pompieri en in baghetg egl ost dalla casa da scola vin Sontget.



Scola Cadruvi entuorn ils anno 1930

Ils scolasts en scola Cadruvi

Scola gronda (entochen 1859 la suletta)

1850-1854	Placi Antoni Bisquolm (stad ed unviern)
1854-1859	Gion Antoni Soliva
1859-1873	Fidel Caderas, Ladir
1873-1880	Onna Maria Caplazi
1880-1887	Anselm Capeder

La scola pintga da Sedrun han dau:

Avon 1859:

1859-1861	Tumaisch Jacomet
1861-1862	Rudolf Cavelti
1862-1864	Lucas Cavegn
Suenter:	Stiafen Schmed
	Gion Antoni Soliva

La scola tudestga han dau:

Avon 1868:	Gion Antoni Soliva
1868-1870	sur Casanova Anton
1870-1873	sur Gieri Tuor
1884-1886	Josef Schuoler, Danis

Scola da lavur

1883/84	«Era ina scolasta per la scola da lavur ha il cussegl da scola pladiu per la scola da Sedrun, numnadamein la giuvna Eleonora Caveng da Sedrun, cun ina paga de fr 18.»
---------	--

Cun l'erecziun dalla secunda casa da scola vi Sontget giudem Gonda, piarda la scola sia funcziun primara. Vinavon vegn la scola duvrada entras la suprastanza communal, sco biro dil president e per sedutas dalla suprastanza.

Secapescha, era pli tard ha la casa Cadruvi aunc fatg survetsch da scola. Ina classa ni l'otra, mo oravontut la scola da lavur ha savens aunc anflau albiert sut sias alas. Ins sesegidava sco ins pudeva e la casa Cadruvi ha mo plaun plaunet piars sia funcziun sco casa da scola.

Igl onn 1948 vegn il sutteran baghegiaus ora en duas localitads. Igl october 1949 affittescha la suprastanza communal quella encunter sera a Placi Beer, cusunz, per in tscheins annual da 415.- frs. pil cuoz da treis onns. Dil reminent vegnan las empremas monduras dalla Societad da musica cusidas en quella localitad igl unviern 1950/1951. Duront ina sesiun 1951/52 ha Placi Berther da Camischolas luvrau ensemen cul Placi Beer. La vart anora surpren calger Alexander Schmid, medemamien pil cuoz da treis onns cun ina annuala summa da 250.- frs. Cun 1952 s'installescha Teofil Schmid ella localitad da siu frar calger e drezza en ina fatschenta da sport, oravontut pil sport da skis. L'Installaziun electrica Sedrun ha giu priu a tscheins in local da 1957 entochen 1959.

Zacu ha ella lu recepiu il revendissim sur caplon e survegniu il num casa caplania. Co ell'ei daventada facultad dalla pleiv san mo ils aungnels. En scadin cass ha la vischnaunca cumprau ella dalla pleiv igl onn 1965 per la summa da 190'000.- frs. e cun las suschnas vidlunder ei la summa aunc carschida per 23'000. - frs. La vischnaunca e pleiv eran in esser, ins prendeva nua ch'ei era e metteva nua ch'ei muncava. Gliez mument settractav'ei da baghegiar ina nova casa pervenda. La habitaziun dil caplon ei vegnida duvrada dils caplons tochen sur Rageth. Cu lez ha baghegiu sia casa odem Sedrun, eis el setratgs en quella. Naven da lu ha la famiglia dil Placi Soliva habitau en quella duront 37 onns entochen tier la reconstrucziun d'ina nova casa Cadruvi igl onn 1977.

Culla cumpra ha la vischnaunca surpriu in affon da pitgiras, ina casa isada e sguardinada. Donn pil bi plaz! Per saver far zatgei ha la vischnaunca cumprau las cumparts e las suschnas annexas. Per ussa ha ella saviu disponer digl entir baghetg.

Ils 16 da mars 1977 ha la radunonza da vischnaunca approbau in niev project e concediu per l'erecziun d'ina nova casa Cadruvi in credit da frs. 420'000.- La stad 1977 ei il venerabel albiert svanius. Pli che in tschentaner ha el dominau e controllau nies Cadruvi. Ella ha viu nos antenats che caminavan a scola e che fagevan vischnaunca. Ella ha viu pompusas fiastas e persecitau burasclusas radunonzas publicas. Bia eveniments han legrau ella da cor, auters han cuntristau ella alla mort. Forsa eisi bien che la veglia casa ei metta. Ella selamentass dalla fuola e dil cadanem hodiern, scurllass il tgau e schess:" Tgei tgaus fasierlis!"



**Casa Cadruvi ils onns
1970**

La scola a Sontget

Sco igl ereger l'emprema scola, aschia dat era il baghegiar la secunda scola da Sedrun bia da paterlar. Puspei stat il liug nua plazzar ella en discussiun. L'iniziativa per l'erecziun vegn dil cussegl da scola cun il motiv da memia pauc plaz. Ils 24 da zercladur 1880 vegn prelegiu sin vischnaunca ina ordinaziun dil Cussegl d'educaziun, ch'il local da scola sin Cadruvi stoppi vegnir engrondius. Ins dueigi ponderar, schebein ins vegli alzar la casa vedra ni baghegiar ina nova. La radunonza da vischnaunca pren il conclus da far plaunsiu cun quella caussa e schar sura alla cumissiun da scola ensemen cun ils geraus da ponderar, tgei seigi la megliera sligiazion per la vischnaunca.

Ins ha buca fatg prescha culla caussa. La radunonza da vischnaunca dil fenadur 1882 anfla primarmein per bien da sligiar il problem da plaz cun nudar aschia el cudisch da protocols:

Sin la brev vegnida tier dil cussegl d'educaziun ariguard la casa da scola a Sedrun eis ei concludiu da rispunder ch'ins vegli mirar da saver ira cun ina classa affons naven da Sedrun e tarmetter a Camischolas e lura mirar sch'ei seschassi buca seregular sin quella moda.

Quella sligiazion ei u buca secumprovada ni buca vegnida acceptada. Cun 1883 entscheivan las preparativas per ina nova scola ed il protocol dil cussegl da scola dat plaid e fatg davart la lavur dil cussegl e d'ina cumissiun.

Il 7 d'october 1883. La vischnaunca era differentas gadas vegnida fatga attenta ch'ella stoppi baghiar ina nova casa da scola per il vischinadi da Sedrun, essend la veglia tuttavia buca sufficienta. La vischnaunca ha aber era adina fatg nuot stem sur da quei e concludiu da baghiar mo cu ella stoppi, schegie che mintga carstgaun cun sauna raschun stueva veser en ch'ei era fetg necessari, muort biaras raschuns da baghiar ina casa.

Il 18 d'uost ha il cussegl d'educaziun tarmess tier al cussegl da scola in memorandum, nua ch'el stimulescha ed obliquescha il cussegl da scola da luvrar ch'ei vegni fatg enzatgei pervia dalla casa da scola. Sin quei ha lura il president da scola purtau avon quella caussa alla vischnaunca e quella ha lura legiu ora ina cumissiun consistente ord il cussegl da scola ed aunc sequents signurs:

1. Vigeli Deragisch da Bugnei
2. Giachen Antoni Soliva da Sedrun

3. Bruno Soliva da Gonda
4. Gion Paul Berther da Camischolas
5. Giachen Antoni Venzin da Rueras
6. Wigieli Venzin da Selva
7. Sep Antoni Hendry da Surrein
8. Luis Hendry da Cavorgia

Quella cumissiun duegi lura luvrar ora in pareri, nua lein tschentar la casa e co far.

Il 27 d'october 1883. Suentermiezdi ei la cumissiun pervia da baghiar la casa da scola a Sedrun stada radunada a Sedrun en casa da caplania.

Buca stai cumpari ein

1. Gion Antoni Cavegn
2. Giachen Antoni Venzin
3. Vigeli Venzin
4. Hans Giachen Decurtins

Suenter quei ch'il president ha giu mess avon la raschun u motiv, pertgei la cumissiun seigi oz cheu, ei la debatta vegnida aviarta sur dalla damonda: Nua ei seigi bein il pli adattau plaz per baghiar ina casa da scola a Sedrun, sinaquei che las scolas da Sedrun e Camischolas savessien vegnir unidas.

Sur da quella damonda eis ei vegniu plidau bia e ditg e differents meinis ein vegni purtai avon.

Tgi leva baghiar la casa da scola en Camischolas e concentrar leu en quella casa lura tuttas scolas, aschia che l'entira vischnaunca savessi prender part vid quella.

Tgi leva tschentar ella a Mira, sinaquei ch'ils affons da Camischolas vessien buca memia lunsch e memia ruh, essend ch'il viadi da Camischolas a Sedrun seigi igl unviern in fetg ruh pass.

Tgi leva baghiar la casa da scola a Sontget e zuar da maun sut dalla via. Quei fussi il pli adattau liug, sch'ins vegli era risguardar ils affons da Bugnei e Surrein. – Era il pli adattau liug muort caussas che stoppien vegnir risguardadas, cura ch'ins vegli baghiar casa da scola. E quei segi:

- a. La scola duegi esser cun la baselgia
- b. Survigilonza. Igl affon duegi far termagl sut survigilonza
- c. Muort la ductrina. Ins sappi buca metter si la grevezia als spirituals d'ira en Camischolas, ni Mira a far doctrina
- d. Muort l'aua
- e. Muort scaldar pegna et etc.

Suenter ina liunga debata eis ei vegniu votau giu e concludiu cun 11 vuschs encunter ina da tschentar la casa da scola vi Sontget. – Quella ina vusch leva baghiar la casa da scola en Camischolas.

Bein aber fan ils 2 commembers dil vischinadi da Camischolas la remarca, che quei duegi esser negin pregiudezi al vischinadi da Camischolas e ch'els vegnien mo stuend ni zunghegiai a Sedrun cun ses affons.

Suenter esser perina sur dalla damonda nua tschentar la casa da scola ei la discussiun vegnida aviarta sur ina outra damonda, numnadamein: Co ni tgei lein baghegiar vi Sontget?

-

Essend aber il temps s'avanzaus, ed essend quei ina damonda da gronda impurtonza, sch'eis ei vegniu concludiu da refierer quella sin ina outra sesiun, sinaquei ch'ins vagi temps e peda da patertgar e meditar sur da quella caussa.

Il 4 da november 1883 ei la cumissiun puspei stada seradunada a Sedrun en casa da caplania.

Absents eran:

1. R. D. Farrer, buca bein disposts
2. Hans Giachen Decurtins
3. Bruno Soliva
4. Luis Hendry
5. Wigieli Wenzin

Oz ha la cumissiun giu da seconcluder sur dalla moda e maniera, co baghiar la casa da scola. Sur da quella caussa revevan era differentas ideas e meinis. Tonaton era ei ualti general meini, da baghiar enzatgei scoiauda, che survessi per tuts basegns, ton per la scola, sco era per auters basegns dalla vischnaunca.

Ina part dalla cumissiun leva unir cun la casa da scola aunc la caplania, sinaquei ch'ins savessi lura vender l'entira casa vedra da scola, ed aschia trer in grond daner. – L'autra part, ch'era la gronda part, leva buca quei, essend che quei vegni in memia grond baghetg, cuosti memia bia e sappi struschamein baghiar solit avunda. – denton ha la cumissiun anflau per bien da schar purtar avon alla ludeivla vischnaunca domisdus meinis e quella sappi lura decider quella caussa sco ella anfli per bien. –

Unitamein ha la cumissiun concludiu da baghiar ina casa da scola cun sequentas stanzas:

1. Giufuns ina stanza per far il turnen; davostier tschalers
2. I^{mo} alzada, da maun sut 2 stivas per las scolas romontschas. Davostier ina stanza per la sprezza e 2 talinas per lenna ni 2 combras secund sco ei drova
3. Il^{do} alzada da maun sut ina stiva per la scola tudestga, ina per il "Civilstand" ed ina per igl "Oberkeit" da vischnaunca. Davostier ina cuschina ed ina combra per il scolast e lura aunc igl arsenal per disposiziun dil genau militar.

Ina part dalla cumissiun leva aunc baghiar ina III^{za} alzada per la caplania, sinaquei che la vischnaunca savessi lura vender l'entira vedra casa da scola e trer en grond daner ordlunder e stuessi buca mantaner 2 tetgs e baghetgs.

L'autra part ch'era la part gronda, ha buca vuliu quei ord motiv che quella casa vegnessi memia gronda, custassi memia bia etc.

Denton ha la cumissiun concludiu da schar purtar avon alla ludeivla vischnaunca domisdus proposiziuns, sinaquei che quella sappi decider.

La damonda, baghiar ord crap ni len, ha la cumissiun era schau sura da decider alla ludeivla vischnaunca. – Alla finala eis ei vegniu surdau al president da luvrar ora in rapport sur dil tractar per mauns dalla ludeivla vischnaunca.

Ils 18 da november 1883. Ei il rapport, daus en dalla cumissiun da scola davart baghiar la casa da scola vegnius purtaus sin vischnaunca, ha aber tuttavia buca saviu cuntentar la vischnaunca. Quella ha manegiau, che quei drovi tuttavia buca in aschi grond baghetg e buca schi bia cuost. Il conclus ei staus, la cumissiun duegi turnar ensemen e ponderar quella caussa aunc inaga ed ins duegi refierer per oz quella caussa.

Ils 29 da november 1883. Aschinavon sco la ludeivla vischnaunca ha nuota giu vuliu saver dil rapport che la cumissiun veva giu luvrau ora, sondern garegiu da turnar a luvrar ora in niev, sch'ei quella vegnida suenter a quei giavisch e luvrau ora in niev. La cumissiun ha concludiu da buca ira vi Sontget cun la caplania, schar quella tscheu neu e las stivas da scola schar per ils differents basegns da vischnaunca. Tonaton duegi vegnir baghiau vi Sontget enzatgei scoiauda. – Igl ei vegniu concludiu da baghiar las medemas stanzas e combras sco igl ei vegniu stau concludiu en la II sesiun, mo dar auters nums.

Per luvrar ora quei rapport ei signur Gion Andriu Berther vegnius destinaus.

Ils 16 da december 1883. Ei il niev rapport, daus en dalla cumisiun da scola, davart baghiar

la casa da scola, vegnius purtaus avon alla ludeivla vischnaunca, la quala ha anflau quella ga aunc suenter enqual remarca, da dar l'approbaziun. Sin quei ha la ludeivla vischnaunca lura legiu ora ina cumssiun da treis commembers: R.D Caplon Thomas Berther, sco president, signur Gion Andriu Berther e Duri Berther, Zarcuns, meister e surdau a quella tut il menaschi.-

Il 10 da schaner 1884. La sera ein ils 3 commembers, als quals la ludeivla vischnaunca ha schau sura il baghiar la casa da scola, stai radunai a Sedrun. Igl ei vegniu concludiu da far pinar la lenna il fevrer. - Davart il plan per la casa da scola han ils 3 commembers buca pudiu vegnir perina, essend che Gion Andriu e Duri Berther manegiaven d'esser sufficient cun in plan che nus fagein giu, caplon aber era cun quei tuttavia buca cuntents e garegia ch'ei stoppi vegnir fatg in plan bein e scuoiauda, ch'ins sapi tgei ins vegli e tgei ins vagi da far. Suenter liunga e viva debatta eis ei vegniu concludiu da ver plaid e cussegl en quella caussa cun signur inspectur Disch.

Il 25 da schaner 1884. Ei vegniu dau ora la lenna per baghiar la casa da scola. Era ei quei di schon ed il di suenter vegniu pinau lenna.

1884. Davart il baghiar la casa da scola ei vegniu tractau e plidau bia. Il destinau comite ha giu schau far in plan suenter il conclus da vischnaunca. Mo staus quel inaga, sche eis el sin luvrar d'entgins malvugli, puspei vegnius bess per il tempel en. Sin quei ha il president da quei comite dau giu sia demissun e sedeclaraus ch'el vagi marveglias nuot pli.- Igl ei lura vegniu puspei ina nova cumissiun e fatg novs plans differentas ga. Aber la cumissiun ha puspei priu ina demissun ed aschia eis ei iu pliras ga. Il plans ein era puspei vegni bess. Finalmein ei vegniu mess ella cumissiun:

- 1. Duri Baptesta Berther da Zarcuns*
- 2. Statalter Gion Paul Berther da Camischolas*
- 3. Statalter Stiafen Beer da Gonda*

Quels han perinaga acceptau lur nomina ed era luvrau vid in plan. Co e tgeinin ei aunc oz buca enconuschnet al president da scola.

Els protocols dil cussegl da scola calan las indicaziuns pertuccont la casa da scola. La sura quarta cumissiun en caussa vegn a frida cun lur lavur da preparaziun e la rdunonza da vischnaunca decida il 28 da settember e lu il 12 d'october 1884:

Ei concludiu da baghegiar la casa da scola sco quella da Mustér e far ella da lenn tenor vegls conclus ed il destinau comite dueigi mirar che la lavur mondi vinavon.

Il 12 d'october 1884 ei vegniu il rapport dil comite dalla casa da scola che la casa da scola da Muster hagi negina cuschina e habitaziun per il scolast; ei oz concludiu a Rueras che la casa da scola duegi vegnir fatga da lenn, las stivas tschentadas ina sur l'autra ed ils necessaris cumahs per habitaziun da scolast cun cuschina etc. dueigi il comite metter tier tenor commoditad e basegns.

Igl architect cantunal Ne(ä)scher da lezzas uras sto haver presentau in plan che preveva da baghegiar ina casa da crap. In auter plan fuva per ina casa da lenn. U crap ni lenn - quella damonda ha caschunau gronda discussiun sin pliras vischnauncas. La pluralitad fuva dil meini, ch'ina casa da crap seigi memia freida. Ins vul la casa da lenn e sedecida la finala da far mir mo dalla vart dil stradun per segirezia encunter fiug. La casa duei obtener duas stivas da scola ina sur l'autra e da l'autra vart las commoditads, duas cuschinas e habitaziuns per ils scolasts. La construcziun dil tetg era previda da setener vid la pratica usitada en la val cun duas alas tetg drizzadas viers sid nord. Il

co en lezs graus vegn surschau alla cumissiun.

Il scrinari e meister Gion Battesta Schmid ha denton tschintschergnau si in tetg da crusch alla cumissiun ed aschia ei naschiu in tetg buca gest unitars cullas casas da Tujetsch. Tochen 1908 han slondas cuvretg il tetg. Quellas ein lu vegnidas cuvretgas ina secunda gada cun slondas ton ch'ei ha dau in tetg dubel da slondas. Gia tschun onns pli tard offerescha il cantun 30% subvenziun per remplazzar las slondas cun stuors. Schegie ch'il tetg cun bunamein novas slondas vess aunc surviu 20 tochen 30 onns, ei la lavur vegnida executada. Forsa ha era la segirtad encunter fiug motivau a quella midada.

Igl onn 1886 vegn ei finalmein entschiet a baghegiar e per igl onn da scola 1887/88 ei il niev baghetg preparaus.

La lavur da lenn ha il scrinari Gion Battesta Schmed, oriunds da Mustér, mo sesents ad Andiastr, giu surpriu. Tuttas lavurs han custau las suandontas summas:

Ils cuosts per baghiar la casa de scola de Sedrun en ils suandonts

<i>Pil plan della sura casa</i>	<i>fr.</i>	200.00
<i>Pil sulom – fests 80 a 7 fr porta</i>		560.00
<i>Per 84 salmès caltschina a 8 fr porta</i>		652.00
<i>Per resgiadiras per 3 onns</i>		302.70
<i>Per Lavurs de Maridurs</i>		1474.00
<i>Per Tetg</i>		200.00
<i>Per Lavurs de Maisters</i>		3450.62
<i>Per Glas e faradira</i>		767.70
<i>Per Lavurs de spenglers</i>		225.60
<i>Per las 4 pagnias</i>		380.00
<i>Per Lavurs de Malters</i>		276.00
<i>Per Lavurs de fravis</i>		154.30
<i>Per manadiras de glas, faradira etc</i>		155.76
<i>Tutta lena duvrada tier la sura casa</i>		1440.00
<i>820 manadiras sco lavurs Cumina, per mana tier lena, crapa etc. a fr 5 per um e bof fa</i>		100
<i>Tuttas schurnadas, sco lavurs cuminas senza bos a 2.40</i>		3185.00
<i>Lavurs de taglia crapa</i>		70.00
<i>Total</i>		17'593.68



Il zennet dalla scola Sontget

**Inscriziun: GEGOSSEN VON GEBRÜDER GRASSMAYR
FELDKIRCH 1874**

Reliev: Sogn Marcus, evangelist

(Sesanfla oz en sala dalla Tgèsa communal.)

Co sepresentava ussa la nova casa da scola

El sutterran sesanflavan la sala da teater ed ina cella cun garter per eventuals sfarfatgs. El plaunterren ed ella emprema alzada ecunter sid las duas stanzas da scola. Encunter nord duas habitaziuns pils scolasts, consistent d'ina stiva, combra da durmir, cuschina e tualettas. El plantiu sesanflavan treis combras da durmir pils affons dils scolasts. Pli tard ein las duas habitaziuns vegnidas baghegiadas entuorn en stanzas da scola. La cuschina el plaunterren ei vegnida mantenida vinavon e vegneva duvrada dil talper. Quel habitava ina combra el plantiu. En scola veva el era il depot da fallas e tut siu inventari da mistregn. Per onns ein las talpas stadas ina vera crusch e mulesta. Il talper vegneva eligius dalla vsichnaunca e veva ina ordvart impurtonta funcziun.

Igl εμπrem onn da scola a Sontget

Dumengia, ils 16 d'october 1887 ei la nova casa da scola vegnida benedida e collaudada. Suenter viaspras ein ils affons, alla testa la musica e cullas duas bandieras dils affons entuorn igl ornau crucifix, tratgs dalla vedra casa da scola vi ella nova e leu ha giu liug la cerimonia dalla benedicziun sut participaziun digl entir pievel cun in commensurau plaid dil president da scola e cun concert da cantadurs e musicants.

Aschilunsch il protocol dil cussegl da scola. L'auter di, ils 17 d'october 1887 ha igl εμπrem onn da scola entschiet en quella casa.

Quei onn possedeve la vischnunca tschun scolas cun sis partiziuns, a Sedrun duas e mintgamai ina a Cavorgia, Camischolas, Rueras e Selva. La scola romontscha a Sedrun dumbrava 46 scolars e la tudestga 20. L'entira vischnunca dumbrava en tut 129 scolars e scolaras. Il cussegl da scola viseta silmeins sis gadas las scolas dalla val; la scola tudestga cun la participaziun digl entir cussegl e tuts scolasts! Suenter ei vegniu teniu in referat da scolast Josef Schuoler. Ils 26, 27 e 28 da mars 1888 han giu liug ils examens.

Mars 28: Avonmiezdi examen en la scola romontscha a Sedrun, suentermiezdi ella tudestga, sut participaziun dil cussegl da scola, dil plevon e biars geniturs. Dapertut cuntenteivlas prestaziuns.



Scolast Gion Antoni Deragisch cun la scola superiura da 1893/94

Il baghetg duvrava fetg bia lenna per scaldar las stanzas da scola e quei fagevan ils gronds burers lenna dadens scola endamen ni las uras da lavur cumina. E cons scolars han sevilau inaga u l'otra da stuer purtar lenna da pausa enstagl saver sturnegiar. Per spargnar cuosts fuva era il scuar la sera las stanzas ina pauc emperneivla lavur per las scholaras. Conta puorla che beinenquala ha laguttu cun quels plantschius vegls e conta da quella che restava sternida tscheu e leu aunc per gl'auter di! Per igl onn 1931/32 ei vegniu pretendiu dal scauldapegnas d'era scuar ils locals. La suprastonza communal surdat quella lavur, aschia igl onn 1949 a Sebastian Monn, che ha fatg quella lavur duront decennis. Il nuder noda en quei connex:

La suprastonza ei denton dil meini da far cun signur Sebastian Monn in contract el qual ins fa attens el da spargnar lenna, da buca duvrar petroli, sco era da calar da sgiavlar e zundrar. Vegn signur Sebastian Monn buca suenter a quei contract, vegn tratg giu ad el 40.- frs. e restass mo 300.- frs.

Igl onn 1917 havess ins denton gleiti fatg dar ensemen la casa. En la sala suten havevan ins giu tschentau gia all'entschatta ina detga petga amiez la sala per sprunar e francar quella. Mo quella fuva specialmein en peis per las produziuns da teater. Perquei han ins priu ora ella. Gia quei unviern, mo principalmein 1918/19, han las nevadas mudergiau il baghetg da tala maniera, ch'ins ha stuiu surdar a scrinari Vigeli Beer da rinforzar e segirar puspei il baghetg avon ch'el sfrachi ensemen. Signur Vigeli Beer ha capiu stupent da far quei, aschia che la casa ei restada entochen 1975 senza caschunar disgrazias. Mo da quei temps derivan era las sluppadas e caneras ch'ins udeva beinduras suenter en quella casa. Da cheu derivan era las praulas ch'ei seigi striegn en quei baghetg. Beinenqual ha giu tema da notg en quella casa.



Scolast Toni Hendry e sur Giachen Antoni Fetz cun la scola superiura

Ils dus locals da scola fuvan per da lezzas uras ualti gronds. Tuttina ein els era vegni in di stretgs. Igl onn 1914/15 haveva il scolast Gion Antoni Schmid 60 scolars en las empremas quater classas e paga - ca. 500.- fs. Il diember dils scolars ei culs onns carschius ch'ins ha cul temps era aunc duvrau ils dus locals da maun sura per stanzas da scola. Sco habitaziuns per ils scolasts fuvan els vegni duvrai da paucs scolasts. Dad in scolast vegn ei raquintau ch'el havevi mess si ina damaun castognas da cuer. Quellas fuvan lu ina rara spisa. Mond in ni l'auter scolar mintgaton sin cuma, hagi el cumandau d'ir en cuschina e metter in lenn ni dus en la platta. Vulend denton da miezdi derscher giu las castognas, hagi el anflau paucas da quellas pli en la cazzetta. Suenter hagi el adina


cuschinau persuls. 4 onns, 1896 - 1900, ha Signur Adolf Cavegn giu la habitaziun suten duront ils onns ch'el ha baghegiu sia casa.

Il pli malemperneivel e malcumadeivel local fuva bein la sala suten, pintga e freida. E tonaton, contas produenziuns da teater ein vegnidas dadas en quella e cun fetg bien success. Specialmein il capavel regissur Felici Monn ha cun ses giugadurs exercitau e - schelau tschiens e tschiens uras en quella "tauna". El ha luvrau atras cheu stupents dramas, schi stretg e malengrazieivel sco ei fuva en quella sala. Per ses tocs teater sco Garcia Morena, ils Heroxs da Nidwalden, la Garda svizra, Venanzius ed aunc auters tocs stueva el mesirar giu beinduras sil centimeter il plan per las roschas giugadurs che fuvan inaga u l'autra sin la tribuna.

15 d'avrel 1962. Per il project baghegiar ora la casa da scola veglia a Sedrun en casa da vacanzas vegn dau il necessari credit e competenza alla suprastonza da schar far in plan surlunder. Il meini ei denton sche ins vul baghegiar duei ins far quei endretg. La causa ei denton pli tard da rapportar alla vischnaunca.

La casa da scola a Sontget, da sias uras in baghetg che astgava semussar, ha oz per ina roscha motivs fatg ses survetschs. Dapi igl onn 1962 che la novissima casa da scola ha aviert sias portas per tut il scolaesser da Sedrun, ha la casa a Sontget surviu mo pli per biros e magazins dalla Installaziun electrica Sedrun dapi 1964 e dall'Uniun da cura e traffic. Omisduas uniuns han ussa anflau adattai locals en la nova casa communal baghegiada dasperas. - 1975 vegn la casa communal erigida e la casa da scola vegn fatga giu!

En 76 onns han ina biala roschada d'affons empriu cun pli gronda ni pli pintga premura, ein segli entuorn ed han sturnegiau, ein sediverti e beinduras era sescagnai. La scola ha fatg plaz a parcadis e sut quel en sesanflan ils locals publics da schurmetg.



La scola a Sontget ils anno 1930

Barla Berther (1917-2005) ha giu descret suandontamein la scola a Dulezi: "Quei era ina scola semplia, fetg semplia. Ei era ina scola da pauca valeta, freida cun terments corridors. Da quels

mav'ins igl unviern en palas viaden. Per l'otra veva ei scalas da lenn che fagevan ina enorma canera. En las stanzas da scola era ei en bauns ch'ins seseva en treis ni quater, buca sco oz dus. Sisum il baun era ina ruosna el baun per la tenta. En ina stanza eran circa 30 - 40 affons, il bia treis classas. Quei era fetg sempel, sch'ins vul dir la verdad."

•••

Ei suonda ussa cheu aunc ils nums da tuts ils scolasts e scolastas che hau dau scola duront quels 76 onns en la scola a Sontget. L'entschatta ei stada sufficienta cun dus scolasts, in per il scalem elementar e l'auter per la scola tudestga. Culs onns creschan il diember d'affons. Ei vegn creau ina secunda partiziun cugl unviern 1920/21 e plitard ina tiarza igl onn 1941 e lu 1961 ina quarta.

Scalem primar

Baseli Hosang, Segnas	1887 – 1890 cun 46 scolars
Josef Schuoler, Danis	1887 - 1889 cun 20 scolars
Gion Batt. Venzin, Mustér	1891 - 1893 scola superiura
Gion Antoni Soliva, Sedrun	1891 - 1896 scola inferiura
Gion Antoni Deragisch, Bugnei	1894 - 1898 superiura
Giachen Antoni Pally, Camischolas	1897 scola inferiura
	1910 - 1912 puspei scola inferiura
Anselm Capeder, Rueras	1898 scola inferiura
	1899 - 1906 scola superiura
Jakob Camartin, Breil	1899 - 1902 scola inferiura
Gion Benedetg Derungs	1903 scola inferiura
Eusebi Cavegn, Breil	1904 - 1908 scola inferiura
	1909 e 1910 scola superiura
Gion Batt. Durschei, Segnas	1907 e 1908 scola superiura
Duri Riedi e Stivet	1909 inferiura
Paul Livers, Breil	1911 - 1916 scola superiura
Gion Antoni Schmid, Cavorgia	1913 - 1928 scola inferiura
Tumaisch Venzin, Sedrun	1917 - 1924 scola superiura
	1929 - 1956 scola inferiura
Cristian Bass, Sumvitg	1920 e 1921 scola mesauna (stau mo quels dus onns treis scolas)
Gion Michel Peder, Selva	1925 - 1928 scola superiura
Toni Hendry, Cavorgia	1929 - 1945 scola superiura
	1946 - 1961 scola mesauna
Felici Hendry, Cavorgia	1941 - 1945 3. e 4. classa
Teofil Schmid, Sedrun	1946 - 1956 scola superiura
	1957 - 1961 1. e 2. classa
Leci Jacomet, Sedrun	1957 - 1960 scola superiura
Vigeli Venzin, Sedrun	1959 e 1960 secunda mesauna
Paul Deplazes e siu fegl	1961/62 scola superiura
Pia Caviezel, Sumvitg	1961/62 secunda mesauna

Scola reala, secundara

Ludovic Hendry, Cavorgia	1950 - 1958
--------------------------	-------------

La scola tudestga, pli tard (dapi 1908) la scola reala han dau:

Josef Schuoler, Danis	1887-1889
Gion Antoni Soliva	1874-1875
Stiafen Schmed, Sedrun	1889-1890

Scola da lavur

Genoveva Bearth	1899 - 1901
Elisabeth Beer	1901/02 - 1907
Christina Soler	1909/10
Genoveva Monn	1916/17
Mariuschla Monn, Sedrun	1921/22
Cristina Pally	1922/23 - 1924
Barla Catrina Capeder	1928/29
Maria Urschla Berther	1929/30 – 1938
Jenal	-1961



Scolast Toni Hendry cun la mesauna 1950/51



Scola Sontget, igl onn 1968

La scola Sontget vegn spazzada 1975



sid/ost



nord/vest



sid/ost



vest/sid

La scola da 1962

La carschen dalla populaziun ha giu per consequenza ch'il baghetg da scola ei tec a tec vegnius memia pigns. Denton era l'infrastructura metteva en damonda gl'entir baghetg. Ei muncava la sala da gimnastica, localitads per l'instrucziun da cuschinar e scola da lavur. Insumma la necessitad da far midada era pli che dada. A Camischolas fuva la reala, era cun problems da plaz, stuend untgir ora a Sedrun ni Rueras.

Dil svilup a l'erecziun d'ina casa da scola a Sedrun ed a Rueras plaidan il meglier ils protocols da vischnaunca. En numerusas radunonzas ei vegniu discussiunau pulitamein. Meinsvart ei quella tractanta stada ualti viva e liunga.

22 da schaner 1956. Sco quarta tractanda ha signur president da metter avon ina buca meus impurtonta caussa, numnadamein quella da reconstruir, baghegiar novas casa da scola a Sedrun e Rueras. Vid quellas damondas han ins patertgau gia avon onns, mo adina refretg per tema dil finanziar. Oz entras l'explotaziun dalla auas quantan ins haver ord quellas entradas annualas che lubeschan da finanziar e baghegiar novas casas da scola tenor basegns, senza stuer engraviar ils vischins.

Il president prelegia ina brev digl inspectur e dil cussegl da scola Tujetsch. Omisduas instanzas insinueschan seriusamein la vischnaunca da patertgar e dad el proxim temps prender a mauns la reconstrucziun, respectiv il baghegiar novas a Sedrun e Rueras. ... Scolast Tumaisch Venzin s'exprima en in pli liung exposé dalla necessitad da reconstruir casas da scola e da sche pusseivel tschentar quellas en loghens suleglivi. Mo era en ils locals da scola sco tals munglassi il sulegl dalla carezia sclarir.

Era ils auters votums, genau Cristian Berther, ils cusseglers da scola Giusep Monn-Flepp e Giachen Martin Valier, genau Benedetg Deflorin e Benedetg Valier recamondan a raschun dalla necessitad e dalla prevedida meglia situaziun finanziaria dalla vischnaunca da el proxim temps reconstruir, respectiv baghegiar scolas novas a Sedrun e Rueras.

Principalmein a Rueras seigi grond basegns.

Era signur derschader Alfons Berther ei dalla medema idea. Gia avon entgins onns hagien ins entschiet a tschentar in fondo per quei intent. Quel vegni denton entochen oz buca ad esser sviluppaus fetg e munti probabel buca sin in grond capital.

Signur Baseli Monn recamonda che cura che quellas casa da scola vegnien baghegiadas metter buns survegladers dallas lavurs.

Signur genau Teofil Schmid anfla ch'ei seigi per quella damonda necessari dad eleger ina cumissiun che studegia e ponderescha quella caussa sco era co e nua ins vegli baghegiar talas e rapportar surlunder alla vischnaunca. La vischnaunca va d'accord cun quella proposiziun e vegn eligiu per quei intent ils suandonts:

1. La suprastanza communal

2. Ils commembers dil cussegl da scola cun aunc trer tier ils signurs derschader Alfons Berther, Luis Hendry, capo-lingia e scolast Tumasich Venzin.

23 da settember 1956. Il president Placi Jacomet dat rapport sur dil luvrar dalla cumissiun stada eligida en caussa baghegiar scolas novas a Sedrun e Rueras. Sin giavisch dalla cumissiun seigi ils 23 d'avrel 1956 signur cusseglie guvernativ Theus, schef dil departement d'educaziun cantunal e signur inschigner da baghegiar cantunal Lorenz cun signur inspectur da scola Bundi stai sils plazs preparai per ils suloms da scolas per dar giu lur pareris. Tenor lur rapport en scret seigi il sulom a Rueras adattaus. Quel a Sedrun recamondan els sin la squadra Dulezi.

Sin quei pareri vegn ina delegaziun tarmessa a Cuera tier monsignur uestg per secunvegnir cul Dulezi. Mo nuidis vegn monsignur suenter a lur giavisch e dat il consentiment da ceder giu 70'000 m² dil Dulezi per 10.- frs. il m² ni 70'000.- frs. Quei ei stau secunvegniu mo a bucca. Tenor rapport en scret pretenda el lu pli tard minimum 80'000.- frs. per quels 70'000

m². Il sulom a Rueras ei il frust da vieua Onna Maria Caduff viasi Las Sorts. Mesira circa 520 fests. Per quei marcau stattan treis variantas avon maun. Recumandau dalla cumissiun vegn varianta 3 nua ch'il frust cuosta 40.- frs il fest.

Ils vischins da Rueras pretendan entras ina iniziativa suttascretta da 64 vischins, che la scola reala vegni a restar sco entochen ussa a Camischolas. En ina brev da sexculpaziun per la radunonza dalla cumissiun dils 17 d.q. recamonda il president dil cussegl da scola, sur Schuler, ina a Rueras.

Cun quei ei il rapport da signur president alla fin, ed el arva la discussiun en caussa, la quala ei fetg viva. Buca ils suloms dattan la gronda discussiun, mobein las scolas realas. Plis signurs sustegnan l'iniziativa da Rueras. Era signur Felici Schmid sustegn tala, cun la moziun ch'il dretg sulom per la scola inferiura da Sedrun fussi sut la scola vedra, ed era fussi ei da studegiar da lu far ord la scola vedra cul temps ina casa per glieud veglia.

Signur Francestg Berther anfla la caussa buca aunc madira e propona da per oz refierer quella tractanda. La tscharna decida denton da tractar oz vinavon ella.

Primarmein vegn il sulom per la scola a Rueras tractaus. Havend varianta 3 aunc l'annexa che di, ch'il vegl proprietari hagi vianvon il dretg da segar giu gratuit il regress entuorn scola, vegn quei strihau ed igl entir frust vegn entras tscharna cumpraus per 40.- frs. il fest. Il tractar vinavon la caussa scola reala vegn concludiu dad ad interim refierer.

21 d'october 1956. Passan ins tier la davosa, denton delicata tractanda, il secunvegnir cun las scolas realas. Per orientaziun prelegia signur president la risposta dil departement d'educaziun cantunal, il qual sclarescha giu davart il subsidi. Tal per baghegiar vegn ei dau, sche las scolas realas vegnan omisduas baghegiadas ensemen a Sedrun ni a Camischolas. Per ina a Sedrun e l'autra enzanua auter vegn dau negin subsidi. Il subsidi per ils scolasts denton vegn dau nua ch'ellas vegnan.

Dapli prelegia el la proposiziun dils vischins da Camischolas, ils quals ein per tener la scola reala leu. Era ils vischins da Sedrun admettan lur conclus en scret e pretendan las scolas realas en in bloc a Sedrun. Vegness ei denton mo ina a Sedrun, sche pretendan els ch'ei vegni igl emprem sclariu giu nua ella vegni, e ch'ei vegni priu si avon che decider nua, ina calculaziun dils cuosts per tuttas scolas novas.

Finidas quellas prelecziuns vegn aviert la discussiun en caussa. Signur. president exprima ch'el mantegni siu emprem meini ed economicamein sco finanziamein audien las scolas a Mira. Gerau Toni Hitz dat sclariment sur dil conclus dils vischins da Rueras, nua ch'els han concludiu da mantener la scola a Camischolas. Fuss quei buca il cass, sche giavischassen els ina a Rueras. Ils signurs Tumaisch Schmid e Christian. Berther, anflan era che igl adattau plaz seigi a Camischolas. Signur scoalst Tumaisch Venzin ei per la scola a Mira e propona da refierer per saver vegnir suenter allas proposiziuns dils vischins da Sedrun.

Entras tscharna vegn concludiu da refierer per ponderaziun dil sulom e dils cuosts.

9 da december 1956. Signur president orientescha la radunonza sur dil curriu e passau en caussa scolas novas. Sco stau schau sura seigi el semess en contractivas cugl inschigner cantunal Lorenz, per schar far in plan e calcul provisoric, il qual seigi momentan aber buca caussa pussevla. Era la cumissiun per sulom a Camischolas hagi entochen oz aunc giu pauc success. La caussa vegn messa en discussiun, principalmein schebein ins vegli tractar oz vinavon e tgei. La discussiun tila ualti alla liunga e croda da tuttas sorts proposiziuns. Tgi da decider oz nua las scolas realas vegnien, auters da decider mo schebein ins vegli baghegiar ellas sut in tetg ed auters da concluder da far vinavon cun quella a Rueras. Il menar vinavon il baghegiar tala vegn dau la plenipotenza alla cumissiun, aschi gleiti sco ella hagi enta maun il pareri dils vischins da Rueras davart las localitads.

20 d'october 1957. Davart la moziun dil baghegiar scolas sclarescha signur president il

semover d'entochen ussa. Ils plans en detagl per la scola da Rueras seigien tarmess en alla regenza per la damonda da subsidi. Ils schar far ina calculaziun dils cuosts per las ulteriuras scolas seigi dau sura. En num dalla cumissiun engrazia signur Benedetg Valier per l'orientaziun.

12 d'avrel 1959. *Signur president orientescha la vischnaunca sur dils projects da scola presentai da signur architect Maissen per Sedrun e Camischolas. En disposiziun stattan 5 variantas. La scola reala a Camischolas custass 275'000.- frs. La scola primara a Sedrun 940'500.- frs. La scola reala e primara ensemen 1'171'500.- frs. Havend orientau il sura, exprima signur president era il meini dalla cumissiun, la quala stetti en fetg per baghegiar la scola a Mira sur il stradun e la sala dapersei. La discussiun tila fetg alla liunga ed ei per part fetg interessanta. Generalmein vegn il meini dalla cumissiun sustenius ed ei vegn concludiu da tractar sin ina proxima radunonza da vischnaunca, nua ch'ei dueigi vegnir fixau definitiv il plaz.*

19 d'avrel 1959. *Tenor conclus da l'anteriura radunonza da vischnaunca havein da decider oz nua plazzar la nova scola a Sedrun, sco era la scola reala. Arvend signur president la discussiun, vegn fatg da tala stedi diever e principalmein proponiu da baghegiar a Mira sur via. Menond la discussiun empau en confusiun, vegn votau giu schebein ins vegli tractar oz quella caussa ni aunc inaga refierer per reponderaziun. La tscharna decida da tractar oz. La secunda tscharna decida da baghegiar a Mira sur via en in bloc, scola primara e secundara e schar sura alla cumissiun da preparar entginas variantas cun prezi e mesira e lu metter avon sin vischnaunca. Empau discussiun dat la sala. Il cura e nua baghegiar stauscha bravamein encunter difficultads. Ei vegn concludiu da baghegiar ella sil pli tard igl onn che la scola nova va encunter la fin, il nua aunc ponderar.*

14 da zercladur 1959. *Sulom casa nova da scola Sedrun. La suprastanza sa presentar duas variantas da sulom. Ina dadens casa da Curschellas, Mira e l'autra sur la resgia da Heinric Schmid. Per sedecider vegn scrutinau. Sco dumbvuschs vegnan eligi: signur president Placi Jacomet, gerau Toni Hitz, Baseli Huonder, Sigisbert Giossi e Gaudenz Cavegn. Resultat dil scrutini: Dau giu 202 vuschs. Dadora 116 vuschs, dadens 86 vuschs. Aschia decida il pli da baghegiar la scola sur la resgia da Heinric Schmid.*

28 da zercladur 1959. *Concediu 12'000.- frs pil mobiliar dalla scola da Rueras. En la cumissiun per baghegiar casa da scola e sala a Sedrun vegn proponiu ed eligi, ord la suprastanza communal signur president Christian Berther, vicepresidente Gion Crisost Caduff. Plinavon: signur Flurin Caduff, Alfred Decurtins, Battista Vinzens e Vigeli Beer, scrinari.*

26 da fenadur 1959. *Per las preparativas dall'erecziun dalla scola nova a Sedrun vegn dau alla cumissiun il dretg da far ils necessaris cuosts.*

6 da settember 1959. *Sulom sala da gimnastica Sedrun. Presentau vegnan treis variantas da sulom. Ina Drun, l'autra Dulezi e la tiarza Gonda, plaz casa da scola nova. Suenter entgina discussiun decida la tscharna da desister dil plaz sin Gonda nua che la casa da scola vegn baghegiada e refierer la damonda nua baghegiar sin pli tard per ponderaziun.*

6 da december 1959. *Essend il sulom cumpraus per la nova casa da scola Sedrun buca sufficientes damonda la suprastanza per la cumpetenzza d'astgar cumprar giu aunc circa 400 fests. Entras tscharna dat la radunonza da vischnaunca alla suprastanza e cumissiun la*

cumpetenza da cumprar ils 400 fests dumandai, sco era aunc ulteriur spazi per quei intent sch'ei fa basegns.

17 da schaner 1960. Signur president dat entgin sclariment sur ils cuosts per casa da scola Sedrun. Cumpriu sulom, mobigliar, vias ect. possi quella vegnir sin circa 1 ½ milliun. Signur inschigner Merz declara aunc inaga tuts models e recamonda, sco era la suprastanza e cumissiun d'approbar il project nr. 12321. Dalla discussiun fan plirs vischins part cun differentas objecziuns. La suprastanza cun la cumissiun proponan ultra dil sura project aunc alla radunonza da vischnaunca in credit dad 1 ½ milliun. Signur Clemens Berther fa la proposta da creditar mo 1 milliun. Ins passa alla tscharna che decida per project 12321 e da dar in credit dad 1.5 milliuns. Damai ch'ils num dils architects dils different plans ein secrets, vegn la brev cun la numera 12321 aviarta e prelegiu il cuntegn. Cheu seresulta ch'il plan e model dalla numnada numera appartegn a signur architect Carl Beer, Turitg.

9 da matg 1960. Sulom sala da gimnastica Sedrun. Suentar in detagliu sclariment entras signur president vegn il conclus dils 6 da settember 1959, che plaيدا da buca baghegiar la sala sin il plaz dalla scola nova ruts entras ina tscharna quasi unanima. Secunda tscharna decida da baghegiar sur il plaz scola cun schar sura alla supratsonza e cumissiun nua tschentar ella. Plinavon vegn era dau la libertad da sestuschar cun il sulom.

10 da fenadur 1960. Orientaziun sur dil project da scola nova a Sedrun. Signur president Christian Berther orientescha sur il volumen dils baghetgs, sco era sura dalla calculaziun dils cuosts che muntan oz ina summa da 2'600'000.- frs.

La cumissiun da baghegiar en uniu cun la suprastanza communal proponan alla radunonza da vischnaunca dad approbar il project sco mess avon.

Signur architect Beer engrazia per la confidanza demussada ad el sco burgheis da Tujetsch e dat ina clara ed entelgeivla orientaziun digl entir project, sur dalla calculaziun dils cuosts ed era daco quels ein carschi aschia dapi il schaner vargau.

Per la cumissiun da baghegiar plaيدan ils signurs Schmed Aluis e Decurtins Alfred ed omisdus recamondan dad approbar il project sco el ei mess avon denton spargnar ton sco pusseivel enten dar vi las lavurs. Plinavon fan part dalla discussiun ils signurs Deragisch Placi, gerau Francestg Berther, gerau Schmid Teofil, Valier Giachen Martin e president Placi Jacomet il qual recamonda da buca strihar enzatgei vid il project presentau.

Vegn tras tscharna concludiu dad approbar il project dalla scola nova a Sedrun sco mess avon, cun ina calculaziun dils cuosts da 2'600'000.- frs, e da conceder il necessari credit.

3 da settember 1961. Orientescha signur president sur las lavurs e cuosts vid ils baghetgs da scola Sedrun. Entochen oz seigi vegniu surdau lavurs per la summa da frs. 1'434'176.75. Per quellas lavurs seigien ton sco pusseivel nossas firmas e mistergners vegni risguardai.

11 d'avrel 1966. Signur gerau Gion Crisost Caduff dat in clar e stupent rapport sur dil quen final dalla scola Sedrun. Gl'entir complex ha custau la summa da frs. 2'545'713.80. Da quei han ins retratg subsidi per frs. 257'496.-, che resta in cuost effectiv da frs. 2'288'257.80. El engrazia alla entira cumissiun, en special al president da quella, signur Christian Berther ed a signur architect Beer, per tutta lavur e per il bien reussir da quei edifices. Oz ein omisdus vegni clamai tier l'armada gronda. Els ruaussien en pasch. Sco giu empermess da signur architect Beer, ein era ils artavels vegni suenter a siu giavisch e schenghegiu alla vischnaunca il prau cumprau entras el. Ultra da quei lai la famiglia dil defunct ereger quater maletgs che representan las stagiuns. Tala gesta cuosta la summa da frs. 30'236.-. Bien engraziament.

L'emprescha sesida dalla cumissiun da preparaziun e studi entscheiva cun ils 5 da fenadur 1959. La gruppa preparatorica secumpona da Christian Berther sco president, Gion Crisost Caduff, Rueras, actuar, Flurin Caduff, Camischolas, Battesta Vinzens, Gonda, Vigeli Beer, Sedrun, Alfred Decurtins, Gonda e Battesta Soliva, Gonda. - Igl atun 1959 ha la vischnaunca da Tujetsch envidau en sis architects ad ina concurrenza per ina nova casa da scola a Sedrun. - Il schaner 1960 han ils derschaders e silsunter la suprastanza communal decidu da recumandar alla radunonza communal l'erecziun dil project d'architect Karl Beer a Turitg. - La radunonza communal concluda ils 10 da fenadur 1960 l'erecziun cun approbar il preventiv da cuosts da 2.6 milliuns suenter ch'il project ei sin giavisch dallas autoritads cantunalas vegnius engrondius cun ina halla da gimnastica.

Igl entir complex dalla casa nova da scola secompona ussa ord

- la part per l'instrucziun, scola primara, reala e secundara

- la casa dil pedel

- il baghetg per la scoletta

- e la halla da gimnastica.

Per l'erecziun dils numnai baghetgs steva in sulom da 5811m² denter via principala ed el sid dalla staziun da Sedrun. Cunquei ch'il sulom ei staus zun pigns ei buca vegniu en damonda per la scola in baghetg cun singuls tracts da scola; ei ha giu num restrenscher il menaschi da scola en in baghetg.

Il baghetg ei vegnius ruchegius dil tuttafatg al cunfin settentriunal dil sulom, sinaquei che la part meridiunala resti libra pil plaz da giug. Quei ei tonpli stau necessari cunquei ch'ei stueva, muort l'erecziun dalla halla da gimnastica, aunc star liber il plaz special per gimnastica.

Propi il baghetg da scola ei tenius schi bass sco pusseivel sinaquei ch'el sepresenti buca sco in monster disturbond il maletg dil vitg. Sco transiziun al vitg vegl ein la casa pil pedel e la scoletta vegnidada erigidada sco baghetgs independents per cheutras buca disturbar la construcziun cumprovada dil vitg.

La halla da gimnastica che duei survir il medem mument sco halla da fiasta ei aunc vegnida augmentada entras ina tribuna e siara giu en posiziun verticala viers ils suranumni baghetgs harmonicamein igl entir stabiliment.

La casa da scola – en detagls

En sut-plaunterren:

Cuschina da scola cun quater plattas da cuschinar, in local da magliar per schotg affons ed in magasin per material. El tract liung secattan ils locals da schurmetg per 300 personas ed in local da sanidad cun dudisch letgs. Il scaldament cun dus preuls per scaldament central cun scaldament d'ieli cumbinau cun in stabiliment per aua calda. Milsanavon secattan cheu la centrala electrica e la repartiziun dall'aua.

El plaunterren:

L'entrada principala che schai sin la vart orientala a vesta dil vitg ed ina secunda entrada sin la vart occidentala. Dall'entrada principala arriva ins en la gronda halla d'entrada ed en la sala da musica e cant dasperas. La halla d'entrada sa cun la sala da cant ensemen vegnir duvrada sco aula cun 200 plazs da seser. Sin la vart occidentala schai il local per la scola manuala cun in local per material. Encunter il sid schai la gronda halla da pausa cun tetg ed avon quella il plaz da giug.

Ell' **1a e 2a alzada** schain mintgamai tschun stanzas da scola, milsanavon mintgamai ina stanza da scolasts en las qualas secattan la biblioteca da scola e material da scola. Schegie che la scola ha stuiu vegnir plazzada en in tract da construcziun ein scola inferiura, scola superiura e scola secundara separadas ina da l'autra cun atgnas scalas. Las stanzas da scola schaian tuttas sin la vart meridiunala e mesiran 8.50 m sin 6.80 m. L'entira preit posseda retschas da finiastras ch'ei in schurmegiadas encunter il sulegl cun storas da rullar d'alumini. Las moblias dils locals da scola, sco mobiglias da scola scaffas, tablas da preit ed autras tablas per l'instrucziun corrispundan allas pretensiuns hodiernias. Els corridors ein las garderobas vegnidadas plazzadas sut ils bauns da seser ils portcalzers. Las commoditads necessarias per scolasts, buobs e buobas secattan en mintga alzada.

La casa da scola ei unida entras in corridor sutteran cun il sut-plaunterren dil pedel e la halla da gimnastica cun tuts ulteriurs locals, aschia ch'ils scolars arrivan era sut tetg cura ch'ei neiva e plova alla halla da gimnastica.

La **casa dil pedel** cuntegn el sut-plaunterren: local da schurmetg, tschaler, pistregn e luvratori; el plaunterren: biro stiva, combra da durmir pils geniturs, combra da durmir pils affons, cuschina cun plaz da magliar, bogn e commoditad.

La **scoletta** posseda ina atgna entrada sin la vart orientala. Ella ha negina comunicaziun cun la casa da scola aschia ch'ils affonets san buca vegnir mulestai dils affons pli gronds da scola. Il local dalla scoletta ha ina mesira da 8.30 x 8.70 m. Ina terrassa per part cuvretga e per part aviarta survescha sco terrassa da giug.

La **halla da gimnastica** che duei el medem mument survir sco halla festiva contonscha ins neu dalla scola tras il corridor da comunicaziun sco era directamein tras l'entrada principala sin la vart orientala. La halla da gimnastica ha ina mesira da 12.00 x 20.50 m. La tribuna ina tala da 16.50 x 7.00 m. Alla halla da gimnastica appartegn l'entrada principala cun garderoba per ils hosps da fiasta. Las garderobas dils scolars cun sis duschas, indrezs per bogns da peis ed il local pils requisits da gimnastica.

La **tribuna** che survescha per part per representaziuns da gimnastica, teatralas eav. ei provedida cun illuminaziun da soffitas, indrez pil suflader ed umbrivals ch'ins sa midar ora, respectiv umbrivals da decoraziun. In vast local survescha sco plaz da deposit per culissas ed auters indrezs da teater. Quei local posseda era ina extrada directamein el liber. Sut la tribuna ed uniu cun quella secattan las garderobas pils giugadurs e giugaduras cun commoditads. Sut l'entira halla da gimnastica ein tschalers che surveschan sco locals per requisits da pumpiers e sco locals per velos ed autos.

Avon la halla da gimnastica schai sin la vart occidentala il plaz dir da gimnastica en ina mesira da 18.00 x 36.00 m cun il foss da siglir ed igl indrez da reiver. Il plaz ei curclaus cun asfalt tgietschen. Viers il sid siara ina prada da giug en ina mesira da 38.00 x 26.00 m giu igl entir stabiliment da scola.

La fiasta d'inauguraziun dalla scola nova

Dumengia ils 25 da november 1962

Program:

I. Benedicziun:

1. 12.30 rimnada en baselgia - Veni Creator e benedicziun dils crucifixs
2. Til alla casa da scola
3. Benedicziun dil niev edifeci silla piazza avon casa da scola

II. Inauguraziun:

1. Salid e beinvegni
2. Producziun dalla societad da musica, direcziun signur scolast Teofil Schmid
3. Plaid da signur architect Karl Beer Turitg
4. Plaid festiv da signur pres. communal Berther Christian
5. Producziuns dils affons e dil chor mischedau
6. Giug humoristic da Placi Deragisch
7. Cuort discuors da revendissim sur Stephan Schuler president dil cussegl da scola; dil representant dalla regenza e da signur inspectur Leo Bundi.
8. Cantata „Himni alla scola nova“ da revendissim sur Giusep Durschei cumponida e dirigida da signur scolast Giusep Huonder. Uniuns cooperontas: Chor da femnas, direcziun Alfons Schmet; Chor da vallada, direcziun Giusep Huonder; Chor d'affons, direcziun Leci Jacomet.

9. Producziuns dalla Societad da musica Sedrun

Repartiziun da regals als affons

Investa dalla scola nova



La casa da scola da 1962

Ella Gasetta Romontscha rapportescha scolast secundar Leci Jacomet sur dalla benedicziun ed inauguraziun dalla scola

... Sedrun ha inaugura la scola nova e quei en moda festiva e solemna. In niev e beinreussiu edifeci amiez la cara biala Val Tujetsch argumentescha il spert progressiv da nosa entira populaziun. Vegl e giuven ein loschs da quella stupent'ovra eregida per il beinstar e prosperar da nos affons. Mo era a tuttas uniuns e societads porscha la scola nova ils cundrezs necessaris per promover e cultivar la cultura en nies bi paradis terrester. ... Nies augsegner sur plevon Giusep Durschei benedescha la casa. Suenter quella cerimonia principala suonda la part festiva. Il comite d'organisaziun era gia pli baul sedecidius da far quella festivatad en sala. ... La suprastanza communal ha a caschun dall'inauguraziun partiu ora a tuts affons ina metga sco regurdientscha dalla fiasta. 500 affons han retschiert quei bi regal. ... Possi la nova casa da scola survir a nies pievel, a nosa giuventetgna ed a nos cars affons per il beinstar da tgierp ed olma.

Himni alla scola da sur Giusep Durschei

Scola nova bein postada
el sulegl dalla vallada:
Arva pia tes portals!
Ils affons la giuventetgna
han spetgau cun passadetgna
da guder tes novs locals.

Seigies ina mumma prusa
cun carezia generusa
per tes gronds e pigns affons.
Veglia bein sur la cardientscha
e diregia cun prudientscha
tes discipels tras ils onns.

Nus tschentein tei per adina
sut la protecziun divina.
Tut en tei sei benedi!
Possien biars en casa tia
prender in bigliet sin via
per anflar albiert tier Diu!

Entginas midadas tiel sistem da scola

1904 Ils 9 d'october ha la vischnaunca decidu da prolunghir il temps da scola per 4 jamnas sin 28 enstagl 24 – la proposiziun d'acceptar 9 onns da scola cun 24 jamnas ei curdada atras.

- 1908 Ils 5 d'avrel ha la vischnaunca concludiu da menar en ina scola secundara pigl entir Tujetsch – naven da 1908 a Camischolas
- 1922 Tenor conclus da vischnaunca dils 8 d'october cuoza la scola elementara puspei 8 onns da 28 jamnas cun resalva dalla lubientscha dalla regenza.
- 1962/63 Decidiu d'entscheiver la scola reala la primavera e fixau sin 34 jamnas per la scola primara.
- 8-9-1963 Decidiu da pagar als scolars ils cudischs obligatoris.
- 22-11-1964 Otg onns scola cun 34 jamnas
- 21-2-1965 Niev regulativ da scola
- 15-12-68 Nova scola primara a Sedrun
- 30-10-1971 Nova scola primara pil proxim onn
- 15-12-1972 Vegn decidiu scola per 40 jamnas ed 8 jamnas vacanzas la stad. La finala resta ei lu tier 38 jamnas!
- 2-2-1973 Iniziativa cun 241 suttascripziuns per midar sin 10 jamnas vacanzas la stad.
- 22-12-1973 Secunda scola reala.

- 2008 Fusiun dallas duas scolas Rueras e Sedrun

Midadas ed engrondaziuns dalla scola

Igl onn 1987 ei la casa da scola vegnida engrondida cun ina annexa el nord. Quella secumpona d'ina localitad sco luvratori cun magazin per la scrinaria, in luvratori per lavurs cun metal ed in local d'instrucziun en fisica e chemia. Las investiziuns ein stadas da quasi miez milliun. Igl anteriur luvratori ei vegnius midaus en ina sala plurivalenta e pli tard en la stanza pil cerchel scolastic. Il local che ha surviu sco archiv da 1962 – 1975 ei daventaus il magazin per il luvratori. L'entrada diltut el vest ei vegnida serrada si ed endrizzata sco magazin da material d'instrucziun e per las maschinas da copiar.

El decuors dils davos onns vegn mintg'onn investau pil manteniment dil baghetg. Aschia ein tuttas finiastras vegnidas remplazzadas, il tetgs da tuts edifecis ein vegni sanai, las Fassadas ein vegnidas isoladas, l'escha ei vegnida remplazzada ed auter bia. Era l'aula ei vegnida adattada cun trer agrad il plantschiu ed endrizzar mieds technics ed ina meglia illuminaziun.

Il tetg plat denter sala e scoletta, previur sco piazza da termagliar e pausa per la scoletta, caschunava meinsvart donns d'aua. Igl onn 2006 ei vegniu fatg tetg ed endrizzau ina saletta plurivalenta. La fusiun dalla scola da Rueras cun Sedrun igl onn 2008 ha sfurzau d'anflar ina sligiazion per la secunda scoletta e quella stanza ei sepurschida sco eccellente sligiazion per ina stanza d'instrucziun per ils pigns.

La sala da gimnastica ei vegnida adatada als giavischs dil temps present. Quei ei era succedi cun la tribuna. La tecnica moderna dat alla sala e tribuna l'infrastructura necessaria per tuttas occurrenzas dil temps dad oz.

Era ils plazs da pausa avon scola, in summa entuorn scola, han midau caracter ils davos trenta onns. La cuschina, per l'instrucziun da tenercasa ha igl onn 1996 retschert in mobiliar conform al temps modern.

Las midadas necessarias han manteni in bien standard da qualitat egl entir complex da scola. La construcziun da 1961/62 ei per cletg stada fetg innovativa. Las pretensiuns d'ina instrucziun moderna han denton pretendiu midadas. Las autoritads ein stadas d'in spert aviert per l'educaziun e scolaziun dils affons tuatschins ed ein mai senuspi dad investir els baghetgs ed egl inventari. Grazia a quella tenuta ei la scola dils anno 1960 aunc oz moderna ed actuala.

Ils scolasts dapi 1962 en scola nova a Gonda/Mira:

Scolasts primars:

1962-1974	Toni Hendry, Sedrun
1962/1963	Pieder Caduff, Lumnezia
1962-1970	Giusep Gieriet, Camischolas
1963-1966	Alfons Schmet, Sedrun
1964-1970	Baseli Berther, Rueras
1965-1967	Gion Antoni Derungs, Surcasti
1967-1973	Stiafen Berther, Camischolas
1968/1969	Angelica Condrau, Mustér
1969-1977	Rico Casanova, Mustér
1969-1975	Giusep Caduff, Rueras
1970-2011	Ciril Monn, Sedrun
1972-	Beni Hendry, Sedrun
1973-1998 e	
2000-2002 e lu	
2008-2014	Tarcisi Hendry, Sedrun
1974-1976	Judith Hendry-Bläsi, Sedrun
1975-1985	Ervin Cathomas, Sevgein/Rueras
1976-	Marcus Bearth, Rabius/Sedrun
1978-1981	Josefina Cadruvi, Ruschein
1981-1986	Ursula Cadalbert, Rueun
1985-1987	Jovita Valier, Camischolas
1986-1992	Miriam Berther, Sedrun
1987/1988	Monica Pally, Rueras
1988-1995	Esther Decurtins, Trun
1996-1998	Vinzens Pally, Rueras
1997/1998	Alexa Giger, Surrein/Sumvitg
2004-	Ursula Cadalbert, Sedrun
2011-	Sandro Tomaschett, Trun

Scolasts secundars:

1962-1985	Vigeli Berther, Camischolas
1962-1992	Leci Jacomet, Sedrun
1960/1961	Eugen Casanova
1985-	Ervin Cathomas, Rueras
1987/1988	Miriam Sossai, Trun
1988/1990	Gion Battesta Spescha, Danis
1991- 95/96	Carli Degonda, Rabius
1992- 96/97	Peder Brenn,
1996-2004 e lu	
2004-2011	Katja Maissen-Spälti, Sedrun
1997/98	Andri Vinzens
- 2001	Ivo Berther
2001-	Manuela Schnoz-Flury, Mustér
1998 - 2010	Vigeli Jacomet, Sedrun
2010/2011	Kai Hinrichsen, Mustér/Sedrun



Il Cerchel scolastic digl onn Davostier da seniester: Peder Brenn, Beni Hendry, Erwin Cathomas, Ciril Monn, Alfons Schmet, Norbert Vinzens; enamiez: Marcus Bearth, Tarcisi Hendry; davontier: Nicoletta Marino, Carli Degonda, Esther Hendry

Scolasts reals:

1962-1964	Pieder Coray, Laax
1965-1994	Alfons Schmet, Sedrun
1974-2006	Norbert Vinzens, Sedrun
..... -2010	Hans Monn, Sedrun
2010-	Gieri Spescha, Vella
2011-	Adrian Cathomas, Sedrun

Classa pintga integrada a Sedrun:

1995/96-	Nicolina Giossi Cathomen, Rueras
1999-2002	Elmar Holzner
2002-2004	Doris Loretz, Sedrun
2004-	Ursula Cadalbert, Sedrun
2008-	Lea Berther, Sedrun/Surrein

Scola da lavur e cuschinar

1962-1967	Letizia Monn
1962-1972	Giulianna Coray
1972/73	Lisetta Candinas
1973/74	Silvia Lombriser
1975-1977	Flepp Maria
1975-1992	Cavegn Margrit
1977-1978	Brida Caduff
1980-1985 e	
1986-1992	Rosvita Schmid

1984 Giuseppa Giossi
1985 Claudia Cadosch
1985 Corina Casaulta
1989-1990 Gebharda Berther
- 1992 Irena Flepp
1991 Gebharda Berther
1992 Nicoletta Demund
1992-1996 Gebharda Berther
1997-1998 Evelin Berther
1998-2000 Jolanda Monn
2001- Barla Cavegn-Fry
2001- Nicole Soler-Krebs,



Igl onn da scola 2010/11

5. La scola dil vischinadi da Camischolas

Ils onns dall'entschatta dallas scolas el senn dad oz, leu amiez il 19avel tschentaner, stuevan ils singuls vischinadis, cun agid dalla vischnaunca, baghegiar sezs las casas da scola ed haver quitaun pil scolast. Negin che havess giu schiglioc marveglias, priu ora la baselgia. Igl ei remarcabel cun tgei tschaffien la vischnaunca ed ils vischinadis han luvrau e spargnau per scaffir in fondo da scola. Era bia privats han purtau grondas unfrendas per quei intent. Tujetsch, culs numerus vischinadis, ei mai staus anavos en quei risguard, anzi ha adina mussau grond interess e sacrificau bia per l'instrucziun dalla giuventetgna.

Il „Romansch,“ ina gasetta da 1847 scriva denter auter il suandont:

La Vischnaunca da Tujetsch ha ils 30 da matg unitamein tschentau si in fondo da scola dad 11'000 flurins, ditgel endisch melli renschs. In bi e zun legreivel progress e segiramein mai s'udius ellas annalas tuatschineras suenter la mort dil glorius Pieder de Pultengia!

•••

Ord las numerusas ed interessantas notizias da pader Baseli Berther, dat ei da nudar il suandont davart la scola e la casa da scola a Camischolas:

Sco auters vitgs dalla vallada ha Camischolas giu sia scola ditg avon ch'ina casa da scola vegni baghegiada. Vischins che eran stai empau naven a scola, ni che savevan in tec dapli ch'ils auters, sedevan sez neu ed instruevan temps d'unviern ils affons dil vitg. Aschia ha per exempel statalter Tumaisch Beer, in capavel e rutinau vischin che haveva giu studegiau tiels gesuits a Brig, dau plirs unviarns scola en casa d'Ignazi Beer sper caplutta. Aschia era in onn Gion Andriu Berther ella medema casa. Plaun a plaun suondan lu reguladamein scolasts e scolastas cun admissiun e patenta.

La casa da scola da Camischolas ei vegnida baghegiada dals vischins igl onn 1862. Avon vegnev'ei dau scola en casas privatas. Aschia raquintava per exempel scolast Mihel Maissen da Mustér-Cuoz ch'el hagi fatg scola leu en casa da Lorenz Jacomet odem il vitg sur via en la stiva dadens, encunter la baselgia.

(P. Baseli Berther, A Camischolas. Notizias cultur-historicas ord la Val Tujetsch. 1917)

La scola dils da Camischolas e Zarcuns ha gia priu sia entschatta entuorn 1845 cun la scola en casas privatas. En quei mument che Sedrun ha retschiert ina scola nova igl onn 1848, han ils da Camischolas insistiu sin in agen baghetg. Tutta breigia dils d'anora d'unificar ils vischinadis, quei ch'appartegn la scola, ha gidau nuot. Ils da Camischolas e Zarcuns han buca schau luc.

Ils 23 da fevrer 1861 cumpra il vischinadi da Camischolas il sulom per ereger sia atgna scola:

Tujetsch, ils 23 da fevrer 1861 eis ei daventau il sequent marcau denter Gion Battesta Berther da Camischolas sco vendider e statalter Gion Andriu Berther, era da leu e segnerfarrer Joseph Ant. Durgiai, sco cumprader en num e per cumissiun dalla cumissiun da scola pervia dil sulom dalla casa da scola da Camischolas. Gion Battesta Berther dat e venda sias duas pendas prau ch'el ha leu el vitg Camischolas sut sia casa, dado la casa da statalter Gion Bistgaun Monn p.m. per tschentar e regress dalla casa da scola e zuar sut las sequentas cundiziuns: sur casa encunter la via sto ei vegnir priu tut, dapli sto ei era vegnir priu, ultra dil sulom dalla casa aunc per las grondas entuorn la casa; quei il qual aber che resta dado casa encunter siu clavau salva el per sesez, per en cass ch'el less baghegiar baghetg u nuegl, havessi il dretg da puder seruchiar anen,

Lura s'oblighescha el da prender giu quei prau, che venzass sut casa che füss stai dil Duri Deflorin, il qual ceda sia purziun perquei intent sco il Gion Battesta e zuar fest per fest. Perencunter s'obligheschan ils cumpraders da pagar per quest prau 2.50 frs. il fest, ditgel dus francs e tschunconta raps il fest e per quei pagament ha era il Duri Deflorin empermess da dar sia penda.

Dapli vegn ei schu il dretg a Gion Battesta da egar entochen neutier la casa, sch'ei dat enzatgei, resalvond, sch'ei vegness lennau sisu, quei ei sch'ei vegness lennau sut las grundas da quels che stessen en casa.

Il pagament vegn fatgs sin d'atun da 1861 cun respectiv tscheins vitier, num ch'el savessi aunc per quest onn guder il fretg.

Che quest marcau seigi daventaus di ed onn sco sura e vegnius legius avon allas parts e da quellas confirmaus cun lur suttascripziuns ed expendius en dus conforms originals, confirma Joseph Ant. Durgiai, farrer

Gion Andriu Berther, cumissiunau

Gion Battesta Berther

Igl onn 1862 han els eregiu in'atgna scola a Camischolas amiez il vitg. Il cantun ha giu regalau igl onn 1865 al vischinadi in premi da 350.– frs. Quels daners han ins saviu duvra per pagar la scola ni per il fondo. Igl onn 1863 han els giu mess in'entschatta tier in fondo per lur atgna scola entras ina collecta voluntaria, che ha purtau 393 frs. 63 rps. Il vischinadi ha augmentau cuntinudamein e saviu pagar aschia onn per onn lur agen scolast.

Cun l'ereziun dalla scola a Sontget, igl onn 1886, vegn stimulau ils da Camischolas da schar vegnir a scola on Gonda. Els ein semess encunter ed ein stai vinavon el vitg. Per la decisiun dil Cussegl pign dil cantun Grischun digl onn 1892 ha dau la viulta. Quei onn e silsuenter han ils affons da Camischolas e Zarcuns stuiu ir a Sedrun a scola. Aschia eis ei vegniu concludiu sin vischnaunca. Segiramein perquei ch'ei era memia paucs affons en quels dus vischinadis e per spargnar in scolast alla vischnaunca e forsa era perquei che la scola nova baghegiada a Gonda/Sontget igl onn 1886, era ussa pli damaneivel da Camischolas. Per Zarcuns e Camischolas eis ei stau ina frida da stuer tarmetter ils affons a scola o Sedrun. In recuors dils vischins da Camischolas tiel Cussegl Pign ei vegnius renviaus.

Tenor ordinaziun dil Cussegl d'educaziun vegn la scola da Camischolas muort sia pintga frequenza unida cun quella da Sedrun, che survegn cheutras dus scolasts, in per la scola inferiura ed in per la scola superiura.

Gasetta Rom. 1891, nr. 43.

Silla ferma opposiziun dalla beinstonta fracziun Camischolas

Gasetta Romontscha 1891, nr. 44.

Per illustrar l'entira procedura dil vischinadi da Camischolas e Zarcuns suondan ils protocols dallas radunonzas da vischnaunca che han giu da tractar quei tema difficil:

25 d'october 1891 *Concludiu da schar la scola da Camischolas leu vinavon per adina sco entochen uss, sut la cundiziun che ils affons da quella, che gaudan negina almosna, paghien en cassa da vischnaunca annualmein 5.- frs. in, aschi ditg sco quella scola vegn buca frequentada da 14 affons, da leu naven han ei gratis la scola. Medemamein ei vegniu concediu a Sedrun dus scolasts.*

21 da fevrer 1892 *remarca tiel protocol dils 25 d'october 1891, nua ch'ei setracta da schar exister la scola da Camischolas leu, ei il plaid „per adina“ buca vuliu vegnir approbaus. Essend aber che il cuntegn digl entir passus, che ha buca saviu vegnir snegau e di era senza plaid, che la sura scola dueigi exister leu aschi ditg sco gl'ei affons a Camischolas, seigi lura*

biars ni paucs, sche se crai il suttascret ch'el hagi giu il dretg da duvrar quei plaid, era ord motiv che quei vischinadi ei mai staus senza affons e vegn speronza mai a vegnir – e surlai ruasseivlamein a scadin che legia quest protocol senza simpatia – da giudicar sur quel.

10 d'avrel 1892 Che ils affons dalla scola da Camischolas stoppien vegnir a Sedrun a frequentar quella. Vesend Thomas Berther, ch'ei seigi per el buca pli cunvegnent da star sin sia posta vinavon sco gerau ha el admess la piazza anavos els mauns d'ina ludeivla vischnaunca, essend ch'el sco ses vischnins da Camischolas, hagi l'obligaziun da sustener la scola leu e cunvegna ad in um d'honor buca da survir a dus patruns.

9 da matg 1892 Ei vegniu legiu giu il recuors dils vischins da Camischolas e Zarcuns encunter la vischnaunca pervia da sia scola. Per rispunder a quei recuors ei tratg ora ina cumissiun consistenta ord ils signurs geraus en uffeci, Cristian Muggli, Anselm Capeder e Stiafen Beer.

Da 1892 entochen 1907 ei la scola stada vita. Dalla casa da scola ha lu la finala l'entira val fatg diever, enaquella ch'ins ha fatg lunderora la nova scola reala, secundara, dall'entira vischnaunca. Quei ei schabegiau igl onn 1908 e cuzzau entochen igl onn 1962, il mument che la scola nova ha



aviert sias portas a Gonda.

Ina decisiun ch'ha fiers empau undas

27 d'avrel 1941. Prelegia signur president il conclus prius dil cussegl da scola, che secloma sco suonda. Muort scartezia da plaz els dus locals da scola a Sedrun, concluda il cussegl da scola da far ira ils affons da Zarcuns tuts, sco era quels da Camischolas, che van il quart onn ensi inclusiv a Rueras a scola e quei entscheiva igl atun 1941.

Las reacziuns pervia da quella decisiun ein stadas nuot auter che positivas. Oravontut ord las retschas dil vischinadi pertuccau ei vegniu fatg vehementa opposiziun. A Sedrun regeva denton manco da plaz. Il cussegl da scola raduna perquei ils geniturs da Sedrun/Gonda, Camischolas e

Zarcuns per anflar ina sligiaziun ed empruar da sentelgir cun anflar relaziuns prospereivlas per la scola. Pusseivlas e nunpusseivlas propostas vegnan discussionadas e la finala vegn schau sura alla radunonza da vischnaunca da decider.

31 d'ost 1941. *Passan ins tier la actuala damonda da scola a Sedrun, che secloma sin la gliesta da tractandas sco suonda:*

a) da star dil conclus prius dil cussegl da scola

b) eventualmein crear ina nova scola

Suenter ina liunga discussiun en caussa, passan ins tier la votaziun e concluda la radunonza da star dil conclus prius dil cussegl da scola ch'era fixaus sco suonda: Ils affons da Zarcuns tuts, sco era quels da Camischolas, che van il quart onn ensi inclusiv, han dad ira a Rueras a scola per dus tochen treis onns d'emprova.

Sin la sura decisiun decidan plirs vischins da recuorer tier la regenza grischuna. La finala noda il protocol dil cussegl da scola il suandont agl ur dalla radunonza dils 18 da settember 1941:

1941. *Ha la vischnaunca vuliu sfurzar ils affons da Camischolas e Zarcuns a Rueras a scola. Ils vischins han sinquei recurriu e gudignau il recuors.*

En quella situaziun ei vegniu creau ina tiarza classa a Sedrun ed eligiu scolast Felici Hendry da Cavorgia per quella nova partiziun.

La scola reala, secundara a Camischolas

5 d'avrel 1908 *Sin moziun da Segnerfarrer e dil ludeivel cussegl da scola metta il president avon alla ludeivla vischnaunca, schebein ins vegli ereger ina scola reala per nossa vischnaunca a norma dil regulativ dil ludeivel Cussegl Grond dils 7 da matg 1907.*

Igl εμπrem d'october 1908 ei stau gl'emprem di da scola ed avertura dalla scola secundara en Tujetsch. Igl εμπrem scolast ei Hans Gaichen Decurtins cun 17 scolars ed ina paga da 1200.- frs. Las statutas per la scola secundara approbadas dils Cussegl Pign ils 5 da zercaldur 1908 plaidan sco suonda:

Statuten für die Sekundarschule Tavetsch

- 1. Die Sekundarschule Tavetsch schliesst sich an den 6^{ten} oder 7^{ten} Schuljahr der Primarschule an und umfasst 2 – 3 Kurse.*
- 2. Es werden an ihr die von der Kantonalen Verordnung für die bündnerischen Sekundarschulen vorgeschriebenen Fächer gelehrt. Als Fremdsprache wird hier im ersten Kurse das Deutsche behandelt, in den folgenden Kursen entweder Französisch oder Italienisch.*
- 3. Die Sekundarschule Tavetsch dauert 30 Wochen, jede Woche in der Regel mit 33 Unterrichtsstunden.*
- 4. Die Aufnahme der Schüler in die Sekundarschule geschieht jeweilen vor Beginn der Schule auf Vorschlag des Lehrers der Oberschule und auf Grund einer Prüfung vor dem Schulrath.*
- 5. Der Schulrath der Primarschule ist zugleich Sekundarschulrath; Schulbesuche durch denselben finden in der Regel monatlich statt.*
- 6. Unentschuldigte Schulversäumnisse werden mit 1. fr. Pro Tag bestraft.*
- 7. Die Besoldung der Sekundarschullehrer geschieht durch die Beiträge des Kantons, der Gemeinde und das Schulgeld der Kinder (10 – 15.- fr.). Unbemittelten wird das Schulgeld erlassen.*

8. Die Schüler sind verpflichtet die Schule bis zum erfüllten 16^{ten} Altersjahr zu besuchen, sofern sie nicht in eine höhere Lehranstalt übertreten; vor Schluss eines Kurses ist der Austritt nicht gestattet.
9. Im Übrigen gelten die Bestimmungen der neuen Verordnung für die bündnerischen Sekundarschulen und der Schulordnung des Kantons Graubünden.
- Vorstehenden Statuten erteilt der Kleine Rat seine genehmigung.
Chur, den 5. Juni 1908.



Scola secundaria cun scolast Sep Mudest Nay, seniester sur Giachen Antoni Fetz e dretg sur caplon Luregn Rabeth, ca. 1923.

Secunda scola secundaria

Igl onn 1949 intervegn igl inspectorat da scola Reinanterior-Glogn cugl inspectur Albert Spescha en caussa casa da scola e situaziun a Camischolas.

En occasiun dall'inspeziun da Vossa scola secundaria dils 25 d'avrel o.c. havein nus enderschiu, che quella vegni a dumbrar sin d'atun proxim buca meins che 40 scolars. Nus essan en vertid da nies uffeci obligai dad opponer cheu encunter. Ins vegn a capir ch'igl ei nunpusseivel d'haver 40 scolars en ina scola secundaria. L'instrucziun pitescha sensiblamein; il donn han ils scolars. Sche nus havein ina scola secundaria ed ils geniturs mettan peisa da saver tarmetter lur affons en quella, il qual ei en sesez segiramein fetg legreivel, lu stuein nus era far pusseivel alla scola da satisfar a siu grev pensum. Mo era raschuns higienicas lubeschon mai e pli mai da plazzar 40 scolars egl existent local da scola. Quei fuss ina malprecauziun inperdunabla che savess haver grevas consequenzas per la sanadad da scolars e scolast. Ina tala responsabladad astgein nus buca surpender sin nusezzi.

Nus deplerein grondamein, che la damonda ha avon temps buca anflau ina outra sligiazion. Mo en vesta al factum che nus havein d'atun 40 scolars en scola secundaria, il qual fuva da lezzas uras aunc buca enconuschent, stuein nus insister, che la ludeivla vischnaunca tracteschi danovamein la damonda da crear ina secunda piazza alla scola secundaria.


Mo per igl onn 1949/50 savess la damonda vegnir sliada en quei senn, ch'in scolast menass la 2. e 3. classa a Camischolas ed il secund scolast secundar havess mo la 1. classa a Sedrun. Eventual pudess ins surdar a quel per igl onn proxim aunc la 8avla classa primara per levgiar la scola superiura.

Nus vulessen milsanavon aunc far attents Vossa ludeivla vischnaunca sin la necessitad d'introducir l'instrucziun manuala per ils buobs dalla scola secundara ch'ei perscretta en artechel 7 lit. 4 dalla ordinaziun cantunala per las scolas secundaras.

Ils plans dils anno 1950

Igl onn 1949 vegn pia scaffiu ina secunda scola secundara. En quei mument dat ei a Camischolas memia pauc plaz mo cun ina stanza. Ins untgescha ora a Sedrun. Ussa nescha denton era l'idea dad engrondir la scola a Camischolas, ni schizun da baghegiar leu ina casa da scola nova. Davart quei moviment plaidan il meglier ils protocols dalla radunonza da vischnaunca.

28 da schaner 1951. Vegn purtau avon alla radunonza la reconstrucziun ed engrondaziun dalla casa da scola Camischolas. Tras signur president vegn dau sclariment dil plan per ingronaziun dalla casa vedra fatgs tier signur lennari Vigeli Beer. Signur Vigeli Beer presenta in plan per alzar la casa cumprui en tuttas lavurs da 14'000.- frs. La discussiun vegn aviarta ed en la quala mintgin sto seperschuader ch'ils vischins han empau tema da prender a mauns e far pli gronds cuosts, el mument, ch'ei ha caschunau tons donns e destrucziuns tras lavinas en nossa vischnaunca. Suenter haver giu tedlau giu ils differents meinis, vegn concludiu, sin proposiziun da signur vegl president Placi Jacomet, da aunc refierer per in onn igl engrondir quella scola.



Plan per la casa da scola a Camischolas 1951

11 da matg 1952. Renovaziun ed engrondaziun casa da scola Camischolas.

a) Orientescha signur president sur dils plans e cuosts da signur Vigeli Beer fatgs per engrondir la existenta casa da scola a Camischolas.

b) Sur dils plans e cuosts tarmess tier dil departement da baghegiar cantunal, per engrondir la casa a Camischolas, ni eventualmein baghegiar la scola reala e quellas da Sedrun denter Camischolas e Sedrun sin sulom niev.

Suenter in clar e detagliau sclariment, arva signur president la discussiun, dalla quala ei vegn fatg diever. Ils signurs Valier Giachen Martin e Soliva Battesta tschentan la proposiziun da schar mo ina scola reala per ils buobs e crear ina scola per il tenercasa per las mattatschas.

Signur scrinari Vigeli Beer motivescha da calar cun il cuntschergnar il veder e far quei ch'ins sto far da niev ed endretg. Suenter che la discussiun ei stada alla fin e la radunonza era arrivada tier negin resultat, vegn sin proposiziun ord il miez concludiu dad aunc ina gada radunar la cumissiun gronda sinaquei che quella sappi preparar ina sligiazium e purtar quella sin la proxima radunonza da vischnaunca.

25 da matg 1952. *Sco secunda principala tractanda dalla hodierna radunonza, ei il baghegiar la casa per la scola reala a Camischolas.*

a) Vegn prelegiu il conclus e la proposiziun dalla cumissiun gronda.

b) Dat signur president cuortamein orientaziun sur las ideas e meinis che ein curri ella cumissiun gronda.

Suenter vegn aviert la discussiun, dalla quala numerus oraturs fan diever ed ord la quala ils meinis dad entscheiver cun far in fondo per baghegiar nossas scolas ei ualti generals.

Suenter che la discussiun ei stada alla fin, vegn tras tscherna unanimamein concludiu dad immediat entscheiver a far in fondo da baghegiar nossas scolas, per lura, cura che quel lubescha baghegiar nossas scolas sco ei semuossa il basegns.

La regenza cantunala, il Cussegl Pign, retscheiva posta giu da Tujetsch. Placi Jacomet, il president communal scriva:

Ault stimau signur cusseglier guvernativ!

Partenent secunda nova scola reala a Camischolas

Suenter ina madira ponderaziun partenent nos baghetgs da scolas, e quei en duas sesiuns dalla cumissiun gronda da vischnaunca, sco era en duas radunonzas da vischnaunca ein ins vegni finalmein tier il suandont resultat.

Sin fundament d'in plan provisoric elaboraus entras il schef cantunal da baghegiar, signur Lorenz, ei la vischnaunca desisitida dil plan da signur Vigeli Beer tarmess tier a Vus il december 1951 e priu posiziun sco suonda.

Protocol dalla radunonza da vischnaunca dils 25 da matg 1952

Tras unanima tscherna vegn concludiu dad immediat entscheiver cun in fondo da scola, per lu cura che quel lubescha finanziamein baghegiar nossas scolas sin sulom niev.

Cundiziuns

a.) Per aschi ditg sco in baghetg niev vegn buca en damonda da baghegiar, resta ina scola reala a Camischolas cun treis classas e l'otra a Sedrun era cun treis classas.

b.) La scola reala a Sedrun duess tenor register haver entgins scolars dapli che quella a Camischolas, mo ston las scolas onn per onn vegnir ulivadas entras la sort.

c.) Dapli seoblighescha la vischnaunca sin fundament dil sura conclus prius da far uonn ina gronda reparatura vid la casa da scola Sedrun, numnadamein engrondir il local scola reala, sco era finaistras e plantschiu en tala. En ina scola primara a Sedrun plantschiu, sco era quels dils piartis, scalas etc.

d.) Quellas lavurs ein unidas cun in grond cuost e perquei level cun quella caschun dumandar sch'ei vegni era gidau cun subsidi, per il qual nus fussen fetg engrazieivels.

e.) Per saver entscheiver cun in fondo da scola 1952 ei eligiu ina cumissiun la quala prepara in plan cun ina nova taglia da vischnaunca extra per quei fondo da scola.

24 da zercladur 1952. *Cun la remarca da signur president, ch'il conclus da vischnaunca ariguard il baghegiar la scola reala, sco era il conclus dad immediat entscheiver cun in fondo*

per baghegiar, seigi vegnius approbaus dallas instanzas cantunalas a Cuera. Dapli vegnien las scolas realas sin il davegnir scola entira a Sedrun e scola entira a Camischolas. Semusass ei ina differenza da scolars en ina u l'otra scola, sto quella vegnir ulivada tras reparter ils scolars ni eventual tras sort. Ils scolars da Rueras e Camischolas audan en emprema lingia a Camischolas. Quels da Sedrun ed anora aschi lunsch sco il diember survarga buca a Sedrun.

Cugl onn 1952 vegn pia tschentau il fundament per l'erecziun da casas da scola en Tujetsch. Lu savev'ins aunc nuot dalla construcziun dallas ovras hidraulicas en Tujetsch e che quellas portien numerusas entradas alla val. Pér la garanzia d'haver bunas finanzas ha allura possibilitau la construcziun dallas casas da scola dad oz.

Cheu suonda la gliesta dils scolasts e dallas scolastas a Camischolas.

Da 1850 circa entochen 1859 1859-1862	statalter Tumaisch Beer, plirs onns. Gion Andriu Berther da Camischolas, in onn. Mihel Antoni Maissen, Mustér-Cuoz, 3 onns, en casa Berther odem il vitg en stiva dadens encunter la baselgia.
1863-1866	Josef Steiner, Cumpadials, emprer scolast ella scola nova, baghegiada 1862, paga 125.- frs.
1866-1868	Elisabeth Huonder, Mustér-Disla; paga 350.- frs.
1868-1869	Duri Riedi, Rueras,
1869-1870	Vigeli Giusep Berther, Camischolas, cun ina paga da 150.- frs.
1870-1872	Rosa Berther, Selva,
1873-1875	Sigisbert Monn, Mustér-S.Gions, paga frs. 240.-.
1875-1876	Maria Ursula Desax, Mustér-Gonda. Ha dau scola mo entochen Nadal e lu ida culla brocca. Suenten han ils affons stuii ir a Sedrun per quei onn e persuenten ha Camischolas giu da bonificar als da Sedrun.
1876-1880	Anselm Capeder, Mustér-Rueras,
1880-1881	Onna Maria Caplazi, Surrein-Sumvitg, in onn, 23 scolars, paga 430.- frs.
1881-1891	Sigisbert Monn, S. Gions/Mustér, per la secunda ga cun ina paga da frs. 430. Quei era la paga minimala dil cantun. El ei staus dus onns in suenter l'auter. Sigisbert Monn fuss turnaus bugen, sche la scola havess cuzzau vinavon. El era fetg cuntents cun affons e geniturs.

Da 1891 entochen 1908 ha giu liug negina scola a Camischolas. Igl onn 1908 ei la scola reala vegnida creada per tuts affons dalla val en casa da scola a Camischolas. Sco scolasts reals han ils suandonts instruiu leu:

1908-1915	Hans Giachen Decurtins-Agosti, Sedrun
1915-1918	Benedetg Bundi, Surrein
1918-1920	Albert Cadalbert, Rueun
1920-1944	Sep Modest Nay, Danis
1944-1960	Ludivic Hendry-Venzin a Sedrun
Naven da 1949 duas scolas realas.	
1949-1962	Vigeli Berther, Camischolas
1961/1962	Eugen Casanova a Rueras
1961/1962	Leci Jacomet, Sedrun a Rueras

•••

Ins astga maneivel metter vitier il suandont. Camischolas ha giugau ina rolla tut speciala tier

l'erecziun dallas scolas. Els han all'entschatta, pia gia avon 1850, refusau da s'unir cun Sedrun. Tier l'erecziun dalla scola da 1886 han els medemamein fatg oposiziun. La finala ha il cantun ordinau dad ira o Sedrun. Ils onns 1950 tiel project d'ina scola secundara a Camischolas han els era giu in ferm plaid en caussa. Quella posiziun cuntinuescha ils onns 1950 e 1960 cun vuler la scola secundara mo a Camischolas. Pér cun la decisiun per la scola a Mira pren quei patertgar finalmein ina buna fin.

6. La scola da Rueras

Rueras ha suenter Sedrun las pli veglias notizias d'ina scola. Cul temps ha ei semussau che la baselgia e la scola a Sedrun persulas eran buca sufficientas per la pastoraziun ed educaziun dall'entira val. Perquei han ins era baghegiu a Rueras ina baselgia ch'ei vegnida consecrada dagl uestg da Cuera 1491 ils 4 da december.

(P. Baseli Berther, Baselgias, capluttas e spiritualessen da Tujetsch, p. 16 e ss.)

Havend quella baselgia all'entschatta il character da filiala da Sedrun, eis ei ualti probabel aschia ch'il gidonter dil sur plevon da Sedrun deva era scola a Rueras.

Dapi 1643, che Rueras vegn alzau ad ina "caplania da scola cul caplon el liug", ei quei causa segira. Aschia plaida in document da 1677 partenent Rueras e la scola da leu:

Auf den 15 Tag Augusti Anno 1677 ist alhier notiert Mit tags: Pacten und Conditionen wie man einen Caplon aufnimmt zu St. Jakob.... Zum Triten, allen Werktagen ohne kein Beschwernuss oder Lohn 2 Mallen zum Tag Schuol halten

Dies bekehrn ich Ludwig Jagmet mit meiner eigener Handt.

(Urbari da Rueras)

Tschien onns pli tard stat ei aunc adina pressapauc tuttina pertuccont l'obligaziun da dar scola a Rueras, sco in document da 1765 plaida.

Decretum novum: Betreffend die Schuldigkeit eines jeweiligen Herrn Kaplans alljährlich an gewöhnliche Zeit schul zu halten, hat es nun eine unwidersprechliche richtigkeit, nachdem die löbliche Nachbarschaft sambt die Nachbarn von Giuff (Giuu dumbrava aunc 1768 tschun fiugs cun 22 personas. 1805 ei il davos habitont da Giuv, Tschimun Decurtins, setratgs a Rueras.) durch einhähliche bemehrung sich declariert und verobligiert hinfüro auf jeden feyerstatt (feyerstatt = fiug, casada) ein beyführende Gutte (Gutte, vul dir ina vaulta) Holzfueder oder anstatt jenes 5 batzen aufgelegt zu haben. Dieser beyderseits verbündete Vertrag ist gleichfalls von unsern Hochwürdigsten Ordinariat gnädiglich bestetiget worden, und zugleich verordnet, es solle alhier zur aller richtschnur fleissigt eingeschrieben werden. So geschechen den 17ten April. Anno 1765. –

Per me Jacobum Antonium de Gonda, Secretarium Capituli, ac loci Paroch.

(Urbari da Rueras, p. 12)

En ina brev dils 20 d'uost 1804 scretta agl uestg da Cuera dil "*statthalter Ulrich Venzin, Deputierte und Johannes Gieriet Landa. Deputierte*", supplicheschan els ch'igl uestg duessi dar uorden ch'il caplon legi mintgadi messa a Rueras

.. und das der Capellan in winterzeit kein anlas habe die schuol zu unterlassen, und also die jugend mehr unterwiesen werde ...

Igl uestg ha correspondiu al giavisch dils da Rueras, tenor brev da sur plevon Josef Schmidt, (Chur, den 4. Jänner 1806) e concernent "officia generalia" dueigien era ils da Selva guder quei privilegi, sinaquei che

die Schul nicht zu oft versäumt werden müsste

Anno 1811 dat ei novas, ch'il caplon da Rueras hagi da far scola, ni d'haver quita che zatgi fetschi:

*.... Doch soll die Gemeinde ... falls kein Caplan daselbst wäre, um einen anderen Schulmeister umzusehen gehalten werden. –
Chur, den 23 April 1811 - Carl Rudolph de Buol. Episc. Cur.
(Ord Decretum novum, p. 14. 57)*

Cul temps mav'ei lu tuttina buca pli da pagar il caplon mo cun "vaultas lenna", perquei il suandont conclus che fa honor als da Rueras:

*Igl onn 1837 ils 19 de Mars a Rueras ha in ludeivel Vischinadi en Preschientscha da sgr. Farrer, et Caplon concludiu unittameing de far aung per 6 onns, chan da vegnir igl Uffeci de Caluster en Roda et aplicar il vanzament del Intrada vid la Scola u wid Bageigs ne Cudischs, ne salari dil Schulmeister, suenter sco ina Commissiun traj ora dil Vischinadi afla per bien, la quala dei ses Projects a quel metter avon a sco'l Vischinadi aprobescha dei el ver valur, tonaton adina per Nez della Scola. –
Christ Venzin p. t. Gierau.
(Urbari da Rueras)*

Tgei ei aunc enonuschent dalla scola veglia da Rueras? Igl ei segir che quella vegneva dada dall'entschatta enneu en casas e stivas privatas. Dil temps avon che la casa da scola vegni baghegiada 1850 a Rueras, plaidan las suandontas notizias ord la cronica da Rueras, quei che pertucca la scola veglia.

("Cronica da Rueras" scretta da Giachen Antoni Venzin (1839 - 1918) da Rueras, sin fundament dalla tradiziun dalla fin dil 18 avel tschentaner.)

Dapi da vegl enneu ha la scola de Rueras entschiet sut sur Vigeli Venzin. Quel ei staus caplon a Rueras varga 40 onns. Gl'unviern devi el scola sut la medema taxa de 30 renschs (51 frs.). Quei sur caplon ha baghiau la casa sper baselgia ch'auda a Gion Mathias Monn. El hagi baghiau quella per spargnar la lenna (leugiu duvrava el duas pegas), la quala el procurava sez. Ils vischins stuevan dar ina vaulta lenna ni miez rensch. - En quella hagi el dau biars onns scola. Ei vegneva mussau empau da leger e scriver ed il quen; las 4 specias. Allas buobas vegnev'ei mussau plitost mo da leger. Ils davos onns, nua ch'el era vegnius empau fleivels, ha Gion Fidel Berther (cantadur) surpriu de dar scola. Quel mussavi de scriver ils bustabs gronds avon ch'ils pigns. Il sur decan Hetz hagi ina gada visitau la scola sut quel ed hagi detg ch'ins stoppi mussar ils pigns avon ils gronds. - Suenter ha assistent Muggli fatg scola in unviern en la stiva da Gion Ludivic Pally (nossa casa, stiva dadens). Suenter ha pader Martin Andreoli fatg la scola en la casa pervenda aschiditg ch'el ei staus caplon leu; e lura sur Lorenz Riedi, era en casa pervenda, e siu vegnentsuenter ei stau sur Bistgaun Beer. La taxa della paga era da quels sura scolasts (caplons) 80 renschs, entochen 1850

Cun anno 1850 ha la scola da Rueras cun sias stivas ambulontas priu ina fin. Il vischinadi ha baghegiu sia emprema casa nova da scola.

Tujetsch ils 8 de Maitg eis ei daventau in Marchau denter las sequentas parts, numnadamein Sigr. Mistral Gieriet, Sigr. Str. Paul Wenzin, Sigr. Str. Hans Giachen Decurtins, en Num della Comissiun de Scolla, e de l'otra vart Meister lezi Muclj e zuar sco suonda:

Meister Lezi Muclj interpren de baghegiar si la Casa de Scolla de Rueras, la quala deigi vegnir baghegiada sin quella moda. L'emprema alzada ina Stiva de oitg bratscha sin mintgia maun, et in Stebli dasperas de oitg bratscha en lungezia e tschun en ladezia, num ch'ei massi memia grond pregiudezi per via de memia cuorta lena. La altezia sto ristar terdisch quartas. Dapli sto ei essre ella emprema alzada mez en ischenchels per plantschius dubels. La secunda alzada veng il madem, resalvont la altezia de mo dudisch quartas senza plantschius dubels. Tier il gang e cuschina della emprema alzada veng ei faitg ella emprema alzada mo rigelspan, ella secunda cun preit et aung ina preit per miez en che sparti il zule della combra u cuschina sura. Il gang e cuschina deigi esser en

lunghezia sco stiva e stebli e largezia de quarta bratscha denter las preits, aschia ston las outras sura masiras era esser denter las preits.

El giebel sto ei aung vegnir manau en ina combra, sco quei chei po en. Finalmein sto el aung meter si ils Jserchels, Canals e tablegiar sut si entuorn la Casa sin mintgia quater mauns, et avon lasfatschadas tschentar en las schlondas dilg teitg.

Per quella lavur eis ei schau adel temps de baghegiar enten ilg onn present ner per ilg onn 1849, bein che en cass che lessi bucca baghegiar en quest onn sappintonaton la lena vegnir surdada e messa ensemen per saver meter sut teitg.

Per quella lavur sura paga la comissiun de Scolla 230 et 10 f rames, scrivel duatschien e trenta renschs et ina bubla rames. Duess el mo surdar la lena quest onn, sche veng ei faitg il pagamen mo proportiun de quella lavur, baghegiel aber si sche veng ei din Datun de anno 1848 pagau tiarzas, et in tiarza sto el dar peda.

Cun quei pagamein deigi lura esser compiliau en tut e la comissiun de Scolla resalva de ver neginas outras obligatiuns u gravezias encunter il sura. Depli eis ei aung resalvau sin la Comissiun de Scolla de aprobar ner refusar.

En fide de quei suttascriven las Parts

Joseph Ant. Durgiai

Paul Jos. Wenzin

Hans giachen Decurtins

NB: eis era aung schau adel in di las Stiallas senza pagamen

Lezi Antoni Muccli

1850, ils 23 da November pagau la sura suma 230 f ei aung de far ora la dubla rames et per ina crusch piarsa.

Il vischinadi da Rueras ha saviu mantener sia atgna scola mo cun purtar gronds sacrificis. Pli tard han ils subsidis cantunals susteniu e gidau. Aschia secloma in exempel nudaus egl urbari da Rueras co ins stueva meinsvart agir arisguard las finanzas:

Anno 1861, ils 19 da Marz hal vischinadi, en preschientscha da mei Suttascret, legiu ora il Giachen Maculin per 2 onns caluster, cun la paga da 104 frs., digiel tschien e quater francs per onn, cun la Condiziun ch'el laschi tut l'otra entrada della Calustria agli vischinadi, e quei tut per aplicar tier il Benefeci della Scola, e tier nuot auter, e ch'el, Giachen, stoppi lu orda quei pagar nuot, ni Spenda, ner enzitgei auter, sonder el hagi de trer il sura 104 frs. blut, per siu survetsch. - Vigilius Venzin, caplon.

Entochen 1910/11 ha la gronda stiva da quella, il stebli e la cumadeivla cuschina tunschiu per scolast e scolars.

3 d'avrel 1910 Metta il signur president avon alla ludeivla vischnaunca ina petiziun dils vischins da Rueras, en la qualla numnai vischins damondan dalla ludeivla vischnaunca duas scolas per siu vischinadi, essend il diember dils scolars memia gronds mo per ina scola. Suenter haver tedlau giu ils differents meinis ed aviert la discussiun generala en caussa, conclud'ins cun pintga participaziun da votants da dar als vischins da Rueras duas scolas per aschiditg sco il diember da scolars survarghi 35 scolars ed ei vegni buca outras relaziuns.

Pigl onn da scola 1910/11 ha Rueras survegniu duas scolas, scola pintga e scola gronda. La scola pintga ha puspei stuiu viandar. Ella ei vegnida instruida en casa da Sep Maria Giger, stiva dadens; la scola gronda en casa da scola-vegla.

5 da fevrer 1911 Metta il signur president avon alla ludeivla vischnaunca la damonda, schebein ins vegli, ni ei curvegna dad arranschar en la casa da scola a Rueras, sinaquei ch'ei seigi plaz en quella per duas scolas, a raschun che la ludeivla vischnaunca ha sut datum dils 3 d'avrel 1910 concludiu 2 scolas al vischinadi da Rueras. Suent'er haver tedlau giu ils differents meinis en caussa ed aviert la discussiun generala en caussa, concluda la vischnaunca dad arranschar la casa da scola a Rueras, ch'ei seigi plaz en quella per duas scolas.

Primavera e stad digl onn 1911 han ins alzau omisduas alzadas dalla casa da scola, fatg en finiastras novas e drizzau en per duas scolas sigl unviern 1911/12. Il spitg dalla casa ha survegniu in'atgna curiosa fuorma. Quei ha lu dau empau ina curiosa cumparsa ed in schliet attestat als construiders cun pouca capientscha per in bi estetic baghetg da scola.

Cul spiarder la funcziun da scola ei il baghetg staus zatgei onns vits. Igl onn 1966 decida la vischnaunca da baghegiar ora la casa sco camp da vacanzas per gruppas e scolas. Igl onn 1980 succeda la vendita dalla casa a privats cun la cundiziun che la casa astgi buca vegnir tenida vinavon sco casa da colonias.



Scola cumplessiva a Rueras

Cheu suonda il rodel dils scolasts che han instruiu ed educau en l'emprema scola da Rueras.

Scolasts primars

Vigeli Venzin, caplon, 40 onns
Duri Monn da Sedrun, en casa pervenda
Gion Fidel Berther da Rueras, en casa Giachen Antoni Venzin
Gion Rest Muggli da Rueras, en casa da Sep Lurenz Venzin
Silsuenter ei Gion Rest Muggli vegnius eligius secretari dalla canzlia cantunala a Cuera e morts leu il fevrer 1860.
Revendissim pader Martin Andreoli, caplon

1844/46

1846/47	Vincens Cyprian Andreoli, Mustér
1847/48	Giachen Lurenz Riedi, caplon
1848-1850	Gion Battesta Bisquolm, Sumvitg
1850-1854	Gion Antoni Soliva, Sedrun
1854/1855	Leci Berther, Disla
1855/1856	Stiafen Beer, Sedrun, entochen Daniev
1856/1857	Michel Simonett, Disla
1857-1864	Vigeli Giusep Riedi, Mumpé-Medel, maridaus a Segnas
1864/1865	Sep Fidel Berther, Mumpe-Tujetsch
1865-1867	Sep Bigliel, Mumpé-Tujetsch
1867	Anton Schmed, Mumpe-Medel
1868/1869	Sep Bigliel, Mumpe-Tujetsch
1869-1882	Maria Barla Pally, Rueras
1882-1884	Gion Battesta Derungs, Breil
1884-1887	Baseli Hosang, Segnas
1887-1889	Stiafen Schmed, Sedrun
1890-1898	Anselm Capeder, Mustér-Rueras
1899-1903	Giachen Antoni Pally, Camischolas
1904-1910	Aluis Venzin, Platta-Medel



Cun igl unviern 1910/11 ha Rueras obteniu duas scolas: «scola pintga» e «scola gronda».

Scola pintga han dau:

1910-1913	Augustin Schuoler, Cumpadials
1913/1914	Josef Antoni Muoth, Breil
1914-1917	Placi Sigisbert Giger, Curaglia
1917-1922	Bistgaun Fidel Cathomen, Dardin

Scola gronda han dau:

1911-1913	Aluis Venzin, Platta-Medel
1913/1914	Silvester Simeon, Lonsch
1914-1917	Josef Antoni Muoth, Breil
1917-1920	Barclamiu Coray, Laax
1920-1922	Lurenz Casutt, Falera
Cun 1922/23 puspei mo ina scola	
1922/1923	Leci Coray, Laax
1923-1925	Giusep Cavegn da Surcuolm
1925-1929	Barclamiu Peder da Selva

Cun 1929/30 ha Rueras puspei survegniu duas scolas, essend ch'il diember da scolars era carschius per in bionton ed ins haveva buca plaz pli mo en in local.

Scolasts dalla scola pintga:

1929/1938	Gion Mihel Peder da Selva
1938/1939	Pieder Cavigeli, Siat
1939-1959	Giusep Gieriet, Tujetsch

Scolasts dalla scola gronda:

1929-1938	Barclamiu Peder da Selva
1938-1950	Gion Mihel Peder da Selva
1950-1956	Leci Jacomet, Surrein-Tujetsch

Scola da lavur

1883/84	«Ils da Rueras han buca vuliu ina scolasta per la scola da lavur.»
1905/06	M. Berther
1906/07 - 1910	B. Cath. Caduff
1913/14 - 1929	Anna Maria Muggli, Rueras
1939 - 1975	Catrina Berther

La scola da 1959

La scola veglia fuva daventada pintga, memia pintga per la carschen d'affons. Cugl onn 1956 entscheivan las tractandas sin vischnaunca pertuccont las scolas. Suenter ver refretg onns ora quella caussa, para ussa la situaziun empau outra. Gia 1952 vev'ins fundau in fondo per la construcziun da scolas. L'explotaziun dallas auas porta novas entradas e lubeschan da baghegiar las casas tenor basegns e quei senza stuer engreviar ils vischins. Ils vischins elegian ina cumissiun che prepara e studegia variantas per casas da scola. Gia gl'atun 1956 sa la cumissiun rapportar da sias preparativas e studis. Oravontut ei vegniu fatg studis pertuccont ils suloms e quei cun las instanzas cantunalas ed igl inspectur da scola. Il plaz a Rueras seigi zun adattaus ed a Sedrun vegn recumandau la squadra da Dulezi. Il vischinadi da Rueras sefatschenta secapescha intensivamein cun l'erecziun da lur scola. Il protocol dil vischinadi dils 2 da fevrer 1956 dat plaid e fatg:

1. Sgr. Gerau Toni Hitz arva la radunonza e fa in cordial beinvegni a tuts stimai vischins ed en special a nies revendissim augsegner, sur Bajer. El orientescha sur dil curriu e passau en fatgs baghiar casa da scola.

Igl intent dalla radunonza ei da'udir in bien meini ord il miez, nua ch'ei fuss da survegnir in bien plaz adattau per baghiar ina nova casa da scola.

2. Signur gerau Toni Hitz surdat il plaid a nies revendissim augsegner. Nies preziau augsegner fa valer il grond basegns ch'igl ei per baghiar casa da scola. Ariguard il sulom manegia el, ch'el segi buca aschi enconuschents cun nossas relaziuns. El ei denton dil meini ch'ins duessi haver duas variantas, schon pervia dil prezi. El exprima era aunc il giavisch ch'ei fussi da mirar da survegnir ina scola reala a Rueras. Otg scolars fussi sufficient per crear ina scola.

3. *Differents vischins exprimian lur meinis ariguard il sulom. Plirs loghens nua ch'ei fuss la pusseivladad da baghiar, vegnan menziunai, mo che ein tuttina buca adattai per certs prighels ed era memia pauc sulegl. Ins vegn tier la resoluziun ch'odem il vitg, sillas Sorts, fussi il pli sulegliv ed adattau liug per baghiar la scola. En principi ein tuts vischins persuerter.*

4. *Ord il miez vegn ei aunc proponiu da tschentiar si ina iniziativa per la scola reala, nua che tuts vischins ein supplicai da suttascriber, cun aunc trer tier ils vischins da Selva e Tschamut. Tier sura proposiziun vegn ei concludiu da votar e la tscherna decida unanimamein da star en per la iniziativa.*

29-06-1956. *Sut sura datum ei stau radunonza da vischins e tractau il suandont.*

2. *La cumissiun da baghiar, signur genau Toni Hetz e signur Leci Brugger, orienteschan sur il curriu e passau en fatgs da scola a Rueras.*

3. *Vegn fatg la proposiziun. Ein ils vischins en principi da baghiar la scola orasisum il vitg. Ei vegn fatg si la tscherna e quella decida unanimamein da baghiar ella ora si las Sorts.*

4. *Ei vegn concludiu dad ira entuorn cun la iniziativa sin la quala ils vischins da Rueras e Dadens gl'Uaul pretendan che la scola reala vegni baghiada a miezliug a Camischolas. Sin quei conclus vegn ei era votau e peglia il pli.*

4. *Vegn aunc tratg ora dus umens per ira entuorn cun la iniziativa. Ils suandonts signurs vegnan elegi: Leci Brugger e Francestg Berther.*

Cun ina iniziativa pretendan 64 vischins da Rueras che la scola reala resti a Camischolas. Ella radunonza da vischnaunca dils 23 da settember 1956 vegn il frust ora si las Sorts cumpraus. In meins suenter, igl october 1956, han ils vischins da Rueras concludiu da mantener la scola a Camischolas. Sche quei fussi buca il cass, giavischassen els ina Rueras.

18 d'october 1956 ... *Signur genau Toni Hitz presidiescha la radunonza cun slontsch e capacitat. El arva la discussiun sin la secunda fetg impurtonta tractanda: scola reala. El surdat il plaid a nies rev. augsegner sur Baseli Albin. El exprima ils avantatgs e disavantatgs per la scola reala a Rueras. Persunalmein fussi el per la scola a Rueras. El vegli aber influenzar negin persuerter. El plaidi persuerter sco augsegner e per fatgs da pastoraziun. Cu ins hagi ils affons enta maun, ed hagi la confidonza dad els, seigien ins segir da realisar tut. Plirs vischins, babs da famiglia exprimian siu votum e vesessen bugen la scola reala a Rueras. Auters ein denton per la scola a Camischolas. Essend ils vischins buca units, nua baghiar la scola reala, vegn ei fatg duas proposiziuns.*

1. *Lein nus la scola reala a Rueras*

2. *Lein nus la scola reala a Camischolas*

Sin domisduas proposiziuns vegn ei votau e la tscherna decida cun il pli dallas vuschs per Camischolas.

Duess ei denton vegnir decidiu sin la radunonza da vischnaunca, che omisduas scolas realas vegnan baghiadas a Sedrun, sche pretendan ils vischins da Rueras, che ina scola vegni a Rueras.

19 da december 1956. *Signur Toni Hitz metta avon sco ins duessi baghegiar la scola e stanzas sufficientas: 2 stanzas da scola, 1 stanza da reserva, 1 stanza da lavurs manilas ed ina sala.*

Signur genau surdat il plaid a nies rev. augsegner. El metta avon fetg bein co ils locals dalla scola duessen vegnir baghegiati. 1 sala cun combrettas e spartidas, 2 stanzas da scola, 1 stanza da reserva, 1 stanza da lavurs manilas, eventualmein cuschina

Suenter liunga ponderaziun han ils vischins aunc maniau dad eleger ina cumissiun d'ir e

mirar la casa da scola a Segnas. En la cumissiun ei vegniu eligiu ils suandonts: sur rev. augsegner Baseli Albin, signur gerau Toni Hitz e signur Leci Brugger.

•••

Cun la fin digl onn 1956 vegn decidiu da menar vinavon il baghegiar la scola a Rueras e dau la plenipotenza alla cumissiun, aschi gleiti sco ella hagi enta maun il pareri dils vischins davart las localitads. Cun quei ein las preparativas avanzadas zun fetg. Vinavon plaidan ils protocols da vischnaunca davart l'entira procedura.

14 d'avrel 1957. *Passan ins tier la principala tractanda, il project per la scola nova a Rueras. Essend ils plans exponi, sclarescha signur president els detagliadamein, sco era tals cuosts ed il secunvegnir cun architect Maissen.*

La scola persula custass 308'100.- frs.

La sala cun scoletta 132'500.- frs.

Il ruglar ora il plaz da giug 11'500.- frs.

Total tenor project 452'700.- frs.

En sura summa ei il sulom, sco il mobigliar las stanzas da scola e sala buca cumpriu.

Giud sura summa mass aunc il subsidi giu, circa 70'000.- frs. sco era 6 – 7000.- frs. sco entelgiu honorar architect. Arvend la discussiun crodan da tuttas sorts meinis e

proposiziuns. Gerau Toni Hitz exprima il conclus dils vischins da Rueras. Signur gerau cassier declara empau ils cuosts e vegn sin l'idea che la scola vegni aunc adina sin 500'000.- frs.

A signur Clemens Berther cuntenta igl agir dalla cumissiun buca diltut. Bien fussi ei stau d'eleger duas cumissiuns per quei intent, aschia ch'ellas havessien saviu paregliar lur conclus ina cun l'otra. Era il buca trer en informaziuns tier auters architects e star mo tier in, plai buca ad el. Da quella opiniun ein era aunc auters signurs. Signur Benedetg Valier fa sevaler che la sala seigi memia gronda en quella dimensiun e tschenta la proposiziun da far ella en ina dimensiun da silpli 100 m². Il baghetg per la scoletta seigi da schar naven e persunter far ils locals per ils teatrists sut la sala en, denton mantener il subsidi. Dapli propona el da sclarir giu schebein ins vegli star tier igl architect Maissen ni eleger in auter. La proposta d'eleger in auter architect vegn sustenida da pliras varts, aschia era da signur Gaudenz Loretz, il qual declara publicamein ch'ils cuosts che architect Maissen hagi giu entochen ussa per tal project, sorprendi el.

La proposta da far la sala pli pintga e schar naven la scoletta vegn sustenida da signur Sigisbert Giossi.

Signur Baseli Monn anfla che la sala audi sut las scolas en. Era plai igl architect mo empau ad el, manegiand che mo la cumissiun hagi gronda simpatia per tal.

Signur Leci Antoni Cavegn propona da aunc refierer quella tractanda per pli madira reponderaziun. Da pliras varts vegn la proposiziun dalla cumissiun era sustenida.

Per vegnir alla fin vegn passau tier la votaziun. L'emprema tscharna vegn fatga sin la proposiziun dalla cumissiun e cun la medema tscharna era elegiu igl architect signur Venanzi Maissen. Secund il decider da quella tscharna, vegn votau giu sin las ulteriuras proposiziuns fatgas.

La tscharna decida dad approbar il project e baghegiar tenor tal, senza schar curdar il subsidi ed aschia ei era igl architect eligius. Tenor questa approbaziun crodan las ulteriuras proposiziuns e signur president declara la radunonza per serrada.

10 da zercladur 1957. *Dat signur president ina orientaziun sur dil project casa da scola Rueras, nua ei glei previu da sminuir la sala per 1 meter sil maun liung, denton mo sch'il*

subsidi mondi buca a piarder e tuts ils vischins seigien cuntents. Damai che negin fa giudlunder oposiziun ei tala caussa acceptada.

20 d'october 1957. Davart la moziun dil baghegiar scolas sclarescha signur president il semover d'entochen ussa. Ils plans en detagl per la scola da Rueras seigien tarmess en alla regenza per la damonda da subsidi. Ils schar far ina calculaziun dils cuosts per las ulteriuras scolas seigi dau sura. En num dalla cumissiun engrazia signur Benedetg Valier per l'orientaziun.

20 d'avrel 1958. Essend ils plans definitivs dalla scola nova da Rueras exponi en sala, dat signur president giudlunder sclariment, sco era dils cuosts da tala. Cun schar naven la scoletta e differentas caussas ei vegniu spargnau en 60'600.- frs. per mantener il subsidi, principalmein dalla sala e 3% alzament dils cuosts eisi carschii per 26'300.- frs., aschia ch'ei stat oz avon maun in project da 418'400.- frs giu dil qual ei mass aunc il subsidi da 60'000.- frs. Arvend signur president la discussiun, fa genau Toni Hitz menziun dil schar curdar la scoletta, sperond che la vischnaunca vegni in di encunter als da Rueras sin ina moda ni l'autra sch'ei semuossa in di in basegns per ina tala. La tscharna decida da baghegiar tenor project.

Sigl onn da scola 1959/60 ei la scola preparada. La Gasetta Romontscha nr. 83 dils 16 d'october 1959 porta ina pintga notizia ed annunzia la festivitad d'avertura dalla scola da Rueras:

Avon in pèr onns ha la ludeivla vischnaunca da Tujetsch concludiu da baghegiar ina nova casa da scola a Rueras. La primavera digl onn vargau han ins priu a mauns las lavurs ed ussa eis ei aschi lunsch:

*Odem il vitg stat en parada
La nova scola baghegiada
E mira giu sin il vischins
E fa sustar ils pelegrins.*

Dumengia proxima, ils 18 d'october suentermiezi ei la benedicziun ed inauguraziun dalla nova casa da scola en rama d'ina mudesta fiastetta. Per oz schein nus cun quella cuorta notizia ed enviein ad in pli detagliu rapport che vegn a suandar il proxim temps ella "Romontscha".



Deplorablamein suonda negina menziun ella gasetta davart la fiasta. Pil di da fiasta ed inauguraziun ei vegniu presentau in giug recitativ ord la plema da genau Gion Antoni Venzin.

Sin la fassada dalla casa da scola ha igl artist Albert Wider concepiu igl aughel Rafael cun Tobias cun in pèsch enta maun e l'inscripziun "Nossa scola". La figura fa paleis il giavisch dils da Rueras da metter lur affons e la scola sut la protecziun digl aughel pertgirader. – In bien patratg!

Il baghetg cuntegn quater stanzas da scola ed ina sala da gimnastica. Plirs onns

ha la scola era funcziunau duront la stad sco camp per scolas dalla Bassa. El decuors dils onns ei vegniu fatg diversas midadas vid il baghetg. Igl onn 1996 succedan midadas dalla entrada principala ed el plaunterren dil baghetg. El sutterran dalla sala ein tualettas e stanzas da secumiar vegnidas endrizzadas. Il plantiu egl ost ha surviu sco stanza da zambergiar. La stanza ei stada ton sc'in local plurivalent, per l'instrucziun da musica e local d'emprova per il chor mischedau da Rueras. El ei vegnius partius en duas localitads ed ina da quellas ei stada a disposiziun per l'instrucziun en rama dalla classa pintga integrada. Pigl auter surveschan ils plantius aunc oz sco magasins per differentas uniuns culturalas. Secapescha ha era il tetg retschiert ina nova cuvrida e las finiastras ein per gronda part vegnidas remplazzadas.

L'entschatta ei vegnida dada cun duas classas primaras, la scola tudestga ed ina classa dalla secundara. Cun 1962 ei la scola secundara serendida a Sedrun. La carschen d'affons ha sfurzau igl onn 1965 da crear per in per onns ina tiarza classa. Cun la fundaziun dalla scoletta igl onn 1966 ha quella obteniu ina stanza en scola.

Ils onns 1990 neschan patratgs da fusiun cun Sedrun. La digren dils affons da Rueras crescha ad in crescher. Entgins onns, aschia 1995 e 1996 vegn instruiu a Rueras ina classa cun scolars dall'entira val. Da 1998 ei il scalem bass, 1. 3. classa, dall'entira val a Rueras. Naven da 2004 instruescha mo pli in scolast l'emprema e la secunda classa primara. Quei scolast vegn sustenius d'ina scolasta parziala per la classa pintga integrada e d'ina scolasta cun lecziuns da levgiament per l'instrucziun per dar ina buna qualidad all'instrucziun.

Cugl onn da scola 2007/08 va l'istoria dalla scola da Rueras a fin. Duront tschunconta onns ha il baghetg surviu a siu intent, in edifeci ch'ei a sias uras staus concepius internamein fetg modern. Empau discussiun ha la cumparsa exteriura leventau. Ils da Sedrun han meinsvart titulau la scola da Rueras sco "gagliner". Actualmein survescha la scola sco albiert per las diveras uniuns culturalas e da sport da Rueras. Dalla stanza da scola egl emprem plaunterren fa la gruppa da Pluscheins diever.

Enten baghegiar ora las auas entras la ORA ei ina scola tudestga sefatga a Rueras. Quella ha scolast Alfons Schmet instruiu da 1959 tochen 1963.



Scola primara a Rueras cun la scolasta Valentina Deflorin

Scolasts e scolastas en scola nova da 1959:

Scolasts primars

1959-1996	Vinzens Pally, Rueras
1959-1962	Giusep Gieriet, Camischolas
1962-1963	Catrina Schatz-Cavegn, Cazis
1963-1964	Valentina Deflorin, Segnas
1965-1966	Rest Martin Bundi, Peiden
1965-1975	Norbert Vinzens, Trun
1974-1975	Mengia Schmid, Rueras
1976-1977	Corinna Bearth, Rabius
1978-1979	Armin Caduff, Lumnezia
1980-1981	Yvonne Derungs, Tavanasa
1982-	Hans Monn, Sedrun
1995/1996	Beni Hendry; 6. classa
1996/1997	Marcus Bearth, Sedrun, 4.classa
1998/1999 e	
2002-2008	Tarcisi Hendry, Sedrun
1998/1999	Vinzens Pally, Rueras
1999-2002	Nicolina Cathomen Giossi, Rueras
1999-2002	Alexa Giger, Surrein/Sumvitg
2002-2004	Flurin Foppa, Favugn

Scola secundara a Rueras

1959 - 1962
Vigeli Berther
Leci Jacomet
Eugen Casanova

Scola tudestga

1959-1963
Alfons Schmet

Classa pintga integrada

2006 - 2008
Lea Berther, Sedrun/Surrein

Scola da lavur

1975/88
Giuseppa Giossi



Scola primara da Rueras cun ils scolasts Norbert Vinzens e Vinzens Pally

7. Scola e scolasts da Selva e Tschamut

L'empresma baselgia a Selva ei vegnida consecrada igl onn 1630 da Giusep Mohr, uestg da Cuera. Cugl emprum caplon Pieder Callemberg da Schlans, igl onn 1664, ha carteivel era la scola entschiet. Avon ein ils affons da Selva e Tschamut carteivlamein vegni instrui da persunas privatas. Il diember d'affons dils dus vischinadis ei matei staus pigns. Entochen il caplon sur Gion Giusep Deplaz, caplon per Dadens igl Uaul da 1818-1859, han buca meins che 32 caplons surpriu l'instrucziun dils affons e dil pievel. La casa pervenda fuva pia era stanza da scola. Sco els auters vischinadis han era ils vischins da Selva e Tschamut cul caplon alla testa giu quitau per l'instrucziun da lur affons. Il spiritual fuva per ordinari pagaus nuot per dar scola, ni quasi nuot.

Era a Selva prescriveva ina obligaziun dil beneficiat, la quala datescha senza dubi aunc digl urbari vegl, sco suonda:

. . . Sechtens. Soll Er ohne weiteres Interes Schull halten, und die Kindern unterrichten.

Empau pli originala fuva la scola da Selva. Aschia raquenta la tradiziun che sur Deplaz fagevi scola a Selva en stiva dalla casa pervenda e ch'el schevi enqualga als affons da Selva:

Vus haveis en truffels enstagl tschurvi,

ed als da Tschamut:

e vus pelletschas.

La lavur da dar scola fuva pulitamein stentusa senza adattai cudischs ed indrezs. Sur Gion Giusep Deplaz deva scola en sia casa e quella cuzzava per ordinari da sontga Catrina, ils 25 da november, entochen la dumengia da palmas. El entschaveva mintgamai ualti marvegl e fageva scola tochen mesa las endisch e pér lu celebrav'el la s.messa. El mussava da leger, scriver e far quen. Ei era in um pign, curteseivel, temprau e tuttavia versaus ellas ciencias. El haveva giu fatg ses studis, schibein dil gimnasi sco era dalla teologia a Salzburg ed era cunzun bein da casa ella historia. Nunhavend all'entschatta in cudisch d'ABC, vegnevan ils affons cun ina slonda en fuorma da palutta en scola, sin la quala ils bustabs eran tagliai ora cun in cunzi. Il bien caplon mussava e schava dir si ils bustabs. Suenter haver fatg in temps quei exercezi, preudev'ins in cudisch da mussaments, da ductrina ni d'oraziuns ed entschaveva a bustabiar ed arrivar aschia tier il leger. Gion Gaudios Riedi da Tschamut, bab da sur Gion Evangelist, capeva bein da tagliar ora quels bustabs ed era aschia per bein enqual affon il furnitur digl ABC da lenn.

A Bregenz ei cumpariu gia igl onn 1805 in ABC en lungatg sursilvan, mo tier nus ha pér igl ABC da pader Beat Ludescher giu in esit desiderau. Era la bibla da pader Sigisbert Frisch, cumparida 1823, ei stada da grond néz per la scola egl imprendder da leger. Mender era ei propi cul scriver! Sur Gion Giusep Deplaz encureva ensemen plattas, tablas da scriver per ses scolars e cun gronda breigia tagliaiv'el ora greffels ord toccanaglia da plattas ch'el parteva ora en sia scola.

Arisguard il quen existev'ei gia dus cudischs, in da Christian Jodocus Steinhauser (1808) e l'auter da pader Beat Ludescher (1809), mo fuvan quels cudischs darar els mauns dils scolars. Pli da vegl vegnev'il quen fatgs a tgau e nudaus si, sch'ei fageva da basegns, cun in cunzi sin buccadas lenn alla moda dallas stialas da latg. Aschia deva ein aunc quels onns leu vischins che han purtau la mesira d'in toc prau en bratscha e quartas, tagliaus ora sin ina stiala lenn.

Las scolas da Selva

La primavera 1852 han ins entschiet a baghiar a Sut Crestas la caplutta culla casa pervenda e cun ina stanza da scola. Igl unviern 1853/54 ei sur Deplaz serendius per l'empresma ga a Sut Crestas per habitar e tener survetsch divin leu.

La scola en casa pervenda a Sut Crestas ei denton buca stada emperneivla ed ideala per l'instrucziun e perquei ei vegniu instruiu en ina casa privata. Plirs onns ei vegniu dau scola en casa da Flurin Venzin gest sper la caplutta. Leu veva il scolast era siu tenercasa e combra da maner. Igl onn 1863 ei la casa da scola vegnida baghegiada. Per quella han ils vischins da Selva e Tschamut survegniu l'auter onn sissu, 1864, in premi cantunal da 400.– frs. Il fondo da scola a Selva ei vegnius carschentaus cun unfrendas privatas e cun vender gia igl onn 1854 el mises vi Surrein in bien ton pastira per schar far praus ordlunder a Franz Giusep Loretz ed a Giachen Venzin. Puspei ei vegniu dau scola en casa dalla caplania a Selva. Ils habitonts da Selva ein culs onns restai il temps d'unviern a Selva e buca pli serendi el refugi da Sut Crestas. Entras l'erecziun da lavineras e la plontaziun digl Uaul da Rusas fuva Selva vegniu pli segir da lavinas. Denton semuossa era la casa caplania memia pintga e meins qualificada. La vischnaunca sto ponderar d'ereger ina casa da scola als Dadens igl uaul.

Cun igl onn 1901 entscheiva ina liunga dispeta pertuccont la casa da scola da Selva e Tschamut cun la vischnunca. La casa da scola era en in schliet stan ed ultra da quei vulevan ils da Selva la scola ora el vitg. Ils protocols dattan perdetga da quei vi e neu che sesplegia duront varga quendischns.

10 da fevrer 1901 En vertenta questiuon dils vischins da Selva e Tschamut ei da signur president vegniu mess avon alla ludeivla vischnaunca ch'els vischins da Selva e Tschamut petiziuneschian,

1.) che lur casa da scola vegni reparada ed ultra da quei petiziuneschan

2.) ils vischins da Selva sulets che la scola vegni cun quella caschun translocada naven da Sut Crestas e baghegiada ora Selva.

Encunter quei petitium protestan ils vischins da Tschamut. Cheutras ei naschiu disuniun denter ils sura vischinadis e mess avon per decisiun la vertenta damonda alla ludeivla vischnaunca sco emprema intsanza cumpetenta en caussa: schebein la casa da scola duei restar a Sut Crestas ni transferida a Selva. Suenter haver udiu ils motivs e las raschuns dallas respectivas parts, ein vegni dumandai giu ils meinis, ils quals han plidau tuts unitamein en in senn, numnadamein che ils vischins da Selva hagian neginas raschuns sufficientas tier lur pretensiun secundaria sco era en risguard dallas relaziuns, dalla situaziun e dalla experienza denter las numnadas fracziuns seigi negina cunvegnientscha da transferir la casa da scola naven da Sut Crestas. La vischnaunca ha sin quei concludiu da rugalar la casa da scola da Selva-Tschamut e zuar aschi gleiti sco ils vischins da leu seigien perina nua tschentar quella. Pil cass che la casa vegni transferida tegn la vischnaunca ora il sequent: Ils vischins da Selva ston sin agen donn e cuost procurar

1.) per in segir sulom

2.) tuts transport dalla casa da scola.

Cun quei ei stau finiu.

1. d'october 1905 Sin ina brev dalla regenza, nua che quella damonda si la vischnaunca, tgei pass ella intenziuneschi da far pervia dalla casa da scola a Selva, la qualla seigi tenor rapport dil signur inspectur buca pli sufficienta per dar scola, concluda la vischnaunca da rispunder, che la casa dil caplon a Sut Crestas, nua ch'ins hagi dau scola ils davos onns, sequalficheschi tenor rapport dil signur scolast per in oreifer local da tener scola e ch'ella, la vischnaunca, seceigi dad ad interim buca stuer baghiar casa da scola.

5 da fevrer 1911 Fa il signur president enconuschent alla ludeivla vischnaunca ch'els vischins da Selva hagian, sut datum dils 28 da november 1910, dau en alla ludeivla vischnaunca ina petiziun en la qualla numnai vischins garegian la construcziun d'ina casa da scola el vitg Selva.

Suenter haver mess en discussiun la damonda da baghegiar ina casa da scola el vitg da Selva ed udiu ils differents meinis en caussa concluda la vischnaunca

1.) da buca corrispunder alla petiziun dils vischins da Selva.

2.) da rugalar si la casa da scola a Sut Crestas tenor sco ils basegns damondan per ils vischinadis Selva e Tschamut ensemen, sco stau entochen da cheu.

Ina correspundenza scretta da Gion Antoni Peder, da Selva, pil vischinadi da Selva alla vischnaunca, per preleger alla radunonza, emprova d'argumentar nua che la scoa duei vegnir baghegiada.

Nua s'auda la casa da scola da Selva, a Selva ni a Sut Crestas?

La ludeivla vischanunca da tujestch ha da bagegiar als da Selva ina casa da scola, la vischnaunca haves creiel jeu il dretg da fixar il liug per tala casa, mo essend ils da Selva e Tschamut buca perina denter els, sche ha la vischnaunca dau plaid da bagegiar aschigleiti ch'els hagian fixau in adattau plaz.

La presenta casa da scola ei a Sut Crestas denter Selva e Tschamut ed ei vegnida baghegiada leu dil temps ch'ins era vidlunder da translocar il vitg Selva a Sut Crestas. Quella translocaziun ei aber vegnida menada atras mo per part e mo per temps d'unviern. Avon quei temps vegneva ei teniu scola a Selva en casa pervenda pils affons da Selva e Tschamut. Ils temps e circumstanzas ein semidai. La ludeivla vischnunca ha cun gronds cuosts plantau uaul silla Val da Plaun da vart da mesanotg, mess en mellis pals e fatg biars e fermes mirs ed aschia segirau il vitg da Selva da lavinas e bovas. Da l'autra vart da miezdi ei la Val Ruinatsch cun siu prighel, era quel ei savius entras tagliar ora la draussa e bostga, aschia che la neiv vegn giu dafertontier tochen ch'igl ei aunc pauca. Selva ei aschia totalmein ord prighel da lavina, aschia ch'ins sa baghegiar a Selva senza negina tema da quellas varts. In secund motiv che Tschamut vul la casa a Sut Crestas, ei il prighel da lavina dad ir e turnar als affons. Denter Selva e Sut Crestas vegn giu lavina e denter Sut Crestas e Tschamut eis ei era bua diltut segir e gnanc a Sut Crestas eis ei senza prighel. Da metter il local da scola a Sut Crestas ein tuts affons exponi al prighel, ei la scola a Selva, sche ein mo 1/3 dils affons en prighel. Plinavon ei Sut Crestas in liug isolau, nua che negin habitescha pli ni stad ni unviern. Dallas siat casas stadas eregidas leu, ein duas transportadas naven, 12 outras ein schon en plan da venir naven, pia in liug bandunau, aschia che la scola auda buca pli a Sut Crestas, bein aber a Selva, nua che ¾ dils habitonts ed affons ein. Sut Crestas ei plinavon in liug quasi senza sulegl, in terren bletsch e humid, schegie sin in crest eran las habitaziuns adina bletschas ed ils plantschius surtratgs cun stelas cura ch'ins habitava leu, pia in liug malsau. Da plidar sur da morala lein nus surschar als augsegners, sche elas anflan per indicau, nua che mattatschs e mattatschas da 15 – 16 onns ein en in liug isolau e sturnegian in denter l'auter. Ins astga era menziunar che quels umens da Tschamut, (igl ei atgnamein mo in) che vulan la scola a Sut Crestas ein sez perschudi che la scola audi a Selva, vulan aber buca dar suenter e secreian che quel che possi girir il pli fetg, hagi la megliera raschun e dat ei cass da prighel, sche ei negin obligaus da semetter sin via, seigi ch'ils affons ein a casa lur ni ch'els seigien a Selva a scola. En gliez cass ha la vischnaunca da dar sufficient uorden e vegn era a far. Era ei igl entir cussegl da scola, igl inspectur e tuts raschuneivels umens perschudi, che la scola s'audi a Selva. La medema caussa ei avon onns stada messa avon allas autoritads e stau decidu per Sut Crestas. Quei ei stau ina faulsa decisiun. La caschun da tala decisiun ei il da lezzas uras omnipotent Capeder staus, buca ch'el ei perschudius che la scola s'audi a Sut Crestas, bein aber perquei che Selva veva da lezzas uras buca s'adressau tier el per agid e cussegl.

Ord ils sura arguments seresultescha clar e bein che la scola s'auda a Selva, nua ch'il pievel ed ils affons ein ed il prighel il pli pign.

Cun in per remarclas secartessel da saver metter vitier: Ha igl ault ludeivel Cussegl Pign fixau Sut Crestas sco liug miez, il qual ei denton tuttavia buca il cass, essend nunhabita, ei aschia

mo in punct miez ; ei dat tier nus negiun liug miez.

Jeu secartess ch'ins astgass cun tut dretg pretender ch'ina scola vegni messa sper enzatgi. Vegn la scola cheutras dis da malaura totalmein negligida; e la survigilanza sin nos affons ei ordeifer las uras da scola era buca sunter giavischs. Ei cass empruau ch'in scolast cun habilitad vegn mai a surpender ina scola desertada e tagliada giu da tutta glied sco Sut Crestas ei.

Serecumandein a Lur beinvulientscha sco car convischin e cumpatriot

Cun cordials salids e schon ordavon nies engraziament

Peder Joh. Ant.

1. d'october 1912 *Prelegia il signur president la sentenza digl aultludeivel cussegl pign en caussa recuors vischinadi Selva, contra la vischnaunca Tujetsch, pervia dil translocar la casa da scola da Sut Crestas a Selva, la qualla sentenza ei vegnida dada ora en favur dalla vischnaunca, da buca translocar la scola.*

La decisiun dil Cussegl Pign, tarmessa tier allas autoritads communalas, ils 16 d'uost 1912, en fuorma d'in stampat da treis paginas, decida: "Die Beschwerde des Schulrates Selva wird im Sinne der Erwägungen abgewiesen." Cheu suonda in extract da parts da quei scriver:

"Für das Schuljahr 1911/12 seien 22 Schulkinder. Der Hauptgrund aber, weshalb in Selva der Bau eines Schulhauses verlangt werde, sei die grosse Lawinengefahr, der die Kinder auf dem Schulwege nach Sut Crestas ausgesetzt seien.

27 da fevrer 1916 *Arisguard la casa da scola a Selva vegn concludiu da star sil sulom veder.*

17 da fevrer 1918 *Tals che vulan surpender las lavurs dalla casa da scola a Selva, san dar en lur offertas entochen il davos d.q. al signur president, nua ch'ins sa era prender investa dils plans.*

Il contract, per l'erecziun dalla nova casa da scola a Sut Crestas dallas autoritads communalas culs sorprendiders, vegn tschentaus si il december 1918.

Contract per baghegiar la casa da scola Selva-Sut Crestas

Sut il sut indicau datum ei serrau il suandont contract denter ils interessents contrahents :

- 1. La vischnaunca paga ina summa da 6150.- frs. (sismelli e tschientschunconta frs.) il qual importo vegn pagaus totalmein aschigleiti sco la casa ei baghegiada ora e colaudada dallas autoritads cantunalas silmeins 80 % vegn pagau il november 1919 tenor sco las lavurs ein finidas.*
- 2. La vischnaunca metta tut material sil plaz, metta a disposiziun in local sut tetg a Sut Crestas per luvrar e sco loschi e lenna da cuschinar, dapli la stiva da scola vedra a Sedrun per las lavurs vid quella casa.*
- 3. Tuttas lennas da quadrar vegnan aschilunsch sco pusseivel resgiadas ora entiramein sin mesira dada en.*
- 4. Tuttas necessarias lennas per eschadiras, petgas da posts finiastras e las necessarias aissas per tablegiaus überhanbt lenna per las lavurs che vegnan fatgas a Sedrun vegnan dalla vischnaunca pridas giud resgia ni rabbitschadas dils respectivs privats che dattan aissas seccas e messas sil plaz per sechentar ni sper il luvratori a Sedrun sco ils meisters anflan per bien, dacheu naven ei lavur dils mesiters.*

5. Per mesirar aissas da privats vegn bonificau 1.- frs. per ura.

Ils sorprendiders declaran :

1. Da far tenor plan tuttas lavurs da lennari e scrinari e schnizler pinau ora fixum fertig las clavs enta maun che ston vegnir fatgas vid quei edifeci, priu ora quei da miradur e vid fundament.
2. Da dar en ina gliesta per las empustaziuns da ferradiars, glasa, cons ziaghels grevs da Turitg.
3. Da dar en sin resgia las mesiras dalla lenna da resgiar ora en diember e qualidad.
4. Da finir las lavurs tochen igl 1. october 1919 totalmein, sche ton pusseivel, bein aber sil pli pauc la stiva da scola, il zemmer dil scolast ed il gang, aschia ch'ei sappi vegnir dau scola.
5. *Ils sorprendiders stattan negina garanzia per calarvia da plantschius e tablegiaus.*

Per vigur dil sura contract, suttascrivan las parts

Tujetsch, ils 22 da december 1918

per vischnaunca contrahenta

Per ils sorprendiders

Beer Vigeli Jos. fegl

president communal

Beer Vigeli, bab

Gion Andriu Berther

Deragisch Emanuel

Plazi Schmid

Igl onn 1919 ei la casa nova da scola finalmein vegnida baghegiada a Sut Crestas. Il suandont artechel ella Gasetta Romontscha plaيدا dalla malcontentientscha dils da Selva: Ils onns e las lutgas dils onns precedents han schau anavos fastitgs.

Correspondenza dil pei dil Badus. Ils vischinadis da Selva e Tschamut han survegniu uonn ina stupenta casa nova da scola. Ella ei baghegiada a Sut Crestas sper l'enconuschenta caplutta da «Maria digl agid» ni «Maria Hilf». Igl ei ina casa da lenn bein luvrada e stupent decorada dadens e dado cun bials ornaments tagliai ora en preits e plantschius. Ella porscha pilver igl aspect d'ina nobla villa.

Ils cuosts ein stai considerabels. Grondas difficultads ha principalmein il rabbitschar il material sil plaz dau. Quel han ins numnadamein stuiu spedir cun agid d'ina suga dil stradun tochen sin il plaz da baghegiar. Il vitget da Sut Crestas, che schai denter Selva e Tschamut, ei vegnius baghegius els emprems decennis dil davos tschentaner suenter la gronda catastrofa dalla lavina da Selva d'anno 1808. Igl emprem, ch'ei vegnius sil patratg da tanslocar il vitg pli anen en in liug segir da lavina ei stau pader Placi a Spescha. Siu plan ei vegnius realisus en quei senn, ch'ins ha laschau las casas a Selva leu e fatg si a Sut Crestas casas novas. Cura ch'igl unviern tarmetteva l'emprema neiv, lura emigrava igl entir vischinadi a «Maria Hilf» e habitava leu entochen la primavera. Quei descriva nies poet Giusep Steiner en sia poesia sur la Val Tujetsch sco suonda :

Ed in quart ura pli anen

Eis ei in vitg cun tgèsas lenn.

Cu ei smanatscha la lavina

Leu ei la mumma digl agid

Che dat ad els fetg grond cunfiert.

Ussa succeda l'emigraziun a "Maria Hilf" buca pli. Ins ha gia transportau pliras casas anora e gleiti restan leu mo caplutta e casa da scola pli. Il vitg da Selva ei numnadamein buca pli exponius al prighel da lavina. Dad ina vart vegn quella impedida entras in spess uaul,

plantaus avon circa 50 onns e da l'otra vart han ins pinau ora il cagliom videifer, aschi che la neiv seleischna giu dafertontier ch'ei neiva.

Essend las relaziuns el decuors dil temps semidadas sin tala moda, han ils vischins da Selva anflau per cunvegnet, ch'ins vegni era cun la scola a Selva. Lur pretensiun pareva era d'esser giustificada muort la circumstanzia, ch'il vaidi da Selva a Sut Crestas ei buca senza prighel da lavina. Era ei la cuorsa da Tschamut a Selva buca per pli che duas minutas pli liunga, che da Tschamut a Sut Crestas, aschia ch'ei emporta pauc ch'ils da Tschamut van giu Sut Crestas ni giu Selva a scola. Mintgaga, cu ei dat neiv, ston ils affons da Tschamut rumper via per ir a scola, ferton che da Tschamut a Selva eis ei adina ina buna via da slusada. Plinavon havess la casa da scola udiu a Selva, essend leu la casa pervenda ed il grond diember dils affons, quei vul dir duas tiarzas da quels. Cun quei che la casa da scola ei aschi allontanada dils vitgs habitai, vegn la scola tier mintga nevada interrutta per enzacons dis. Sche nus havessen a Selva la casa da scola, vegness quei buc avon.

Ins ha denton dau negina ureglia alla bein motivada pretensiun dis vischins da Selva. Nus vulein cheu tuttavia buca passar si encunter la sentenza d'aultas autoritads e nus astgein era buca dubitar sur la gestadad da quella, schegie che nus vesein buc en ella, essend nossas enconuschientschas giuridicas cumpatg memia pintgas. In motiv principal ch'ins ha buca dau la scola a Selva ei bein quel, ch'ins temeiva d'allura era stuer dar als da Tschamut in'atgna scola e quei vuleva ins ord interess evitar. Basta, la casa da scola ei ussa baghegiada a „Maria Hilf“ e nus lein e stuein esser cuntents aschia e tarmetter viaden nos affons, quei vul dir exponer els al prighel, aschi ditg sco Dieus pertgira quels da disgrazias tras lavinas, las qualas ein en nossa val da larmas buca raras.

(Gasetta Romontscha, 1919, dils 9 d'october, artechel secrets da scolast Tumaisch Venzin.)

Culs onns 1950 semida la situaziun demografica a Selva/Tschamut. Igl onn da scola 1958/59 daventa il davos onn da scola a Selva. Il schaner 1959 scriva il caplon sur Stephan Schuler alla suprastonza communal, fagend attent davart la situaziun actuala.

Cun questas lingias lessel far ina istanza supplica e damonda pervia dalla scola da Selva. En nossa scola vein nus uonn 6 scolars e quei tut buobas. Igl unviern ei grevs, pli grevs che quei ch'ins ha septgau. Ed ussa vein nus propi in marteri pervia dalla via da scoa. Pli baul eis ei stau pli lev: bunavmein entochen la fin da fevrer han ils purs da Selva schau lur tiers a Sut Crestas ed aschia han els cun ir a poerver automaticamein giu adina ina via passabla.

Era il diember dils scolars era pli gronds ed aschia ha ei adina giu via. Ussa eis ei tut auter. Il davos pur vegn gia da Nadal orda Sut Crestas e lura va buca ina suletta comba pli anen. Pervia da quei ston las buobas manterner la via e da Selva eis ei mo treis buobas, da Tschamut era mo treis. Cun quei never e cufla ei ei daventau, che la via ei bunamein adina cuvretga. Jeu haiel gia supplicau ils habitonts da Selva e Tschamut da vuler far via ed els fan era quei. Mo avon las nov va negin sin via e la scola duess entscheiver allas otg. Lu ston las buobas far via ni mirar co ellas vegnan tras las nevas.

Mo era quei ei il cass, chils umens han fatg via ed ei cufla gest puspei en. Savens han els fatg via e l'auter di, la damaun marvegl ei tut cuvretg. Jeu mez vegnel nunpusseivel tars quella neiv ed hai simeins in'ura per vegnir atras tochen tier la scola ed aschia hai stuii tralascar pliras gadas la ductrina. Quei ei propi malemperneivel, fa cuntinudamein quitaus e displaschers.

Lu haiel giu in idea e plidau sur da quella cun vies signur president. Jeu lessel supplicar, che la suprastonza communal, vegli lunir da far scoola an la casa da Battesta Giger ch'ei vita. Ils geniturs da Tschamut ein d'accord, pertgei ch'il stradun ei il pli savens aviarts e la via aschia pli leva e pli emperneivla. Cun Battesta Giger haiel sin giavisch da signur president Jacomet era plidau; el ei d'accord da dar la stiva e la cuschina, sco naturalmein era la tualetta. La cuschina sto el dar, pertgei che leu sesanfla la pegna da scaldar. Tuttas autras

combras restan serradas. Signur Giger pretenda persunter la summa da 150.- frs. tochen la fin digl onn scola; naturalmein ston ins dar anavos la stiva e cuschins en bien stan. Recamondel quella supplica instantamein a Vossa beinvulientscha. Jeu fuss leds e propi ventireivels, sche Vus, stimai signurs, savesses vegnir encunter e sedecclarar d'accord cun quella proposta. Ei setracta mo da quels treis meins tochen la fin digl onn scolar. Il proxim onn vegn ei buca pli en damonda da far scola a Selva, lura drova ei era buca pli il manteniment ni dalla scola ni dalla via. jeu sperel zun fetg, che vus veglies ponderar quei en ina propi bien clima e buna luna e lura prender in conclus, ch'ei per mei e per las paupras buobas in grond levgiament. In grond Dieus paghi ed ils mes il pli respectai salids St. Schuler, caplon

Nota bene!

Liquidar san ins la scola da Selva aunc uonn buc. Pigl onn 1958/59 duvrein nus la scol da Selva, per quei che nus havessen mai anflau plaz per ils affons da Selva/Tschamut ellas outras classa e scolas. Tuttas classas da Sedrun e Rueras ein uonn propi fullanadas.

Ils 16 da fevrer 1964 veda la vischnaunca la casa da scola a Sut Crestas. La notizia el cudisch da protocols da vischnaunca ei cuorta e precisa.

16 da fevrer 1964 Signur president orientescha sur interessents e dils motivs pertgei ei cunvegna da vender la scola a Sut Crestas. Era han ils vischins da Selva e Tschamut sin incarica da signur president priu posiziun en caussa ed ein cuntents da schar vender ella. La radunonza da vischanunca decida tras tscherna da vender ella.

Ils scolasts

Suenter sur Deplaz, cugl onn da scola 1855/56, han seculars surpriu la scola. Plirs han fatg quei senza gronda preparaziun ni ulteriurs studis, auter che giu frequentau la scola da vischnaunca, sco en biars auters loghens. Els havevan pintgas pagas, denton era pintgas expensas, essend ch'ils vischins gidavan ora generusamein ils «schulmeisters» en lur tenercasa ch'els fagevan per ordinari sez.

Giusep Steiner, scolast a Selva da 1867 – 1870 nota il suandont sur dalla scola :

Con mal steva ei cun la scola pli da vegl, principalmein a Selva. Ins po dir ch'il bastun eri il "schulmeister" e buca l'instrucziun. E lu san ins aunc dir, che avon la vegnida dil signur pader Sigisbert sco caplon, regeva ei buca il meglier uorden e schubradad en casa pervenda. Ella casa da lur spiritual era ei segir buca igl exempel che animava tier schubradad e bien uorden. Quei che la presenta generaziun vesa uss, ni quei ch'ei vesevan avon siatonta ni otgonta onns. Tgei differenza! Quel, pader Sigisbert, ha lu buca vertiu la scola leu en sia habitaziun digl unviern, essend quei memia grond disturbi per in spiritual. La scola ei lu vegnida fatga entgins unviarns en ina stiva d'in pur leu sper baselgia e pli tard lu baghegiu ina casa da scola. Gia plirs unviarns ein ils caplons nuota ira a Sut Crestas per habitar leu.



En scola a Sut Crestas

Ils scolasts ch'ei stai a Selva:

1855/1857	Gion Paul Riedi da Tschamut
1857/1859	Balzer Anton Curschellas da Surrein-Tujetsch,
1859/1860	Gion Battesta Matiuët da Cumpadials, 120.- frs. paga e 22 jamnas scola
1860/1861	Gion Giusep Monn, Cumpadials,
1861/1863	Rudolf Cavelti, Sagogn, haveva era da scaldar la pegna dalla scola, nua ch'ei vegneva d'vrau bostga e striaunas. Cavelti, in giuven da 16 onns, ha giu scret inagada a casa sur da quei, per dar ina idea dall'altezia, enten la quala el sesanfli!
1863/1865	Gregori Capeder da Curaglia. Ei staus igl empren che ha dau scola ella casa nova.
1865/1867	Stiafen Albin da Mumpe-Medel
1867/1870	Giusep Steiner, Selva
1870/1872	Rosa Berther, Selva
1872/1908	Duri Riedi, Rueras, 36 unviarns
1908/1909	Onna Maria Caplazi, Surrein-Sumvitg
1909/1910	M. Blumenthal
1910/1915	Giachen Fidel Berther, Rueras
1915/1917	G.Sialm, Mustér
1917/1919	Giachen Benedetg Venzin dad Acla-Medel (Scolast Giachen Benedetg Venzin dad Acla-Medel ei sedisgrazias d'ir a catscha da camutschs enta Medel, ils 7 d'october 1919.)
1919/1920	Sivester Simeon, Lantsch
1920/1922	Anna Schuoler, Sumvitg
1922/1924	Pia Candinas, Sumvitg
1924/1925	Eusebi Cavegn da Breil (morts 1956 il davos d'avrel).
1929/1933	Maria Ursula Catarina Cavegn da Rueras
1933/1934	Josef Derungs, Camuns
1934/1939	Josef Gieriet, Tujetsch
1939/1943	Gieri Cavegn, Breil
1943/1944	Ludovic Hendry, Cavorgia
1944/1945	Vigeli Berther, Camischolas
1945/1946	Felici Hendry, Cavorgia
1946/1950	Mathilda Halter, Surcuolm

1950/1951	Giusep Giossi, Rueras, morts ella lavina dils 20 da schaner 1951
1951/1953	Alfons Schmet, Sedrun
1953/1955	H. M. Schlanser, Surrein-Sumvitg
1955/1956	Lorenz Paulin, candidat-scolast, Schluein Albert Deplazes (seminarist)
1957/1958	Mario Gadola, Mustér
1958/1959	Aluis Tuor, Cumpadials (seminarist) Luregn Carigiet, Breil/Dardin (seminarist)

Scola da lavur

1905/06	M. Berther
1906/07	Marg. Berther
1909/10	M. Jul. Berther
1921/22	Maria Berther, Rueras
1923/24	Pia Candinas
1930/31	M. Ursula Cavegn



**Scola cumplessiva
da Sut Crestas cul
scolast H.M.
Schlanser**

8. Scola e scolasts da Cavorgia

Cavorgia schai pulitamein giud via da Sedrun e quei sto esser stau il motiv dil vischinadi da sez erreger ina scola. Els ein stai piuniers ed han eregiu lur scola igl onn 1848, sco emprems ella val ensemen cun Sedrun.

Ils 20 da schaner 1840 scriva igl «Ordinariats-Officium» da Cuera:

Tavetsch an Herrn Decan und Pfarrer Joseph Hitz: Auf das geziemende Ansuchen Namens der Einwohner des dortigen Filialhofes Cavorgia, es möchte demselben ein kleiner Beitrag aus dortiger vermöglichen Kapelle S. Lucii zur Haltung einer eigenen, wegen dem weiten und oft lebensgefährlichen Wege zur allgemeinen Pfarrschule, fast unentbehrlichen Hofschule bewilligt werden, erlaubt das Ordinariat, dass alljährlich ein Beitrag von fl. 20 aus benannter, dortigen Kapelle als Salarium eines Lehrers verabfolgt werden können gegen dem, dass

- 1. die Einwohner für die Nahrung des Lehrers selbst sorgen möchten,*
- 2. alle Kinder zur Schule, und allen Eltern derselben zum Unterhalt des Lehrers pro rata verpflichtet seien, dass*
- 3. Lehrer und Schule unter die Aufsicht des Pfarrers gestellt seien, und dass letzterer befugt sei, sowohl Materialien als Personalien der Schule zu entfernen, wenn sie den guten Sitten, oder der Reinheit der katholischen Lehre gefährlich werden sollten, endlich*
- 4. dass diese Bewilligung auf zehn Jahre beschränkt sei, indem man erwartet, dass bis dorthin andere Hilfsquellen für diese Schule ausfindig gemacht werden können.*

Chur, am 20. Jänner 1840

Das Ordinariat-Officium für Selbes Jac. Fr. Riesch, Cancellier.

(Archiv communal Tujetsch)

Ina interessanta notizia cumparida ella pressa romontscha, en igl Amitg dil Pievel (I) 1841, nr. 50. secloma:

"Cavorgia in hof da paucas casas en Tujetsch duei haver concludiu da baghegiar ina casa da scola. In exempel che mereta imitaziun. Contas grondas vischnauncas dat ei, nua ch'ins ha negina casa da scola."

(Amitg dil Pievel (I) 1841, nr. 50)

Igl onn 1848 vegn la casa da scola erigida. El contract dils 3 d'avrel 1848 davart il baghegiar la scola a Cavorgia stat ei scret:

Ei daventau in Contract denter la Comissiun de Scola dina wart e maister Gion Antoni Schmedt de lautra wart, maister Gion Antoni Schmedt surpren da baghegiar ina Casa de Scola a Cavorgia en largezia denter las Preits 10 ½ bratscha en largezia de mintga maun, che duei vignir faitg ina Stiva, in Stebli de trei e miez Bratscha e la Stiva 7 bratscha sin mintga maun, con aung ina Combra el Giebel, deigi lura vigniu mess si Isiarhels e Canals e tablegiau las Grundas sin tuts mauns sut si. La stiva e stebli deigien ristar l'altezia de 13 quartas. Perquella lavur paga la Comissiun al detg Schmedt in Capital de 85 fl digiel oitgiontatschun Risculdis, e dus Thalers remess. Il Capital veing pagaus duas tiazas sin Datun proxim, et ina tiarza deigi vignir dau empau pli liung tems, nonessent el Cass de saver pagar tut. Il maister ei lura obligaus de far la Lavur sco ei auda. La Lenna deigi vignir dulada sco quella dil Mucli ei stada dulada.

Tujetsch ils 3 de Avrel 1848.

*Joseph Ant. Durgiai, Farrer
Johann Jacob Beer, Actuar*

(Archiv communal Tujetsch)

Era per il pinar ora e mobiliar la scola ei stau fatg in contract.

Tujetsch, ils 23 de Avrel 1849, eis ei daventau il sequent Accort de lavur denter Sigr. Lucas Caveng e Sigr. scarvon Monn en Num della Comissiuin de Scola e Meister Gion Antoni Schmed a risquart il pinar ora la Casa de Scola de Cavorgia et ei sco suonda:

1mo Sto il Meister Gion Antoni far ella maldigiada Casa dus Plentschius perdius en Stiva e Stebli castrai, e dus surengiu, dapli dus suren en il madem Stebli e Stiva. Item on cuschina in plentschiusuten daven dilg Esch casa entochen dadens ilg Esch Stiva, e suren avon Combra era il madem, sco era il plentschiusura della Combra dilg Giebel.

2do In esch casa fatergiu, dus Eschs cun tablas sin la Stiva e Stebli et in cun arigels sin la Combra. Tuts quels Eschs sto el anferar e meter si.

3tio Ina Scalla per ira sin Combra, e far oitg barcuns e quels anferar e meter si els, item tabliar entuorn la pegnia e far ina fanastrel sut quella en.

4to Supias entuor la Stiva daven din Esch entochen lauter et era ina meisa, della Stiva liunga. Sco era ina supia de quella lungezia. En Stebli in letg et ina meisa ordinaria e duas supias pintgias cun artg. Fus ei era aung de basegns de meter en ischenchels sehe eis el era tier quei obligaus.

Tut quella Lavur sto lura esser buna e solida. Per quella lavur paga la Comissiuin de Scola, f 55 dico tschunconta tschun renschs, sin ilg atun proxim de quest onn. Duess aber la lavur per munchonza dellas aissas buca saver vegnir fatgia entira en quest onn, sehe veng il pagamen faitgs mo suenter della proportiun della lavur.

Per confirmaziun dilg Sura suttascrivien las parts contrahentas. Il Meister Gion Antoni Schmed, nunsavent scriver fa si sia Noda Casa.

Lucas Cavegn

sco Comissionau de quella vard

(Archiv communal Tujetsch)

Davart quella casa scriva Giusep Steiner:

Baghegiada eis ella sin ina muota da grep, pressapauc mesavia denter las casas dil vitg Cavorgia e quellas dil Plaun s.Leci. Ella ha negin tschaler, mobein ina stiva, in stebli cun ina combretta el giebel. La cuschina ei buca spartida si, e vegn duront 10-12 seras igl atun squitschau ora ieli da semglin en quella cuschina. Grond disturbi pil scolast quellas notgs ... Jeu vevel ils scolars dils davos onns che vevan tut lur geniturs ch'eran stai a scola tier mei. (Ord las notizias da Josef Steiner. Quei scolast ei staus in original e schizun poet.)

Sco ei para vevan ins era empruau in onn da metter si scola a Surrein.

Sur Giachen Antoni Monn, nativ da Sedrun, naschius 1829, ha da giuven, forsa da student, fatg scola a Surrein en casa giudem da Luis Curschellas; denton probabel buca ditg. El ei morts 1872 sco caplon da Laax.

(Notizia da pader Baseli Berther)

Cavorgia haveva gia giu avon scola, zanza en ina casa privata. Sco emprem scolast en la nova scola han ins elegiu il giuven Leci Antoni Balzart per 45.- frs. Anflar scolast era per cavorgia buca sempel e quei ha cuzzau atras tut ils onns d'na scola. Biaga ha ei dau nuot auter che d'anflar cumpromiss, magari cun ira a Sedrun, ni ils davos onns cu la scola ei vegnida menada cun agid da seminarists. Gia 1850 scriva inspectur Placi Condrau:

Per buca schar pli ditg la scola da Cavorgia orfonila haiel jeu cun consentiment digl emprem gerau (en riguard la paga) e cun cussegl dil signur Janer (en riguard il personal) pladiu leu in

scolast sut las condiziuns sco onn. Il cussegl d'educaziun vegn tenor empermischun a schar vegnir tier ad el in susteniment de 40.- fr.

(Archiv communal Tujetsch)

Ils 7 da zercladur 1880 scriva il departament d'educaziun al cussegl da scola dalla vischnaunca da Tujetsch:

Aus den statistischen Tabellen des Schulinspektorates Kath. Oberland haben wir entnommen, dass der Lehrer der Schule in Cavorgia im letzten Schulwinter folgende Belohnung erhielt:

f 200 baar

f 100 in Naturalien

f 40 Wohnung und Holz

Sie werden hiemit eingeladen, sich beförderlichst unser vernehmen zu lassen, in was die Naturalien bestanden und wie dieselben gewerthet worden sind.

Der Vice-Präsident F. Manatschal

(Archiv communal Tujetsch)

Il pagar ils scolasts ina part cun naturalias era usitau era en autras scolas. Mo scriva il departament d'educaziun en in auter liug, ch'el seigi buca absolutamein encunter il pagar ils scolasts sin quella moda, stoppi denton pretender che quellas naturalias vegnien surdadas dil cussegl da scola al scolast, sinaquei ch'il scolast seigi buca necessitau d'ir sez casa per casa per quellas.

La casa da scola a Cavorgia

da Cecilia Hendry-Schmid, Cavorgia

Aschi anavos sco jeu seregordel ha la casa sil grep sper la via denter la part sura digl uclaun da Cavorgia e la part sut, il Plaun s.Leci, surviu sco casa da scola. Jeu mezza hai frequentau mes onns da scola en quella digl october 1929 tochen igl avrel 1938.

La semplia casa da duas alzadas fuvu tablegiada ordadora cun slondas. Damai ch'ella era tschentada sil grep havev'ei negin tschaler. Atras in ferm esch-casa vegnev'ins en in pierti aschi grond sco circa ina tiarza dalla mesira dil plaun terren. Senierster steva ina scala per ir en l'alzada sura cun ina combra. Si cheu fuvu tut il material vegl e buca duvreivel. Dretg el pierti fuvu l'entrada per la stiva da scola. Gest speras era il tgamin cun la bucca pegna e davostier ina furnascha da mir per cuschinar. Las preits e plantschiu sura fuvan stgir-brinas dil fem.

En quei pierti sesanflava da lezs onns in spezial indrez per struclar ora ieli semglin. Sper la preit entadem il pierti fuvu baghegiu si cun ferms quaders igl indrez per il torchel da smaccar. Gliez vegneva fatg cun dar aigra cun in liung e ferm quader lenn. Quei quader da circa quater meters steva tut ils onns per liung dil pierti entochen ch'ins ha entuorn 1950 dismiss tut quei uorden. Ina finiastra entadem il pierti deva empau glisch.



La stiva fuvu biars onns partida si en dus locals. Ord munconza da scolars ha ina famiglia viviu in cuort temps en casa da scola. Els onns ch'ei ha puspei dau scolars han ins fatg ordlunder mo ina stanza, fatg novs plantschiu e tablegiu tut cun tablegiu-table e fatg finiastras novas da treis varts.

La stanza fuva clara ed emperneivla. Sco decoraziun fuva mo in sulet maletg ed il crucifix. Sin ina preit pendevan duas cartas da geografia, ina dalla Svizra ed ina dil Grischun. Vid l'otra pendevan duas tablas da scriver, ina cun lingias, ina senza. Duas crunas vid la preit fuvan per metter si nos carnets da bi. Cul niev cudisch da tudestg ei vegnius daus a nus, havein survegniu in maletg da preit d'instrucziun. Pli tard ha enzatgi schenghegiu alla scola ina copia d'in maletg da Aluis Carigiet, la «vacca verda».

Il mobiliar da nossa stiva da scola fuva mudests. En in cantun ina meisa ed ina suppia cun pusal, plinavon in sempel pult per il scolast ed 8 – 9 bauns da scola. Dus da quels bauns havevan dus plazs, ils auters treis plazs. Miez la meisa dil baun savev'ins volver si e davon il baun giu savevan ins tschentar giu la tabla da scriver da crap. Sut il plat dil baun haveva mintga scolar ina crunetta per sias caussas. Sin il sottapeis da gliestas savevan nus tener nos peis e schar luar la neiv giud nos calziers enguttai. Ils bauns eran magari bass, ils affons pli gronds havevan breigia da stender la membra. Ina gronda e buna pegna deva cauld a l'entira stanza. Il cauvitg ni in'otra persuna scaldava mintga damaun marvegl la pegna. Vid il plantschiu sura pendeva tochen 1957 ina ampla da petroli. Sch'ei fuva la damaun allas otg buca clar avunda, sche deva quella in tec clarezia, ni la sera sch'il scolast haveva aunc lavurs. Ina spina dad aua dev'ei era buca en casa. In scolar stueva ir per aua da lavar las tablas ord il begl sper il dutg. Avon casa fuva in laupiet, entadem quel in camberlet cun cumah schetg.

Nos onns da scola a Cavorgia

da Cecilia Hendry-Schmid, Cavorgia

Ils onns da mia affonza fuvan nus ina roschada affons el vitg da Cavorgia. Aschia fuva la stiva en casa da scola sil grep sper la via, duront biars onns emplenida bein cun scolars. En quella casa che stat aunc oz denter il Plaun ed enasi Cavorgia, sun jeu ida otg unviarns a scola. Nus fuvan vegn e dapli scolars en otg classas e mo in scolast. Uras da scola eran adina navenda las otg dalla damaun entochen las endisch cun ina pausa d'in quart ura. E lu da l'ina tochen las quater. Per tut las classas adina quei temps e la sonda suentermeizdi liber. La mesjamna suentermiezdì havevan ils buobs gimnastica ni schiglioc ina occupaziun ordaviert cul scolast. Las buobas havevan lu scola da lavurs manilas, cuser e far caltschiel. Ina ga ad jamna deva il caplon da Sedrun ducrina per in'ura e mesa a tuts scolars.

Suenter l'oraziun la damaun deva il scolast a mintga classa siu pensum da lavur. Per tuts, priu ora l'emprema, fuva ei ualti adina da far quen a scret entochen la pausa da mesa las diesch.

L'emprema haveva d'emprender las cefras ed ils emprems quens. Denteren haveva scadina classa dapersei quen a tgau, negin vegneva da mitschar orasut.

Suenter la pausa, che era il scolast haveva veramein da basegns, mava nies studi vinavon. Las classas aultas, navenda la quarta tochen la tschunavla, survegnevan ils penusm per emprender tudestg. Quei deva a bein enqual da semudergiar, principalmein cun la grammatica, declinaziuns e

verbs. Las classas cun pensums romontschs, leger e grammatica romontscha en leger e scriver fuvan bein occupadas. Avon las endisch vegneva scadin aunc vidlunder da mussar ils pensums fatgs a casa. Leds ch'ei deva prest il gentar mavan nus casa. Memia spert fuva ei l'ina e pauper quel che vegneva memia tard, per lez dev'ei in «strof», scriver giu a casa.

Suenter l'oraziun deva ils scolast a mintga classa siu pensum da far per tudestg u romontsch en scret. Quei fuvan concepts, geografia, historia dalla patria e historia naturala. Denteren vegnevan certs roms pri atras a tgau. Il scolast ch'ei staus en mes onns da scola deva bia peisa sin grammatica en romontsch e tudestg. Il cudisch da grammatica da pader Ursicin Simeon cun las colonnas da verbs regulars e irregulars,



conjugaziuns e declinaziuns, savev'ins la fin dalla scola bunamein ordadora. Era ils scriver bein e schuber fuva lu impurtont.

Cun ils scolars dallas empremas treis classas stuev' il scolast far bia exerchezis a bucca. Perquei regeva gronda disciplina en scola. Mintgin stueva emprender da seconcentrar sin sia lavur e buca disturbar il vischin. Il scolast fuva attents e fageva endamen las consequenzas. Cant havevan nus buca cun regla, denton emprender poesias e da raquintar ualti savens.

Tut material da scola, per mintga classa siu cudisch da leger e quel da far quens e cudischs da tudestg, stuevan ils geniturs pagar. Perquei artavan nus adina quels denter fargliuns. Aschia vesevan ils cudischs ora cul temps ualti mal. Da mes onns da scola havein nus duvrau la tabla da platta morta ed il greffel da crap tochen la davosa classa. Suenten las correcturas scrivevan nus in ton dils pensums en in carnet. En ils carnets scrivevan nus cun plemas da metal e tenta. Da temps en temps scrivevan nus certs pensums en tuts roms en il carnet da bi. E quei per saver tschentiar ora quels sin ina meisa, cura ch' ils geniturs vegnevan sin viseta duas ga per unviern. Igl inspectur visitava nus duas ga per onn.

Ils emprems treis onns sun stada a scola tier miu aug Gion Antoni Schmed che fuva sils onns. Ina ga ha el per in motiv che jeu sai buca pli, dau a mi ina tazza cun la lingiala sin miu maun aviert ora. Quei ha fatg aschi mal che jeu hai fatg il propiest da mai dar caschun pli per in tal castitg. In onn havein giu in scolast da Trun gest ord il seminari che ha giu pauca pazienza e dau fridas a bein enqual scolar. Ils davos quater onns havein giu in scolast els megliers onns. Quel haveva buna disciplina en scola ed era buns sco in bab. Quel procurava che nus survegnevan mintga atun enzaconts haras meila e parteva ora a mintga affon per purtar a casa. Sin Nadal mussava el a nus in giug e canzuns ed envidava en ils geniturs. Inaga haveva el perfin rimnau resti per ils affons e partiu ora. Tut che haveva giu grond plascher, ils geniturs ed affons. Nus havevan aunc mai enconuschiu tals benefactors.

Tier quei scolast sun stada ils davos quater onns. Nus fuvan lu entuorn 22 scolars. Ei haveva num star cul tgau tier la lavur e mirar mintgin da siu pensum. Jeu seregordel ch'ei regeva quietezia duront ch' il scolast fageva la runda entuorn ils 7 – 8 bauns da scola. Ins udeva mo il sgarflem dil greffel da scriver sin la tabla e mintgaton ina pitgada da nos calzers enferrai cun guotas.

En las davosas classas dev'ei da suar cun igl emprender tudestg a bucca ed a scret. Nossas lecziuns da scola fuvan en las davosas classas pli e pli bia en tudestg. Aschia era il far quen, che era per nus grevs, muort las cefras zanistradas dil tudestg. Auters roms sco geografia e historia ed auter empredevan nus adina sin romontsch. Exercezi da cant havevan nus mo inaga ad jamna circa mes'ura.

Essend nus a Cavorgia mo 2 – 3 scolars per classa, vegnev'ins mai suto en pensums a bucca. Nossas cameratas en la scola a Sedrun, cun partida affons per classa, raquintavan a nus da lur saver sefugir dallas damondas dil scolast.

Pensums a casa en quens ed auter survegnevan nus mintgadi cun paucas excepziuns, sco da Sontgaclau e Nadal. In miezdi il tscheiver raquintava il scolast en scola praulas ni ch'ins deva giugs. Inaga astgavan nus ira cul scolast a mirar teater ni a mirar in film mét a Sedrun.

Il di da fiera sogn Martin havevan nus liber. Ils buobs astgavan catschar ils tiers cul bab ensemen dallas Cavorgias oiragiu tochen a Mustér e lu turnar la sera a pei a casa. In brav strapaz! Fuva la raccolta da truffels en retard, survegnevan ils scolars magari liber per gidar ils geniturs, sco era per gidar a scuder.

...

Cugl onn da scola 1967/68 ha la scola dil vischinadi da Cavorgia pegliau sia fin. Varga tschien onns ha quella casetta sil grep surviu sco scola e per l'instrucziun dils affons da Cavorgia. Silsuenten han ils affons da Cavorgia stui serender a Sedrun. (a pei/cu bus)

Igl onn venda la vischnaunca la casa. Quella vegn midada en ina casa da vacanzas.

Ils scolasts e las scolastas

Cavorgia ha giu el decuors dil temps ils suandonts scolasts:

- Avon 1855: Muggli da Cavorgia
Stiafan Beer, in onn
Duri Riedi da Rueras
Hermarina Fazendin da Danis
Gion Antoni Soliva da Sedrun
Sigisbert Monn da Mustér
Genal da Surrein-Sumvitg
- 1856-1862 Giusep Anton Steiner da Cumpadials, cun ina paga da 100.- frs. per onn.
1862-1872 ston ils affons da Cavorgia, essend zun paucs, ira si Sedrun a scola.
1872-1874 3 onns ha Giusep Antoni Steiner dau scola a Surrein/Tujetsch, en casa da Giger per
ils affons da Surrein e Cavorgia, essend ils biars da Surrein. Paga 100.- frs.
1876-1884 8 onns ha Giusep Steiner puspei dau scola a Cavorgia ed haveva retschiert ils davos
onns entras beinvulientscha digl inspectur Disch la patentia d'admissiun.
1884-1894 ein ils affons da Cavorgia i a scola a Sedrun.
1894-1896 Adalbert Schuoler, Cumpadials
1898-1901 Onna Maria Caplazi, Surrein-Sumvitg
1901-1916 ein ils da Cavorgia puspei vegni a Sedrun a scola; la vischnaunca pagava in ton per
affon.
1916-1917 Giachen Fidel Berther da Rueras (La primavera 1916 ha el stuiu ir schuldau; per el
ha scolast Albin da Breil gidau ora a Cavorgia e finiu igl onn scolastic.)
1917-1920 Giachen Fidel Berther da Rueras
1920-1925 Silvester Simeon da Lonsch
1925-1928 Tumaisch Venzin da Sedrun
1928-1933 Gion Antoni Schmed da Cavorgia
1933-1934 Serafin Bundi, Trun
1934-1939 Gieli Cavegn, Breil
1939-1945 Teofil Schmed-Valier, Sedrun
1945-1946 Vigeli Berther, Camischolas
1946-1947 Rest Gieri Walder, Sevgein
1947-1950 Leci Jacomet, Sedrun
1950-1951 Carli Job, Trun
1951-1953 Albert Berther, Buretsch-Mustér
1953-1955 Rest Antoni Friberg, Danis. Morts duront il temps da scola.
Gion Giachen Steier, Lonsch
1955-1956 Jacob Baselgia, Lonsch
1956-1957 Curdin Cathomen, Breil (seminarist)
Mario Gadola, Mustér (seminarist)
1957-1959 Vigeli Venzin, Sedrun
1959-1960 Elsi Capeder, Pitasch (seminarista)
Lothar Bearth, Rabiun (seminarist)
1960-1962 Tina Schatz-Cavegn, Cazis
1962-1963 Baseli Berther, Rueras (seminarist)
Julius Bucholzer, Rueun (seminarist)
1963-1964 Giusep Camenisch, Surrein/Sumvitg
1964-1965 Gion Antoni Derungs, Surcasti (seminarist)
Norbert Vinzens, Trun (seminarist)
1965-1966 Norbert Vinzens, Trun
1966-1967 Flurin Tschuor, Sumvitg

1967-1968 Clara Deplazes, Rabius (seminarista)
Rico Casanova, Mustér (seminarist)

Scola da lavur

1921/22 Barbara Capeder, Zarcuns



**Scolast Teofil Schmid-Valier
sin skis cun dus scolars**

Il davos onn ein ils sequents scolars e scolaras aunc stai a scola a Cavorgia:

Hendry Justina	8. classa
Hendry Ida	8. classa
Hendry Cecilia	7. classa
Hendry Tresa	6. classa
Hendry Guido	3. classa
Schmid Ervin	3. classa
Peder Pia	3. classa
Peder Giusep	2. classa
Monn Cornelia	2. classa
Monn Rosmaria	1. classa
Peder Beatrix	1. classa
Schmid Jovita	1. classa

9. La scoletta

Sedrun

L'emprena scoletta en Tujetsch ei sefatga a Sedrun. L'iniziativa ei vegnida da privats e la fundaziun ha giu liug igl onn 1937. Ils iniziants, fundaturs e promoturs ein stai scolast Tumaisch Venzin da Sedrun, Placi Deragisch da Gonda e Francestg Berther da Rueras.

Cheu il protocol da fundaziun:

Sedrun, ils 15-11-1937

Radunonza per fundar ina scola da stad per affons pigns

Sut il datum dils 24 da schaner 1937 ein seradunai in tozzel umens, babs da famiglia sco era empau mummas, en casa da scola a Sedrun per fundar ina scola da stad per ses pigns. Avon dus onns havevan ualti ils medems, surdau a signur scolast Tumaisch Venzin la cumissiun da far ils necessaris pass per ina tala scola.

Sin quella radunonza dat signur scolast Tumaisch Venzin rapport tgei ch'ei seigi curriu e passau tochen uss en caussa.

Igl ei buc stau pusseivel da secunvegnir cun las muniessas ad Ingenbohl ord motiv ch'ellas pretendevan a nus da procurar per lavur per duas muniessas, il qual ei a nus buca stau pusseivel. Nus lein sperar da pli tard tuttina vegnir perina cun ellas en caussa.

Igl ei lu s'annunziau ina scolasta cun diplom per da talas scolas, numnadamein la giuvna Irena Caduff da Razen. Ella ha presentau stupents attestats e recumondaziuns, aschia che signur scolast Venzin recamonda da prender ella per instructura da nossa scola.

Ils presents concludan cun il pli unanimamein da pia fundar ina tala scola. Els elegian ina suprastonza ellas personas sco suonda: signur Tumaisch Venzin sco president, plinavon signur Lucas Cavegn-Pally, signur Albert Cavegn pasterner e sco acessurs las signuras Maria Soliva e Luisa Decurtins.

Ei vegn surdau alla suprastonza d'eleger la scolasta, da preparar statutas e procurar per il mobiliar e per ils locals.

Ins lai annunziar ils affons provisoricamein ed ei vegn annunziau circa 42 che frequentassen la scola. Recumandont quella biala ovra alla protecciun dil Tutpussent siara il president la radunonza.



L'emprena scoletta era ina scoletta spirontamein da stad. Ils affons vegnevan tgirai ed instruiu naven dil matg entochen igl october. L'instrucziun entschaveva allas 08 :00 uras e cuzzava entochen alla endisch da meizdi. Il suentermiezdi cuzzava lu naven dallas 13:00 uras entochen las 16:00 uars. Igl intent primar fuva surtut dad occupar ils affons e tener els giud las vias entras ina buna survigilonza. La scola veva da survir cun promover l'educaziun digl affon, esser gideivla als geniturs cun instruir enconuschientschas fundamentalas

dalla baselgia catolica. Plinavon fuva ei pils pli biars geniturs in levgiament da saver occupar ils affons duront il pli grond temps da lavur sil funs.

All'entschatta varia la vegliadetgna dils affons. Quella fuva buca fixada aschi exactamein, aschia chils affons savevan ver denter treis e diesch onns.

Cugl onn 1940 sorprendan las soras da Glion la scoletta a Sedrun. Quei mument ha ei dau ina midada essenziala dalla structura dalla scoletta, oravontut quei che pertucca il temps d'instrucziun. Naven dad uss era ei era scoletta igl unviern.

Las midadas cuntinueschan. Ils affons da scoletta eran fetg fetg giuvens e caschunavan empau diltut problems e quitaus per las mussadras. Aschia fixescha il protocol da 1951 la vegliadetgna dils scolarets:

„Sin giavisch dalla sora vegn concludiu, da buca prender si scolars sut 2 onns e 10 meins.“



Cun la casa da scola nova a Gonda igl onn 1962 retscheiva era la scoletta ina grondiusa localitad el complex dil grond baghetg. Da siu dapersei egl ost han, ton las mussadras, sco ils affonets ina scoletta attractiva, gronda e sulegliwa cun ils necessaris plazs da termagliar.

Igl onn 1971 obtegn Sedrun sia secunda scoletta. Quella vegn endrizzada en ina stanza da scola egl'emprema plaunterren en casa da scola a Sedrun. Cun l'erecziun dalla casa Cadruvi igl onn 1977 vegn erigiu ell'emprema alzada ina stanza da scoletta e la secunda scoletta sesanfla dapi lu leu. Cun la vendita dalla casa Cadruvi vegn la secunda scoletta arranschada a Rueras. Entgins affons da Sedrun vegnan transportai a Rueras e quei succeda entochen la fusiun dallas duas scolas igl onn 2008. La secunda scoletta sa far diever dil dentercomplex, in local plurivalent erigius igl onn 2006. Igl onn 2008 ei quel vegnius midaus entuorn en ina vasta scoletta.

Localitads

1937 - 1940	Casa da scola Sontget a Gonda
1940 - 1941	Local da vieua Onna Maria Derungs
1941 - 1954	Casa Mulin a Gonda
1954 - 1962	Local da Gion Giusep Jacomet a Gonda
1962 -	Nova casa da scola Mira

Secunda scoletta

1971 - 1976	Stanza da scola en casa da scola nova
1976 -	Casa Cadruvi, Sedrun
	Casa da scola Rueras

Survesta

1931	Fundaziun dall'Uniun per scola dad affons pigns. Davart igl intent plaيدا artechel 2 dallas statutas da 1937: Ella ha igl intent da crear a Sedrun ina scola per affons da circa 3 – 10 onns duront entgins meins la stad. Entras la scola duein ils affons vegnir survigilai ed occupai ed aschia teni giud las vias. Ella duei prender giu il quitau da casa. Quella scola duei era promover l'educaziun digl affon ed esser gideivla als geniturs d'instruir els en las enconuschientschas elementaras dalla sontga religiun catolica Promoturs e fundaturs ein stai: scolast Tumaisch Venzin, Placi Deragisch e Francestg Berther
1937-1939	Scola mo la stad; temps matg entochen october 08 :00 – 11.00 uras e 13 :00 uras entochen allas 16 :00 uras. In miezdi liber ad jamna.
1940	Las soras da Glion sorprendan la scoletta a Sedrun, scola era il temps d'unviern
1944	Ord il protocol dalla radunonza generala: „De nos pignets l'educaziun Ei noss'emprem'obligaziun. Segidont nus en tuts graus, La benedicziun nus detschi Dieus." Ei vegn recumendau, che tgi che ha buca la pusseivladad da far als affons en scola in per scalfins per schar scumiar, duei sespruar da tarmetter ils scolars cun calzers senza guotas. Quei daventa per schurmetg visavi las mobillas ed er per evitar caneras irritontas.
1951	Arisguard las vacanzas dat ei entgina discussiun. Havend negina scola gl'entir meins uost, para buca d'esser dil tut cunvegnent e zuar pervia dil traffic sin via etc. Las vacanzas vegnan fixadas suandontamein: Il meins da matg entir 15 dis igl uost 15 dis igl october Sin giavisch dalla sora vegn concludiu da buca prender si scolars sut 2 onns e 10 meins.
1971	Vegn aviert ina secunda scoletta a Sedrun
1972	Novas statutas
1973	Ils 12 d'avrel surpren la vischnaunca las scolettas da Sedrun e Rueras
1977	Scoletta en casa Cadruvi
	Secunda scoletta da Sedrun ensemen a Rueras
2008	Dapi la fusiun sesanflan omisduas scolettas a Sedrun

Uniun da scoletta Sedrun

Suprastonts dalla „Uniun da scoletta"

Presidents:

Tumaisch Venzin	1937 - 1939
sur Gion Antoni Fetz	1940 - 1947
sur Giusep Durschei	1948 - 1970
Melchior Decasper	1971 - 1973

Cassiers:

Lucas Cavegn	1937-1939
--------------	-----------

Thomas Curschellas	1940-1943
Giachen Hendry	1944-1949
Placi Deragisch	1950-1953
Giusep Flury	1954-1957
Tumaisch Cavegn	1958-1961
Ludivic Monn	1962-1963
Vigeli Hendry-Beer	1964-1970
Franzisca Cavegn	1971-1973

Actuars:

Albert Cavegn	1937-1939
Aluis Hendry	1940-1943
Christian Berther	1944-1949
Alfons Berther	1950-1955
Valentin Deragisch	1956-1959
Baseli Monn	1960-1963
Aluis Cavegn	1964-1968
Giachen Giusep Monn	1969-1973

Assessurs :

Maria Soliva	1937
Luisa Decurtins	1937-1939
Castgina Cavegn	1938-1939
Placi Soliva	1940-1943
Anna Berther	1940-1943
Maria Deragisch	1944-1957
Josefa Cavegn	1944-1954
Rusina Valier	1955-1969
Catrina Soliva	1958-1963
Rosa Hendry	1964-1970
Alexandra Curschellas	1970-1973
Battesta Monn	1971-1973

La suprastonza era responsabla per tut ils fatgs da scoletta. Mintga commember dalla suprastonza era responsabels per ina sparta dalla lavur en favur dils affons ni dalla mussadra. En tutta cass era la scoletta gia da gliez temps ina caussa bein organisada.



Mussadras da scoletta:

Sedrun

Irena Caduff	1937-1938
Maria Cahannes	1938
Sora Annunziata Scherrer	1940-1941
Sora Renata Deflorin	1942-1949
Sora Paulina Philip	1950-1964
Sora Geresina Candinas	1965-1979
Leonora Cavegn	1971/1972
Sora Ulrica Flury	1973-1998
Sora Adelina Demont	1979/1980
Michelina Cavegn-Schmet, Sedrun	1980-1986
Evelin Schnoz, Mustér	1986/1987
Wilhelmina Venzin, Rueras	1987/1988
Evelin Schnoz, Mustér	1988/1989
Riccarda Soler, Bugnei	1989-1994
Petra Berther, Camischolas	1994-1998
Manuela Monn, Sedrun	1999/2000
Sibylle Pfiffner, Camischolas	2000/01
Romana Deragisch-Hendry, Bugnei	2001/02 – 2005/06
Flavia Cantieni, Danis	2006/07 – 2008/09

Scoletta per l'entira vischnaunca a Sedrun

Letizia Berther, Camischolas	2008 -
Gelgia Deplaz, Rueras	2008 -



Scoletta a Rueras

Il vischins da Rueras perencunter han stuiu spitgar ualti ditg sin lur scoletta. Quella ei vegnida aviarta igl onn 1966 per 25 affons sin iniziativa da Sep Fidel Berther. Probabel era il basegns per ina tala instituziun a Rueras buca aschi gronds. Las famiglias spirontamein purilas e numerusas vevan ord ils pli differents motivs tochen lu aunc buca giu basegns da quei sustegn. Forsa ha era la situaziun dil vitg contribuì a quella tenuta – pli puril che Sedrun. A Sedrun derivavan numnadamein ina gronda part dils affons da famiglias buca purilas, silmeins tochen viaden els anno 1950. Il vischins da Rueras han fundau in'atgna uniun per lur scoletta.

Localitad

Tier la construcziun dalla casa da scola a Rueras fuvà la necessitad d'ina scoletta aunc buca dada. Ord motivs da spargn vegn la prevedida scoletta strieda ord il project. En quella radunonza da vischnaunca dils 20 d'avrel 1958 croda il suadont votum arisguard ina scoletta:

Arvend signur president la discussiun, fa gerau Toni Hitz menziun dil schar curdar la scoletta, sperond che la vischnaunca vegni in di encunter als da Rueras sin ina moda ni l'otra sch'ei semuossa in di in basegns per ina tala.

Aschia ha l'emprema scoletta da Rueras immediatamein anflau suttetg ella nova casa da scola, gl'emprem ella secunda alzada e pli tard ella emprema. Il davos onns a Rueras ei la scoletta vegnida engrondida cun far ora in esch en l'otra stanza.

Mussadras a Rueras

Rita Berther, Rueras
Jazinta Giossi, Rueras

1966-1970
1970-1972

Rita Venzin, Rueras	1972-1982
Franzisca Gieriet, Rueras	1982-1988
Letizia Berther-Loretz, Camischolas	1988-1993
Gelgia Deplaz, Rueras	1993-2008



La vischnaunca surpren

Il 12 d'avrel 1973 ha la radunonza da vischnaunca decidu unanimamein da sorprender las treis scolettas existentas a Tujetsch: duas a Sedrun ed ina a Rueras. Cheutras ha ella confirmau la gronda muntada ch'ella attribuescha allas scolettas e documentau spért da solidaritad envers las famiglias cun affons pigns.

•••

Oriundamein era la scoletta plitost ina levgera per las mummas suroccupadas.

Beingleiti ein ins denton vegni cunscients dalla gronda muntada dalla scoletta per l'educaziun ed il svilup digl affon.

La scolaziun dallas mussadras e mussaders da scoletta ei semidada da rudien. La scolaziun ei daventada fetg professiunala e fa grondas pretensiuns als participonts.

Il pensum principal dalla scoletta ei da preparar igl affon per la veta da mintgadi, mo oravontut era per l'entrada en scola primara. Ils termagls ed il termagliar ei segiramein aunc fetg essenzial, denton tut igl auter ha oz priu en ina gronda ed autra dimensiun. Aschia vesa ina mussadra il pensum dalla scoletta:

Nies pensum principal ei da promover surtut sis aspects. Quei ein inaga igl aspect cognitiv, promoziun dil lungatg e la percepziun dils senns, lu igl aspect social, che dueigi mussar agl affon co luvrar ensemen, co ir entuorn cul concarstgaun. Plinavon empruein nus da promover aunc igl aspect motoric, creativ, emoziunal ed igl aspect voluntativ, affon empen da dir ord atgna voluntad tgei ch'el vul.

10. Il cussegl da scola

Cumissiuins da scola vegnan per l'emprema gada eligidas ils anno 1840. Las empremas incumbensas ein stadas il preparar l'erecziun dallas casas da scola. Mintga vischinadi veva ses responsabels. Ina impurtonta causa ei medemamein stada la fiananziaun dallas scolas e dils scolasts. Aschia ei vegniu fundau fondos. All'entschatta ein quels meinsvart vegni carschentai cun collectas els vischinadis, cun cotribuziuns dil cantun e schizun cun cotribuziuns singularas da vischins. Pli tard ha ei lu dau in cussegl da scola che miarva sin tuttas scolas da vischnaunca. Igl emprem uorden en quei grau datescha digl onn 1866.

Uorden da scola da 1866

Per direger las scolas dalla vischnaunca els differents vischinadis, legia la vischnaunca mintga dus onns ora in cussegl da scola da 6 commembers, cun il signur farrer vitier, e quel legia ord siu miez in president.

Il cussegl da scola ha l'obligaziun e l'autoridad da cun entelgientscha dils appartenents vischins, pladir ils scolasts per tut las scolas en vischnaunca sco era leger ora in cassier u ugau, il qual ha da administrar il fondo da scola general, sco era da mirar che las casas da scola ed ils affects enten quellas vegnien manteni en bien uorden.

Il cussegl da scola 1935

L'administraziun dils fatgs da scola vegn exequida dil cussegl da scola, il qual consista ord ils spirituals dalla vischnaunca, il president communal e 5 cussegliers. Conform alla ordinaziun cantunala seconstituescha el sesez cun eleger in president ed igl actuar. Ultra dallas funcziuns surdadas ad el entras l'ordinaziun cantunala ha el aunc autras cumpetenzas e funcziuns:

- a) cun trer tier la suprastanza communal elegia el mintgamai per dus onns ils scolasts e scolastas sco era eventuala servitud necessaria,*
- b) scolasts u scolastas che fan buca lur duer san sin conclus dil cussegl da scola da tut temps vegnir relaschai, pia era enteifer la perioda da dus onns. Per scolasts e scolastas novas ei igl emprem onn, onn d'emproma. L'elecziun duei vegnir comunicada a scadin scolast ni scolasta en scret cun las cundiziuns da survetsch,*
- c) il cussegl da scola fixescha il diember da classas enteifer las scolas ed empeila e survigilescha las scolas en fatgs da disciplina,*
- d) el viseta silmeins 3 gadas ad onn tut las scolas e tegn ina gada ad onn ina conferenza cun ils scolasts sur fatgs da scola e deliberescha cun quel schiglioc tut quei che fa basegns. Per promover bunas relaziuns da scola, bien contact cun las famiglias, cun scolasts e cussegl, eis ei recumandeivel da tener ina gada ad onn ina aschinunada sera da geniturs,*
- e) il cussegl da scola reponderescha tuttas moziuns e reclamaziuns ariguard fatgs da scola, fatgas dalla suprastanza, dalla vischnaunca ni da particulars e fa sin giavisch las resp. proposiziuns.*

Il cussegl da scola 1964

L' administraziun e la survigilonza dils fatgs da scola e da cuors da perfecziun ei causa dil cussegl da scola. Quel secumpona dil president communal e da 9 commembers. Sche pusseivel dueien ils spirituals dalla val vegnir elegi el cussegl da scola. El seconstituescha sesez cun eleger in president ed in actuar.

Cumpetenzas e funcziuns:

- 1. Ensem cun la suprastanza communal elegia e relai el ils scolasts e las scolastas. Las elecziuns vegnan fatgas mintga dus onns. Per scolasts e scolastas novas ei igl emprem onn, onn d'emproma. L'elecziun duei vegnir comunicada a scadin scolast ni scolasta en scret cun las condiziuns da survetsch.*

2. Controlla dil menaschi da scola e la preponderaziun ed erecziun d'in uorden da scola. Quel ha da vegnir approbaus dalla radunonza communal.
3. El fixescha entschatta da scola, finiziun da quella e las vacanzas.
4. El procura per bien manteniment dallas localitads da scola e per mieds d'instrucziun.
5. El pronunziescha castitgs per grevs surpassaments disciplinars e polizials d'affons a norma dalla legislaziun cantunala e federala.

Il cussegl da scola 1965

Il cussegl da scola secumpona dad 11 commembers, incl. il president communal ed ils augsegners dalla pleiv che fan part dad el ex officio. Mintga vischinadi duei esser representaus sco tochen dachen. Il cussegl da scola seconstituescha sesez, mintgamai all'entschatta d'in bienni d'uffeci suenter las elecziuns communalas.

Cumpetenzas e funcziuns:

- a) Ensemen culla suprastonza communal elegia e relai el ils scolasts e las scolastas. Las elecziuns vegnan fatgas mintga dus onns. Per scolasts e scolastas novas ei igl emprem onn igl onn d'emprova. L'elecziun duei vegnir comunicada a scadin scolast ni scolasta en scret cun las conduziuns da survetsch.
- b) Controlla il menaschi da scola e la preponderaziun ed erecziun d'in uorden da scola. Quel ha da vegnir approbaus dalla radunonza communal.
- c) El fixescha l'entschatta e finiziun da scola e la secunda jamna da vacanzas.
- d) El procura per bien manteniment dallas localitads da scola e per mieds d'instrucziun.
- e) El pronunziescha castitgs per grevs surpassaments disciplinars e polizials a norma dalla legislaziun cantunala.
- f) Pertuccond igl artechel 21 dalla lescha da scola cantunala promova il cussegl da scola contacts denter geniturs e scola e procura da temps en temps radunonzas dils geniturs ensemen culs scolasts ed il cussegl da scola.
- h) Il cussegl da scola elegia era il miedi da scola, il miedi-dentist per las scolas e survigilescha il survetsch da quels.

Il cussegl da scola 1973

La direcziun e survigilonza dils fatgs da scola e da cuors da perfecziun ei caussa dil cussegl da scola.

Quel secumpona da siat commembers e seconstituescha sesez. Elecziun vegn fatga dil pievel all'urna. En damondas che pertuccan l'instrucziun vegn in representant dils scolasts envidaus cun vusch consultativa allas sessiuns dil cussegl da scola. Il commember dalla suprastonza, incumbensaus cun la tgira dil scolaesser, appartegn d'igl uffeci anora al cussegl da scola. Scadin commember dil cussegl da scola che assista allas sedutas, ei obligaus da votar.

Cumpetenzas e funcziuns:

- a) elegia e relai ensemlamein culla suprastonza communal scolastas e scolasts,
- b) controlla il menaschi da scola, predeliberescha ils regulativs da scola per mauns dallas instanzas cumpetentas,
- c) fixescha l'entschatta e la finiziun dalla scola sco era las vacanzas,
- d) procura per in bien manteniment dallas localitads e per mieds d'instrucziun,
- e) fixescha ils castitgs per grevs surpassaments disciplinars e polizials d'affons a norma dalla legislaziun cantunala e federala,
- f) propona onn per onn per mauns dil preventiv communal ils importos che duein vegnir resalvai per intents da scola.

Il cussegl da scola 1993

La direcziun e la survigilonza dils fatgs da scola e da cuors da perfecziun ei caussa dil cussegl da scola. Quel secumpona da 5 commembers e seconstituescha sez. Scolastas e scolasts dallas scolas communalas e lur parents tenor art.7 dalla constituziun astgan buca appartener al cussegl da scola. Il commember dalla suprastanza, incumbensaus cun la tgira dil scolaesser, appartegn d'uffeci anora al cussegl da scola. Scadin commember dil cussegl da scola, che assista allas sedutas, ei obligaus da votar.

Cumpetenzas e funcziuns:

a) Elegia, relai scolastas e scolasts ensemen cun ils commembers dalla suprastanza communalas.

b) Sustegn e segida a moda cooperativa cun scolastas e scolasts.

c) Controllescha il menaschi da scola, predeliberescha ils regulativs da scola per mauns dallas instanzas cumpetentas.

d) Fixescha l'entschatta e la finiziun dalla scola sco era las vacanzas.

e) Procura per ils mieds d' instrucziun.

f) Fixescha ils castitgs per grevs surpassaments disciplinars e polizials d'affons a norma dalla legislaziun cantunala e federala.

g) Propona onn per onn, en collaboraziun culs scolasts, per maun dil preventiv communal ils imports che dueien vegnir resalvai per intents da scola.

Gia 1866 veva il cussegl da scola certs pensums ch'el stueva ademplir. Quels eran formulai clar e bein egl uorden da scola. In pensum dil cussegl da scola ch'ei mai semidaus ei d'eleger ils scolasts e las scolastas per la vischnaunca. Quei ch'ei era adina restau, ei l'obligaziun dil cussegl da scola da procurar per in bien manteniment dallas localitads e per mieds d' instrucziun. 1866 eran quei lu ualti tuts pensums dalla cumissiun da scola, sco quei ch'ella vegneva numnada pli baul.

Naven da 1935 ein las funcziuns dil cussegl da scola vegnidas slargadas. Ina nova funcziun ei la promoziun da contacts denter geniturs e scola daventada. In'otra nova ei il sustegn ed igl agid per scolasts e scolastas e surtut, ch'il cussegl da scola ei era prompts da collavurar culs scolasts. Quei ch'ei denton adina puspei semidau, ei il diember da commembers dil cussegl da scola.

Commembers dil cussegl da scola:

1847:

signur scarvon Monn

substitut Stiafen Monn

Hans Giachen Beer

signur mistral Gieriet

statalter Paul Wenzin,

statalter Hans Giachen Decurtins

statalter Gion Andriu Berther

statalter Vigeli Wenzin

statalter Lezi Mucli

statalter Sep Antoni Mucli

1853:

Lucas Cavegn

statalter Duri Monn

statalter Vigeli Beer

Gion Antoni Berther

statalter Gion Rest Monn

statalter Giachen Wenzin

1855:

Vigeli Berther

Gion Antoni Monn

Gion Antoni Berther

Giachen Martin Berther

Fidel peder

Era ils signurs spirituals e geraus dueigein esser leutier ed il segnerfarrer dueigi era esser elegibels sco president.

1865:

statalter Vigeli Giacumet
Duri de Florin
Gion Antoni Berther
Giachen Antoni Deflurin
Martin Peder
Gion Antoni Curschellas

1867:

Lezi Huonder
Duri de Florin
Gion Antoni Berther
Giachen Antoni Deflurin
Martin Peder
Gion Antoni Curschellas

1877:

Gion Andriu Berther
Leci Huonder, Sedrun
Vigieli Deragisch
Tumaisch Schmed
Fidel Venzin
Gion Antoni Berther

1879:

Gion Andriu Berther
Leci Huonder, Sedrun
Vigieli Deragisch
Tumaisch Schmed
Fidel Venzin
Gion Antoni Berther

1881:

Duri Venzin
Vigieli Venzin
Tumaisch Schmed
Gion Andriu Berther
Leci Huonder, Sedrun
Vigieli Deragisch

1883:

Signur caplon Berther,
president Signur Farrer
Fidel Venzin
Gion Antoni Cavegn
Tumaisch Schmed
Vigieli Deragisch
Leci Huonder, Sedrun
Gion Andriu Berther

1885:

Signurs spirituals Farrer e caplon
Gion Antoni Peder
Gion Antoni Cavegn
Gion Pally
Tumaisch Schmed
Leci Huonder, Sedrun
Hans Giachen Decurtins

1887:

Eduard Muoth, plevon
Augustin Riedi, Tschamut
Giachen Martin Beer, Rueras
Gion Fidel Riedi, Zarcuns
Tumaisch Schmed, Cavorgia
Leci Huonder, Sedrun
Hans Giachen Decurtins, Sedrun

1889:

Sur Gion Antoni Venzin, Rueras, president
Augustin Riedi, Tschamut
Hans Giachen Decurtins
Giachen Martin Beer, Rueras
Leci Huonder, Sedrun
Gion Fidel Riedi, Zarcuns
Tumaisch Schmed, Cavorgia

1891:

Augustin Riedi, Tschamut
Giachen Martin Beer, Rueras
Gion Fidel Riedi, Zarcuns
Hans Giachen Decurtins
Leci Huonder, Sedrun
Tumaisch Schmed, Cavorgia

1891:

Augustin Riedi, Tschamut
Giachen Martin Beer, Rueras

1893:

Leci Huonder, Sedrun
Gion Antoni Monn

Gion Fidel Riedi, Zarcuns
Hans Giachen Decurtins
Leci Huonder, Sedrun
Tumaisch Schmed, Cavorgia

1895:

Leci Huonder, Sedrun
Gion Antoni Monn da Stiafen
Giachen Martin Beer
Felici Monn
Luis Hendry
Vigeli Venzin

1899:

Signur farrer sur Venzin, president
Leci Huonder, Sedrun
Gion Antoni Monn
Felici Monn
Gion Martin Beer
Vigeli Venzin, Selva
Thomas Schmed, Cavorgia

1903:

Sur Gaudenz Engler
Giachen Fidel Cavegn
Tumaisch Berther
Tumaisch Schmed, Cavorgia
Flurin Venzin, Selva
Leci Huonder, Sedrun
Gion Antoni Monn

1907:

Signurs augsegners
Leci Huonder, Sedrun
Gion Andriu Monn
Giachen Fidel Cavegn
Flurin Venzin da staltalder Fidel, Selva
Giachen Giusep Deflorin

1911:

Signurs augsegners
Leci Huonder, Sedrun
Gion Fidel Caduff, Rueras
Gion Andriu Berther, Camischolas
Gion Antoni Peder, Selva
Florentin Cavegn, Sedrun

Vigeli Berther
Gion Antoni Battesta
Tumaisch Schmed, Cavorgia
Vigeli Venzin

1897:

Sur Gaudenz Engler, plevon
Leci Huonder, Sedrun
Gion Antoni Monn da Stiafen
Giachen Martin Beer
Felici Monn
Luis Hendry
Vigeli Venzin

1901:

Rev. sgr. farrer
Signur benefiziat da Rueras
Leci Huonder, Sedrun
Gion Antoni Monn, Sedrun
Felici Monn
Giachen Martin Beer
Thomas Schmed, Cavorgia
Vigeli Venzin, Selva

1905:

Augsegners
Leci Huonder, Sedrun
Tumaisch Berther
Giachen Fidel Cavegn
Gion Andriu Monn
Flurin Venzin da staltalder Fidel, Selva

1909:

Augsegners
Leci Huonder, Sedrun
Gion Fidel Caduff, Rueras
Bruno Soliva
Giachen Giusep Deflorin
Flurin Venzin da staltalder Fidel, Selva

1913:

Augsegners
Leci Huonder, Sedrun
Gion Fidel Caduff, Rueras
Florentin Cavegn, Sedrun
Vigeli Valier, Camischolas
Gion Antoni Peder, Selva
«..... elegia la vischnaunca sgr. Leci Huonder per
veta duronta sco commember da honur dil
cussegl da scola.»

1915:

Signurs augsegners
Leci Huonder, Sedrun
Florentin Cavegn, Sedrun
Vigeli Valier, Camischolas
Gion Antoni Hitz, Rueras
Gion Antoni Peder, Selva

1919:

Ils rev, sgr. plevons
Gion Antoni Peder, Selva
Gion Antoni Hitz, Rueras
Vigeli Valier, Camischolas
Florentin Cavegn, Sedrun
Leci Huonder, Sedrun
Giachen Martin Hendry, Cavorgia

1923:

Gion Antoni Peder, Selva
Baseli Berther, Rueras/Dieni
Vigeli Valier, Camischolas
Florentin Cavegn, Sedrun
Giachen Martin Hendry, Cavorgia
ed ils rev. augsegners

1927:

Rev. signur farrer
Rev. signur caplon
Sep Antoni Schmed
Florentin Cavegn, Sedrun
Baseli Berther, Dieni
Vigeli Venzin, Selva
Vigeli Hendry, Cavorgia

1931:

Rev. signur plevon A. Fetz, president
Rev. signur caplon Luregn Rageth
Vigeli Venzin, Selva
Baseli Berther, Rueras/Dieni
Sep Antoni Schmed, Zarcuns
Hans Giachen Decurtins, actuar
Vigeli Hendry, Cavorgia

1935:

Sur Luregn Rageth, president
Sur A. Fetz, plevon
Baseli Berther, Dieni, president communal
Gion Felici Monn, Camischolas

1917:

Rev. Sgr Farrer
Gion Antoni Peder, Selva
Gion Antoni Hitz, Rueras
Vigeli Valier, Camischolas
Florentin Cavegn, Sedrun
Leci Huonder, Sedrun
Giachen Martin Hendry, Cavorgia

1921:

Gion Antoni Peder, Selva
Baseli Berther, Rueras/Dieni
Vigeli Valier, Camischolas
Florentin Cavegn, Sedrun
Giachen Martin Hendry, Cavorgia
ed ils rev. augsegners

1925:

Rev. signur farrer
Rev. signur caplon
Vigeli Valier, Camischolas
Florentin Cavegn, Sedrun
Baseli Berther, Rueras/Dieni
Vigeli Venzin, Selva
Vigeli Hendry, Cavorgia

1929:

Rev. signur farrer
Rev. signur caplon
Sep Antoni Schmed, Zarcuns
Hans Giachen Decurtins, Sedrun
Baseli Berther, Dieni
Vigeli Venzin, Selva
Vigeli Hendry, Cavorgia

1933:

Sur Giachen Antoni Fetz, president
Sur Luregn Rageth, caplon
Gion Antoni Loretz, Selva
Baseli Berther, Dieni
Sep Antoni Schmet, Zarcuns
Hans Gaichen Decurtins, actuar, Sedrun
Giachen Hendry, Cavorgia

1937:

Felici Monn, president communal
Duri Vigeli Soliva, Sedrun
Duri Vigeli Cavegn, Rueras
Vigeli Schmed-Berther, Cavorgia

Duri Vigeli Soliva, Sedrun
Duri Vigeli Cavegn, Rueras
Gion Antoni Loretz , Selva
Vigeli Schmed-Berther, Cavorgia

1939:

Sur G. Antoni Fetz, president
Caplon L. Rageth
Felici Monn, president communal, actuar
Duri Vigeli Soliva, Sedrun
Duri Vigeli Cavegn, Rueras
Vigeli Schmed-Berther, Cavorgia
Mechel Loretz, Selva

1943:

Benedetg Deflorin
Ludwig Pally
Gion Antoni Berther
augsegners
Vigeli Schmid-Schmid

1947:

Rev. augsegners
Signur president da vischnaunca
Stiafen Cavegn, Sedrun
Clemens Berther, Camischolas
Toni Geriet, Rueras
Giachen Giusep Venzin, Selva
Hans Monn, Cavorgia

1951:

Rev. augsegners
Hans Monn, Cavorgia
Signur president da vischnaunca
Giachen Giusep Venzin, Selva
Clemens Berther, Camischolas
Leci Brugger, Rueras

1955:

Rev. augsegners
Benedetg Beer, Tschamut
President communal Placi Jacomet, Sedrun
Giachen Martin Valier, Camischolas
Leci Brugger, Rueras
Giachen Hendry, Sedrun
Gaudenz Hendry, Cavorgia

1959:

Gion Antoni Loretz, Selva

1941:

Sur G. Antoni Fetz
Duri Vigeli Cavegn
Vigeli Schmed-Berther
Mechel Loretz, Selva
Benedetg Deflorin
Vigeli Jacomet

1945:

Rev. augsegners
Signur president da vischnaunca
Stiafen Cavegn, Sedrun
Benedetg Deflorin, Camischolas
Gion Antoni Berther
Giusep Giger
Hans Monn

1949:

Rev. augsegners
Signur president da vischnaunca
Stiafen Cavegn, Sedrun
Clemens Berther, Camischolas
Toni Gieriet, Rueras
Giachen Giusep Venzin
Hans Monn, Cavorgia

1953:

Rev. augsegners
Leci Brugger, Rueras
Signur president en uffeci
Benedetg Beer, Tschamut
Clemens Berther, Camischolas
Gaudenz Hendry, Cavorgia
Stiafen Cavegn, Sedrun

1957:

Rev. augsegners
President communal Placi Jacomet, Sedrun
Leci Brugger, Rueras
Gaudenz Hendry, Cavorgia
Benedetg Beer, Tschamut
Giachen Martin Valier, Camischolas
Giusep Monn-Flepp, Sedrun

1961:

Rev. augsegners
President communal en uffeci
Benedetg Beer, Tschamut
Gaudenz Hendry, Camischolas
Victor Berther, Rueras
Christian Cavegn, Camischolas
Alfred Decurtins, Sedrun

1963:

Rev augsegners
Benedetg Beer, Tschamut
Victor Berther, Rueras
Christian Cavegn, Camischolas
Gion Giachen Beer, Sedrun
Placi Hendry, Cavorgia

1967:

Sur. Steffan Schuler
Victor Berther, Rueras, president
Sur. Giusep Durschei, Sedrun
Sur. Martin Bearth, Rueras
Theophil Schmid, Sedrun, pres. communal
Leonhard Loretz, Sedrun
Martin Schmid, Camischolas/Zarcuns
Giusep Caduff, Rueras
Murezi Monn

1971:

Rev. sur. Giusep Durschei, Sedrun
Alexander Loretz, Rueras, president
Rev. sur. Martin Bearth, Rueras
Theophil Schmid, Sedrun
Leonhard Loretz, Sedrun
Lucas Cavegn, Rueras
Gion Battesta Monn, Sedrun

1975:

Lucas Cavegn, president, Rueras
Victor Berther, Rueras, ex. off.
Rev. sur. Giusep Durschei, Sedrun
Vigeli Berther, Rueras/Dieni
Luis Curschellas, Sedrun
Nescha Cavegn-Giger, Sedrun
Mathilda Schmid-Halter, Rueras

1979:

Benedetg Beer, president
Sur Giusep Cathomas, Sedrun
Leci Brugger, Sedrun, ex. off.
Ervin Deragisch, Sedrun

Rev. augsegners
President communal en uffeci
Benedetg Beer, Tschamut
Victor Berther, Rueras
Christian Cavegn, Camischolas
Alfred Decurtins, Sedrun
Gaudenz Hendry, Cavorgia

1965:

Rev. augsegners
Benedetg Beer, Tschamut
Victor Berther, Rueras
Martin Schmid, Camischolas/Zarcuns
Gion Giachen Beer, Sedrun
Ignazi Monn, Sedrun
Placi Hendry, Cavorgia

1969:

Rev. sur. Giusep Durschei, Sedrun
Alexander Loretz, Rueras, president
Rev. Sur. Martin Bearth
President com. Teofil Schmid, Sedrun
Leonhard Loretz, Sedrun
Giusep Caduff, Rueras
Murezi Monn, Sedrun
Luis Cavegn, Rueras

1973:

Lucas Cavegn, president, Rueras
Sur Martin Bearth, Rueras
Victor Berther, Rueras, ex. off.
Vigeli Berther, Rueras
Nescha Cavegn-Giger, Sedrun
Luis Curschellas, Sedrun
Mathilda Schmid-Halter, Rueras

1977:

Venanzi Berther, president, Sedrun
Rev. sur. Giusep Cathomas, Sedrun
Tumaisch Monn, Sedrun, ex. off.
Paul Monn, Rueras
Nescha Cavegn, Sedrun
Flurin Monn, Rueras
Victoria Berther, Sedrun

1981:

Benedetg Beer, president
Gion Beer, Sedrun, ex. off.
Giusep Cathomas, Sedrun
Benedetg Deflorin, Camischolas

Ludivina Loretz, Sedrun
Benedetg Deflorin, Camischolas
Paul Monn, Rueras

1983:

Conrad Berther, president, Rueras
Gion Beer, Sedrun, ex. off.
sur Giusep Cathomas, Sedrun
Ghitti Bearth, Sedrun
Paulina Cathomas, Sedrun
Baseli Hitz, Rueras
Giusep Riedi, Sedrun

1987:

Franz Schmid, president, Sedrun
Clemens Monn, Sedrun, ex. off.
sur Giusep Cathomas, Sedrun
Paulin Berther, Sedrun
Michel Loretz, Sedrun
Bernadetta Demund, Camischolas
Mario Hitz, Sedrun

1991:

Franz Schmid, president
Flurin Berther, Rueras, ex. off.
Aluis Cavegn, Rueras
Josefina Flury, Camischolas
Vigeli Hendry, Sedrun
Franzisca Hitz, Rueras
Imelda Monn, Rueras

1996

Vigeli Giusep Berther, ex. off.
Gino Cavegn, Sedrun, president
Claudia Berther-Monn, Camischolas
Giusep decurtins, Sedrun
Eduard Meier, Gonda

1999

Toni Schmid, Camischolas, ex. off.
Gino Cavegn, Sedrun, president
Gabharda Berther, Rueras
Giusep Decurtins, Sedrun
Eduard Meier, Gonda

2005

Toni Schmid, Camischolas, ex. off.
Bruno Berther, Rueras, president
Sonja Decurtins, Bugnei
Monika Flury, Camischolas
Eugen Degonda, Sedrun

Ludivina Loretz, Sedrun
Conrad Berther, Rueras
Paul Berther, Rueras/Dieni

1985:

Conrad Berther, president, Rueras
Clemens Monn, Sedrun, ex. off.
sur Giusep Cathomas, Sedrun
Paulina Cathomas, Sedrun
Baseli Hitz, Rueras
Franz Schmid, Sedrun
Ghitti Bearth, Sedrun

1989:

Franz Schmid, president, Sedrun
Paulin Berther, Rueras
Bernadetta Demund, Camischolas
Michel Loretz, Sedrun
Mario Hitz, Sedrun
Imelda Monn, Rueras

1993:

Antonia Hendry-Loretz, presidenta, Sedrun
Vigeli Giusep Berther, Rueras, ex. off.
Judith Decurtins-Berther, Sedrun
Annamaria Monn-Tuor, Sedrun
Christian Monn, Rueras

1997

Toni Schmid, Camischolas, ex. off.
Gino Cavegn, Sedrun, president
Claudia Berther-Monn, Camischolas
Giusep Decurtins, Sedrun
Eduard Meier, Gonda

2002

Toni Schmid, Camischolas, ex. off.
Gino Cavegn, Sedrun, president
Gabharda Berther, Rueras
Eduard Meier, Gonda
Walter Monn, Camischolas

2008

Eveline Soliva, Sedrun, ex. off.
Bruno Berther, Rueras, president
Sonja Decurtins, Bugnei
Monika Flury, Camischolas
David Tuor, Sedrun

2011

Eveline Soliva, Sedrun, ex. off.

Bruno Berther, Rueras, president

David Tuor, Sedrun

Daniel Cavegn, Sedrun

Claudia Monn-Bass, Camischolas



Il cussegl da scola 2008 - 2010

Da seniester: David Tuor, Sedrun; Sonja Decurtins, Bugnei; Eveline Soliva, Sedrun, geraua ex. off.; Monika Flury, Claudia Monn-Bass, Camischolas; Bruno Berther, Rueras, president

Il cussegl da scola ha in niebel pensum – la tgira dall'instrucziun dils affons tuatschins. Buca adina ei il pensum da quei gremium levs. Tuts ein i a scola e tuts capeschan enzatgei dalla scola! Anflar la dretga via ei buca adina stau lev. Resumond la scola sur varga 150 onns, san ins dir senza seludar, ils cussegliers e las cusseglieras ein sestentai per ina buna scola e scolaziun.

Ils temps ein semidai e semidan. Geniturs ed affons ein sesviluppai cul temps modern fagend autras pretendiuns a scola, cussegl e scolasts. En tut quels onns ha ei dau bia problems da sligiar, bia radunonzas, massada da protocols e scrivams e massa lavur el zuppau enzugliai da bia quitaus e fastedis.

Las novas leschas han pretendiu midadas, nova lavur e bia auter. Novas directives, novas spartas da scola han pretendiu engaschi da tuttas personas involucadas cun l'instrucziun. La scola ei stada ed ei adina en in moviment e process da svilup. Buca tut ei adina stau per bien, era il moviment dils davos onns ha fatg sia scola ed enqual naufragi.

Dapi igl onn 2002 vegn il cussegl da scola levgiaus en sia lavur cun gl'engaschi d'in menader da scola.

Menaders da scola per Tujetsch

Beni Hendry 2002 – 2012

Manuella Schnoz 2013 –

11. Ina cronologia dils baghetgs da scola

- 1848 Erecziun dalla casa da scola a Sedrun sin plaz Cadruvi
- 1848 Baghegiau casa da scola a Cavorgia
- 1850 Il vischinadi da Rueras survegn ina casa da scola
- 1852 Selva e Tschamut, scola a Sut Crestas. Stanza da scola en casa pervenda.
- 1862 Baghetg da scola a Camischolas
- 1863 Nova scola a Sut Crestas
- 1886 Nova scola a Sontget, Sedrun/Gonda
- 1911 Engrondu la casa da scola a Rueras
- 1919 Nova casa da scola a Sut Crestas
- 1959 Nova casa da scola a Rueras
- 1962 Nova casa da scola a Sedrun/Gonda
- 1987 Engrondaziun dalla casa da scola da Sedrun cun ina annexa el nord
- 2006 Construcziun dil dentertract denter casa pedel e scoletta sco local plurivalent. Dapi 2008 survescha quei local alla secunda scoletta.
- Scola Rueras, modificaziun tier l'entrada, novas localitads sanitaras per la sala ed ulteriuras midadas praticas.
- Modernisaziun dalla tribuna



La scola Sontget cun davostier il clavau dalla pleiv

12. Conclusiun

Duront tschentanners ha la baselgia instruiu ils affons e priu oravontut en egl l'instrucziun religiosa. Dasperas ei era vegniu mussau il leger ed era il sriver. L'instrucziun ei stada fetg libra e tuts geniturs han buca viu la necessitad d'ina instrucziun per lur affons. Ils pli svegliai ein vegni promovi e tarmess en scolas aultas – oravontut cun la finamira da far daventar in muntg ni plevon. Las buobas ein plitost vegnidas alla cuorta.

Cun la fundaziun dalla Confederaziun igl onn 1848 semida era l'instrucziun dils affons. La baselgia sto ceder la scola al stadi. Il svilup al stan dad oz ei staus oravontut el 19avel tschentaner fetg progressivs ed innovativs. Las stentas dalla vischnaunca e populaziun per ina buna instrucziun dils affons e giuvenils, buobas e giuvnas, ein stadas ed ein aunc oz emplenidas d'in spert da gronda responsabladad pigl avegnir da mintga generaziun.

13. Fontaunas

Archiv dalla Vischnaunca da Tujetsch sut sectur 7 **Scolaresser**

Archiv dalla Vischnaunca da Tujetsch. **Protocols da vischnaunca**

Archiv dalla Vischnaunca da Tujetsch. **Protocols dil Cussegl da scola**

Berther, pader Baseli. Numerusas **notizias** ella Biblioteca romontscha dalla claustra da Mustér

Berther Pius. **Sut Crestas – In liug da refugi e peleginadi da 1853-1959** Lavur da patenta el seminari scolastic Cuera 1988

Cudisch da Tujetsch. **Igl andament da sia historia**, Sedrun 1987

Gadola Guglielm. **Historia della scola rurala dalla Val Tujetsch** cumparida egl Ischi da 1957;

Gassetta Romontscha. **Tujetsch e sia scola**. 1962

Hendry Toni. **Il vischinadi da Cavorgia**. 1978

Hendry Toni. **Per regurdientscha dalla casa da scola a Sontget Gonda**. En *La Tuatschina*, nr. 34, 1975

Pfiffner Marlene. **Il svilup dalla scola tuatschina**. 1994

14. Fotografias

Archiv dalla Vischnaunca da Tujetsch, sut cultura

Cavegn Bruno, Sedrun

Berther Bruno, Rueras

Ord ils cudischs da protocols da vischnaunca dils onns 1838 entochen 1986

08-10-1838 Ina cumissiun dad in per vischinadis duessi seradunar per ina "questiun" fatga ed era per mirar co ins savess regular en ina megliera scola.

05-05-1843 Concluidi da tschintschar cun sur Camenisch e dumandar sch'el savessi buca dar scola; pagar 30 fl sch'el tegni buca ora autras cundiziuns.

31-03-1844 Quei di han ils vischins da Cavorgia dumandau la vischnaunca per lenna da baghegiar ina casa da scola. Concluidi ch'ei seigi ussa buca il temps da pinar lenna e spitgar entochen primavera. Era ils vischins sezs eran buca tuts perina.

05-01-1845 Vegn fatg enconuschent tgei premis il cantun dessi per scolas ruralas e per baghegiar scolas.

05-04-1846 Pleiv, priu si farrer per 2 onns, sur Vigeli Venzin, caplon a Sedrun cun mirar ch'ei vegni fatg la scola leu.

30-05-1847 Plinavon ei il pareri proponius davart l'augmentaziun dallas scola sco ei plaيدا era vegnius approbaus. Ariguard dalla biara lenna dada entuorn quest atun, ei ordinau da seprofitar da quella per baghegiar casas da scola, ni vid baghetgs dalla pervenda ed ei vegniu legiu ora in cussegl da scola consistent ord 8 commembers: segnerfarrer ei president, stalter Vigeli Venzin da Selva, assistent Schmedt, ni signur mistral Gieriet, assistent Gion Rest Muggli, stalter Gion Andriu Berther fegl, Hans Giachen Beer, signur scarvon Monn, stalter Lezi Antoni Muggli e quels ein obligai da secumparer schi savens sco il signur president anfla per bien da radunar els e per lur fadigia dueigi la pagaglia da Diu surviv, quei ei gratis. Lur obligaziuns consista ch'els ston dar uorden che las casas da scola, sco auters fatgs nunprovedi, che succedan ordlunder, tenor ordinaziun dalla vischnaunca, vegnien mess en effect.

04-07-1847 Eis ei sin publica vischnaunca vegniu concluidi davart las lennas dadas entuorn da per gl'empren ira naven cun las lennas dallas casa da scola e per suenter serugalar cun quella che resta.

29-08-1847 Eis ei concluidi da mirar da carschentar la caplania da Rueras ton sco per la zavrugia ed ei schau sura alla cumissiun da scola ni alla cumissiun pauperila nua rucavar, aber adina cun approbaziun dalla vischnaunca.

02-04-1848 Ariguard la casa da scola eis ei vegniu cumprau la casa da stalter Valentin Caveng per il prezi da 255 fl. cun la cundiziun da pagar la mesadad sin d'atun proxim 1848 senza tscheins, l'autra mesadad sin igl onn suenter; la mesadad paga la vischnaunca, l'autra mesadad paga la cassa a scola.

Protocols Cussegl da scola

27-06-1847 Ha la cumissiun da scola concluidi il sequent: numnadamein da baghegiar ina casa vin Dulezi che dueigi surviv per scola centrala dall'entira vischnaunca. La casa dueigi vegnir baghegiada giufuns duas stivas grondas a pèr e lura trer giebel da maniera ch'ei possi aunc en zatgei cumachs. Ils da Camischolas dueigien sedecider, sch'ei veglien s'eunir cun ils da Sedrun en termin tochen ils 29 dil present senza neginas cundiziuns, oreifer sch'ei duess vegnir il cass ch'els havessen stgisas sufficientas da sedevidir separadamein. Cass vegness ei lura fatg ina regurdientscha co gidar zatgei vid lavur cumina. Sco era schei duess vegnir mess spesas pecuniaras, dueigi era vegnir ad els a proporziun. Als da Rueras ei schau sura als vischins da tschentar sia casa suenter lur bein manegiar,

bein entelgiu aschi spargnusamein sco pusseivel, bein ch'ei vegni fatg in local adatteivel per ina scola. Ariguard co e sin tgei moda ei dueigi vegnir pagau per baghegiar ils locals, sa il cussegl da scola buca entrar en ad interim, bein che cura ch'ei vegn adaquella, vegn la cumissiun suenter circumstanzias e proporziunadamein a dar uorden ch'ei vegni pagau da maniera da far neginas taglias. Era ch'ei dueigi vegnir fatg per la via dil miez e sin la pli adatteivla moda sco pusseivel. Davart quels che mauncan tier las lavurs cuminas che van tier las scolas, ei mess si dalla cumissiun per castitg 50 xr per scadin di e mintga tgauvitg ni rotmeister ei constrenschiu da far per senn e tener quen e nudar si e cunscenziusamein dar en ad in commember dalla cumissiun e quei schon la sera; il strof dueigi vegnir executius sin g'atun. Il strof dueigi vegnir repartius mintgamai tier ni alla classa ni vischins nua ch'il strof vegn tratgs en. Scadin dueigi esser la damaun las 8 sil plaz e la sera tochen allas 4.

31-05-1848 Ei la cumissiun seradunada a Selva ed ha approbau il sura accort. Era ha ella fixau da dar lenna per la casa da scola a Selva en Plaun Viradas ed endadens Sumsassi sut via, bein aber cun igl absolut camond da metter sut tetg la lenna schon pinada o Rueras. – Item ella fixau da scriver ora e schar promuljar ellas duas vischnaucas da Mustér e Sumvitg, che ils scalprins e charidurs, che havessien plascher da interprender las lavurs da mir e pegnas tier las casa da scola, dueigien sin in temps che vegn fixau cheu sepresentar per accordar. Las pegnas dueigien vegnir fatgas ora si Calmut, ina giu Cavorgia per la casa da leu. NB: Dueigi vegnir teniu tier che ils interprenders da quellas lavurs laschien era tier nos miradurs.

03-04-1849 ha la cumissiun contractau da baghegiar si la casa da scola cheu a Sedrun tenor abriess, cun il meister signur sechelmeister de Ragisch per il capital da 320 fl e 20 remess. La casa da scola da Cavorgia ei marcadada cun meister Gion Antoni Schmed per il capital tenor brev da marcau da 85 fl e dus talers remess e zuar senza neginas autras ulteriuras expensas, sco marendas. Cun ils meisters da Rueras eis ei buca saviu vegnir perina, giu purschiu als meisters per quella casa sco ultimum 190 fl e 10 remess. A Rueras dueigi vegnir fatg ina casa cun ina stiva ed in stebli dad in circa 12 – 13 bratscha la largezia da domisdus cumahs e lura trer giebel ed en quel lura aunc dus treis cumahs. A Selva dueigi era vegnir baghegiu ina sco a Rueras, oreifer enstagl in stebli, pon els far duas stivas a pèr, aber la casa dueigi vegnir baghegaida en Sut Crestas. Cavorgia dueigi vegnir baghegiu ina casetta cun ina stiva ed ina combra suren.

06-02-1848 ei dalla cumissiun concludiu il sequent, che las lennas dueigien esser tratgas sil plaz tochen sin ils 12 dil present. Il commember da scola da Rueras dueigi vegnir numnaus silmeins provisoricamein tochen l'emprema radunonza da vischnaunca, essend ch'ei maunca in. Alla giuvna Leci Vigieli Monn e Barbla Mucli ei mess si per oblige 5 per in bien exempel havess la cumissiun bugen 6 fl 40 xr. Alla giuvna Leci Giachen Martin Bearth e Barbla Catrina Beer ei mess si dalla cumissiun da scola 1 fl 40 xr.

26-03-1848 ha la cumissiun concludiu da baghegiar casa da caplon tier la casa da scola e per quella fin dueigi vegnir fatg duas alzadas. Ei lura tratg ora ord meiz la cumissiun treis, numnadamein signur Lucas Caveing, stalter Lezi Mucli e Paul Schmed, quels dueigien mirar da cumprar giu la casa vedra sin Cadruvi da stalter Valentin Caveing cun resalva che la vischnaunca anfla per adequat da baghegiar leu ella; davart il sulom fuss concludiu da pagar miez ord fondo da scola, l'otra mesadad dalla vischnaunca. Ils da Rueras ein sentelgi da tschentiar sia casa da scola sper la casa dalla pervenda dadens. Davart las stialas ei concludiu da far pagar 30 xr per scadin um ni meister per di, ei lura era entelgiu che quels che prendan quellas da grob, ston era prender in di quellas da splauna e pagar per

domisdus gir 30 xr en tut. Il meister ei lura obligaus da tener quen, tgi pren las stialas e lura dar en ad in dalla cumissiun.

En mintga vischinadi dueigi vegnir schau saver che sch'ei seigi enzatgi che havess plascher da contrahar da far si las casas da scolas, dueigi tochen sin venderdis proxim dar en agli segnerfarrer e lura dumengia sera presentar avon alla cumissiun da scola; il signur president ha decretau la radunonza dalla cumissiun sin dumengia, ils 2 d'avrel.

Remarca: vendiu la lenna dalla casa vedra agli Marti Wallier per 2 fl; Giachen Martin Berther per 5 fl; Gion Antoni Beer da Surrein per 20 fl; caluster Werth per 1 fl 12 xr ed a Giachen Fidel Beer las aissas per 18 fl.

29-07-1849 Concludiu dalla cumissiun da scola:

1. Davart las pegas ei concludiu da schar urentar il crap en Nual, ei quel buns ei la cumissiun cuntenza da schar luvrar ora ellas leu, sco er da far pinar las vias che meinan leutier, cun far ira enasi quels che han buca bos, sut tetel da lavur cumina.
2. Il baghegiar la casa da Rueras ha la cumissiun dau il cunsentiment da refierer tochen sin primavera proxima 1850.
3. Davart la casa da Selva eis ei ad interim refretg cun sentir lur pareri ariguard il vuler setrer en Sut Crestas.
4. Davart il premi empermess ei la cumissiun seschada en d'acceptar ed ira en las cundiziuns dil cussegl d'educaziun sco era dat la cumissiun da scola incumbensa da corrisponder al cussegl d'educaziun al signur president da scola segnerfarrer.
5. Ha la cumissiun incumbensau il segnerfarrer e signur assistent Schmed da dar uorden da procurar per in schulmeister permanent pigl onn futur.

16-09-1849 Conclusiun dalla cumissiun da scola. Ha concludiu da pladir il giuven Biscuolm per schulmeister cheu a Sedrun e da pagar ad el per 10 entirs meins far scola e 6 uras per di la summa da 350 fl netto, senza neginas autras obligaziuns ulteriuras. Las obligaziuns ch'el ha eis el obligaus da prender giu da maun dalla cumissiun da scola. El dueigi aber seschar en da vegnir per 3 onns. Ei era concludiu che quels vischins che tarmettan tier quei schulmeister ein obligai da pagar per quels che frequentan la scola temps d'unviern 30 x per affon e per quels che frequentan gl'entir on 2 fl 30 xr.

26-11-1849 Radunonza dalla cumissiun, fatg dalla cumissiun ina indemnizaziun al meister de Ragisch, perquei ch'els han stuiu ira vi e neu e dular las lennas 20 fl. - Plinavon ha la cumissiun schau sura da pladir in schulmeister per Rueras al segnerfarrer e stalter Paul Wenzin. Per Cavorgia ei dalla cumissiun pladius per schulmeister il giuven Lezi Antoni Balzart ed ha fatg ora per pagaglia 45 fl e sto far la scola tochen la vacanza dalla primavera. - Ei era concludiu da far ina schulvisita tier mintga scola ina gada per meins ed ein destinai ils sequents: il farrer duei esser tier mintga viseta cun aunc in auter dalla cumissiun. Stalter Paul Wenzin ei destinaus per Sedrun, signur Lucas Caveing ni Hans Giachen Beer per Rueras, stalter Lezi Mucli per Cavorgia. Ariguard far ira a messa ils affons da scola ei concludiu da far far messa in quart ura avon las 8 e scadin scolar seigi obligaus da cumparer en quella; ils firaus dispensai e dis da bara vegn fatg messa las 10, nua ils scolar dueigien era esser obligai d'ira a messa.

Ei mess, ni vegnius legius ora sco cassier da scola signur gerau Paul Schmed.

Ei concludiu ariguard quels ch'eran maridai avon che rumper la lescha de pagar il stipulau fix alla scola, e vevan schon pagau, dueigi ei era vegnir pagau anavos a quels quei, il qual quel che veva pagau.

Ariguard las materialias e cudisch da scola dueigi per tut la scolas vegnir fatg vegnir dil cussegl da scola anora e partiu ora en scadin scola ed a scadin scolar senza interess.

Ariguard la protesta da signur mistral Gieriet, vul far encunter la cumpetenzza dil schulrath da spitgar giu e mirar nua era el vul cun quella protesta.

01-04-1850 Conclusiun dalla cumissiun da scola.

1. Ei concludiu da metter pils cudischs duvrai, cudischs instructivs 6 bl. Cudischs screts 3 bl. Cudischs pigns da leger 2 bluzgers, ils cudischs duegien restar vid la scola, vul dir per onn.
2. Dueigi la scola cheu a Sedrun e Cavorgia vegnir cuntinuada aunc 15 dis, nunsavend luvrar eis ei reservau da schar far vinavon aunc ina jamna ei dueigi vegnir teniu in examen pils da Sedrun sin ils 13 dil present e pils da Rueras sin ils 6 dil present.
3. Ei concludiu da puspei turnar a muentar sin vischnaunca ariguard il far pagar ils affons ch'han frequentau la scola igl unviern, sco era per quels che frequentan cheu la stad sco era davart il segirar la casa da scola.
4. Nun impediments duei la scola dalla stad vegnida entschevida ils 13 da matg.

12-05-1850 1. Ei concludiu da schar frequentar la scola dalla stad fargliuns in per l'auter, temps per temps, vul dir in per l'auter, senza stuer pagar pli che la taxa da fl. 2. Buc aber in che ha entschiet a frequentar e cala lura si e metta buca in auter, quel ei obligaus da pagar ils 2 fl.

2. Ha la cumissiun acceptau il plan dil signur scolast, il qual ei s'obligaus da far duas gadas scola a Sedrun, ed ina enta Rueras, bein aber ch'ei vegni dau ad el ina raschuneivla indemnisaziun, la quala el remetta alla cumissiun da scola presenta. La cumissiun ha lura schau sura da organisar en il temps ed uras al signur scolast ed al segnerfarrer cun, sch'ei fa da basegns, aunc in auter commember dalla cumissiun. 8 uras scola en tut per di.

3. Davart la lenna ei concludiu che mintgin dueigi stuer trer ina vaulta lenna per affon e schar urentar quella in commember dalla cumissiun da scola, il qual dueigi leutier esser destinaus. Quels che tilan buc la lenna ein obligai da pagar 50 x per scadina vaulta. La lenna dueigi esser tratga mintgamai cura che la scola digl unviern cala si. La restonza dalla lenna ch'ei stada anavos gl'onn 1850 dueigi sin Nadal 1850 esser tratga, a quella caschun ein quels era obligai da pagar ils 50 x per vaulta, quella regla dueigi survir per Sedrun e Rueras, insumma per tuttas scolas.

27-10-1850 Ein stai presents: segnerfarrer, sur Deplaz, sur Beer, assisten Schmed, stalter Paul Wenzin, Giachen Fidel Caveng, stalter Gion Andriu Berther, Hans Giachen Beer, scarvon Monn, Lucas Caveng, Stiaffen Schmed.

1. Ei vegniu dil signur president mes en enconuschientscha ch'ei seigi da basegns da procurar per in schulmeister a Rueras pigl unviern. Concludiu d'essend presents, dumandar sur Beer sch'el vegli surprender da far scola per quest unviern. Il qual dat giu la declaronza, allegond pliras raschuns, ch'el sappi per quest unviern buca surprender. Sin quella declaronza vegn sur Beer dalla cumissiun da scola unanimamein supplicaus da surprender da far la scola cun aunc dasperas seporscher da dar en cass da basegns dar in agid. Sin quei resalva signur sur Beer in per dis da patertgar – sin quei refretg per oz.

2. Damonda cura far entscheiver las scolas.

- a) La scola da Sedrun: entschatta ils 5 da november e finir la primavera tenor sco il temps damonda. Aschia ha la cumissiun resalvau dad allura fixar cura schar calar si il cuors digl unviern.
- b) Era a Rueras concludiu il medem.
- c) Selva tenor usit.
- d) Concludiu ariguard la scola da Cavorgia. Entras signur farrer e Lucas Caveng schar dumandar els cons affons ch'ei tarmettien a scola, sch'ei hagian enzatgi che fetschi scola e per con quel fetschi la scola e con ils vischins veglien sacrificar ord lur sac, suenter ni entochen che quellas rispostas ein buca anavos prender neginas positivas conclusiuns.

3. Damonda ariguard l'indemnisaziun al schulmeister per la stad per haver fatg duas uras dapli scola, per ira a Rueras e far la scola. Concludiu da dar, essend stau remess alla cumissiun da scola, per quella breigia ultra sia obligaziun fl 20.

4. Damonda tgei dar a quels treis signurs, stalter Gion Andriu Berther, Hans Giachen Beer, Paul Schmed ch'ein stai a stigar ora las pastiras, ein stai dus dis e concludiu da dar fl 1 per di e prender

giu enzatgei spesas a Selva tier sur Deplaz. Ei era concludiu da dacheudenvi dueigi negin dar ni pagar papli per di ch'in fl per um che sto far breigias per la scola.

27-11-1850 Concediu dalla cumission per far la scola al signur G.B. Beer 65 fl e da pagar sin primavera e per il local da far la scola per Rueras 3 fl 20 x.

Quels che han da trer en per il fein a pastg e per ils affons che han frequentau la scola:

per Sedrun: Stiafen Monn

Rueras: statalter Paul Wenzin

Selva e Tschamut: Stiafen Schmedt

Surrein: statalter Leci Mucli

Cavorgia: Gion Antoni Schmedt

Camischolas: Gion Battista Berther

Sto esser tratg en sin S. Andriu.

Davart ils da Cavorgia ei concludiu da dar 25 fl cun cundizun ch'els mirien sez per in schulmeister che fetschi ina buna scola, sco era da purtar sin vischnaunca ch'ei vegni ... schau tier da prender si sin pastira da casa zatgei vadials, els ein aber era culpents da pagar alla cassa da scola quei ton per affon sco igl ei dalla cumission da scola mess si.

La cumission ha elegiu ora per cassier da scola il Tumaisch Schmedt da Camischolas.

11-04-1851 Ha la cumission da scola fixau da tener ils examens da scola per Rueras, gliendisdis dalla jamna sontga, ils 14 da quest, per Sedrun ils 15 e per Cavorgia ils 16 e dad entscheiver allas 10 uras avonmiezdi. Il cuors da scola digl unviern duei aunc cuzzar entochen la fin digl avrel, num che las lavurs dil funs vegniessen avon da far, en il qual cass lura la scola calar si. Era sur Gion Bistgaun ha tier quei s'obligau, resalvond per la jamna sontga. La vacanza dalla primavera dueigi cuzzar per in meins.

Dapli eis ei vegniu sbassau la taxa digl affon per la scola dalla stad cun far pagar quel mo 30 x enstagl ils 2 fl.

Davart il tener scola la stad a Rueras eis ei ad interim concludiu da schar vegnir ensemen ils vischins da leu per mirar tgei affons che vegniessen tier quella.

09-06-1851 Ha la cumission concludiu da schar accordar il mir dalla casa da Rueras. Dau cumission als cumissionai da prender en augenschein ensemblamein cun ils miradurs Steger e soziai.

2. Davart la casa da scola da Selva ei sentelgiu da baghegiar en Sut Crestas ina casa tenor plan, numnadamein dueigi suten, sco en tschaler ina baselgia da maneira ch'ils divins uffecis temps d'unviern sappien vegnir fatgs. Nua tschentar la casa ha la cumission incumpensau signur farrer, signur Lucas Caveing, Giachen Martin Berther e Thomas Schmedt. Las lennas dueigien vegnir duladas, messas a guvern sut tetg, ed el medem temps mirar da saver marcadar cun zatgi che surpren da baghegiar si quei da lenn.

3. Davart il moni fier da Gion Alexi ei concludiu da vegnir ni secunvegnir cun el tenor sco gest ei.

4. Ei serrau giu in accort cun Vigilius Beer e Lezi Mucli da pinar ora la casa da scola da Rueras, sco muossa igl accord.

21-09-1851 1. Ha la cumission da scola, damai che las voluntarias unfrendas dils da Selva ein en parts schon dadas en, concludiu da baghegiar la casa da scola, pervenda e baselgia tenor plan e da schar marcadar vi en cuort entras il numnau beschluss, cun igl exprimiu giavisch che quella sesprovi da risguardar ton sco pusseivel ils fleivels interess dalla scola, bein adina senza donn dil baghetg.

2. Eis ei vegniu cumissionau quei, cun aunc ver tratg tier e supplicau il signur caplon Gion Bistgaun ed in dils signurs geraus u signur assisten Schmed ni signur Hans Giachen Beer, da tschentar si ils necessaris instruments per collectar ton egl jester sco el cantun per basegns da quei edifeci e da quels lura anora far ils necessaris pass e tarmetter ora.

3. Ha la cumissiun sin declaronza da signur caplon, che el muort circumstanziadas da sanadad sappi e possi buca far la scola da Rueras, danovamein exprimiu siu desideri e cuntentientscha ch'el duessi far la scola vinavon, aber sin sia repatida declaronza decretau da dar part quei al vischinadi da Rueras e metter quel ella vera enconuschientscha e sentir da quel siu giavisch sur da quels fatgs che quel dueigi enteifer e sil pli ditg da 15 dis dar giu siu meini sur da quels.
4. Eis ei concludiu da schar finir damaun la scola dalla stad e lura da prender tier quei muncament da 12 dis ch'il scolast Biscuolm havess aunc da far per il cuors da stad, tier il futur cuors digl unviern, cun schar entscheiver per quei pli baul.

- 25-10-1851 1. Ha la cumissiun da scola, sin quei di seradunada danovamein, instanziau il segner signur caplon Gion Bistgaun da vuler interprender la scola da Rueras, il qual lura ha finalmein seschau perschuer ad interim, cun la resalva che sche sia sanadad total lubeschi buca, che la cumissiun libereschi el era duront il cuors scoalstic e miri per in auter, la quala resalva era la cumissiun ha acceptau e lura dau ad el il salari da fl 80 per il cuors digl unviern. Il scaldar la pegna ed il scuar la stiva da scola dueigein ils da Rueras interprender.
2. Ha la cumissiun ordinau d'entscheiver la scola ils 27 da uost onn current.
 3. Als da Cavorgia fixau da dar il sustegn per il scolast sco igl onn vargau.

28-10-1855 Ei seradunau la cumissiun da scola ed ein cumpari ils sequents signurs, numnadamein:
segnerfarrer, president
statalter Gion Andriu Berther
statalter Gion Rest Monn
Giachen Antoni Schmett
Stiaffen Schmett
Sep Antoni Deragisch

La raschun, la quala la cumissiun da scola ei stada radunada, ei per contractar cun ils schulmeisters. Sche essan nus unitamein vegni perina e contractau da far la scola da Sedrun per igl onn 1855 entochen 1856 che va ora cun la lavur sin il feld e da leu naven dueigi vegnir fatg la scola da firaus e dumengias entochen igl emprem da november digl onn 1856, sco era dueigi el esser obligaus da scaldar la pegna, sco era far ora la lenna e resgiar ella, sche glei affons che san gidar resgiar e far ora, sco era sunar las orglas; cun il schulmeister Johann Anton Soliva, sche per far la scola da Sedrun cun las suras cundiziuns e per siu salari eis ei dau ad el per in onn frs. 250.-, sco era dueigi el esser obligaus da dar igl exercezi dil cantus dalla baselgia.

En num dalla cumissiun scolara
Joseph Ant. Durgiai, president
Scolast Joh. Ant. Soliva

28-10-1855 Eis ei serrau giu da far la scola da Cavorgia igl onn 1855 entochen anno 1856 entochen che va ora a luvrar sin il feld, cun Leci Antoni Balzart e per salari eis ei dau ad el frs. 68.-.

Per fede da quei
En num dalla cumissiun scolara
Joseph ant. Durgiai, president
Lezi Ant. Balzart

02-11-1855 Ei serrau giu tenor entelgientscha fatga ils 28 d'october cun il scolast Michel Simonet per far la scola da Rueras per igl onn da scola 1855 e 1856 entochen che las lavurs dalla primavera entscheivan ed igl ei dau ad el per salari frs. 125.- cun dasperas la lenna per cuschinar per el quei temps ch'el stat leuen. Lura eis ei era concediu ad el 3 dis liber per basegns dad ira cun ils s.h. tiers a Disla e lura turnar cheu en Tujetsch, sco era turnar engiu cun els.

En fede da quei

Joseph Ant. Durgiai en num dalla cumissiun scolara
Michel Ant. Simonet

Protocols vischnaunca

25-05-1851 Schau tier da prender sill'jarva senza arvè als vischins da Cavorgia sis vadials, duegien aber tener sin sia pastira da casa, quei ei schau tier per igl onn d'uonn per diever dalla scola.

13-07-1851 Per stagiari ora pastiras da segar en bonis da scolas e vias vegn destinau 9 umens.

06-06-1852 Davart la scola e pladir vinavon il schulmeister. Essend ora igl accord fatgs cun el, ei ad interim refretg ed el medem temps concludiu da vegnir ensemen aunc inagada la cumissiun da scola, la quala dueigi ponderar la caussa madiramein, ira atras ils quens, mirar co ei stat cun la bilanza, sco era con lunsch las resursas, ni il fondos da scola tonschan. Lura metter in ni plirs projects e quei lura purtar sin la vischnaunca.

16-05-1853 Ei dalla vischnaunca concludiu da dar per far la scola dalla stad 20 flurins al schulmeister che fa quella, cun l'obligaziun ch'el stoppi sunar las orglas e che dacheu naven duegien quels 20 flurins per sunar las orglas vegnir mess vid las scolas e la cumissiun da scola che pladescha schulmeister duegi el medem temps cumpigliar en l'obligaziun da sunar las orglas sur tut onn.

14-09-1853 Eis ei sedeliberau sur dallas scolas. Gl'emprem legiu ils quens ed administraziun dallas scolas tochen tiel di dad oz ed ei resultau che la bilanza ei curdada ora ualti uliva, da maniera che la scola ha ussa da bien ni s'avanzada las casas ch'ei dapresent baghegiadas. Plinavon ha la vischnaunca incumbensau la cumissiun dalla scola da mirar da procurar per schulmeister pigl onn d'uonn e quei aschi bein sco igl ei pusseivel e quei pil cuors d'unviern; adina aber cun approbaziun ni disapprobaziun dalla vischnaunca.

25-09-1853 Eis ei sin vischnaunca sedeliberau sur dils schulmeisters. Gl'ei stau scret ora la concorrenza per 4 scolasts, nua ch'igl ei stau 4 che han fatg il melden e quels ein Plazi Biscuolm per in salari da 200 flurins, quartier e lenna ed aunc il premi cantunal; Soliva per in salari per Sedrun 160 flurins e 20 flurins remetter ed 11 vaultas lenna e per Rueras 140 flurins e 20 flurins remess e lenna per siu diever da cuschinar; Biscuolm da Sumvitg per in salari da 100 flurins ed il premi cantunal e lenna per diever da cuschinar; in cert Deplazes da Surrein/Sumvitg, il qual deva sin oz ver dau en il tgei e co, survegniu aber neginas notizias ed aschia ei la vischnaunca passada tier las elecziun sco suonda.

1. Ha la vischnaunca schau semegliar las pretensiuns memia enormas ed aschinavon sco ils petents han giu dau giu siu ultimum, ha la vischnaunca buca saviu vegnir suenter a lur pretensiuns, han aschia concordau gl'emprem per Sedrun cun il scolast Soliva, il qual ei s'obligaus da far la scola il cuors d'unviern cun era vitier sunar las orglas igl entir onn, suenter sco gl'ei stau ils cheu davos onns e quei entschavend da Numnasontga tochen ch'ei vegn ch'ins sa generalmein luvrar il funs e quei per in salari da 100 flurins cun aunc schar vegnir tier il premi ad el che vegn dil cantun e zatgei lenna, la quala lenna duegi puder vegnir dada ultra quella che vegn tratga per la scola, sch'ei duess tier quella muncar lenna; fagend la scola cun cuntentientscha dalla vischnaunca eis ei da far ina remessa.

2. Al scolast Biscuolm da Sumvitg eis ei fatg si tscharna e e cuntertscharna, sche bein ins vegli dar ni vegnir suenter a sia damonda, nua ch'igl ei lura pigliau il pli da buca dar ton. Suenter ei lura il medem sura numnau Biscuolm mess en preposiziun cun aunc in nies vischin Michel Simonet sco per scolasts a Rueras e zuar Biscuolm per 70 flurins e schar ad el il premi cantunal e lenna per diever da cuschinar, per Simonet per 70 flurins e lenna per siu diever da cuschinar.

Ei lura vegniu fatg il pli sur da quels dus subjects ed ei curdau ora per Michel Simonet, il qual ha las medemas obligaziuns sco Soliva, priu ora ils sunar las orglas.

Per Dadens gl'uaul e da Maunsut ha la vischnaunca era concludiu da dar aschi a proporziun, seigi dalla vischnaunca ni ord il fondo, bein entelgiu aber ch'ei vegni era pladiu subjects, ils quals seigien adattai per far ina scola, suenter siu meglier saver e puder. Ei da remarcar, che ton ils Dadens gl'uaul sco quels da Maunsut, hagein ils dretgs da puder tarmetter ses affons tier las adina usitadas scolas, en gliez cass aber vegniessen ei a survegnir negina bonificaziun per quellas.

02-12-1853 Sco president da scola ei legius ora signur assistent Schmed da Gonda.

07-05-1854 Eis ei concludiu da mirar per caplon a Sedrun ed il giavisch fuss da survegnir in che fagess scola ed aschia dau cumissiun als signurs geraus da seconsultar cul segnerfarrer e lura schi gleiti sco pusseivel far pleiv.

07-05-1854 Eis ei sedeliberau schebein ins vegli schar cumpleina libertad alla cumissiun da scola da schar pladir ils schulmeisters e da manischar las caussas scolasticas senza intervegnir dalla vischnaunca, ni sch'ins vegli che la cumissiun possi dad ella anora senza dumandar la vischnaunca far nuot ed aschia entras in grond pli concludiu che las deliberaziuns dalla cumissiun da scola seigien obligatorias da vegnir sancziunadas dalla vischnaunca, da l'otra vart da surschar la plenipotenza illimitada alla cumissiun ei staus quasi persuls Hans Giachen Beer.

11-04-1854 Eisi dil president da scola vegniu legiu il quen da quella dils onns 1853 e 1854, nua ch'igl ei resultau che la scola ha aunc da pagar, ni resta deivet u capitals ni current 194.- frs. e zatgei raps, senza esser quintau ils 100 renschs che la vischnaunca dueva pagar la scola 1853 ed aschia approbau il quen.

Plinavon eis ei davart la scola dacheudenvi stabiliu sco suonda: La vischnaunca ei s'obligada da prender il deivet restont tier ella ed ultra da quei pagar ord cassa da vischnaunca alla scola 120 flurins annual cun aunc schar alla scola il schon fixau dallas baselgias.

Dapli duegi dacheudenvi esser dau l'autoridad independenta alla cumissiun dalla scola da pladir ils schulmeisters suenter lur bein manegiar a norma dalla sura menziunada summa. Las autras resursas ch'eran schiglioc per la scola, duegien curdar en cassa da vischnaunca.

17-02-1861 Silsuenter ha signur president legiu giu in project mes avon dalla cumssiun da scola, co ins savessi arver fontaunas per cuvierer ton pli tgunsch las spesas, ton da vischnaunca sco da scola, ei aber sedeliberau sur da quei punct nuot, sulet mo per dar enta maun da patertgar co ins savessi far.

10-11-1861 Eis ei concludiu da schar la mesadad da quels tiers che vegnan pri si sin la pastira da casa da Cavorgia als vischins da Cavorgia, l'otra mesadad aber ella cassa da scola comunabla.

29-12-1861 en connex cun l'elecziun dil caplon pader Augustin Schuoler decida la vischnaunca: c) Ariguard ils 51.- frs. per la scola, duei buca la caussa da quella engaldir, sonder quels 51.- frs. dueien vegnir pagai ord cassa da vischnaunca alla scola.

f) Cura ch'ei fuss negin caplon a Sedrun, sche dueien quels 51.- frs. per la scola vegnir pri ord il tscheins dalla caplania.

04-10-1863 Ei vegniu purtau avon ch'ils da Sedrun secuntentien uonn mo cun in schulmeister ed els vaien il dretg da retrer la rendita dil fondo da scola per dus schulmeisters. Sche ei dalla vischnaunca vegniu concludiu da schar vegnir tier ad els per igl onn d'uonn mo per 1 ½, bein aber dueigi quei nuota pregiudicar ils da Sedrun sin in'otra gada sch'els vegnan puspei sil patratg da tener dus schulmeisters, aschia ch'els hagian puspei ils medems dretgs sco vidavon.

04-10-1863 Ei concludiu da far far en la pegna ella casa da scola da Rueras.

18-10-1863 Eis ei vegniu concludiu dad aunc rumper ora e far en ina finiastra nova ella casa da scola da Sedrun.

17-01-1864 Sin garegiar dil cussegl d'educaziun eis ei vegniu purtau avon, schebein ins vegli turnar a retrer la protesta dada en per via dallas pagas dils scolasts ed ei unanimanein vegniu concludiu da buca retrer quella.

28-08-1864 Ei dil president vegniu declarau che mintga vischinadi duei ver queitau da mirar ch'ei hagian schulmeister sin da vegnir e quei tenor uorden da vischnaunca.

07-04-1867 Eis ei vegniu mess avon, sche ins lessi buca metter si ina scola da repetiziun en nossa vischnaunca u pliras. Eis ei concludiu dalla vischnaunca ch'il cussegl da scola dueigi radunar ina cumissiun da dus ni treis per vischinadi sco ella anfli per bien e lura luvrar ora in plan da quellas varts e suenter metter quei avon alla vischnaunca.

19-05-1867 Eis ei vegniu supplicau ils vischinadis ch'ei mettien ils umens destinai, cura ch'il cussegl da scola cloma per mirar sch'ei veglien rugalar en la scola da repetiziun per igl unviern.

04-10-1868 Eis ei vegniu fatg attent che la scola digl unviern cuozzi enstagl 22 jamnas 24 da cheu naven.

17-05-1869 Eis ei vegniu legiu ora l'entira cumissiun da scola dils dus onns vargai che han el medem temp, plitard entras ina cumissiun, luvrar ora in plan tgei quella ha da far e cumandar e plitard metter avon quel alla vischnaunca.

17-05-1869 Ha gerau Lucas Cavegn dumandau la vischnaunca da schar far scola privata en la stiva digl oberkeit entochen d'atun, ei quei vegniu ad el concediu.

09-07-1871 Ha il president mess avon ina brev dil cussegl d'educaziun, sch'ei vegnessi en nossa vischnaunca tratg ensemen empau las scolas, aschia che ins savessi salarisar empau pli bein ils schulmeisters ed en particular vegness ei giavischau che la scola da Camischolas vegnessi translocada cheu a Sedrun.

Ha lura la vischnaunca per il di dad oz nuota saviu entrar en tala caussa e schau sura al vischinadi da Camischolas da patertgar 15 dis per far cun Sedrun tala uniun e lura en quei termin dar risposta al president il siu conclus prius ad els.

30-03-1879 Ha la vischnaunca concludiu che dacheudenvi dueigien ils scolasts e las scolastas vegnir pladi entras ils commembers dil cussegl da scola en entelgientscha pli u meins era cun quels, ils quals han da tarmetter lur affons tier quella scola.

08-02-1880 Casa Cadruvi. Vigeli Cavegn s'oblighescha da temps d'unviern e da scola da buca emplunar si lennas da maun sura per buca stgirentar la stiva da scola.

06-06-1880 Ei en consideraziun, ch'ei vegn uonn da pagar ils scolasts ord cassa da vischnaunca, vegniu legiu ora ina cumissiun, la quala duei, culs geraus ensemen, luvrar ora in pareri per carschentar las entradas da vischnaunca e quel lura metter avon a quella.

24-06-1880 Ei da nies signur president vegniu purtau avon ch'il local da scola a Sedrun stoppi tenor ordinaziun dil cussegl da scola vegnir engrondius. Ins duei mirar sch'ins vegli alzar la casa da scola vedra ni baghegiar ina nova. Suenter haver udiu plirs e differents meinis, ha la vischnaunca concludiu da far empau plaunsiu e schau sura alla cumissiun da scola cun ils geraus da planisar ed intercurir, quala seigi la megliera moda per la vischnaunca e lura dar giu da quellas varts alla vischnaunca in respectiv pareri.

30-07-1882 Sin la brev vegnida tier dil cussegl d'educaziun ariguard la casa da scola a Sedrun eis ei concludiu da rispunder ch'ins vegli mirar da saver ira cun ina classa affons naven da Sedrun e tarmetter a Camischolas e lura mirar sch'ei seschassi buca seregular sin quella moda.

26-08-1883 ei stau vischnaunca ed ei dil signur president vegniu fatg da saver che entgins vischins hagian garegiu che la vischnaunca fetschi las lennas da scola. Mo damonda el expressivamein, sche in ni l'auter dils vischins veglien constrenscher cheutier. Sepassond negin si sin sia damonda, sche ha il signur president declarau ch'ins vegni pia buca a far quellas lennas, essend che mintgin seigi cuntents da far quella sco entochen cheu.

07-10-1883 Ei sin la brev dil cussegl d'educaziun tarmessa tier ariguard la casa da scola da Sedrun concludiu e legiu ora ina cumissiun, la quala entscheivi a far giu in plan co e nua baghegiar la numnada casa. Ils cheu eligi persunals ein: Vigeli Deragisch, Giachen Antoni Soliva, geraus Bruno Soliva, stalter Gion Paul Berther, geraus Giachen Antoni Venzin, Vigeli Venzin, Sep Antoni Hendry e Luis Hendry cun il cussegl da scola.

18-11-1883 Ei concludiu da baghegiar la nova casa da scola a Sontget; mo l'antieriura cumissiun dueigi aunc seradunar ina gada e mirar co baghegiar e sch'ins dueigi era unir la habitaziun dil signur caplon cun quella casa da scola nova.

16-12-1883 Ariguard la nova casa da scola ei concludiu da star totalmein vid il pareri luvraus ora dalla cumissiun, aschia che la vedra casa da scola resta cheu sco proprietad e diever dalla vischnaunca e tier la nova duegi vegnir baghegiu mo quei ch'il basegns damonda. Ei vegniu legiu ora ina cumissiun da treis commembers, che hagian il necessari quita, mirien e diregien sur lavurs e tut quei che fa da basegns tier e per baghegiar la nova casa da scola. Ils cheutier eligi commembers ein: sur caplon Berther, geraus Gion Andriu Berther e Duri Battesta Berther.

25-05-1884 Ei danovamein concludiu da baghegiar la casa da scola a Sedrun da lenn tenor igl εμπrem plan, nua ch'igl ei al a sias uras eligi comite dau la cumpetenz da sez ni da surdar ad in auter qualifcau um da mirar sura e direger las lavurs cuminas che ston vegnir fatgas da quellas varts.

08-06-1884 Ha il signur caplon vuliu prender la demissiun sco president dalla cumissiun da scola ed il comite che ha da direger sur il baghegiar la casa da scola, mo quella demissiun ei davart dalla vischnaunca buca vegnida acceptada, aschia ch'il signur caplon resta sin sia piazza anteriura.

22-06-1884 Ei stalter Gion Paul Berther vegnius eligius el comite da baghegiar la casa da scola enstagl da Gion Andriu Berther

10-08-1884 Secundariamein ei vegniu formau in niev comite ariguard la survigilonza ed il quita da baghegiar la nova casa da scola; ils eligi commembers ein: signur assistent Schmed, Duri Venzin e Duri Battesta Berther.

21-09-1884 Secundariamein ei danovamein vegniu eligiu ora ina nova cumissiun che miri e diregi co e sur il baghegiar la nova casa da scola a Sedrun, ils cheutier eligi persunal ein ils signurs Duri Battesta Berther, statalter Gion Paul Berther e statalter Stiaffen Beer.

28-09-1884 Ei concludiu da baghegiar la casa da scola sco quella da Mustér e far ella da lenn tenor vegls conclus ed il destinau comite dueigi mirar che la lavur mondi vinavon.

12-10-1884 Ils 12 d'october 1884 ei vegniu il rapport dil comite dalla casa da scola che la casa da scola da Mustér hagi negina cuschina e habitaziun per il scolast; ei oz concludiu a Rueras che la casa dueigi vegnir fatga da lenn, las stivas tschentadas ina sur l'otra ed ils necessaris cumahs per habitaziun da scolasts cun cuschina etc., dueigi il comite metter tier tenor commoditad e basegns.

21-03-1886 Ei concludiu da far trer la caltschina dalla casa da scola entras lavur cumina, nua ch'ei duegi vegnir quintau $\frac{1}{2}$ buot per ina schurnada, sco era il sulom dueigi vegnir cavaus ora da lavur cumina.

09-10-1887 Ei concediu da schar far la scola tudestga a Sedrun en ina dallas casa da scola e zuar quei a gratis aschiditg sco ei glei plaz sufficient.

21-05-1888 Finalmein ei aunc concludiu che ils geraus cun il statalter duegien ira atras ils quens dalla administraziun dalla casa da scola e lura rapportar il resultat alla vischnaunca.

17-06-1888 Ei concludiu da segirar la nova casa da scola a Sedrun sco era da turnar a renovar la segirada dallas outras casas da scola.

22-04-1889 Ei concludiu da per uonn buca segirar las casas da scola.

10-06-1889 Ei il quen e total importo per baghegiar la nova casa da scola vegnius legius e mess avon alla ludeivla vischnaunca, il qual ei lura era vegnius approbaus da quella.

26-05-1890 Ei finalmein concludiu da dar a mintga scola obligatoria ina sort lenna da fiug cun ils paupers.

10-05-1891 Sin damonda d'entgins vischins da Sedrun da far metter neu leu in secund scolast ei quella tscherna restada en minoritad, manegiond ch'ei seschass levgiar quella scola cun entgina buna veglia sin in'otra moda.

25-10-1891 Concludiu da schar la scola da Camischolas leu vinavon per adina sco entochen uss, sut la cundiziun che ils affons da quella, che gaudan negina almosna, paghien en cassa da vischnaunca annualmein 5.- frs. in, aschi ditg sco quella scola vegn buca frequentada da 14 affons, da leu naven han ei gratis la scola.

Medemamein ei vegniu concediu a Sedrun dus scolasts.

25-10-1891 La lescha per gl'alzament dalla paga da scolasts ha giu pro 4 vuschs, encunter 127 vuschs.

21-02-1892 remarca tiel protocol dils 25 d'october 1891, nua ch'ei stracta da schar exister la scola da Camischolas leu, ei il plaid „per adina“ buca vuliu vegnir approbaus. Essend aber che il cuntegn digl entir passus, che ha buca saviu vegnir snegau e di era senza plaid, che la sura scola dueigi exister leu aschi ditg sco gl'ei affons a Camischolas, seigi lura biars ni paucs, sche secrai il suttascret ch'el hagi giu il dretg da duvvar quei plaid, era ord motiv che quei vischinadi ei mai staus senza

affons e vegn speronza mai a vegnir – e surlai ruasseivlamein a scadin che legia quest protocol senza simpatia – da giudicar sur quel. - Concludiu da schar a tscheins ina combra en casa da scola nova a feglia da Giachen Venzin e schau sura alla suprastanza da vegnir perina.

10-04-1892 Che ils affons dalla scola da Camischolas stoppien vegnir a Sedrun a frequentar quella. Vesend Thomas Berther, ch'ei seigi per el buca pli cunvegnet da star sin sia posta vinavon sco gerau ha el admess la piazza anavos els mauns d'ina ludeivla vischnaunca, essend ch'el sco ses vischnins da Camischolas, hagi l'obligaziun da sustener la scola leu e cunvegni ad in um d'honor buca da survir a dus patruns.

09-05-1892 Ei vegniu legiu giu il recuors dils vischins da Camischolas e Zarcuns encunter la vischnaunca pervia da sia scola. Per rispunder a quei recuors ei tratg ora ina cumissiun consistenta ord ils signurs geraus en uffeci, Cristian Muggli, Anselm Capeder e Stiafen Beer.

16-04-1893 Suententer in per pintgas tractandas ei ins passaus tiella votaziun dils 3 pugns da recapitulaziun: a) Alzament dalla paga da scolasts primars da 340.- francs sin 400.- francs. Il resultat final ei staus il sequent: punct a) 0 acceptonts 140 refusonts.

14-05-1894 La damonda pervia dil fondo da scola da Camischolas ei refretga silla proxima vischnaunca. - Conclusivamein declara signur Vigeli Berther da Camischolas per mauns dil presidi, ch'el accepteschi igl uffeci da regiustratur sut la cundiziun, ch'ins concedi ad el il dretg dad ira en casa da scola a Camischolas; al qual igl ei vegniu fatg negin'opposiziun.

04-11-1894 Ei fatg attents, ch'ins dueigi metter neginas lennas sin Cadruvi sur casa da scola e sur igl iert dil plevon.

20-05-1900 fa il president attents ch'ins stoppi reparar la casa da scola a Rueras ed ins duessi dar ina entschatta tier quella lavur.

10-02-1901 En vertenta questiuon dils vischins da Selva e Tschamut ei da signur president vegniu mess avon alla ludeivla vischnaunca ch'ils vischins da Selva e Tschamut petiziuneschian, 1.) che lur casa da scola vegni reparada ed ultra da quei petiziuneschan 2.) ils vischins da Selva sulets che la scola vegni cun quella caschun translocada naven da Sutcrestas e baghegiada ora Selva.

Encunter quei petitium protestan ils vischins da Tschamut. Cheutras ei naschiu disuniun denter ils sura vischinadis e mess avon per decisiun la vertenta damonda alla ludeivla vischnaunca sco emprema istanza cumpetenta en caussa: schebein la casa da scola duei restar a Sutcrestas ni transferida a Selva. Suententer haver udiu ils motivs e las raschuns dallas respectivas parts, ein vegni dumandai giu ils meinis, ils quals han plidau tuts unitamein en in senn, numnadamein che ils vischins da Selva hagian neginas raschuns sufficientas tier lur pretensiun secundaria sco era en risguard dallas relaziuns, dalla situaziun e dalla experienza denter las numnadas fracziuns seigi negina cunvegrientscha da transferir la casa da scola naven da Sutcrestas. La vischnaunca ha sin quei concludiu da rugalar la casa da scola da Selva-Tschamut e zuar aschi gleiti sco ils vischins da leu seigien perina nua tschentar quella. Pil cass che la casa vegni transferida tegn la vischnaunca ora il sequent : Ils vischins da Selva ston sin agen donn e cuost procurar

- 1.) per in segir sulom
 - 2.) tuts transports dalla casa da scola.
- Cun quei ei stau finiu.

11-09-1904 Project d'na lescha concernent l'obligaziun d'ir a scola ed il cuoz da scola che ha giu in resultat da 173 na e negins gie.

02-10-1904 Concluda la vischnaunca da sin fundament dil project da lescha sur l'obligaziun d'ir a scola ed il cuoz dalla scola da prolunghir quella da 24 sin 28 jamnas.

01-10-1905 Sin ina brev dalla regenza, nua che quella damonda si la vischnaunca, tgei pass ella intenziuneschi da far pervia dalla casa da scola a Selva, la quala seigi tenor rapport dil signur inspectur buca pli sufficienta per dar scola, concluda la vischnaunca da risponder, che la casa dil caplon a Sut Crestas, nua ch'ins hagi dau scola ils davos onns, sequalificheschi tenor rapport dil signur scolast per in oreifer local da tener scola e ch'ella, la vischnaunca, secreigi dad ad interim buca stuer baghiar casa da scola.

03-11-1907 essend il basegns avon maun da tablegiar la casa da scola a Sedrun cun slondas, vegn ei mess avon alla vischnaunca, schebein ella vegli surschar da menar quella caussa alla suprastanza ni eleger ina outra cumissiun en caussa. Sin quei conclud'ins da surschar quella caussa alla suprastanza.

05-04-1908 Sin moziun da segnerfarrer e dil ludeivel cussegl da scola metta il president avon alla ludeivla vischnaunca, schebein ins vegli ereger ina scola reala per nossa vischnaunca a norma dil regulativ dil ludeivel cussegl grond dils 7 da matg 1907. Suententer entgina discussiun en caussa conclud'ins da menar en ina tala scola reala per nossa vischnaunca.

14-06-1908 Conclusivamein vegn ei da part dil president dalla cumissiun da quens, signur genau Tumaisch Berther fatg sequentas remarcas :

a.) Ch'il fondo da scola da nossa vischnaunca seigi tenor rapport dil cussegl pign vegnius carschentaus pro 1906-1907 per circa 4000.- frs., dil qual carschament, sco las caussas muossien negin sappi novas. Ord quella raschun duessien tuts administraturs da fondos da scola render inaga ad onn quen alla suprastanza, sco tuttas outras raubas pias.

b.) ch'ins duessi sin ina moda ni l'outra encurir da far meglier diever dalla scola vedra a Sedrun. Appartenent las duas sura moziuns da signur genau Tumaisch Berther, conclud'ins il suandont. Tuts administraturs da fondos da scola dueigien inaga ad onn render quen alla suprastanza. Davart il far diever dalla casa da scola vedra, conclud'ins da surschar quella caussa alla suprastanza.

03-04-1910 Metta il signur president avon alla ludeivla vischnaunca ina petiziun dils vischins da Rueras, en la qualla numnai vischins damondan dalla ludeivla vischnaunca duas scolas per siu vischinadi, essend il diember dils scolars memia gronds mo per ina scola.

Suententer haver tedlau giu ils differents meinis ed aviert la discussiun generala en caussa, conclud'ins cun pintga participaziun da votants da dar als vischins da Rueras duas scolas per aschiditg sco il diember da scolars survarghi 35 scolars ed ei vegni buca outras relaziuns.

15-01-1911 Rapport'il signur president alla ludeivla vischnaunca ch'ils giuvens mats fagessien bugen diever dil tschaler dalla casa da scola a Sedrun per far teater etc. e damondan dalla ludeivla vischnaunca la lubientscha dad arranschar en il tschaler per tal intent.

Suententer haver discussionau quella caussa, concluda la vischnaunca da ranschar en il tschaler scola per diever dalla ludeivla vischnaunca e dils mats, per tener radunonzas da vischnauncas etc..

05-02-1911 Metta il signur president avon alla ludeivla vischnaunca la damonda, schebein ins vegli, ni ei cunvegni dad arranschar en la casa da scola a Rueras, sinaquei ch'ei seigi plaz en quella per

duas scolas, a raschun che la ludeivla vischnaunca ha sut datum dils 3 d'avrel 1910 concludiu 2 scolas al vischinadi da Rueras.

Suenter haver tedlau giu ils differents meinis en caussa ed aviert la discussiun generala en caussa, concluda la vischnaunca dad arranschar la casa da scola a Rueras, ch'ei seigi plaz en quella per duas scolas.

05-02-1911 Fa il signur president enconuschent alla ludeivla vischnaunca ch'ils vischins da Selva hagien sut datum dils 28 da november 1910 dau en alla ludeivla vischnaunca ina petiziun en la qualla numnai vischins garegian la construcziun d'ina casa da scola el vitg Selva.

Suenter haver mess en discussiun la damonda da baghegiar ina casa da scola el vitg da Selva ed udiu ils differents meinis en caussa concluda la vischnaunca

1.) da buca corrispunder alla petiziun dils vischins da Selva.

2. da rugalar si la casa da scola a Sut Crestas tenor sco ils basegns damondan per ils vischinadis Selva e Tschamut ensemen, sco stau entochen da cheu.

08-10-1911 Avis'il signur president che tenor ordinaziun dil medi districtual seigi ei scumandau als affons da scola da Camischolas, che hagien la tuss tgaun, da frequentar las scolas.

10-03-1912 Fa il signur president enconuschent alla ludeivla vischnaunca ch'ei seigi da part dil cussegl da scola vegniu fatg attents, ch'il cussegl d'educaziun pretendi ch'ei vegni ranschau en per las scolas in plaz da far il turnen, gimnastic, e mess neu ils necessaris cundrezs persuenter e ch'ei vegni la fin dils 1913 fatg inspecziun, schebein quei seigi daventau ni buc. Signur president manegia ch'ei cunvegna alla vischnaunca dad ad interim ranschar en tals cundrezs aschi sempels sco pusseivel per las scolas a Sedrun e Rueras.

27-05-1912 Sin rapport da part dil signur president, ch'ei seigi necessari da far tetg e regular si empau la casa da scola vedra a Sedrun e ch'ei cunvegnessi ussa forza da tablegiar encunter la casa da scola nova a Sedrun cun eternit enstagl cun slondas e forza era far il tetg dad eternit, concluda la vischnaunca da surschar alla suprastanza da reparar las duas casas da scola tenor sco ella anfla per bien.

01-10-1912 Prelegia il signur president la sentenza digl aultludeivel cussegl pign en caussa recuors vischinadi Selva contra la vischnaunca Tujetsch, pervia dil translocar la casa da scola da Sutcrestas a Selva, la quala sentenza ei vegnida dada ora en favur dalla vischnaunca, da buca translocar la scola.

06-12-1914 Fa il president enconuschent, ch'ei vegni dau via en libra concorrenza il far entgins bauns da scola ed ils plantschius stiva per la casa da scola a Sedrun, sorprendiders veglien s'annunziar ton pli gleiti en scret.

05-09-1915 Essend absolut basegns d'ina pegna en stiva da scola a Sedrun, concludan ins suenter haver emprau entuorn ils meinis, da far in'emprova cun ina pegna dalla fabrica da Sursee.

27-02-1916 Arisguard la casa da scola a Selva vegn concludiu da star sil sulom veder.

21-01 1917 Fa il signur president attents ch'ei seigi dil departement d'educaziun vegniu motivau alzament da paga als scolasts (Teuerungszulage).

17-02-1918 Tals che vulan surprender las lavurs dalla casa da scola a Selva, san dar en lur offertas entochen il davos d.q. al signur president, nua ch'ins sa era prender envesta dils plans.

01-04-1918 Offertas per reparaturas dil tetg dalla casa da scola a Sedrun san ins dar en entochen ils 15 d.q. al signur Ill. genau en uffeci.

21-02-1920 Fa il signur president attents che la scola reala savessi ir en per munconza da scolars, el visa tals ch'ei intenziunai da schar frequentar quella scola sigl avegnir, da notificar quei enteifer 8 dis al cussegl da scola.

18-04-1920 Ei sin giavisch da plirs vischins da Sedrun-Gonda-Camiscolas extrordirariamein stau radunau vischnaunca per predeliberar la damonda d'ina tiarza scola a Sedrun. Suentar haver tedlau giu differents meinis ed ina ualti viva discussiun en caussa, concluda la vischnaunca da dar ina tiarza scola a Sedrun.

24-04-1921 Alla fin remarchescha signur president Felici Monn che la vischnaunca duessi ponderar, schebein ei seschassi buca sminuir empau las expensas dallas scolas, las qualas ein uonn carschidas considerablamein.

01-05-1921 Legia il signur president avon las proposiziuns dalla cumissiun stada eligida per ponderar co sminuir las expensas da nossas scolas, las qualas ein dalla vischnaunca vegnidas approbadas. Numnadamein da prender si il novavel onn da scola e d'alzar empauet la contribuziun privata pils scolars dalla scola reala.

30-04-1922 Sin repeti giavischs vegn mess avon alla vischnaunca, schebein ella vulessi patertgar da simplificar empau las anzi numerusas scolas. Suentar haver tedlau giu ils differents meinis che mavan tuts d'accord cun ina sminuaziun dallas scolas, priu ora dus meinis che vulevan aunc ponderar empau la caussa avon, ei da vart da certs vegniu procurau disuorden ed ei la vischnaunca vegnida serrada senza prender conclus.

07-05-1922 Da vart dil cussegl da scola vegn tschentau il petitium che la vischnaunca dueigi decider en caussa dallas scolas, sinaquai ch'ei sappi vegnir pladiu ils respectivs scolasts.

24-09-1922 La scola reala entscheiva ils 2 d'october 1922. Geniturs che vulan schar ir ses affons en tala scola ein supplicai da s'annunziar tier il cussegl da scola.

08-10-1922 Motivescha signur scolast Tumaisch Venzin ch'ins duessi turnar anavos sils 8 onns da scola cun 28 jamnas, enstagl dils 9 onns cun 26 jamnas. Suentar haver dumandau entuorn ils differents meinis concluda la vischnaunca da prender si ils 8 onns da scola.

03-12-1922 Vegn fatg da saver ch'il cussegl pign hagi dau lubientscha da prender si ils 9 onns da scola.

04-03-1923 Lescha sur la scola da lavurs manilas. 30 gie e 174 na.

04-03-1923 Concluda la vischnaunca da prender part dall'iniziativa che intenziunescha ina sbassada da paga als signurs scolasts.

19-03-1923 Sin damonda schebein ins vegli reparar ni respectiv far pli gronda la casa da scola a Camiscolas, cusseglia la cumissiun gronda alla ludeivla vischnaunca da far tala reparatura e zuar suenter in sempel plan fatgs da signur scolast Mudest Nay. Tal plan preveda negin carschament da sulom, mo d'alzar la casa, midada digl esch casa e differentas midadas internas. Calculaziun da cuosts circa 1000.- frs. Suentar haver dumandau entuorn ils meinis concluda la vischnaunca da far la numnada reparatura

19-03-1923 In'otra damonda tractada dalla cumissiun ei stau la scola a Rueras, la quala hagi pigl avegnir in diember da 44 scolars. Signur president fa da saver ch'il giavisch dalla cumissiun, numnadamein che ils vischins da Rueras secuntentien mo cun ina scola cun s'arranschar sin ina moda ni l'otra, seigi dils vischins quasi unanimamein vegnius approbaus cun la cundiziun:

1. Ch'els hagian il dretg da tarmetter enzacons affons a Camischolas ella scola reala, eventuel cun formar ina classa preparanda.

2. Affons che vegnan a Camischolas mo en classa preparanda, pagan negina contribuziun sco scolars reals.

3. Quell'entelgientscha duei valer per igl onn 1923/24.

Suenter entgina discussiun concluda la vischnaunca d'ir d'accord cun quell'entelgeintscha.

24-06-1923 Vegn fatg da saver che aspirants per las lavurs da meister vid la casa da scola a Camischolas dueigien s'annunziar tier in commember digl oberkeit nua ch'ins sa prender investa emapu co ei sto vegnir fatg.

10-08-1924 Arisguard il dar supplement da paga a signur Vigeli Beer meister per baghegiar la casa da scola a Camischolas, van ins d'accord cun la proposiziun dalla cumissiun gronda da dar al sura 45 cts per ura per las lavurs cumpridas egl accord.

23-05-1926 Tgi che less surprender da far entginas reparaturas vid casa da scola a Sedrun (in planstchiu sut, ruglar schalusas ect.) vegli s'annunziar tier signur Ill. genau tochen dumengia proxima ils 20 d.q. Arisguard ulteriuras restauraziuns vid la casa da scola a Sedrun, sco dar colur finiastras, schalusas ect., vegn schau sura alla suprastonza da far tenor cunvegnientscha.

06-06-1927 Ei seigi aunc dus fondos en scola che seigien aunc buca sut la controlla ni bitgetta dalla ludeivla vischnaunca, il qual fussi en ses eglis da recumandar che daventassi. Suenter entgina e magari viva discussiun en sura menziunada caussa, vegn manegiau da schar ponderar quella caussa ton da vart dalla ludeivla vischnaunca sco era da l'otra vart.

20-05-1928 Sco principala tractanda figurescha la pretensiun per ina II. scola per Rueras. Signur president prelegia 2 brevs, ina digl ugau da scola e l'otra dil cussegl da scola sez. Omisduas circularas fan valer il absegns ni necessitad per ina nova scola a Rueras, essend ch'il scolast vegn buca entuorn d'instruir in aschi grond diember dad affons cun tontas classas.

Suenter haver dumandau entuorn ils meinis en caussa ed udiu la discussiun generala, concluda la vischnaunca sin proposiziun da signur stalter Hans Giachen Decurtins. Da refierer tala damonda per oz e surdat la vischnaunca ad ina cumissiun tala caussa per pli madira reponderaziun. En quella cumissiun ein eligi: il cussegl da scola, ils revisurs da quen dalla ludeivla vischnaunca e la suprastonza communal.

24-06-1928 Vegn tractau la damonda: ina II. scola a Rueras. Suenter prelecziun dil pareri dalla cumissiun per quella caussa, vegn dumandau entuorn ils meinis e schau liber la discussiun en caussa, nua ch'ils meinis ein curdai pro e contra. Numnada damonda vegn dalla ludeivla vischnaunca tras tscherna snegada, ord motiv dalla presenta ualti precara situaziun da finanzas dalla ludeivla vischnaunca.

27-05-1929 Prelegia signur president ina circulara tarmessa tier dil departement cantunal d'educaziun a nies ludeivel cussegl da scola per mauns da nossa vischnaunca, en la quala circulara ei vegn iniziav e quasi cumandau da dar ina secunda scola a Rueras sin d'atun proxim, sefundond sco raschun sil memia grond diember d'affons e munconza da plaz. Suenter haver dumandau entuorn ils meinis ed udiu la discussiun generala concluda la vischnaunca da dar als vischins da

Rueras quella giavischada secunda scola per aschi ditg ch'ei survarghi il diember da 40 affons (scolars) en lur vischinadi.

18-05-1930 La vischnaunca ha da schar far 4 bauns da scola novs, reflectonts per quella lavur veglien dar en lur offertas a signur cusseglier da scola stalter Hans Giachen Decurtins.

24-09-1930 Reflectonts per scaldar las pegas da scola veglien s'annunziar enteifer 8 dis.

12-06-1932 Vegn mess avon per reponderaziun il conclus dils 6 da mars o.c. pervia da translocar la remisa dalla sprezza a Sedrun. E vegn cun il pli concludiu da metter la sprezza el tschaler dalla casa da scola sin Cadruvi e far giu la remisa sper scola.

12-03-1933 Vegn prelegiu il conclus staus prius ils 24 da zercladur 1928 partenent il scamond da vender zuchrams e da quellas caussas ad affons sut 16 onns.

05-06-1933 Legia signur president avon ina petiziun dil cussegl da scola che vul che la vischnaunca prenda in conclus per introducir ina scola agricola da perfecziun. Quella cumpeglia 180 uras en total, repartidas sin 2 ni 3 onns. Per ils giuvens de 16 – 18 onns ei quella obligatorica, per ils auters facultativa. Quella scola vegn subsidiada miez dalla confederaziun, $\frac{1}{4}$ dil cantun ed $\frac{1}{4}$ tuccass alla vischnaunca. Ils scolast secuntentan denton cun las $\frac{3}{4}$ che vegnan subsidia. La vischnaunca concluda da menar en quella scola cun far 15 gievgias per unviern (2 onns) scola.

01-10-1933 Reflectonts per scaldar las pegas da scola dueien dar en lur offertas enteifer quest'jamna alla suprastanza.

08-10-1933 Prelegia signur president era la risposta dil cussegl d'educaziun pervia dalla reducziun dallas pagas dils scolasts. Tal fa valer che quella midada stetti buca en cumpetenza dallas singulas vischanuncas, essend mo il cantun cheu cumpetents.

29-10-1933 Essend nos signurs scolasts malgrad las diversas representaziuns buca saviu sedecider da far visavi la vischnaunca ina pintga reducziun da lur paga, vegn ei proponiu, che la vischnaunca duessi eleger in comite che instradeschi il referendum encunter la lescha dallas pagas da scolasts. Encunter quella proposiziun oponen principalmein ils signurs president G. Felici Monn e mistral Vigeli Berther, fagend valer, ch'ei seigi da dubitar fetg vid in success d'in tal proceder e ch'ei deschi era buca ad ina vischnaunca d'esser cheu empren iniziand. Sin talas expectoraziuns croda ei ina zun viva, per part burasclusa discussiun e vegn ei alla fin insistiu sin l'elecziun d'in tal comite cun adossar alla vischnaunca ils eventuels cuosts. Tier la votaziun vegn tala proposiziun en quei senn acceptada ed eligiu en tal comite: ils signurs Giachen Martin Berther, junior; stalter Lezi Antoni Cavegn, Vigeli Schmed-Schmed, genau G. Antoni Venzin e genau Hans Giachen Decurtins, il qual accepta la missiun cun resalva, essend in success sin quella via fetg dubius.

05-11-1933 Il conclus prius dalla vischanunca sut datum dils 29 d'october o.c. pervia dil referendum encunter las pagas dils scolasts, vegn suenter liunga discussiun puspei ruts e surschau la caussa alla iniziativa privata.

12-01-1936 Ariguard il regular ora l'alzada sura dalla casa da scola Sedrun, duei la suprastanza en uniu cun igl ugau scola far quei ch'ella anfla per indicau.

07-02-1937 Alla damonda dils mats da Rueras d'astgar baghegiar ora il tschaler dalla casa da scola sco sala da tetaer vegn corrispondu en quei senn, che las respectivas lavurs stoppien vegnir menadas ora sut survigilanza dalla suprastanza communal. Plinavon vegn concludiu da dar giu gratuitamein per quei intent circa 10 m³ lenna en uaul da III. classa.

03-10-1937 Tgi che reflectescha da scaldar las pegnas da scola per il proxim unviern, dueigi far offerta alla suprastanza.

25-09-1938 Vegn dau vi en concorrenza da scaldar las pegnas dallas scolas, offertas san ins dar giu alla suprastanza ni al cussegl da scola.

25-09-1938 Vegn dau vi en libra concorrenza il tablegiar e far en finiastras ella stiva da scola sura a Sedrun, offertas san ins far entochen ils 2 d'october alla suprastanza.

02-07-1939 Vegn ei dil cussegl da scola fatg ina petiziun en scret ariguard la scola agricola, sch'ins savessi buca midar e schar frequentar duas annadas pli veglias quella, ni eventual desister d'ina tala, essend il tschaffen fetg minimis tier la gronda part dils scolars.

29-09-1940 Reflectonts per scaldar las pegnas dallas scolas san s'annunziar tier il cussegl da scola.

27-04-1941 Prelegia signur president il conclus prius dil cussegl da scola, che secloma sco suonda. Muort la scartezia da plaz els dus locals da scola a Sedrun concluda il cussegl da scola da far ira ils affons da Zarcuns tuts, sco era quels da Camischolas, che van il quart onn ensi inclusiv, a Rueras a scola, e quei entscheiva igl atun 1941.

02-06-1941 Encunter la publicaziun fatg en il protocol prelegius per approbaziun dalla vischnaunca dils 2 da zercaldur ariguard il conclus prius dil cussegl da scola da far ira in diember affons da Camischolas e Zarcuns a Rueras a scola, declara signur Benedetg Deflorin cun aunc auters vischins ch'els vegnien a protestar encunter.

08-06-1941 La sura numnada radunonza ei vegnida convocada e tenuta extraordinariamein sin pretensiun da 50 iniziants da Camischolas, Zarcuns e Sedrun, e quei per prender posiziun sur dil conclus dil cussegl da scola staus publicaus tier la radunonza da vischnaunca dils 27 d'avrel 1941.

08-06-1941 Passan ins tier la giavischada tractanda pretendida da 50 iniziants ariguard il conclus prius dil cussegl da scola, che secloma, che tuts affons da Zarcuns sco era quels da Camischolas, che van il quart onn ensi a scola inclusiv, mondien igl atun 1941 a Rueras a scola e quei ord motiv dalla scartezia da plaz ch'ei els locals da scola Sedrun a Sedrun.

31-08-1941 Passan ins tier la actuala damonda da scola a Sedrun, che secloma sin la gliesta da tractandas sco suonda :

- a) da star dil conclus prius dil cussegl da scola
- b) eventualmein crear ina nova scola

Suenter liunga discussiun en caussa passan ins tier la votaziun e concluda la radunonza da star dil conclus prius dil cussegl da scola ch'era fixaus sco suonda. Ils affons da Zarcuns tuts, sco era quels da Camischolas, che van il quart onn ensi inclusiv, han dad ira a Rueras a scola per dus tochen treis onns d'emprova.

03-05-1942 Vegn ei publicau ch'il termin dalla scola reala seigi dacheunaven prolunghius sin 32 jamnas ad onn e tuts quels ch'entscheivan ella ston frequentar tala scola treis onns.

16-08-1942 Metta la suprastanza avon in plan cun indicaziun dils cuosts che muntan circa 3000.- frs per ereger il cumàs sper casa da scola Sedrun. Suenter entgina discussiun surlai ins alla suprastanza da menar atras quella lavur sco mes avon.

16-05-1943 Prelegia signur president il niev regulativ per la scola reala, il qual vegn suenter entgina discussiun unanimamein approbaus.

05-11-1944 Ariguard la concessiun dil tschaler scola Rueras alla ovra d'agid sursilvana per far in local da dar cuors da teisser ordlunder, vegn concediu dalla vischnaunca. La damonda da furnir la lenna ch'ei drova per sura lavur, calculau sin 9 m^3 , vegn schau sura alla suprastanza da contractar cun els e fixau il maximum sin 9 m^3 .

14-10-1945 Mesjamna proxima, ils 17 d.q. han las scolas da Rueras e Selva dad ira a Mustér e schar far il «Durchleuchten» e la gievgia las scolas da Sedrun e Cavorgia. Il program da successiun ha il cussegl da scola. Il bigliet paga la «Fürsorgestelle» la mesadad e l'autra mesadad ils affons.

12-05-1946 La damonda da crear ina secunda scola a Selva vegn ad interim refretga per reponderaziun dil cussegl da scola.

10-06-1946 La damonda da crear ina secunda scola a Selva vegn fiersa dalla vischnaunca.

29-09-1946 Il signur president communicescha ch'il cussegl pign hagi ordinau da crear ina secunda scola a Selva.

27-10-1946 Reponderaziun dil conclus prius tier la radunonza da vischnaunca dils 12-05-1946 ariguard crear ina secunda scola a Selva. Il signur president orientescha tgei gl'ei curriu e passau en causa appartenent la secunda scola a Selva. Suenter entgina discussiun pro e contra en causa, decida la vischnaunca entras tscherna da star dil conclus staus prius tier la radunonza da vischnaunca dils 12-05-1946, il qual ha snegau la secunda scola a Selva.

02-03-1947 Orientaziun en causa secunda scola a Selva. Il signur president orientescha tgei gl'ei curriu e passau en sura causa. Ord motiv che la vischnaunca hagi snegau la secunda scola a Selva, ha il cussegl pign retratg il subsidi per la scola reala. La radunonza da vischnaunca lai sura alla suprastanza da sligiar quella damonda cun rapportar pli tard co gl'ei iu en causa.

07-05-1947 Prelecziun ed approbaziun dil protocol anteriur cun la remarca dil revendissim segnerfarrer ch'ei seigi tier la radunonza da vischnaunca dils 2 da mars vegniu dau surengiu da certs vischins ualti massiv al cussegl da scola ariguard scola a Selva, e buca vegniu stau tier la verdad ed el protesti publicamein encunter talas tschontschas.

11-05-1947 Prelecziun ed approbaziun dil protocol anteriur cun la remarca da signur Battesta Giger, ch'el revocheschi ses plaids detgs tier la radunonza da vischnaunca dils 2 da mars. En siu votum hagi el sbagliu, tier la votaziun dil cussegl da scola, per crear la secunda scola a Selva cun la votaziun dil cussegl da scola per l'elecziun dil scoalst per la scola a Selva, dils 27-05-1945. Quei seigi daventau buca da buna voluntad.

11-11-1947 En causa per ina segirada per affons da scola, vegn fatg valer che tala causa seigi buca diltut clara e seigi da far sclarir si avon che prender conclus, sin quei concluda la radunonza da refierer quella causa sin la proxima radunonza da vischnaunca.

04-07-1948 Plinavon metta signur president avon, che la vischnaunca havessi caschun da schar a tscheins il tschaler dalla casa caplania sin Cadruvi. El metta era quella damonda en discussiun, schebein ei cunvegnessi buca da schar rugalar ora in da quels tschalers, mo conclus pren la radunonza da vischnaunca negin.

01-08-1948 Vegn mess en discussiun il rugalar ora ils tschalers dalla casa caplania sin Cadruvi. La radunonza concluda en principi da schar rugalar ora quels e lai sura alla cumissiun da baghegiar, sco ella anfla per il meglier e secund las offertas.

05-12-1948 La damonda da scaffir ina segirada per affons da scola vegn dalla radunonza da vischnaunca fiersa.

05-12-1948 Sin pretensiun dalla inspectura da scola da lavurs manilas vegn mess avon alla radunonza ils giavischs da quella, ariguard nossas scolas da lavur. Signura inspectura pretenda dad augmentar las scolas da Sedrun da duas sin treis e la scola da Rueras dad ina sin duas. Signur president prelegia il conclus dil cussegl da scola il qual recamonda da far quellas midadas. Per a Sedrun ei ins vegnius da secunvegnir cun ils geniturs da Cavorgia, ils quals sedeclaran da schar vegnir lur buobas a Sedrun a scola da lavur, aschia che la scola da Cavorgia mass en ed a Sedrun vegness augmentau per ina. Per encunter pretendan isl da Cavorgia 80 rps. per buoba e per gada per ils dils che quellas ston vegnit si Sedrun. Per a Rueras vegn concludiu cun pintga tscharna da dar duas scolas.

20-02-1949 En orientaziun e discussiun ariguard in secund scolast per la scola reala metta signur president avon il basegns che semuossa ed igl avantag ch'in secund scolast purtassi a nossa vischnaunca ed a nossas scolas. Mo essend levau empau opposiziun encunter quella idea, hagi la suprastonza cun il cussegl da scola, buca vuliu vegnir cun quella tractanda e quei per buca metter si alla vischnaunca novas grevezias.

Dalla discussiun vegn fatg diever dils signurs cussegliers da scola e da signur scolast secundar Ludovic Hendry, il qual fa valer en siu votum che ei seigi buca grad quei basegns per in secund scolast. El argumentescha quei primo, ch'ei seigi buca ils aspects da crescer da num ils scolars. Secundo: che la scola reala seigi era buca per tuts necessaria.

Sin il votum da signur Ludovic Hendry remarca signur president Hans Giachen Decurtins, el sappi buca ira d'accord che signur scolast Hendry detti mo tonta peisa sin la scola reala.

22-05-1949 Prelegia signur president ina brev da signur inspectur da scola Reinanteriur, en la qualla signur inspectur fa valer la necessitad e basegns d'in secund scolast per la scola reala. Signur president arva la discussiun dalla quala ei vegn fatg diever dalla suprastonza communal e dils signurs cussegliers da scola, sco era da plirs auters vischins e scolast.

Signur scolast secundar Ludovic Hendry va anavos sin siu votum sin la radunonza da vischnaunca dils 20 da fevrer, el declara ch'el hagi sin quella radunonza plidau mo dil biro da plazzament e buca dil biro per elecziun da clamada ed el hagi adina dau gronda peisa sin la scola reala, siu votum seigi forsa buca vegnius prius sa da tuts sco el hagi manegiau. Signur Alfons Berther tschenta la moziun da patertgar da en connex cun la secunda reala saver baghegiar la scola primara e da dismetter igl examen da recepciun per la scola reala.

In'otra moziun ord il miez propona da patertgar sch'ei fussi forsa buca cunvegnent dad alzar la contribuziun dils scolars reals.

Suenter che la discussiun ei stada finida vegn concludiu cun biala tscharna da crear la secunda scola reala e cun quella levgiar la scola primara cun trer tier la 8avla classa dalla scola primara a Sedrun.

02-10-1949 La taxa per ils scolars dallas scolas realas vegn fixada per ils indigens 40.- frs e per ils jasters ord vischnaunca 80.- frs. ad onn.

05-03-1950 Prelegia signur president ina iniziativa suttascretta da 53 vischins, encunter il conclus da vischnaunca dils 2 d'october 1949 concernent alzament dallas taxas dils scoalrs reals. Signur president arva la discussiun dalla qualla ei vegn fatg liung diever pro e contra, principalmein vegn fatg valer da star dallas ordinaziuns cantunalas las quallas prevedien ina taxa da frs. 30.- per ils indigens e frs. 45.- per jasters, era vegnessi il cantun a dar raschun per quellas taxas en cass da recuors. Sin proposiziun da signur president vegn fatg igl emprem ina tscherna da rumper il conclus prius ils 2 d'october 1949. Per rumper quella drova ei duas tiarzas dils votants. Il conclus vegn ruts cun grond pli da duas tiarzas. Tras secunda tscherna concluda la radunonza da fixar ina taxa da frs. 30.- per ils indigens e frs. 45.- per jasters.

12-11-1950 Reponderar sche la vischnaunca vegness buca ora meglier da scaldar ils locals da scola cun forza electrica.

La casa da scola a Camischolas empruar da finanziar cun vender pastiras.

03-12-1950 Als cussegliers da scola vegn concludiu dad indemnisar cun lavur cumina mo per ina gada visitar las scolas. Per las ulteriuras visetas, nua che mintga cusseglier ha da visitar mo las scolas da siu vischinadi, vegn concludiu da dar negina lavur cumina.

28-01-1951. Vegn purtau avon alla radunonza la reconstrucziun ed engrondaziun dalla casa da scola Camischolas. Tras signur president vegn dau sclariment dil plan per engrondaziun dalla casa vedra fatgs tier signur lennari Vigeli Beer. Signur Vigeli Beer presenta in plan per alzar la casa cumpriu en tuttas lavurs da 14'000.- frs. La discussiun vegn aviarta ed en la quala mintgin sto seperschuader ch'ils vischins han empau tema da prender a mauns e far pli gronds cuosts, el mument, ch'ei ha caschunau tons donns e destrucziuns tras lavinas en nosssa vischnaunca. Suenter haver giu tedlau giu ils differents meinis, vegn concludiu, sin proposiziun da signur vegl president Placi Jacomet, da aunc refierer per in onn igl engrondir quella scola.

24-06-1951 La proposiziun dil cussegl da scola per eventualmein schar ira en la scola da Cavorgia, caschuna liunga discussiun, ed ei vegn la finala concludiu da star sco tochen da cheu da dar vinavon la scola a Cavorgia.

11-05-1952. Renovaziun ed engrondaziun casa da scola Camischolas.

a) Orientescha signur president sur dils plans e cuosts da signur Vigeli Beer fatgs per engrondir la existenta casa da scola a Camischolas.

b) Sur dils plans e cuosts tarmess tier dil departement da baghegiar cantunal, per engrondir la casa a Camischolas, ni eventualmein baghegiar la scola reala e quellas da Sedrun denter Camischolas e Sedrun sin sulom niev.

Suenter in clar e detagliu sclariment, arva signur president la discussiun, dalla quala ei vegn fatg diever. Ils signurs Valier Giachen Martin e Soliva Battesta tschentan la proposiziun da schar mo ina scola reala per ils buobs e crear ina scola per il tenercasa per las mattatschas.

Signur scrinari Vigeli Beer motivescha da calar cun il cuntschergnar il veder e far quei ch'ins sto far da niev ed endretg. Suenter che la discussiun ei stada alla fin e la radunonza era arrivada tier negin resultat, vegn sin proposiziun ord il miez concludiu dad aunc ina gada radunar la cumissiun gronda sinaquei che quella sappi preparar ina sligiazun e purtar quella sin la proxima radunonza da vischnaunca.

25-05-1952. Sco secunda principala tractanda dalla hodierna radunonza, ei il baghegiar la casa per la scola reala a Camischolas.

a) Vegn prelegiu il conclus e la proposiziun dalla cumissiun gronda.

b) Dat signur president cuortamein orientaziun sur las ideas e meinis che ein curri ella cumissiun

gronda.

Suenter vegn aviert la discussiun, dalla quala numerus oraturs fan diever ed ord la quala ils meinis dad entscheiver cun far in fondo per baghegiar nossas scolas ei ualti generals. Suenter che la discussiun ei stada alla fin, vegn tras tscharna unanimamein concludiu dad immediat entscheiver a far in fondo da baghegiar nossas scolas, per lura, cura che quel lubescha baghegiar nossas scolas sco ei semuossa il basegns.

Danunder prender las entradas per quei fondo vegn sin la hodierna radunonza buca concludiu. Bein eligiu ina cumissiun che ha da studegiar e preparar las entradas per quei fondo, en quella cumissiun vegnan eligi ils signurs revisurs da quen, consistenta ord scoalst Toni Hendry, Luis Cavegn e Benedetg Valier, dapli signur derschader Alfons Berther e Luis Hendry.

07-12-1952 Proposiziun dalla cumissiun per in fondo da scola da vischnaunca:

La cumissiun stada eligida dalla vischnaunca ils 25 da matg 1952 fa alla radunonza da vischnaunca las sequentas propostas:

- a.) Tuts ils fondos da scola existents en vischnaunca ils quals fan la summa da frs. 65000.-
- b.) Il rest per far in fondo da frs. 10'000.- ein da prender ord la contribuziun che la vischnaunca ha obteniu per ils donns da lavinas.
- c.) Quella summa da 10'000.- frs. duei restar en cassa da vischnaunca e vegnir figurada en la passiva dalla vischnaunca cun 4%. Il tscheins ei mintgamai da metter vitier il capital.

Las propostas dalla cumissiun vegnan messas en discussiun. Davart dalla suprastanza vegn fatg la proposiziun d'in tscheins da 3 ¼ % enstagl 4%. Suenter pintga discussiun vegn tras tscharna concludiu d'approbar las propostas dalla cumissiun cun midar il tscheins da 4% sin 3 ¼ %. Aschia che la vischnaunca ha da metter mintga onn il tscheins da 10'000.- frs, a 3 ¼ % vitier il fondo da scola.

26-07-1953 Il crear ina nova partiziun da scola da lavur manila a Sedrun vegn entras tscharna refusada.

14-03-1954 Crear ina quarta scola da lavur manila a Sedrun. Signur president prelegia in scriver dils 27 d'october 1953 dalla inspectura, venerebla sora Rüttimann, ella qualla ella declara che la quarta scola seigi gia creada. Suenter vegn la caussa messa en discussiun, la quala ei fetg viva ed interessanta. Generalmein vegn ei sevilau sin la moda ch'ei vegnida duvrada per crear tala scola. Igl ira a collectar per financiar ella entras sora Rüttimann, vegn considerau per beffa visavi nossa vischnaunca. Plirs babs da 3 e 4 scolaras fan era attents ch'ei fussi pli da recumandar igl emprender da cuntschar etc. che da far ton pez, sco quei ch'ei vegni plitost cumandau da praticar. Cun ina fetg minima tscharna vegn la scola prida si, denton mo lu, cura ch'il diember survarga 25 scolaras.

16-05-1954 Per scolaras che frequentan igl atun gl'examen d'admissiun per la scola reala e frequentan aber buca tala senza raschun sufficiente, vegn tenor proposiziun dil cussegl da scola mess si ina taxa da frs. 20.-.

22-01-1956. Sco quarta tractanda ha signur president da metter avon ina buca meins impurtonta caussa, numnadamein quella da reconstruir, baghegiar novas casa da scola a Sedrun e Rueras. Vid quellas damondas han ins patertgau gia avon onns, mo adina refretg per tema dil financiar. Oz entras l'explotaziun dalla auas quantan ins haver ord quellas entradas annualas che lubeschan da financiar e baghegiar novas casas da scola tenor basegns, senza stuer engraviar ils vischins. Il president prelegia ina brev digl inspectur e dil cussegl da scola Tujetsch. Omisduas instanzas insinueschan seriusamein la vischnaunca da patertgar e dad el proxim temps prender a mauns la reconstrucziun, respectiv il baghegiar novas a Sedrun e Rueras. ... Scolast Tumaisch Venzin s'exprima en in pli liung exposé dalla necessitad da reconstruir casas da scola e da sche pusseivel

tschentar quell'as en loghens sulegriv. Mo era en ils locals da scola sco tals munglassi il sulegr dalla carezia sclari.

Era ils auters votums, genau Cristian Berther, ils cussegliers da scola Giusep Monn-Flepp e Giachen Martin Valier, genau Benedetg Deflorin e Benedetg Valier recamondan a raschun dalla necessitad e dalla prevedida megliera situaziun finanziara dalla vischnaunca da el proxim temps reconstruir, respectiv baghegiar scol'as novas a Sedrun e Rueras. Principalmein a Rueras seigi grond basegns. Era signur derschader Alfons Berther ei dalla medema idea. Gia avon entgins onns hagien ins entschiet a tschentar in fondo per quei intent. Quel vegni denton entochen oz buca ad esser sviluppau fetg e munti probabel buca sin in grond capital.

Signur Baseli Monn recamonda che cura che quell'as casa da scola vegnien baghegiadas metter buns survigiladers dallas lavurs.

Signur genau Teofil Schmid anfla ch'ei seigi per quella damonda necessari dad eleger ina cumissiun che studegia e ponderescha quella causa sco era co e nua ins vegli baghegiar talas e rapportar surlunder alla vischnaunca. La vischnaunca va d'accord cun quella proposiziun e vegn eligi per quei intent ils suandonts:

1. La suprazion communal
2. Ils commembers dil cussegl da scola cun aunc trer tier ils signurs derschader Alfons Berther, Luis Hendry, capo-lingia e scolast Tumasich Venzin.

23-09-1956. Il president Placi Jacomet dat rapport sur dil luvrar dalla cumissiun stada eligida en causa baghegiar scol'as novas a Sedrun e Rueras. Sin giavisch dalla cumissiun seigi ils 23 d'avrel 1956 signur cusseglier guvernativ Theus, schef dil departement d'educaziun cantunal e signur inschigner da baghegiar cantunal Lorenz cun signur inspectur da scola Bundi stai sils plazs preparai per ils suloms da scol'as per dar giu lur pareris. Tenor lur rapport en scret seigi il sulom a Rueras adattaus. Quel a Sedrun recamondan els sin la squadra Dulezi.

Sin quei pareri vegn ina delegaziun tarmessa a Cuera tier monsignur uestg per secunvegnir cul Dulezi. Mo nuidis vegn monsignur suenter a lur giavisch e dat il consentiment da ceder giu 70'000 m² dil Dulezi per 10.- frs. il m² ni 70'000.- frs. Quei ei stau secunvegniu mo a bucca. Tenor rapport en scret pretenda el lu pli tard minimum 80'000.- frs. per quels 70'000 m². Il sulom a Rueras ei il frust da vieua Onna Maria Caduff viasi Las Sorts. Mesira circa 520 fests. Per quei marcau stattan treis variantas avon maun. Recumandau dalla cumissiun vegn varianta 3 nua ch'il frust cuosta 40.- frs il fest.

Ils vischins da Rueras pretendan entras ina iniziativa suttascretta da 64 vischins, che la scola reala vegni a restar sco entochen ussa a Camischolas. En ina brev da s'exculpaziun per la radunonza dalla cumissiun dils 17 d.q. recamonda il president dil cussegl da scola, sur Schuler, ina a Rueras.

Cun quei ei il rapport da signur president alla fin, ed el arva la discussiun en causa, la quala ei fetg viva. Buca ils suloms dattan la gronda discussiun, mobein las scol'as realas. Plis signurs sustegnan l'iniziativa da Rueras. Era signur Felici Schmid sustegn tala, cun la moziun ch'il dretg sulom per la scola inferiura da Sedrun fussi sut la scola vedra, ed era fussi ei da studegiar da lu far ord la scola vedra cul temps ina casa per glied veglia.

Signur Francestg Berther anfla la causa buca aunc madira e propona da per oz referer quella tractanda. La tscharna decida denton da tractar oz vinavon ella.

Primarmein vegn il sulom per la scola a Rueras tractaus. Havend varianta 3 aunc l'annexa che di, ch'il vegl proprietari hagi vianvon il dretg da segar giu gratuit il regress entuorn scola, vegn quei strihau ed igl entir frust vegn entras tscharna cumpraus per 40.- frs. il fest.

Il tractar vinavon la causa scola reala vegn concludiu dad ad interim referer.

21-10-1956. Passan ins tier la davosa, denton delicata tractanda, il secunvegnir cun las scol'as realas. Per orientaziun prelegia signur president la risposta dil departement d'educaziun cantunal, il qual sclarescha giu davart il subsidi. Tal per baghegiar vegn ei dau sche las scol'as realas vegnan omisduas baghegiadas ensemen a Sedrun ni a Camischolas. Per ina a Sedrun e l'otra enzanua

auter vegn dau negin subsidi. Il subsidi per ils scolasts denton vegn daus nua ch'ellas vegnan. Dapli prelegia el la proposiziun dils vischins da Camischolas, ils quals ein per tener la scola reala leu. Era ils vischins da Sedrun admettan lur conclus en scret e pretendan las scolas realas en in bloc a Sedrun. Vegness ei denton mo ina a Sedrun, sche pretendan els ch'ei vegni igl emprem sclariu giu nua ella vegni, e ch'ei vegni priu si avon che decider nua, ina calculaziun dils cuosts per tuttas scolas novas.

Finidas quellas prelecziuns vegn aviart la discussiun en caussa. Signur president exprima ch'el mantegni siu emprem meini ed economicamein sco finanziamein audien las scolas a Mira. Gerou Toni Hitz dat sclariment sur dil conclus dils vischins da Rueras, nua ch'els han concludiu da mantener la scola a Camischolas. Fuss quei buca il cass, sche giavischassen els ina a Rueras. Ils signurs Tumaisch Schmid e Christian. Berther, anflan era che igl adattau plaz seigi a Camischolas. Signur scoalst Tumaisch Venzin ei per la scola a Mira e propona da refierer per saver vegnir suenter allas proposiziuns dils vischins da Sedrun.

Entras tscharna vegn concludiu da refierer per ponderaziun dil sulom e dils cuosts.

09-12-1956. Signur president orientescha la radunonza sur dil curriu e passau en caussa scolast novas. Sco stau schau sura seigi el semess en contractivas cugl inschigner cantunal Lorenz, per schar far in plan e calcul provisoric, il qual seigi momentan aber buca caussa pusseviva. Era la cumissiun per sulom a Camischolas hagi entochen oz aunc giu pauc success. La caussa vegn messa en discussiun, principalmein schebein ins vegli tractar oz vinavon e tgei. La discussiun tala ualti alla lunga e croda da tuttas sorts proposiziuns. Tgi da decider oz nua las scolas realas vegnien, auters da decider mo schebein ins vegli baghegiar ellas sut in tetg ed auters da concluder da far vinavon cun quella a Rueras. Il menar vinavon il baghegiar tala vegn dau la plenipotenza alla cumissiun, aschi gleiti sco ella hagi enta maun il pareri dils vischins da Rueras davart las localitads.

14-04-1957. Passan ins tier la principala tractanda, il project per la scola nova a Rueras.

Essend ils plans exponi, sclarescha signur president els detagliadamein, sco era tals cuosts ed il secunvegnir cun architect Maissen.

La scola persula custass	308'100.- frs.
La sala cun scoletta	132'500.- frs.
Il ruglar ora il plaz da giug	11'500.- frs.
Total tenor project	452'700.- frs.

En sura summa ei il sulom, sco il mobigliar las stanzas da scola e sala buca cumpriu.

Giud sura summa mass aunc il subsidi giu, circa 70'000.- frs. sco era 6 – 7000.- frs. sco entelgiu honorar architect. Arvend la discussiun crodan da tuttas sorts meinis e proposiziuns. Gerou Toni Hitz exprima il conclus dils vischins da Rueras. Signur gerou cassier declara empau ils cuosts e vegn sin l'idea che la scola vegni aunc adina sin 500'000.- frs.

A signur Clemens Berther cuntenta igl agir dalla cumissiun buca diltut. Bien fussi ei stau d'eleger duas cumissiuns per quei intent, aschia ch'ellas havessien saviu paregliar lur conclus ina cun l'otra. Era il buca trer en informaziuns tier auters architects e star mo tier in, plai buca ad el. Da quella opiniun ein era aunc auters signurs. Signur Benedetg Valier fa valer che la sala seigi memia gronda en quella dimensiun e tschenta la proposiziun da far ella en ina dimensiun da silpli 100 m². Il baghetg per la scoletta seigi da schar naven e persuerter far ils locals per ils teatrists sut la sala en, denton mantener il subsidi. Dapli propona el da sclarir giu schebein ins vegli star tier igl architect Maissen ni eleger in auter. La proposta d'eleger in auter architect vegn sustenida da pliras varts, aschia era da signur Gaudenz Loretz, il qual declara publicamein ch'ils cuosts che architect Maissen hagi giu entochen ussa per tal project, sorprendi el.

La proposta da far la sala pli pintga e schar naven la scoletta vegn sustenida da signur Sigisbert Giossi.

Signur Baseli Monn anfla che la sala audi sut las scolast en. Era plai igl architect mo empau ad el, manegiond che mo la cumissiun hagi gronda simpatia per tal.

Signur Leci Antoni Cavegn propona da aunc refierer quella tractanda per pli madira reponderaziun. Da pliras varts vegn la proposiziun dalla cumissiun era sustenida. Per vegnir alla fin vegn passau tier la votaziun. L'emprema tscharna vegn fatga sin la proposiziun dalla cumissiun e cun la medema tscharna era eligiu igl architect signur Venanzi Maissen. Secund il decider da quella tscharna vegn votau giu sin las ulteriuras proposiziuns fatgas. La tscharna decida dad approbar il project e baghegiar tenor tal, senza schar curdar il subsidi ed aschia ei era igl architect eligius. Tenor questa approbaziun crodan las ulteriuras proposiziuns e signur president declara la radunonza per serrada.

12-05-1957 Prelecziun dil protocol anteriur, sin il qual signur Benedetg Valier fa valer che sia proposiziun fatga sin l'anteriura radunonza da vischnaunca seigi buca vegnida risguardada. Signur Tumaisch Cavegn-Deflorin sclarescha igl intent dalla iniziativa, manegiond che il bagegiar aschia vegni memia car, igl architect cuntenti buca e la cumissiun hagi gia schon rut il conclus, vulend empruar cun architect Maissen da far scursanir la sala. Muort tala raschun seigi il protocol nunapprobabels. Savend denton negin far encunter al verbal dil potocol vegn tal approbaus.

12-05-1957 Passan ins tier la reponderaziun dil conclus prius sin l'anteriura radunonza da vischnaunva davart la scola nova da Rueras. Primarmein prelegia signur president l'iniziativa per quella reponderaziun, la quala ha il sufficient diember da suttascripziuns. Tenor uorden da vischnaunca drova ei 2/3 dils votans per rumper in conclus. Essend proposiziuns per scrutini e da votar cun maun liber, vegn votau giu e la tscharna decida cun scrutini. Sco dumbravuschs vegnan eligi ils signiurs scolast Tonoï Hendry, Bruno Soliva e Sigisbert Giossi. Aunc inaga sclarescha signur president il ritus dil scrutini. Tgi ch'ei per rumper il conclus scrivi gie e tgi per mantener el, na. Ils dumbravuschs annunzian il suadont resultat dil scrutini: Total votants 222; gie 135 e na 85; 1 nunvaleivel ed 1 vit. 2/3 fagess 148 vuschs, aschia ch'il scrutini decida da buca rumper il conclus.

10-06-1957. Dat signur president ina orientaziun sur dil project casa da scola Rueras, nua ei glei previu da sminuir la sala per 1 meter sil maun liung, denton mo sch'il subsidi mondi buca a piarder e tuts ils vischins seigien cuntents. Damai che negin fa giudlunder opposiziun ei tala causa acceptada.

20-10-1957. Davart la moziun dil baghegiar scolas sclarescha signur president il semover d'entochen ussa. Ils plans en detagl per la scola da Rueras seigien tarmess en alla regenza per la damonda da subsidi. Ils schar far ina calculaziun dils cuosts per las ulteriuras scolas seigi dau sura. En num dalla cumissiun engrazia signur Benedetg Valier per l'orientaziun.

20-04-1958. Essend ils plans definitivs dalla scola nova da Rueras exponi en sala, dat signur president giudlunder sclariment, sco era dils cuosts da tala. Cun schar naven la scoletta e differentas caussas ei vegniu spargnau en 60'600.- frs. per mantener il subsidi, principalmein dalla sala e 3% alzament dils cuosts eisi carschius per 26'300.- frs., aschia ch'ei stat oz avon maun in project da 418'400.- frs giu dil qual ei mass aunc il subsidi da 60'000.- frs. Arvend signur president la discussiun, fa gerau Toni Hitz menziun dil schar curdar la scoletta, sperond che la vischnaunca vegni in di encunter als da Rueras sin ina moda ni l'autra sch'ei semuossa in di in basegns per ina tala.

La tscharna decida da baghegiar tenor project.

27-07-1958 Primarmein orientescha signur president la radunonza da vischnaunca sur dil secunvegner en curret cun igl institut de segirada Suva per arver in credit da 418'000.- frs. per financiar la nova scola da Rueras. Cun unanima tscharna approbescha la vischnaunca la concessiun d'arver quei credit tier sura numnau institut, aschi favoreivel sco pusseivel.

12-04-1959. Signur president orientescha la vischnaunca sur dils projects da scola presentai da signur architect Maissen per Sedrun e Camischolas.

En disposiziun stattan 5 variantas. La scola reala a Camischolas custass 275'000.- frs. La scola primara a Sedrun 940'500.- frs. La scola reala e primara ensemen 1'171'500.- frs.

Havend orientau il sura, exprima signur president era il meini dalla cumissiun, la quala stetti en fetg per baghegiar la scola a Mira sur il stradun e la sala dapersei.

La discussiun tila fetg alla liunga ed ei per part fetg interessanta. Generalmein vegn il meini dalla cumissiun sustenius ed ei vegn concludiu da tractar sin ina proxima radunonza da vischnaunca, nua ch'ei dueigi vegnir fixau definitiv il plaz.

19-04-1959 damai che las 3 scolas primaras ein a Sedrun surcargadas e vegnend sin igl avegnir aunc mender, basegna ei crear per leu aunc ina quarta scola. Mender stat ei cul local. Il ludeivel cussegl da scola e la suprastanza han ponderau la caussa e proponan alla vischnaunca da metter ina scola reala a Rueras, essend leu plaz e l'otra a Camischolas. Aschia vegness in local a Sedrun libers per la quarta scola. Concludiu vegn ei da crear la 4. scola e plazzar ella sco sura menziunau.

14-06-1959. Sulom casa nova da scola Sedrun. La suprastanza sa presentar duas variantas da sulom. Ina dadens casa da Curschellas, Mira e l'otra sur la resgia da Heinric Schmid. Per sedecider vegn scrutinau. Sco dumbravuschs vegnan eligi: signur president Placi Jacomet, gerau Toni Hitz, Baseli Huonder, Sigisbert Giossi e Gaudenz Cavegn. Resultat dil scrutini: Dau giu 202 vuschs. Dadora 116 vuschs, dadens 86 vuschs. Aschia decida il pli da baghegiar la scola sur la resgia da Heinric Schmid.

28-06-1959 Credit per mobiliar casa da scola Rueras. Essend il mobiliar la casa da scola buca cumpriu en il calcul da prezi, damonda la suprastanza in credit da circa 12'000.- frs. il qual vegn dalla vischnaunca concedius.

28-06-1959 En la cumissiun per baghegiar casa da scola e sala a Sedrun vegn proponiu ed eligi. Ord la suprastanza communal: signur president Chrsitian Berther, vicepresidente Gion Crisost Caduff. Plinavon: signur Flurin Caduff, Alfred Decurtins, Battesta Vinzens e Vigeli Beer scrinari.

26-07-1959 Damonda dalla KVR per crear ina nova scola per ils affons tudestgs. La vischnaunca va d'accord cun quella damonda e conceda la scola cun in cuoz da 28 jamnas sco las nossas.

26-07-1959 Per las preparativas dall'erecziun dalla scola nova das Sedrun vegn dau alla cumissiun il dretrg da far ils necessaris cuosts.

06-09-1959. Sulom sala da gimnastica Sedrun. Presentau vegnan treis variantas da sulom. Ina Drun, l'otra Dulezi e la tiarza Gonda, plaz casa da scola nova. Suententer entgina discussiun decida la tscherna da desister dil plaz sin Gonda nua che la casa da scola vegn baghegiada e refierer la damonda nua baghegiar sin pli tard per ponderaziun.

06-12-1959. Essend il sulom cumpraus per la nova casa da scola Sedrun buca sufficientes damonda la suprastanza per la cumpetenza d'astgar cumprar giu aunc circa 400 festes. Entras tscherna dat la radunonza da vischnaunca alla suprastanza e cumissiun la cumpetenza da cumprar ils 400 festes dumandai, sco era aunc ulteriur spazi per quei intent sch'ei fa basegns.

06-12-1959 Entras signur cauvitg per ils vischins da Rueras, l'uniun dramatica, ed ils giuvens da Rueras vegn dunmadau da mobiliar las sala da gimnastica. Quella damonda sveglia negina opposiziun e vegn dalla radunonza da vischnaunca approbada.

17-01-1960. Signur president dat entgin sclariment sur ils cuosts per casa da scola Sedrun. Cumpriu sulom, mobigliar, vias ect. possi quella vegnir sin circa 1 ½ milliun. Signur inschigner Merz declara aunc inaga tuts models e recamonda, sco era la suprastanza e cumissiun d'approbar il project nr. 12321. Dalla discussiun fan plirs vischins part cun differentas objecziuns. La suprastanza cun la cumissiun proponan ultra dil sura project aunc alla radunonza da vischnaunca in credit dad 1 ½ milliun. Signur Clemens Berther fa la proposta da creditar mo 1 milliun. Ins passa alla tscherna che decida per project 12321 e da dar in credit dad 1.5 milliuns. Damai ch'ils nums dils architects dils differentes plans ein secrets, vegn la brev cun la numera 12321 aviarta e prelegiu il cuntegn. Cheu seresulta ch'il plan e model dalla numnada numera appartegn a signur architect Carl Beer, Turitg.

09-05-1960. Sulom sala da gimnastica Sedrun. Suenter in detagliau sclariment entras signur president vegn il conclus dils 6 da settember 1959, che plaيدا da buca baghegiar la sala sin il plaz dalla scola nova ruts entras ina tscherna quasi unanima. Secunda tscherna decida da baghegiar sur il plaz scola cun schar sura alla suprastanza e cumissiun nua tschentar ella. Plinavon vegn era dau la libertad da sestuschar cun il sulom.

14-06-1960 Contribuziun als scolars da Selva e Tschamut. Revendissim signur caplon Schuler orientescha sur l'obligaziun che la vischnaunca hagi visavi ils scolars che han muort negina scola a Selva stuiu frequentar la scola a Rueras. Ad ina decisiun vegn abstrahau e surschau al cussegl da scola da studiar e purtar ina proposta.

10-07-1960. Orientaziun sur dil project da scola nova a Sedrun. Signur president Christian Berther orientescha sur il volumen dils baghetgs, sco era sura dalla calculaziun dils cuosts che muntan oz ina summa da 2'600'000.- frs.

La cumissiun da baghegiar en uniu cun la suprastanza communal proponan alla radunonza da vischnaunca dad approbar il project sco mess avon.

Signur architect Beer engrazia per la confidanza demussada ad el sco burgheis da Tujetsch e dat ina clara ed entelgeivla orientaziun digl entir project, sur dalla calculaziun dils cuosts ed era daco quels ein carschi aschia dapi il schaner vargau.

Per la cumissiun da baghegiar plaidan ils signurs Schmed Aluis e Decurtins Alfred ed omisdus recamondan dad approbar il project sco el ei mess avon denton spargnar ton sco pusseivel enten dar vi las lavurs. Plinavon fan part dalla discussiun ils signurs Deragisch Placi, gerau Francestg Berther, gerau Schmid Teofil, Valier Giachen Martin e president Placi Jacomet il qual recamonda da buca strihar enzatgei vid il project presentau.

Vegn tras tscherna concludiu dad approbar il project dalla scola nova a Sedrun sco mess avon, cun ina calculaziun dils cuosts da 2'600'000.- frs, e da conceder il necessari credit.

27-09-1960 Essend il diember dallas scolaras da lavur memia gronds vegn sin proposiziun dil cussegl da scola creau ina 5. avala scola a Sedrun e quei per aschi ditg sco la necessitad damonda.

27-09-1960 Contribuziun als scolas da Selva e Tschamut. Suenter ina orientaziun da sur caplon Schuler, vegn concludiu d'indemnizar scadin scolar primar da Selva e Tschamut, che vegnan a Rueras a scola cun la summa da frs. 500.-. Quei vala per aschi ditg ch'igl ei treis scolars. Sesminuescha il diember dueigi la vischnaunca tractar danovamein.

27-11-1960 Reglament scola Rueras. Signur president prelegia il reglament tschentaus si dalla suprastanza e tractaus dalla cumissiun gronda. Suenter entgina discussiun vegn tal approbaus cun pintgas midadas.

03-09-1961 Orientescha signur president sur las lavurs e cuosts vid ils baghetgs da scola Sedrun. Entochen oz seigi vegniu surdau lavurs per la summa da frs. 1'434'176.75. Per quellas lavurs seigien ton sco pusseivel nossas firmas e mistergners vegni risguardai.

03-12-1961 Sin damondas a scret ed a bucca tschenta la suprastanza da damonda sch'ei convegnessi da vender la casa da scola a Camischolas. Tenor proposta da plirs vischins vegn quella damonda refretga per dar caschun als vischins da Camischolas da prender posiziun e schar dar en lur raschuns.

11-02-1962 Nova lescha da scola. Signur president prelegia ina brev dil cussegl da scola en la quala ei cuntegn la proposiziun ch'il cussegl da scola ha priu davart la lescha. Da vart dalla vischnaunca stat liber da schar frequentar ils affons primars 8 onns da scola cun minimal 34 jamnas ni 9 onns cun 30 jamnas per onn. Il cussegl da scola propona en siu scriber 8 onns e quei ord sequents motivs. Per far 9 onns scola vegnessi ina classa dapli e drovi consequentamein era silmeins dus scolasts dapli. Dalla discussiun fan part signur Giusep Flury e signur gerau Francestg Berther, ils quals recamondan 9 onns da scola, ord raschun che cun 34 jamnas hagian ils purs negin ni pauc agid dils buobs temps d'atun per pertgirar ils tiers. Ei suonda la tscherna che decida per in grond pli da fixar nov onns da scola cun 30 jamnas.

11-02-1962 Scola manuala. Per scolars dallas davosas classas primaras ei la pusseivladad da menar en ina scola manuala, per quella vegn ei demussau ualti grond interess entras la discussiun. La radunonza da vischnaunca pren cheu sequent conclus: En principi menar en quella scola, sch'ei dat scolasts.

15-04-1962 Per il project da baghegiar ora la casa da scola veglia a Sedrun en casa da vacanzas, vegn dau il necessari credit e cumpetenzza alla suprastanza da schar far il plan surlunder. Il meini ei denton sche ins vul baghegiar duei ins far quei endretg. La caussa ei denton plitard da rapportar alla vischnaunca.

15-04-1962 Per la tractanda scola da tener casa per las mattatschas referescha sur caplon Schuler. El sclarescha giu la caussa sin tuttas varts e fa sin certs dubis che sefan valer pervia dalla frequenza da quella, la sinceraziun che tuttas buobas dalla scola secundara, primara e manuala hagian il dretg da frequentar quella scola e vegnien era pridas si en quella.

23-04-1962 Proposta dil cussegl da scola partenent entscheiver la scola reala la primavera enstagl igl atun. En caussa orientescha sur caplon Schuler, sco president dil cussegl da scola. La raschun principala per entscheiver la primavera seigi per saver finir igl onn da scola pli baul, il qual seigi d'avantatg per quels che vulan emprender mistregn. Principalmein seigi quei vegniu recumandau da signur inspectur da scola. Cun ina fleivla tscherna decida la radunonza da vischnunca d'entscheiver la scola reala la primavera.

28-06-1962 Per mobiliar la tribuna Sedrun dat la radunonza da vischnaunca in credit da 30'000.- frs. Las differentas uniuns, che fan diever dalla tribuna duegien vegnir restrengidas cun pagar alla vischnaunca in cert procent, il qual duegi vegnir fixaus entras la suprastanza en uniun cun ils presidents dallas uniuns.

28-06-1962 Signur president orientescha ch'ei vegni aviert ina clinica per tractament dils dents dils affons a Mustér. Alla vischnaunca stat sura da schar far diever da tal tractament cun separticipar cun in ton dils cuosts. Ord la discussiun vegn demussau interess en caussa ed ina tscherna decida da separticipar da quella acciun.

05-11-1962 Per il tractament dils affons concluda la radunonza da vischanunca da pagar ord cassa 50 % dils cuosts, denton max. 20.- frs.

20-01-1963 Suenter ina viva discussiun davart il far diever dalla halla, aula, cuschina ect. da nossas scolas vegn priu sequent conclus: Per scadin exercezi, radunonzas ect. vegn il fimar scumandaus. Ina excepziun sa vegnir fatga tier ina caschun d'in arranschament cun consumaziun. Plinavon vegn eligiun ina cumissiun che dueigi preparar e tschentar si in reglament per il diever da quels locals. En quella vegnan eligi: signur scolast Leci Jacomet, signur Benedetg Valier, signur Giusep Berther, signur Gion Giusep Flury e Gion Crisost Caduff.

19-05-1963 L'uniun drammatica Rueras damonda la vischnaunca ina contribuziun da 6 – 7000.- frs. per metter neu uorden sin tribuna a Rueras. Damai che la vischnaunca ha era mess neu la tribuna a Sedrun, conceda ella all'uniun drammatica la summa da frs. 7000.-.

28-04-1963 Vegn igl uorden per las novas casas da scola a Sedrun e Rueras prelegius. Suenter pintga discussiun vegn quel anflaus vengonzs dad ina approvaziun e prius si senza midadas.

08-09-1963 Entras in scriver dils vischins da Rueras fan els la damonda per in agid finanziel per asfaltar la via principala tral vitg sco il plaz avon scola. Damai che quei custass ina gronda summa propona la suprastanza dad ad interim far il plaz avon scola cun la via dil stradun cantunal tochen tier la scola. Ils cuosts per quella etappa ein circa 10'000.- frs. Tras tscherna vegn concludiu da far tala lavur sco proponiu.

08-09-1963 Signur president dil cussegl da scola sur S. Schuler tschenta la damonda en scret per financiar g'l'orden da scola ord cassa da vischnaunca. Damai che quei dess ina brava expensa per la vischnaunca vegn concludiu da per dar ina entschatta pagar tuts cudischs obligatoris da lungatg e quen e tut material per l'instrucziun intuitiva.

20-10-1963 Damonda dall'Uniun da trafiic per ina stanza en scola Dulezi per far ordlunder in biro. Per far la stanza adattada per in biro eis ei necessari da far entginas midadas vidlunder. Perquieui intent damonda la suprastanza in credit da 5000.- frs. il qual vegn tras tscherna concedius.

16-02-1964 Signur president orientescha sur interessents e dils motivs pertgei ei cunvegna da vender la scola a Sut Crestas. Era han ils vischins da Selva e Tschamut sin incarica da signur president priu posiziun en caussa ed ein cuntents da schar vender ella. La radunonza da vischanunca decida tras tscherna da vender ella.

22-11-1964 Entras il scriver dil president dil cussegl da scola per mauns dalla radunonza da vischnaunca propona il cussegl da scola da midar il temps da scola da 9 onns sin 8 onns cun 34 jamnas. Signur president Teofil Schmid e sognur Cristian Cavegn, commembers dil cussegl da scola motiveschan la situaziun e las relaziuns che han menau tier tala midada. Per risguard visavi ils purs che han il grond disavantatg duei l'enschatta dalla scola buca esser avon l'enschatta october. Signur Baseli Monn propona da prender ils affons da scola reala 3 jamnas sin emprova. Tala proposiziun sa vegnir prida encunter sco gaivisch e messa avon al cussegl da scola. Suenter viva discussiun pro e contra decida la radunonza da far 8 onns scola cun 34 jamnas.

21-02-1965 Il regulativ per las scolas dalla vischnaunca da Tujetsch, sebasond sin la lescha cantunala da scola dils 19-11-1963 prepara us dil cussegl ad scola vegn prelegius da signur president. Tier la discussiun vegn fatg las suandontas midadas ed amplificaziuns.
a.) mintga vischinadi duei sche pusseivel vegnir risguardaus cun in representant el cussegl da scola.

b.) La part 6, uorden disciplinar duei vegnir strihaus.

Tars tscharna vegn igl uorden da scola approbaus cun far las midaads necessarias.

27-06-1965 Entras in scriver dil president dil cussegl da scola, signur Victor Berther, per mauns dalla radunonza da vischnaunca fa il cussegl da scola la damonda da crear ina tiarza scola primara a Rueras. Signur president Teofil Schmid e signur Victor Berther orienteschan sur la situaziun e la necessitad da crear ina tiarza scola a Rueras e racamondan la sura damonda. Tras tscharna vegn concludiu da crear ina tiarza scola sco dumandau.

13-03-1966 Cun quei che la casa caplania sin Cadruvi vegn buca pli en damonda per nos augsegners propona la suprastonza da cumprar giu tal edifices per saver ulivar il quen da cultus ch'ei carschius considerabel entras il bageghiar la casa pervenda. Il schazetg ei vegnius fatgs dalla cumission uffiziala da schazetg e munta frs. 190'000.-. Tras tscharna vegn talla cumpra approbada.

11-04-1966 Signur genau Gion Crisost Caduff dat in clar e stupent rapport sur dil quen final dalla scola Sedrun. Gl'entir complex ha custau la summa da frs. 2'545'713.80. Da quei han ins retratg subsidi per frs. 257'496.-, che resta in cuost effectiv da frs. 2'288'257.80. El engrazia alla entira cumission, en spezial al president da quella, signur Cristian Berther ed a signur architect Beer, per tutta lavur e per il bien reussir da quei edifices. Oz ein omisdus vegni clamai tier l'armada gronda. Els ruaussien en pasch. Sco giu empermess da signur architect Beer, ein era ils artavels vegni suenter a siu giavisch e schenghegiu alla vischnaunca il prau cumprau entras el. Ultra da quei lai la famiglia dil defunct ereger quater maletgs che representan las stagiuns. Tala gesta cuosta la summa da frs. 30'236.-. Bien engraziament.

12-06-1966 Ils vischins da Rueras fan la damonda per ina stanza da scola per sia scoletta sco mobiliar tala per circa 30 participonts e surpender dalla vischnaunca ils cuosts da glisch e da scaldament. Signur Victor Berther, president dil cussegl da scola, fa attents sin las localitads da scola, sco era dil plaz che las colonias occupeschan. Tars tscharna vegn concediu sco dumandau cun surschar pertuccont localitad da secunvegnir cul cussegl da scola e la suprastonza dalla scoletta.

06-11-1966 La scola vedra a Rueras ei en in stan ualti schliet e va mintga onn en decadenza. La suprastonza propona per mauns dalla radunonza da vischnaunca da vender ella u baghegiar ora ella. Ils cuosts per metter la scola en in stan duvreivel per militer, eventual colonias munta tenor calculaziun circa 63'000.- frs. senza mobiliar. Dalla discussiun vegn fatg vivamein diever nua ch'il meini general ei per bageghiar ora ella. Signur genau Gion Crisost Caduff fa attents che tal edifices confineschi cun la casa caplania e racamonda da patertgar da bageghiar ora per colonias, per evitar caneras sper casa caplania. Signur Clemens Berther propona da scriver ora ella e schar far offerta. Tras tscharna vegn concludiu da baghegiar ora ella e dau il necessari credit leutier.

06-11-1966 Las scolettas da Sedrun e Rueras fan per mauns dalla radunonza da vischnaunca la damonda per in agid finanziel ella summa da 2000.- frs. per onn per scola. A tala damonda vegn tras tscharna dau suatientscha.

15-12-1968 Pli liunga discussiun dat quella tractanda che preveda da crear pil proxim onn da scola ina nova scola primara a Sedrun ed eventualmein schar ira en la tiarza scola primara a Rueras. Signur president metta avon la posiziun prida dalla suprastonza communal che sebase era sin in rapport digl inspectur da scola. Il president dil cussegl da scola signur Victor Berther dat in extendiu rapport, explicond il diember dils scoalrs a Sedrun e Rueras en scadina classa e sustegn sco president dil cussegl da scola il meini dalla suprastonza, denton sco bab da famiglia el vitg a Rueras eis el per mantener la 3. scola a Rueras. Ils vischins da Rueras che fan buca mo setedi part dalla

discussiu, mobein era presents en sala da vischanunca vulan mantener la scola a Rueras. Sut tscharna vegn ei concludiu:

- a) da crear pil proxim onn da scola ina nova scola primara a Sedrun
- b) da mantener la tiarza scola primara a Rueras.

02-03-1970 Signur president orientescha sur da differentas scolas, numnadamein ina scola da continuaziun, ina scola auxiliara ed ina scola pedagogica curativa. La scola da cuntinuaziun ei acceptada dil pievel ed aschia obligatoria.

Ils presidents communal da Cadi proponan e quei era per levgiar finanziamein scadina vischnaunca da menar la scola da cuntinuaziun regionalmein, pia per l'entira Cadi mo in atala scola, nua quella vegn ei oz aunc buca sclariu giu.

Partenet quella tractanda vegn priu ils suandonts conclus:

- a) da menar la scola da cuntinuaziun regionalmein, pia l'entira Cadi ensemen.
- b) Sco delegai da nossa vischanunca en quei cussegl da scola, che ha era da studegiar l'introducziun dalla duas autras scolas vegnan proponi ed eligi: signur Alexander loretz, actual president dil cussegl da scola e scoalst Stiafen Berther.

14-03-1971 Signur persident prelegia la damonda dallas uniuns dalla scoletta Sedrun e Rueras, che giavischan da crear ina tiarza scoletta a Sedrun, dumandond cul medem pass ina contribuziun pli aulta. Nies signur president ha priu contact cun la suprastanza da quellas scolettas e tenor la statistica avon maun ei la necessitad per ina supplementara scoletta a Sedrun dada. La damonda vegn aunc interpretada e recumandada dils presidents dallas scolattas a Sedrun ed a Rueras. Frequentar quellas scolas astgan mo ils affons, che han cumplenu il 4avel onn.

Sut tscharna vegn partenet quella tractanda concludiu:

- a) da crear ian secunda scoletta a Sedrun e quei en in local da nossa scola nova a Sedrun, aschilunsch che las localitads necessarias ein libras.
- b) la contribuziun annuala dalla vischnaunca a nossas treis scolettas vegn fixada sin 12'000.- frs. q.v.d 4000.- frs. per scoletta e duei valer aschiditg sco igl interess e la necessitad per quellas scolas ei avon maun.

30-10-1971 Pli liunga discussiu dattan ils apparats da televisiun per la scoola a Sedrun ed a Rueras. La suprastanza communal propona da cumprar dus apparats alv/ner essend ch'ei vegn purtau ella televisiun bunas emissiuns per l'instrucziun da nos affons. Ord il miez suondan differentas propostas, tgi propomna apparats en color ed auters ein encunter quels indrezs. La radunonza da vischnaunca decida sut tscharna da cumprar dus apparats da televisiun alv/ner per nossas scolas a Sedrun e Rueras.

15-12-1972 Ils 24 da settember 1972 ha il pievel grischun approbau ina revisiun parziala dalla lescha da scola. Il temps da scola ei fixaus sin 40 jamnas, las vischnaunca san denton reducir il temps da scola sin 37 jamnas. Plinavon setract'ei oz da fixar il cuoz dallas vacanzas da stad. Il cussegl da scola, suprastanza communal e l'uniun purila proponen 9 jamnas vacanzas la stad. Signur Sep Fidel Berther propona en num dall'uniun da mistergners 8 jamnas vacanzas; quella proposta vegn era sustenida da signur scolast Giusep Caduff.

En num da nos purs pren signur gerau Cristian Cavegn il plaid e supplichescha instantamein da sustener la proposta da 9 jamnas per cheutras segidart cul puresser che senta il pli fetg quella midada da scola.

Sut tscharna decida la radunonza da vischnaunca:

- a) temps da scola 40 jamnas
- b) temps da vacanzas durant la stad 8 jamnas
- c) Il parter en gl'ulteriur temps da vacanzas vegn schau sura al cussegl da scola.

02-02-1973 Il conclus prius sin la radunonza da vischnaunca dils 15-12-1972 partenent las vacanzas da stad per nossas scolas cun in cuoz dad 8 jamnas ha buca cuntentau il stan puril; quei fatg atesta l'iniziativa cheu avon maun cun 241 suttascripziuns valeivlas. Per tractar oz quella iniziativa sto g'emprem il conclus dalla davosa radunonza da vischnaunca vegnir suttamessa ad ina tscharna da reponderaziun. Per haver in resultat clar e sigir propona nies signur president da schar sentir il meini cun star sin peis.

Ferm 2/3 dils presents ein per reponderar quei conclus ed aschia sa l'iniziatoiva che propona 10 jamnas vacanzas la stad, gia oz vegnir tractada.

Ils purs per part accumpignai da sias dunnauns ein stedi a vischnaunca e laian sentir quei basegns, buca mo cun la preschientscha, mobein era cun ses numerus votums.

La suprastonza communal propona la via media, pia 9 jamnas vacanzas e l'uniun da nos mistergners, representada entras signur genau Sep Fidel Berther, propona era oz 8 jamnas vacanzas.

Era quella tscharna vegn fatga cun star sin peis. Da 156 presents che han votau, han 92 susteniu l'iniziativa; pia munta il cuoz dallas vacanzas duront la stad per nossas scolas 10 jamnas.

12-04-1973 Quella tractanda meina il vicepresidente, ei setracta gie, schebein la suprastonza va d'accord da conceder in supplement local a scolastas e scolasts. L'idea vegn da nies cussegl da scola e sustenida digl inspectur, proponend in supplement local ed annual da 5% dalla paga fundamentala.

La suprastonza communal sustegn medemamein quella idea, proponida da sura istanza ed ord il meiz suonda negina cunterproposta. Sut tscharna decida la radunonza da vischnaunca da conceder in supplement local a scoalstas e scoalsts che munta 5% dalla paga fundamentala e va en vigur cul proxim niev onn da scola e duei vegnir pagaus ora alla fin digl onn el senn d'ina gratificaziun.

12-04-1973 La suprastonza da nossa scoletta a Sedrun damonda in considerabel alzament dalla actuala contribuziun e quei da 8000.- frs sin 13'000.- frs. e quei per haver la pussevividad d'aunc financiar lur scoalstas cun risguardar la scoletta a Rueras, pia treis scolas, munta il susteniment finanziar per quellas scolas sin 19'500.- frs. La suprastonza communal ha tractau quella damonda e propona en quei connex da surprender las scolettas entras la vischnaunca e surschar la survigilanza al cussegl da scola cun forsa alzar il diember da quels cussegliers.

La contribuziun ch'ils geniturs han da pagar resta vinavon ed en quella direcziun fa la suprastonza communal sin fundament digl actual index la suandonta proposta:

1 affon ord ina famiglia paga 100.- frs. per onn

2 affons ord ina famiglia pagan 120.- frs per onn

3 affons ord ina famiglia pagan 150.- frs. per onn

Ils actuals presidents da nossas scolettas, signur Melchior Decasper e scolast Vinzens Pally sustegnan fermamein quella idea, denton giavischassen els aunca vinavon ina cumissiun separada per las scolettas.

Sut tscharna decida la radunonza da vischnaunca da prender las scolettas sut il menaschi communal. Co reorganisar e survigilar quei menaschi spetga la suprastonza communal ina proposta dil cussegl da scola e dallas suprastonzas dallas scolettas.

10-10-1973 Orientaziun: Per la tgira da dents per ils scolars tuatschins ei fatg in contract cun signur dr. Tuor a Mustér. Las spesas da controllas surpren la vischnaunca entiramein. Per il tractament dils dents surpren la vischnaunca 50% dils quens per tractament. Cass specials, sco sias, dents d'aur, protesas etc. crodan buca sut cass tractament e vegnan buca pagai. Valeivel sco onn d'emproma!

22-12-1973 Il regaulativ per las scolettas, il qual duei esser repartius als votants, vegn da signur president sclarius en general ed orientaus da singuls artechels che pertuccan il reglament.

Suprastonza e cussegl da vischnaunca recamondan l'approbaziun. Entras unanimam tscherna vegn il regulativ approbaus.

22-12-1973 Il cussegl da scola fa la damonda entras ina brev alla suprastonza, per crear ina secunda scola manuala. La damonda ei gia tractada dalla suprastonza e dil cussegl da vischnaunca e quellas duas instanzas recamondan da crear la secunda scola manuala. Signur president e gl'actuar orientesch anunc ina gada ils presents sur las raschuns ed arguments sur il actual e futur proceder.

Entras tscherna vegn la proposta acceptada unanimamein.

06-09-1974 Survetsch dentari per las scolas. Signur president sco era genau Tumaisch Monn orientesch sur la presenta situaziun dil contract cun dr. dentist Tuor. La proposta dil cussegl da vischnaunca e suprastonza ei da pagar 50% dils cuosts pil medi da dents, denton maximum 300.- frs. Tractament special sco protesas etc. ei buca cumpriu el manteniment da dents.

a) Tscherna per rumper conclus 10 d'october 1973 peglia il pli cun 2/3 dalla vuschs.

b) Tscherna decida da pagar 50% dils cuosts per manteniment dils dents, denton maximum 300.- frs. a tuts scolars dalla scola rurala digl 1. onn tochen e cun il 9avel onn da scola. Las controllas dils dents tier il meidi eligius pil survetsch dentari van sco tochen ussa 100% sin quen communal.

10-06-1977 Acquist da regress a Rueras e Sedrun. Rueras: Per realisar e haver access carrabel sil plaz avon scola nova, suenter ch'il tschaler da schurmetg ch'ei projectaus ei baghegius, basegna ei la cumpra da prau da signur Lucas Cavegn. Il cussegl da vischnaunca ch'ei orientaus detagliadamein sur la situaziun e project recamonda gl'acquist da quei terren. Mesira ca. 1000m², prezi egl importo da 6500.- frs. Sedrun: Il prau da Gion Michel Monn, sur scola a Sedrun, confinond cun gl'asil, vegn dalla suprastonza communal e dil cussegl da vischnaunca medemamein recumandaus da cumprar sco regress public. Omsiduas parcelas ei tenor plan zonal reservadas per stabiliments publics. En omsidus loghens va il restont da quels frusts vi al proprietari privat e resta ella zona da baghegiar. Il prau sper scola Sedrun mesira circa 1000 m² e cuosta 50'000.- frs. Cun la decisiun da cumprar entras la radunonza da vischnaunca, vegn era il necessari credit daus. Tscherna: Il salter Albert Cavegn fa las tschernas.

a) D'acquistar il prau a Rueras tenor orientaziun.

b) D'acquistar il terren sper scola a Sedrun tenor pareri.

Il salter constatescha unanimam approbaziun

02-12-1977 Prender decisiun concernent las casas da scola a Camischolas e Cavorgia. Sin stimulaziun da differents vischins che giavischan, che la vischnaunca interprenda enzatgei cun las casas da scola a Camischolas e Cavorgia, ha la suprastonza communal fatg venal las duas casas. Differents interessai han fatg offerta ed offeresch per la casa Camischolas 25 - 33'000.- frs. e per casa Cavorgia 5000 - 19'000.- frs. Per eruir tgei duei daventar cun las casas da scola ha scadina casada dils vischinadis Camischolas e Cavorgia obteniu in questunari nua ch'els han saviu exprimer lur meinis. Ils vischins da Cavorgia ein s'exprimi da salvar e mantener la casa da scola. Il meini dils vischins da Camischolas ei differents. Il cussegl da vischnaunca ha en sia radunonza proponiu da far giu la casa e sche pusseivel ereger in plaz da parcadi. Signur genau Vigeli Giossi constatescha che la disfatga dalla casa ed erecziun d'in parcadi stess en neginas relaziuns da cuost. Entras tscherna decida la radunonza da vischnaunca da salvar e mantener las casas da scola a Camischolas e Cavorgia e surschar alla suprastonza l'utilisaziun da quellas.

22-08-1980 Signur Vigeli Giossi, cau digl uffeci da baghegiar e dil manteniment dils bagehtgs, declara che la casa da scola veglia a Rueras, ussa casa da colonias, hagi adina puspei dau caschun da reclamaziuns ord la vischinonza. Cunzun per la casa pervenda munti igl albiert da giuvenils ina grevezia.

Cumparegliond cuosts per midadas vid las casas, plaz, regress, parcadis vischinonts, manegia el che la sligiaziun cun la casa Monn seigi cunvegnetta, era sch'el sco vischin da Rueras havessi beneventau in museum enta Rueras. La vsichnaunca havessi in'offerta che porschi la biala summa da 150'000.- frs. per la scola, aschia ch'ins astga cusseglar la vendita. Unanimamein vegn concludiu la vendita dalla scola veglia da Rueras cun la cundiziun ch'ella astgi dacheunaven buca vegnir utilisada sco casa da colonias.

24-03-1986 Sanaziun dalla scola a Sedrun. Entochen dapresent s'auda sulettamein in luvratori da scrinari tier il menaschi da scola. Quel ei integraus sut las stanzas da scola en e disturba l'instrucziun en scola. Sin giavisch da scolasts e dalla cumissiun da gestiun ha la suprastanza communal tschercau ina nova sligiaziun. Havend priu investa ellas vischnauncas vischinontas han ins anflau per necessari da far in niev luvratori da scrinaria, in luvratori da luvrar cun materials da metal sco era in niev local per l'instrucziun da chemia e fisica. Il local vegl vegness utilisaus sco biblioteca e sco ulteriur local d'exercezi per las uniuns. Il project ch'ei previus da baghegiar davos scola a Sedrun custass en total 440'000.- frs. En detagl cuosta il bagehtg 280'000.- frs., las mobillas 60'000.- frs., cundrezs spezials ed uaffens 1000'000.- frs.

Quella tractanda ei sepresentada sco fetg delicata e critica ed ha caschunau ina debatta da varga in'ura. Ei ha dau massa damondas, inaga tgei ei schabegi cun ils scolars da Rueras, lu sch'ins hagi scolasts che seigien habels d'instruir ils roms novs, tgi paghi ils cuosts, tgei classas fan diever da quels mieds.

Il vicepresidente sa dar ni intermediar sin tuttas damondas il necessari sclariment. Ils scolasts stoppien frequentar cuors. En principi fetschien tuts scolars diever da quels locals, denton els roms fisica e chemia vegnien mo ils scolars dallas classas superiuras instrui. Il mirar per glied adattada per quels roms ni schar s'instruir ils scolasts seigi causa d'organisar dil cussegl da scola. A Rueras sappien ins era preparar in local da zambergiar per ils scolars che van a scola en leu. Igl ei curdau plirs votums per part ualti vivs pro ed encunter. Cheu enzacons pro: Ella Cadi possedien las biaras vischnauncas gia quels indrezs e nus lein buca star anavos. Ei va gie per bien da nos affons. Quels san duvra quei ella veta futura.

Il vischin Vigeli Berther manegia ch'il project presentaus seigi memia luxerius. Ei dessi la pussevividad da dislocar la scrinaria, la fravia ect. El local existent sut la tribuna dalla sala da gimnastica en. Leu seigi ei a disposiziun in local da 244 m² surfatscha. Igl ulteriur local savess ins far ord l'actuala scrinaria. Tenor la statistica ei il catsch d'affons buca gronds egl avegnir ed ei vegni liber stanzas da scola. Ozildi lavurien ins bia cun glisch artificiala. Ils affons seigien silpli duas uras ad jamna en quels locals. Giu votum per quella proposta che vegn numnada el decuors dalla tractaziun, vegn per part aunc sustenius da pliras varts.

Vicepresidente Alfred Schmid rispunda ch'il plaz a disposiziun el local sut la tribuna en munti mo a 96 m². Igl ulteriur plaz seigi occupaus, aschia ch'ins savessi silpli metter suttetg la scrinaria en quei local.

Suenter la debatta stattan ils persents avon las suandontas propostas:

- l'alternativa da Vigeli Berther da refierer oz la tractanda e studegiar immediat ina nova varianta pli favoreivla e purtar avon per approbaziun al pievel cun la proxima caschun.
- la proposta dil cussegl da vischnaunca da preparar il project 1986, far las installaziuns 1987, endrizzar definitivamein 1987 cun prender ils cuosts el preventiv. (Quella votaziun era ida en emblidanza ed ins ha votau giu dad ella pér sut varia.)
- la proposta dalla suprastanza communal, da far il bagehetg grob la stad 1986, far las installaziuns 1987, endrizzar definitivamein, finir e surdar ei igl onn 1988.

Votaziun: emprema proposta 25 gies e 26 nas; secunda proposta 4 gie, ils ulteriurs na; tiarza proposta 33 gie, 11 na.

Aschia sei concludiu d'execuir la tiarza varianta proponida dalla suprastanza communal: execuir il project presentau per il credit da 440'000.- frs. en treis onns, numnadamein il baghetg grob 1986, las installaziuns 1987, igl endrizzament final e surdar 1988.

